


8. KATEKIZMI I HAJDELBURGUT

Origjina dhe historia e tij

Në shekullin XVI, Gjermania kishte shtatë elektorate të mëdha dhe disa shtete të vogla, të qeverisura nga një perandor. Guvernatorët e elektorateve, ose elektorët, duhej të zgjidhnin një perandor të ri. Kjo bazohej në marrëveshje, gjë që u jepte shumë liri shteteve individuale. Më me ndikim nga këto shtatë elektorate ishte ai i Falcit (Pfalz). Guvernatori i Falcit ishte gjithashtu perandori në detyrë në mungesë të perandorit.

Perandori Karli V (1519–1558) ishte një katolik roman i palëkundur. Për shkak të shumë protestave në Gjermani, në vitin 1555 ai u lejoi guvernatorëve të secilit rajon lirinë të zgjidhnin fenë e vet (*Paqja e Augsburgut*). Nga shtatë elektoratet, katër mbetën katolike-romane, dy u bënë luterane, dhe njëra në fillim u kthye në luterane e më vonë u reformua. Ky i fundit ishte Falcit. Kryeqyteti i saj ishte Hajdelbergu, një nga qytetet më të mëdha gjermane të kohës.

Më 31 tetor 1517, Martin Luteri publikoi 95 tezat në Vitenberg. Një vit më pas, Luteri pati një mosmarrëveshje me murgjit agustinianë në Hajdelberg. Që nga viti 1520, profesorët e Universitetit të Hajdelbergut filluan të mësonin dhe të predikonin nga parimet luterane. Disa guvernatorë të Falcit u bënë protestantë: Frederiku II (guvernator, 1546–1556); Othajnrhi (guvernator, 1556–1559); Frederiku III (guvernator, 1559–1576).



Guvernatori Othajnrh pa se kishat protestante kishin drejtues jo fort të trajnuar, kisha jo të rregullta, dhe fëmijë që kishin nevojë për mësimë katekizmi, ndërkohë që besëtytnitë dhe traditat romake ende ekzistonin në mes tyre. Ai vendosi që gjuha e mësuar në shkolla të mos ishte më latinishtja, por gjermanishtja, dhe se kurrikula duhej të përbëhej nga mësimi i leximit, i shkrimit dhe i katekizmit. Kështu lindi nevoja për një metodë të shëndoshë katekizmi.

Në vitin 1559, Frederiku III pasoi Othajnrhin. Në vitin e parë në detyrë, ai qe në kontakt me profesorin luteran Filip Melanktonin (Philipp Melanchthon) dhe teologun zvinglian Hajnrh Bulinger (Heinrich Bullinger). Teodor Beza, një aleat i afërt i Xhan Kalvinit, madje qëndroi në Hajdelberg. Këto kontakte kontribuuan që guvernatori të vlerësonte format e ndryshme të protestantizmit. Ai gradualisht përqafoi bindjen kalviniste, por ruajti marrëdhënie formale me teologët luteranë.

Kur Frederiku III u bë guvernator, pati një mosmarrëveshje të rëndësishme në Hajdelberg midis një profesori luteran dhe një dhjaku kalvinist rreth Darkës së Zotit. Guvernatori i pushoi nga puna që të dy për t'i dhënë fund debatit. Paqja u kthye. Në vend të tyre, Frederiku III caktoi dy profesorë reformatore të teologjisë në Universitetin e Hajdelbergut: i pari ishte Kaspar Oleviani, (1536–1587, predikues i gjykatës së Frederikut, i cili shpejt u bë drejtuesi i kishës kryesore, i dyti Zakaria Ursini (1534–1583). Ata do të ishin profesorë të teologjisë. Që të dy kishin studiuar për teologji në disa universitete protestante.

Guvernatori urdhëroi shkrimin e një katekizmi të ri nga këta profesorë të rinj. Oleviani ishte 26 vjeç, Ursini 28. Nxitësi i këtij katekizmi nuk ishin as profesorët, as shërbenjësit e kishës, por vetë guvernatori. Qëllimet e tij ishin: ofiqmbajtësit e kishës të zotëronin besimin e reformuar, anëtarët e kishës të kuptonin besimin e reformuar dhe të rinjtë të trajtoheshin në besimin e reformuar.

Teksti i tij

Zakaria Ursini njihet si autori kryesor i Katekizmit të Hajdelbergut. Kaspar Oleviani ka gjasa të ketë kontribuar në hartimin përfundimtar dhe tonin pastoral.

Autorët përdorën një shumëllojshmëri të gjerë të burimeve luterane dhe kalviniste:

- *Katekizmi i madh dhe i vogël* i Luterit (1529);
- *Rrëfimi i Augsburgut* i Luterit dhe Melanktonit (1530/1540);
- *Gutachten* e Melanktonit (1559), për Darkën e Zotit;
- *Katekizmi i Gjenevës* nga Kalvini (1542);
- *Rrëfim i shkurtër* i Bezës (1559);
- *Katekizmi e vogël* e Ursinit (1561/62);
- *Një themel i qëndrueshëm* i Olevianit (1563).



Zakaria Ursini



Kaspar Oleviani

Në përgatitjen e Katekizmit, Frederiku kërkoi dhe shqyrtoi sugjerimet, këshillat dhe bashkëpunimin e fakultetit teologjik, të disa pastorëve, si

dhe të disa besimtarëve të profesioneve të ndryshme në Hajdelberg. Katekizmi i Hajdelbergut u miratua nga Këshilli i kishave të Hajdelbergut, në janar të vitit 1563. Botimi i parë u publikua në gjuhën gjermane më 19 janar 1563, me një parathënie nga Frederiku III. Po në të njëjtin vit, libri pati botimin e dytë dhe të tretë në Hajdelberg në gjermanisht, secili me disa shtesa të vogla, si dhe me përkthimin në gjuhën latine. Botimi i katërt në gjuhën gjermane është tashmë një burim autoritar.

Në parathënien e librit, Frederiku III shkroi: "... përgatitja e një kursi përmbledhës udhëzimi ose katekizmi të fesë sonë të krishterë, sipas fjalës së Perëndisë." ... "sepse, nëse rinia jonë që në moshë të hershme udhëzohet dhe edukohet me zell në Fjalën e Perëndisë, edhe Zotit të gjithëpushtetshëm do t'i pëlqejë të na bekojë me reformimin e moralit publik dhe privat, dhe mirëqenie të përkohshme dhe të përvetshme."

Botimi i parë përmbante 128 Pyetje dhe Përgjigje (P&P), të cilat nuk ishin ende të numëruara. Tekstet biblike provë (mbi 700) ishin të përfshira, por pa numrat e vargjeve. Në botimin e dytë u shtuan: P&P 35 (Zoti Jezus u ngjiz nga Fryma e Shenjtë dhe lindi nga virgjëresha Mari), P&P 80 (mesha papale). Në botimin e tretë, P&P 80 u zgjerua si reagim ndaj Këshillit të Trentit dhe u organizua në 52 Ditët e Zotit, në mënyrë që një pjesë e Katekizmit t'u shpjegohej kongregacioneve çdo të diel të vitit. Struktura e Katekizmit të Hajdelbergut është si më poshtë:

- Parathënia nga Frederiku III (shpesh e papërfshirë në versionet moderne);
- Dita e Zotit, 1: Prezantim i temës kryesore: i vetmi ngushëllim, dhe tri gjëra (dijenja e trefishtë) të domosdoshme për të gëzuar të mirën dhe sigurinë në jetë dhe në vdekje;
- Pjesa I (Dita e Zotit, 2–4, P&P 3–11): Mjerimi i njeriut (dijenja për mëkatin vjen nga Ligji i Perëndisë; origjina e mëkatit dhe pasojat e tij);
- Pjesa II (Dita e Zotit, 5–31, P&P 12–85): Shpëtimi në Krishtin (nevoja për një Ndërmjetës dhe kërkesat e Tij, karakteri i besimit të vërtetë, një shpjegim i Besores së Apostujve, sakramentet);
- Pjesa III (Dita e Zotit, 32–52, P&P 86–129): Mirënjohja ndaj Perëndisë (nevoja për veprat e mira, kthimi në besim, një shpjegim i Dhjetë Urdhërimeve, nevoja për predikimin e ligjit, një shpjegim i Lutjes së Zotit).

Përdorimi dhe rëndësia e tij

Radha karakteristike e Katekizmit "mjerimi, shpëtimi, mirënjohja" rrjedh nga Letra drejtuar Romakëve, Psalmi 50:15, Psalmi 116, Psalmi 130 etj. Ato nuk duhen kuptuar si "ndalesa" të njëpasnjëshme, por si përvoja përsëritëse gjatë gjithë jetës së të krishterëve të vërtetë. Përvoja e kësaj njohjeje të trefishtë nevojitet për pjesëmarrjen në "të vetmin ngushëllim", shprehja e fshehur në pyetjen e parë të famshme "Cili është i vetmi ngushëllimi yt në jetë dhe në vdekje?". Shpjegimi vjen me përgjigjen e saj qetësuese. Me motivin e tij ngushëllues, stilin e ngrohtë personal dhe theksin në përdorimin praktik të tij, Katekizmi i Hajdelbergut fitoi shpejt dashurinë e popullit të Perëndisë, siç është e qartë nga fakti se që në vitin e tij të botimit, ekzistonin shumë përkthime dhe botime. Shumë shpejt, mbledhjet kishtare i udhëzuan pastorët e tyre ta përdornin Katekizmin për të formuar predikimet e tyre, si dhe për të predikuar prej tij.

Në vitin 1566, Frederiku III duhej ta mbronte Katekizmin e Hajdelbergut përpara Perandorit.

Përkushtimi dhe argumentet e tij u bënë përshtypje shumë prej kundërshtarëve të tij.

Frederiku kishte për qëllim të botonte një përmbledhje të besimit biblik që të ishte ekumenike, si një urë mes bindjeve luterane dhe kalviniste. Në të vërtetë, ka ndikime të qarta luterane (p.sh. rendi ligj – Ungjill). Megjithatë, në momente vendimtare, Katekizmi është kalvinist (p.sh. në largimin e Krishtit për në qiell, dhe në Darkën e Zotit). Kisha Luterane, veçanërisht dega konservatore të saj, e kundërshtoi Katekizmin e Hajdelbergut.

Kisha Katolike-Romane e sulmoi ashpër Katekizmin e Hajdelbergut në Këshillin e Trentit (një këshill katolik roman për trajtimin e reformacionit, që u mbajt nga viti 1545 deri në vitin 1564 në Trento dhe Bolonjë. Në përgjigje të opozitës katolike-romane, futja e P&P 80 shënon shpjegimin e zemrës së besimit biblik: kuptimin e sakrificës së Krishtit.

Kishat e Reformuara në Evropë, dhe më vonë kudo nëpër botë, e përqaftuan Katekizmin e Hajdelbergut. Zakonisht, ai u njoh si një nga standardet e rrëfimit. Popullariteti i tij ka njohur rritje deri më sot: i përkthyer në mbi 40 gjuhë. Në botën anglishtfolëse, ai është libri më i përhapur i krishterë pas Biblës dhe *Rrugës së Shtegtarit* të Gjon Bunjanit. Ai është katekizmi më me ndikim dhe më i pranuar nga ato të kohës së Reformacionit, jo vetëm në vendet tradicionalisht protestante, por edhe më shumë në kishat e reja në të gjitha kontinentet. Që nga viti 2006, ky libër është përkthyer dhe ka qenë në dispozicion të lexuesit edhe në gjuhën shqipe.

Në Holandë, Katekizmi i Hajdelbergut u bë i njohur në mënyrë të përgjithshme dhe të favorshme pothuajse menjëherë pasi u botua, kryesisht nëpërmjet përpjekjeve të Petrus Dathenus-it, i cili e përktheu atë në holandisht dhe ia shtoi këtë përkthimit të tij të Librit të Psalmeve të Gjenezës, i cili u botua në vitin 1566. Në të njëjtin vit, një kongregacion në Amsterdam ia kushtoi predikimet e të dielave pasdite këtij katekizmi. Sinodet Kombëtare të shekullit XVI e miratuan atë si një nga Tri Format e Unitetit, duke u kërkuar drejtuesve të kishës ta nënshkruanin dhe shërbenjësve t'ua shpjegonin kishave. Këto kërkesa u theksuan me forcë nga Sinodi i Dortit (1618–1619).

Si përmbledhje, ky katekizëm është bërë gjerësisht i njohur dhe i vlerësuar nga pikëpamja e vlerave të shprehura: vlerat biblike dhe ungjillore, kalviniste – me qëllim ekumenik, me përmbajtje të qartë dhe të rregullt, me ton të ngrohtë dhe devocional, ndërtues dhe ngushëllues, praktik dhe i lehtë për t'u vënë në zbatim.

**KATEKIZMI I
HAJDELBERGUT**

OSE

**I VETMI
NGUSHËLLIMI YT**

DITA E ZOTIT, 1

Pyetja 1

Cili është i vetmi ngushëllimi yt në jetë dhe në vdekje?

Përgjigjja:

Që unë me trup dhe shpirt si në jetë, ashtu dhe në vdekje^a, nuk i takoj vetes sime^b, por Shpëtimtarit tim besnik, Jezu Krishtit^c, i Cili me gjakun e Tij të shtrenjtë ka paguar plotësisht për të gjitha mëkatet e mia^d dhe më ka shpëtuar nga tërë fuqia e djallit^e; dhe kështu më ruan^f, që të mos më bjerë asnjë fije floku nga koka, pa dashjen e Atit tim qiellor^g, po, që të gjitha gjërat të jenë në dobi të shpëtimit tim^h. E prandaj, me anë të Frymës së Tij të Shenjtë, Ai më siguron edhe jetën e përjetshmeⁱ dhe më bën me të vërtetë të vullnetshëm dhe të gatshëm^j që tani e tutje të jetoj për Të.

- a **Rom. 14:8** Sepse, edhe nëse jetojmë, jetojmë për Zotin; edhe nëse vdesim, vdesim për Zotin; pra, edhe nëse jetojmë ose vdesim, të Zotit jemi.
- b **1 Kor. 6:19** A nuk e dini se trupi juaj është tempulli i Frymës së Shenjtë që është në ju, të cilin e keni nga Perëndia, dhe se nuk i përkitin vetvetes?
- c **1 Kor. 3:23** Dhe ju jeni të Krishtit dhe Krishti është i Perëndisë.
Tit. 2:14 I cili e dha veten për ne, për të na shpënuar nga çdo paudhësi dhe për të pastruar për vete një popull të veçantë, të zellshëm në vepra të mira.
- d **1 Pj. 1:18–19** ...duke ditur se jo me anë gjërash që prishen, si argjendi ose ari, jeni shpënuar nga mënyra e kotë e të jetuarit të trashëguar nga etërit, ¹⁹por me anë të gjakut të çmuar të Krishtit, si të Qengjit të patëmetë dhe të panjollë...
1 Gjo. 1:7 Por, po të ecim në dritë, sikurse ai është në dritë, kemi bashkësi njeri me tjetrin, dhe gjaku i Jezu Krishtit, Birit të tij, na pastron nga çdo mëkat.
1 Gjo. 2:2 Ai është shlyesi për mëkatet tona; dhe jo vetëm për tonat, por edhe për ato të të gjithë botës.
1 Gjo. 2:12 Djema, ju shkruaj sepse mëkatet ju janë falur për shkak të emrit të tij.
- e **Heb. 2:14** Sepse, duke qenë se bijtë kanë të përbashkët mishin dhe gjakun, po ashtu edhe ai u bë pjesëtar në po ato gjëra, që të shkatërronte, me anë të vdekjes atë, që ka pushtetin e vdekjes, domethënë djallin.
1 Gjo. 3:8 Kush bën mëkat është nga djalli, sepse djalli mëkaton nga fillimi; për këtë është shfaqur Biri i Perëndisë: për të shkatërruar veprat e djallit.
Gjo. 8:34–36 Jezusi iu përgjigj atyre: «Në të vërtetë, në të vërtetë po ju them: Kush bën mëkat është skllav i mëkatit. ³⁵Por skllavi nuk rri përgjithmonë në shtëpi; ndërsa biri rri përgjithmonë. ³⁶Pra, nëse Biri do t'ju bëjë të lirë, do të jeni me të vërtetë të lirë».
- f **Gjo. 6:39** Por ky është vullneti i Atit që më ka dërguar: që unë të mos humbas asgjë prej të gjithave që ai më ka dhënë, por t'i ringjall në ditën e fundit.
Gjo. 10:28 Dhe unë u jap atyre jetë të përjetshme dhe nuk do të humbasin aspak, përjetë, dhe askush nuk do t'i rrëmbejë nga dora ime.
2 The. 3:3 Por Zoti është besnik, dhe ai do t'ju forcojë dhe do t'ju ruajë nga i ligu.
1 Pj. 1:5 Që nga fuqia e Perëndisë me anë të besimit jeni të ruajtur, për shpëtimin gati për t'u zbuluar në kohët e fundit.
- g **Mt. 10:30** Por te ju edhe të gjitha fjetet e flokëve të kokës janë të numëruara
Lu. 21:18 Por as edhe një fije floku e kokës suaj nuk do të humbasë.
- h **Rom. 8:28** Dhe ne e dimë se të gjitha gjëra bashkëveprojnë për të mirë për ata që e duan Perëndinë, për ata që janë të thirrur sipas qëllimit të tij.
- i **2 Kor. 1:22** I cili edhe na vulosi dhe na dha kaparin e Frymës në zemrat tona.
2 Kor. 5:5 Por ai që na ka formuar pikërisht për këtë është Perëndia, i cili na dha edhe kaparin e Frymës.
Ef. 1:13–14 Në të edhe ju, pasi e dëgjuat fjalën e së vërtetës, ungjillin e shpëtimit tuaj, dhe pasi besuat, u vulosët me Frymën e Shenjtë të premtimit, ¹⁴i cili është kapari i trashëgimisë sonë, për shpëngimin e pronës

së fituar, për lëvdimin e lavdisë së tij.

Rom. 8:16 Vetë Fryma i dëshmon frymës sonë që jemi bij të Perëndisë.

j **Rom. 8:14** Sepse të gjithë ata që udhëhiqen nga Fryma e Perëndisë, janë bij të Perëndisë.

1 Gjo. 3:3 Dhe kushdo që e ka këtë shpresë në të, le ta pastrojë veten, siç është i pastër ai.

Pyetja 2

Sa gjëra janë të nevojshme të dish, me qëllim që të jetosh dhe të vdesësh i lumtur, duke pasur këtë ngushëllim?

Përgjigja:

Tri gjëra^a; e para, sa të mëdha janë mëkatet e mia dhe mjerimi im^b; e dyta, si mund të shpengohem nga të gjitha mëkatet dhe mjerimet e mia^c; e treta, si do t'ia shpreh Perëndisë mirënjohjen time për një shpengim të tillë^d.

a **Psa. 130:1–8** Nga vende të thella unë të këlthas ty, o ZOT. ²O Zot, dëgjoje klithmën time; veshët e tu dëgjojnë me vëmendje zërin e përgjërimeve të mia. ³Në rast se ti do të merrje parasysht fajet, o ZOT, kush do të mund të qëndronte, o Zot? ⁴Por te ti ka falje, me qëllim që të kenë frikë prej teje. ⁵Unë pres Zotin, shpirti im e pret; unë kam shpresë në fjalën e tij. ⁶Shpirti im pret Zotin, më tepër se rojat mëngjesin; po, më tepër se rojat mëngjesin. ⁷O Izrael, mbaji shpresat te ZOTI, sepse pranë ZOTIT ka mëshirë dhe shpengim të plotë. ⁸Ai do ta shpengojë Izraelin nga të gjitha paudhësitë e tij.

Mt. 11:28–30 «Ejani tek unë, o të gjithë të munduar dhe të rënduar, dhe unë do t'ju çlodh. ²⁹Merrni mbi vete zgjedhën time dhe mësoni nga unë, sepse jam zemërbutë dhe i përlulur nga zemra; dhe do të gjeni çlodhje për shpirtrat tuaj. ³⁰Sepse zgjedha ime është e butë dhe barra ime është e lehtë!».

Ef. 5:8 Sepse dikur ishit errësirë, por tani jeni dritë në Zotin; ecni, pra, si bij të dritës.

b **Gjo. 9:41** Jezusi iu tha atyre: «Po të ishit të verbër, nuk do të kishit mëkat; por tani thoni: “Ne shohim”, prandaj mëkati juaj mbetet».

Mt. 9:12 Por Jezusi, mbasi i dëgjoi, u tha atyre: «Nuk janë të shëndoshët ata që kanë nevojë për mjekun, por të sëmurët.»

Rom. 3:10 Siç është shkruar: «Nuk ka asnjë të drejtë, as edhe një.»

1 Gjo. 1:9–10 Po t'i rrëfejmë mëkatet tona, ai është besnik dhe i drejtë që të na falë mëkatet dhe të na pastrojë nga çdo paudhësi. ¹⁰Po të themi se s'kemi mëkatuar, e bëjmë atë gënjeshtar dhe fjala e tij nuk është në ne.

c **Gjo. 8:36** «Pra, nëse Biri do t'ju bëjë të lirë, do të jeni me të vërtetë të lirë».

Gjo. 17:3 Dhe kjo është jeta e përjetshme, të të njohin ty, të vetmin Perëndi të vërtetë, dhe Jezu Krishtin që ti ke dërguar.

Vep. 4:12 «Dhe në asnjë tjetër nuk ka shpëtim, sepse nuk ka asnjë emër tjetër nën qiell, që u është dhënë njerëzve, me anë të të cilit duhet të shpëtohem».

Vep. 10:43 «Për të dëshmojnë të gjithë profetët, se me anë të emrit të tij merr faljen e mëkateve kushdo, që beson në të».

d **Ef. 5:10** Duke provuar çfarë është e pëlqyeshme për Zotin.

Psa. 50:14 Dhuroji Perëndisë flijime lavdërimi dhe plotëso zotimet e tua që i ke bërë Shumë të Lartit.

Mt. 5:16 «Ashtu le të shndritë drita juaj para njerëzve, që të shohin veprat tuaja të mira dhe ta lëvdojnë Atin tuaj që është në qiej».

1 Pj. 2:12 Silluni mirë ndër paganë, që në atë që ju përflasin si keqbërës, të përlëvdojnë Perëndinë ditën e vizitës së tij, për shkak të veprave tuaja të mira.

Rom. 6:13 As mos ia paraqitni gjymtyrët tuaja mëkatit si mjete padrejtësie, por i paraqisni veten tuaj Perëndisë, si të gjallë prej së vdekurish, dhe gjymtyrët tuaja si mjete drejtësie Perëndisë.

2 Tim. 2:15 Ji i zellshëm të dalësh përpara Perëndisë si i sprovuar, si punëtor që nuk ka pse të turpërohet, që ndan drejt fjalën e së vërtetës.

PJESA E PARË – MJERIMI I NJERIUT

DITA E ZOTIT, 2

Pyetja 3

Nga e di ti mjerimin tënd?

Përgjigja:

Nga Ligji i Perëndisë^a.

- a **Rom. 3:20** Sepse asnjë mish nuk do të shfajësohet para tij përmes veprave të ligjit; sepse me anë të ligjit vjen njohja e mëkatit.

Pyetja 4

Çfarë na kërkon Ligji i Perëndisë?

Përgjigja:

Krishti na mëson shkurt (Mateu 22:37–40): “Duaje Zotin, Perëndinë tënd, me gjithë zemrën tënde, me gjithë shpirtin tënd dhe me gjithë mendjen tënde Ky është urdhërimi i parë dhe i madhi. Dhe i dyti, i ngjashëm me këtë, është: “Duaje të afërmin tënd porsi vetveten”. Nga këto dy urdhërime varet i tërë ligji dhe profetët^a.

- a **LiP. 6:5** Ti do ta duash, pra, ZOTIN, Perëndinë tënd, me gjithë zemër, me gjithë shpirt dhe me tërë forcën tënde.
Lev. 19:18 Mos u hakmerr dhe mos mbaj mëri kundër bijve të popullit tënd, por duaje të afërmin tënd si veten tënde. Unë jam ZOTI.
Mr. 12:30 Dhe: “Duaje Zotin, Perëndinë tënd, me gjithë zemrën tënde, me gjithë shpirtin tënd, me gjithë mendjen tënde e me gjithë forcën tënde!”. Ky është i pari urdhërim.
Lu. 10:27 Dhe ai duke u përgjigjur tha: «Duaje Zotin, Perëndinë tënd, me gjithë zemrën tënde, me gjithë shpirtin tënd, me gjithë forcën tënde dhe me gjithë mendjen tënde, edhe të afërmin tënd porsi vetveten».

Pyetja 5

A mund t'i mbash të gjitha këto me përsosmëri?

Përgjigja:

Në asnjë mënyrë^a, sepse prirem nga natyra ime që ta urrej Perëndinë dhe të afërmin tim^b.

- a **Rom. 3:10** Siç është shkruar: «Nuk ka asnjë të drejtë, as edhe një».
Rom. 3:20 Sepse asnjë mish nuk do të shfajësohet para tij përmes veprave të ligjit; sepse me anë të ligjit vjen njohja e mëkatit.
Rom. 3:23 Sepse të gjithë kanë mëkatuar dhe nuk e arrijnë lavdinë e Perëndisë.
1 Gjo. 1:8 Po të themi se nuk kemi mëkat, gënjejme vetveten dhe e vërteta nuk është në ne.
1 Gjo. 1:10 Po të themi se s’kemi mëkatuar, e bëjmë atë gënjeshtar dhe fjala e tij nuk është në ne.
b **Rom. 8:7** Sepse mendja e mishit është armiqësi ndaj Perëndisë, sepse nuk i nënshtrohet ligjit të Perëndisë dhe as nuk mundet.

Ef. 2:3 Ndërmjet të cilëve, edhe ne dikur, jetuam në lakmitë e mishit tonë duke i plotësuar vullnetet e mishit dhe të mendjes; dhe ishim prej natyre bij të zemërimit, si edhe të tjerët.

Tit. 3:3 Sepse edhe ne dikur ishim të pamend, të pabindur, endacakë, duke u shërbyer epsheve të ndryshme dhe qejfeve, duke jetuar në ligësi dhe në smirë, të urryer dhe duke e urryer njëri-tjetrin.

Zan. 6:5 Dhe tani ZOTI pa që ligësia e njerëzve ishte e madhe mbi tokë dhe që tërë synimet e mendimeve të zemrës së tyre nuk ishin gjë tjetër veçse e keqja në çdo kohë.

Zan. 8:21 Dhe ZOTI ndjeu një erë të këndshme dhe ai tha në zemër të vet: «Unë nuk do ta mallkoj më tokën për shkak të njeriut, sepse synimet e zemrës së njeriut janë të këqija qysh në fëmijërinë e tij; dhe nuk do të godas më çdo gjallesë, siç kam bërë».

Jer. 17:9 Zemra është gënjeshtare mbi çdo gjë dhe e ligur keq; kush mund ta njohë atë?

Rom. 7:23 Por shoh një ligj tjetër në gjymtyrët e mia, që lufton kundër ligjit të mendjes sime dhe që më bën rob të ligjit të mëkatit që është në gjymtyrët e mia.

DITA E ZOTIT, 3

Pyetja 6

Atëherë, a e krijoi Perëndia njeriun kaq të lig dhe të çoroditur?

Përgjigjja:

Në asnjë mënyrë; Perëndia e krijoi njeriun të mirë^a dhe shëmbëlltyrë të Vetën^b, në drejtësi dhe shenjtëri të vërtetë, që ai ta njohë drejt Perëndinë, Krijuesin e tij, ta dojë me gjithë zemër dhe të jetojë me Të në lumturi të përvetshme, që ta lavdërojë e ta lëvdojë Atë^c.

- a **Zan. 1:31** Atëherë Perëndia pa të gjitha ato që kishte bërë dhe, ja, ishte shumë mirë. Dhe u bë mbrëmje dhe u bë mëngjes: dita e gjashtë.
- b **Zan. 1:26–27** Pastaj Perëndia tha: «Ta bëjmë njeriun sipas shëmbëlltyrës sonë dhe në ngjasim me ne, dhe të ushtrojë sundimin e tij mbi peshqit e detit, mbi zogjtë e qiellit, mbi kafshët e mbi gjithë tokën, mbi rrëshqanorët që zvarriten mbi dhe». ²⁷Kështu Perëndia krijoi njeriun sipas shëmbëlltyrës së vet, sipas shëmbëlltyrës së Perëndisë e krijoi; Ai i krijoi mashkull e femër.
- c **Ef. 4:24** Dhe të vishni njeriun e ri, të krijuar sipas Perëndisë në drejtësinë dhe shenjtërinë e së vërtetës.
Kol. 3:10 Edhe veshët njeriun e ri, që përtërihet në njohurinë, sipas shembullit të atij që e krijoi.
2 Kor. 3:18 Por ne të gjithë, duke soditur fytyrëzbuluar lavdinë e Zotit si në pasqyrë, shndërrohemi në të njëjtin shëmbëllim nga lavdia në lavdi, si prej Frymës së Zotit.

Pyetja 7

Nga vjen, pra, kjo çoroditje e natyrës njerëzore?

Përgjigjja:

Nga rënia dhe mosbindja e paraardhësve tanë, të Adamit dhe të Evës, në Parajsë^a; prandaj natyra jonë është bërë aq e çoroditur, saqë të gjithë ngjizemi dhe lindim në mëkat^b.

- a **Zan. 3** 'Mëkati i Adamit dhe premtimi i parë', 'Rënia e njeriut', 'Gjykimi i njeriut'.
Rom. 5:12, 18–19 Prandaj, ashtu si me anë të një njeriu të vetëm mëkati hyri në botë dhe me anë të mëkatit vdekja, po ashtu vdekja i arriti të gjithë njerëzit, sepse të gjithë mëkatuan... ¹⁸Sikundër, pra, me anë të shkeljes së njërit erdhi mbi gjithë njerëzit dënimi, ashtu edhe me anë të drejtësisë së njërit erdhi mbi gjithë njerëzit drejtësimi i jetës. ¹⁹Sepse, ashtu si nëpërmjet mosbindjes së një njeriu të vetëm, të shumtët u bënë mëkatarë, ashtu edhe nëpërmjet bindjes së një të vetmi, të shumtët do të bëhen të drejtë.

- b **Psa. 51:5** Ja, unë jam mbujtur në paudhësi dhe nëna ime më ka ngjizur në mëkat.
Zan. 5:3 Adami jetoi njëqind e tridhjetë vjet dhe i lindi një djalë që i përngjiste, njëlloj në shëmbëlltë të tij, dhe e quajti Seth.

Pyetja 8

Atëherë, a jemi aq të ligj, sa që jemi fare të paaftë që të bëjmë ndonjë të mirë dhe priremi drejt çdolloj ligësie?

Përgjigjja:

Jemi vërtet^a; po të mos rilindemi nga Fryma e Perëndisë^b.

- a **Zan. 8:21** Dhe ZOTI ndjeu një erë të këndshme dhe ai tha në zemër të vet: «Unë nuk do ta mallkoj më tokën për shkak të njeriut, sepse synimet e zemrës së njeriut janë të këqija qysh në fëmijërinë e tij; dhe nuk do ta godas më çdo gjallesë, siç kam bërë.
Zan. 6:5 Dhe tani ZOTI pa që ligësia e njerëzve ishte e madhe mbi tokë dhe që tërë synimet e mendimeve të zemrës së tyre nuk ishin gjë tjetër veçse e keqja në çdo kohë.
Job. 14:4 Kush mund të nxjerrë një gjë të pastër nga një gjë e papastër? Askush.
Job. 15:14, 16, 35 «Çështë njeriu që ta konsiderojë veten të pastër dhe i linduri nga një grua për të qenë i drejtë?...¹⁶Aq më pak një qenie e neveritshme dhe e korruptuar, njeriu, që e pi paudhësinë sikur të ishte ujë!...³⁵Ata ngjizin paudhësinë dhe pjellin shkatërrimin; në gjirin e tyre bluhet mashtrimi».
Gjo. 3:6 Ç'ka lindur nga mishi, është mish; dhe ç'ka lindur nga Fryma, është frymë.
Isa. 53:6 Ne të gjithë endeshim si dele; secili prej nesh ndiqte rrugën e vet dhe ZOTI bëri që të bjerë mbi të paudhësia e ne të gjithëve.
- b **Gjo. 3:3–5** Jezusi iu përgjigj dhe i tha: «Në të vërtetë, në të vërtetë po të them se nëse një nuk lind përsëri, ai nuk mund ta shohë mbretërinë e Perëndisë». ⁴Nikodemi i tha: «Si mund të lindë një njeri kur është plak? A mund të hyjë ai për së dyti në barkun e nënës së vet dhe të lindë?». ⁵Jezusi u përgjigj: «Në të vërtetë, në të vërtetë po të them se, kush nuk lind nga uji dhe nga Fryma, ai nuk mund të hyjë në mbretërinë e Perëndisë.»
1 Kor. 12:3 Prandaj ju bëj të ditur se asnjë që flet në Frymën e Perëndisë nuk i thotë Jezusit, i mallkuar; edhe asnjë nuk mund t'i thotë Jezusit, Zot, veçse në Frymën e Shenjtë.
2 Kor. 3:5 Jo se jemi të aftë nga vetja, të kuptojmë ndonjë gjë sikur vjen nga vetja jonë, por aftësia jonë është prej Perëndisë.

DITA E ZOTIT, 4

Pyetja 9

Atëherë, a nuk i bën Perëndia padrejtësi njeriut, duke i kërkuar në ligjin e Tij atë që s'mund ta kryejë?

Përgjigjja:

Aspak^a; sepse Perëndia e bëri njeriun të aftë ta kryejë atë^b; por njeriu, pas nxitjes së djallit dhe mosbindjes së vet të vullnetshme, ia hoqi ato dhurata hyjnore vetes dhe gjithë pasardhjes së tij^c.

- a **Ef. 4:24** Dhe të vishni njeriun e ri, të krijuar sipas Perëndisë në drejtësinë dhe shenjtërinë e së vërtetës.
b **Zan. 3:13** Dhe ZOTI Perëndi i tha gruas: «Pse e bërë këtë?». Gruaja u përgjigj: «Gjarpi më mashtrroi dhe unë hëngra prej saj».
1 Tim. 2:13–14 Sepse së pari u formua Adami dhe më pas Eva. ¹⁴Dhe nuk u gënjye Adami, por grua u gënjye dhe ra në shkelje.
c **Zan. 3:6** Dhe grua pa që pema ishte e mirë për t'u ngrënë, që ishte e këndshme për sytë dhe që pema ishte e dëshirueshme për ta bërë të zgjuar dikë; dhe ajo mori nga fruta e saj, e hëngri dhe i dha edhe burrit të saj

që ishte me të, dhe hëngri edhe ai.

Rom. 5:12 Prandaj, ashtu si me anë të një njeriu të vetëm mëkati hyri në botë dhe me anë të mëkatit vdekja, po ashtu vdekja i arriti të gjithë njerëzit, sepse të gjithë mëkatuan.

Pyetja 10

A do të lejojë Perëndia që një mosbindje dhe një rebelim i tillë të kalojë pa u ndëshkuar?

Përgjigjja:

Në asnjë mënyrë. Ai është jashtëzakonisht i pakënaqur^a, si me mëkatin tonë të parë, ashtu dhe me ato të sotmet; dhe do t'i dënojë në gjykimin e Tij të drejtë, në kohë dhe në përjetësi^b, siç ka deklaruar: *Mallkuar qoftë ai që nuk u përmbahet fjalëve të këtij ligji për t'i zbatuar!*^c

a **Zan. 2:17** «Por mos ha nga pema e njohjes të së mirës dhe të së keqes, sepse ditën që do të hash prej saj ke për të vdekur me siguri».

Rom. 5:12 Prandaj, ashtu si me anë të një njeriu të vetëm mëkati hyri në botë dhe me anë të mëkatit vdekja, po ashtu vdekja i arriti të gjithë njerëzit, sepse të gjithë mëkatuan.

b **Psa. 5:4–6** «...sepse ti nuk je një Perëndi që kënaqet në ligësi; te ti nuk mund të zërë vend e keqja. ⁵Ata që lëvdojnë vetveten nuk do të mund të qëndrojnë para syve të tu; ti i urren të gjithë ata që kryejnë padrejtësi. ⁶Ti do të zhdukësh gjithë ata që thonë gënjeshtër; ZOTI urren njerëzit gjakatarë dhe mashtrues.

Psa. 50:21–22 Ti i ke bërë këto gjëra dhe unë kam heshtur; ti ke menduar që unë jam krejt i ngjashëm me ty. Por unë do të të përgjigjem dhe do të vë çdo gjë para syve të tu. ²²Tani kuptoni këtë gjë ju që harroni Perëndinë, që unë të mos ju bëjë copë-copë dhe askush të mos ju çlirojë dot.

Nah. 1:2 ZOTI është një Perëndi xheloz dhe hakmarrës; ZOTI është hakmarrës dhe plot tërbim. ZOTI hakmerret me kundërshtarët e tij dhe e ruan zemërimin për armiq të tij.

Eks. 20:5 Mos u përkul para tyre dhe as mos u shërbe, sepse unë, ZOTI, Perëndia yt, jam një Perëndi xheloz, që dënon paudhësinë e etërve mbi fëmijët e tyre deri në brezin e tretë dhe të katërt të atyre që më urrejnë.

Eks. 34:7 «Që përdor mëshirën për mijëra njerëz, që fal paudhësinë, shkeljet dhe mëkatin, por nuk e lë të pandëshkuar fajtorin dhe që viziton paudhësinë e etërve mbi bijtë dhe mbi bijtë e bijve deri në brezin e tretë dhe të katërt».

Rom. 1:18 Sepse, zemërimi i Perëndisë zbulohet nga qielli mbi çdo pabesi e padrejtësi të njerëzve, që mbysin të vërtetën në padrejtësi.

Ef. 5:6 Askush të mos ju mashtrojë me fjalë të kota, sepse, për shkak të këtyre gjërave, vjen zemërimi i Perëndisë mbi bijtë e mosbindjes.

c **LiP. 27:26** «Mallkuar qoftë ai që nuk u përmbahet fjalëve të këtij ligji për t'i zbatuar!» Tërë populli do të thotë: «Amen».

Gal. 3:10 Dhe të gjithë ata që janë prej veprave të ligjit janë nën mallkim, sepse është shkruar: «I mallkuar është kushdo, që nuk qëndron në të gjitha ato, që shkruhen në librin e ligjit për t'i bërë».

Pyetja 11

Atëherë, a nuk është Perëndia edhe i mëshirshëm?

Përgjigjja:

Perëndia është vërtet i mëshirshëm^a, por edhe i drejtë^b; prandaj drejtësia e Tij kërkon që mëkati, i cili kryhet kundër Madhësisë më të lartë të Perëndisë, të ndëshkohet me një dënim ekstrem, pra, me atë të përjetshmin, si të trupit, ashtu dhe të shpirtit.

a **Eks. 34:6–7** Dhe ZOTI kaloi pranë tij dhe thirri: «ZOTI, ZOTI Perëndi, i mëshirshëm dhe i dhembshur, i

ngadalshëm në zemërim, i pasur në mirësi dhe në besnikëri, ⁷që përdor mëshirën për mijëra njerëz, që fal paudhësinë, shkeljet dhe mëkatin, por nuk e lë të pandëshkuar fajtorin dhe që viziton paudhësinë e etërve mbi bijtë dhe mbi bijtë e bijve deri në brezin e tretë dhe të katërt».

Eks. 20:6 Dhe unë përdor dashamirësi për mijëra, për ata që më duan dhe që zbatojnë urdhërimet e mia.

- b **Psa. 7:9** Jepi fund ligësisë së njerëzve të këqij, por vendos njeriun e drejtë, sepse ti je Perëndia i drejtë, që provon zemrat dhe veshkat.

Eks. 20:5 Mos u përkul para tyre dhe as mos u shërbe, sepse unë, ZOTI, Perëndia yt, jam një Perëndi xheloz, që dënon paudhësinë e etërve mbi fëmijët e tyre deri në brezin e tretë dhe të katërt të atyre që më urrejnë.

Eks. 23:7 Shmangu nga çdo pavërtetësi; mos vrit të pafajshmin dhe të drejtin, sepse unë nuk do ta fal të ligun.

Eks. 34:7 «Që përdor mëshirën për mijëra njerëz, që fal paudhësinë, shkeljet dhe mëkatin, por nuk e lë të pandëshkuar fajtorin dhe që viziton paudhësinë e etërve mbi bijtë dhe mbi bijtë e bijve deri në brezin e tretë dhe të katërt».

Psa. 5:4-6 «...sepse ti nuk je një Perëndi që kënaqet në ligësi; te ti nuk mund të zërë vend e keqja. ⁵Ata që lëvdojnë vetveten nuk do të mund të qëndrojnë para syve të tu; ti i urren të gjithë ata që kryejnë padrejtësi. ⁶Ti do të zhdukësh gjithë ata që thonë gënjeshtër; ZOTI urren njerëzit gjakatarë dhe mashtrues.

Nah. 1:2-3, 7 ZOTI është një Perëndi xheloz dhe hakmarrës; ZOTI është hakmarrës dhe plot tërbim. ZOTI hakmerret me kundërshtarët e tij dhe e ruan zemërimin për armiqët e tij. ³ZOTI është i ngadalshëm në zemërim dhe pushtetmadh, por nuk e lë pa e ndëshkuar aspak të ligun. ZOTI vazhdon rrugën e tij në shakullinë dhe në furtunë dhe retë janë pluhuri i këmbëve të tij... ⁷ZOTI është i mirë, është një fortesë në ditën e fatkeqësisë; Ai i njeh ata që kërkojnë strehë tek Ai.

PJESA E DYTË – SHPËTIMI I NJERIUT

DITA E ZOTIT, 5

Pyetja 12

Atëherë, meqenëse, sipas gjykimit të drejtë të Perëndisë, ne meritojmë dënimin në këtë jetë dhe në përjetësi, a ka ndonjë rrugë që mund t'i shpëtojmë këtij dënimi dhe të pranohemi përsëri në hirin e Tij?

Përgjigjja:

Perëndia do ta përmbushë drejtësinë e Tij^a; e prandaj ne duhet ta bëjmë këtë shlyerje të plotë vetë, ose me anë të një tjetri^b.

- a **Zan. 2:17** «Por mos ha nga pema e njohjes të së mirës dhe të së keqes, sepse ditën që do të hash prej saj, ke për të vdekur me siguri».

Eks. 23:7 Shmangu nga çdo pavërtetësi; mos vrit të pafajshmin dhe të drejtin, sepse unë nuk do ta fal të ligun.

Eze. 18:4 Ja, të gjithë shpirtat janë të mitë; si shpirti i atit ashtu dhe shpirti i birit janë të mitë. Shpirti që mëkaton ka për të vdekur.

Mt. 5:26 Me të vërtetë po të them se nuk do të dalësh prej andej pa e paguar edhe qindarkën e fundit.

2 The. 1:6 Sepse është e drejtë, përpara Perëndisë, t'u kthehet shtrëngimi atyre që po ju shtrëngojnë.

Lu. 16:2 Atëherë ai e thirri dhe i tha: «Ç'është kjo që po dëgjoj për ty? Jep llogari për administrimin tënd, sepse ti nuk mund të jesh më administrues».

- b **Rom. 8:4** Që të përmbushet kërkesa e drejtë e ligjit në ne, që nuk ecim sipas mishit, por sipas Frymës.

Pyetja 13

Pra, ne vetë, a mund ta bëjmë këtë shlyerje?

Përgjigja:

Në asnjë mënyrë; përkundrazi, ne vetë e rrisim çdo ditë borxhin tonë^a.

- a **Job. 4:18–19** «Ja, ai nuk u zë besë as shërbëtorëve të tij dhe gjen të meta edhe tek engjëjt e tij; ¹⁹aq më tepër tek ata që banojnë në shtëpi prej argjile, themelet e të cilave janë në pluhur, dhe shtypen si një tenjë.»
Job. 9:2 «Po, unë e di që është kështu, por si mund të jetë i drejtë njeriu përpara Perëndisë?»
Job. 15:15–16 «Ja, Perëndia nuk u zë besë as shenjtoreve të tij dhe qiejt nuk janë të pastër në sytë e tij; ¹⁶aq më pak një qenie e neveritshme dhe e korruptuar, njeriu, që e pi paudhësinë sikur të ishte ujë!»
Psa. 130:3 «Në rast se ti do të merrje parasysh fajet, o ZOT, kush do të mund të qëndronte, o Zot?»
Mt. 6:12 Dhe na i fal fajet tona, siç ua falim edhe ne fajtorëve tanë.
Mt. 16:26 Sepse ç'përfitim ka njeriu nëse fiton gjithë botën, por humb shpirtin e vet? Ose çfarë do të japë njeriu si shkëmbim të shpirtit të vet?
Mt. 18:25 Dhe, duke qenë se ky nuk kishte të paguante, i zoti urdhëroi që të shitej ai dhe gruaja e tij, dhe bijtë e tij dhe gjithë ç'kishte, dhe të shlyejë detyrimin.

Pyetja 14

Atëherë, a mund të gjendet ndokund ndokush, i cili është i aftë për të shlyer mëkatet tona?

Përgjigja:

Asnjeri; sepse, së pari, Perëndia nuk do të dënojë asnjë krijesë tjetër për atë mëkat që e kreu njeriu^a; dhe së dyti, asnjë krijesë e vetme nuk mund të mbajë barrën e zemërimit të përjetshëm të Perëndisë kundër mëkatit, në mënyrë që t'i shpëtojë të tjerët nga ai^b.

- a **Eks. 32:33** Por ZOTI iu përgjigj Moisiut: «Atë që ka bërë mëkat kundër meje, atë do ta fshij nga libri im!»
Zan. 2:17 «Por mos ha nga pema e njohjes të së mirës dhe të së keqes, sepse ditën që do të hash prej saj, ke për të vdekur me siguri.»
Eze. 18:4 Ja, të gjithë shpirtrat janë të mitë; si shpirti i atit ashtu dhe shpirti i birit janë të mitë. Shpirti që mëkaton ka për të vdekur.
Eze. 18:20 Shpirti që mëkaton do të vdesë, biri nuk do të mbartë paudhësinë e të atit dhe ati nuk do të mbartë paudhësinë e të birit; drejtësia e të drejtës do të jetë mbi të, pabesia e të pabesit do të jetë mbi të.
Heb. 10:4 Sepse është e pamundur që gjaku i demave dhe i cjepeve të heqë mëkatet.
- b **Nah. 1:6** Kush mund të rezistojë përpara indinjatës së tij dhe kush mund të durojë zjarrin e zemërimit të tij? Tërbimi i tij derdhet si zjarr dhe shkëmbinjtë janë të thërrmuar prej tij.
Psa. 130:3 Në rast se ti do të merrje parasysh fajet, o ZOT, kush do të mund të qëndronte, o Zot?
Isa. 33:14 Në Sion mëkatarët i ka zënë frika, një drithërimë ka pushtuar të pabesët: «Kush prej nesh do të mund të banojë me zjarrin gllabërues? Kush prej nesh do të mund të banojë me flakët e përjetshme?»
Zbu. 5:2–3 Dhe pashë një engjëll të fortë, që shpalli me zë të madh: «Kush është i denjë të hapë librin dhe të zgjidhë vulat e tij?»³Dhe asnjë, as në qiell, as mbi dhe, as nën dhe, nuk mund të hapte librin, as ta shihte atë.
Heb. 12:29 Sepse Perëndia ynë është një zjarr gllabërues.

Pyetja 15

Atëherë, për çfarë lloj ndërmjetësi dhe shpëtimtari kemi nevojë?

Përgjigja:

Një që është vërtet njeri^a dhe përsosmërisht i drejtë^b; por njëkohësisht është dhe më i fuqishëm se të gjitha krijesat; d.m.th. njeri, i cili është gjithashtu dhe vërtet Perëndi^c.

- a **1 Kor. 15:21** Sepse, ashtu si erdhi vdekja me anë të një njeriu, kështu erdhi dhe ringjallja e të vdekurve me anë të një njeriu.
- b **Heb. 7:26** Sepse neve një kryepriфт i tillë na duhej: i shenjtë, i pafaj, i papërlyer, i ndarë nga mëkatarët dhe i bërë më i lartë se qiejt.
- c **Isa. 7:14** “Prandaj vetë ZOTI do t’ju japë një shenjë: Ja, e virgjra do të mbetet me barrë dhe do të lindë një fëmijë të cilin do ta quajë Emanuel.”
Isa. 9:5 “Sepse na ka lindur një fëmijë, një djalë na është dhënë. Mbi supet e tij do të mbështetet perandoria dhe do të quhet Këshilltar i admirueshëm, Perëndi i fuqishëm, Atë i përjetshëm, Princ i paqes.”
Jer. 23:6 Në ditët e tij Juda do të shpëtohet dhe Izraeli do të qëndrojë në siguri. Ky do të jetë emri me të cilin do të thirret: “ZOTI drejtësia jonë”.
Lu. 11:22 Por kur vjen një më i fortë se ai dhe e mund atë, ia merr gjithë armët në të cilat kishte shpresë dhe i ndan plaçkat e tij.
1 Kor. 1:30 Edhe prej tij ju jeni në Krishtin Jezus, i cili u bë për ne urtësi prej Perëndisë, drejtësi edhe shenjtërim dhe shpengim;
Gjo. 5:21, 26 Sepse ashtu si Ati ringjall të vdekurit dhe u jep jetë, po kështu edhe Biri i jep jetë kujt do që do.
²⁶Sepse, sikurse Ati ka jetë në vetvete, kështu ia ka dhënë dhe Birit të ketë jetë në vetvete;
Gjo. 10:15, 28 Ashtu siç më njeh Ati mua dhe unë e njoh Atin dhe jetën time e jap për delet... ²⁸dhe unë u jap atyre jetë të përjetshme dhe nuk do të humbasin aspak, përjetë, dhe askush nuk do t’i rrëmbejë nga dora ime.
Gjo. 15:5 Unë jam hardhia, ju jeni shermendet; kush qëndron në mua dhe unë në të, ai jep shumë fryt, sepse pa mua nuk mund të bëni asgjë.

DITA E ZOTIT, 6

Pyetja 16

Pse Ai duhet të jetë vërtet njeri edhe përsosmërisht i drejtë?

Përgjigjja:

Sepse drejtësia e Perëndisë kërkon që e njëjta natyrë njerëzore, e cila ka mëkatuar, po e njëjta të kryejë edhe shlyerjen për mëkatin^a; por ai që është vetë mëkatar, nuk mund të shlyejë për të tjerët^b.

- a **Eze. 18:4, 20** Ja, të gjithë shpirtat janë të mitë; si shpirti i atit ashtu dhe shpirti i birit janë të mitë. ²⁰Shpirti që mëkaton ka për të vdekur. Shpirti që mëkaton do të vdesë, biri nuk do të mbartë paudhësinë e të atit dhe ati nuk do të mbartë paudhësinë e të birit; drejtësia e të drejtit do të jetë mbi të, pabesia e të pabesit do të jetë mbi të.
Zan. 2:17 «Por mos ha nga pema e njohjes të së mirës dhe të së keqes, sepse ditën që do të hash prej saj, ke për të vdekur me siguri».
Rom. 5:18–19 Sikundër, pra, me anë të shkeljes së njerit erdhi mbi gjithë njerëzit dënimi, ashtu edhe me anë të drejtësisë së njerit erdhi mbi gjithë njerëzit drejtësi i jetës. ¹⁹Sepse, ashtu si nëpërmjet mosbindjes së një njeriu të vetëm, të shumtët u bënë mëkatarë, ashtu edhe nëpërmjet bindjes së një të vetmi, të shumtët do të bëhen të drejtë.
1 Kor. 15:21 Sepse, ashtu si erdhi vdekja me anë të një njeriu, kështu erdhi dhe ringjallja e të vdekurve me anë të një njeriu.
Heb. 2:14–16 Sepse, duke qenë se bijtë kanë të përbashkët mishin dhe gjakun, po ashtu edhe ai u bë pjesëtar në po ato gjëra, që të shkatërronte, me anë të vdekjes atë, që ka pushtetin e vdekjes, domethënë djallin, ¹⁵edhe të çlironte të gjithë ata, që nga frika e vdekjes i ishin nënshtruar robërisë për tërë jetën. ¹⁶Sepse ai, pra, nuk kujdeset për engjëjt, por kujdeset për farën e Abrahamit.
b **Heb. 7:26–27** Sepse neve një kryepriфт i tillë na duhej: i shenjtë, i pafaj, i papërlyer, i ndarë nga mëkatarët dhe i bërë më i lartë se qiejt, ²⁷që nuk ka nevojë çdo ditë, si ata kryepriфтërinjtë, të ofrojë fljime më parë për

mëkatet e veta e pastaj për ato të popullit; sepse këtë e bëri një herë e përgjithmonë, kur ofroi vetveten.

Psa. 49:7 Asnjëri nuk mund të shpengojë kurrësi vëllanë e vet, as t'i japë Perëndisë çmimin e shpengimit të tij.

1 Pj. 3:18 Sepse edhe Krishti ka vuajtur një herë për mëkatet, i drejti për të padrejtët, për të na çuar te Perëndia. U vra sipas mishit, por u ngjall me anë të Frymës.

Pyetja 17

Pse Ai duhet të jetë njëkohësisht edhe Perëndi?

Përgjigjja:

Sepse me anë të fuqisë së Hyjnisë së Tij^a, të mund të mbajë në natyrën e Tij njerëzore^b, barrën e zemërimit të Perëndisë^c; dhe të na marrë e të na rikthejë drejtësinë dhe jetën^d.

a **Isa. 9:5** Sepse na ka lindur një fëmijë, një djalë na është dhënë. Mbi supet e tij do të mbështetet perandoria dhe do të quhet Këshilltar i admirueshëm, Perëndi i fuqishëm, Atë i përjetshëm, Princ i paqes.

Isa. 63:3 «Gaviçin e shtypa vetëm dhe asnjë nga popujt nuk ishte me mua. I shtypa në zemërimin tim dhe i shkela në tërbimin tim. Gjaku i tyre spërkati rrobat e mia dhe njollosa tërë veshjet e mia.»

b **Isa. 53:4, 11** Megjithatë ai mbante sëmundjet tona dhe kishte marrë përsipër dhembjet tona; por ne e konsideronim të goditur, të rrahur nga Perëndia dhe të përlurur. ¹¹Ai do të shikojë frytin e mundimit të shpirtit të tij dhe do të jetë i kënaqur; me anë të diturisë së tij, i drejti, shërbëtori im, do të bëjë të drejtë shumë veta, sepse do të marrë përsipër paudhësitë e tyre.

c **LiP. 4:24** Sepse ZOTI, Perëndia yt, është një zjarr që të konsumon, një Perëndi xheloz.

Nah. 1:6 Kush mund të rezistojë përpara indinjatës së tij dhe kush mund të durojë zjarrin e zemërimit të tij? Tërbimi i tij derdhet si zjarr dhe shkëmbinjtë janë të thërrmuar prej tij.

Psa. 130:3 Në rast se ti do të merrje parasysh fajet, o ZOT, kush do të mund të qëndronte, o Zot?

d **Isa. 53:5, 11** Por ai u tejpshua për shkak të shkeljeve tona, u shtyp për paudhësitë tona; ndëshkimi për të cilin kemi paqen është mbi të, dhe për shkak të vurratave të tij ne jemi shëruar. ¹¹Ai do të shikojë frytin e mundimit të shpirtit të tij dhe do të jetë i kënaqur; me anë të diturisë së tij, i drejti, shërbëtori im, do të bëjë të drejtë shumë veta, sepse do të marrë përsipër paudhësitë e tyre.

Pyetja 18

Cili, pra, është ai Ndërmjetës, i Cili është edhe Perëndi^a, edhe njeri^b i drejtë^c?

Përgjigjja:

Zoti ynë Jezu Krisht^d, i Cili nga Perëndi u bë për ne ditori, drejtësi, shenjtërim dhe shpengim^e.

a **1 Gjo. 5:20** Por dimë se Biri i Perëndisë erdhi dhe na dha të kuptuarit, që të njohim të Vërtetin; dhe jemi në të Vërtetin, në Birin e tij Jezu Krisht; ky është i vërteti Perëndi dhe jeta e përjetshme.

Rom. 8:3 Sepse atë që ishte e pamundur për ligjin, sepse ishte pa forcë për shkak të mishit, Perëndia, duke dërguar birin e tij në shëmbëllim mishi mëkatar, edhe për mëkat, e dënoi mëkatin në mish.

Rom. 9:5 Të tyret janë edhe etërit, prej të cilëve rrjedh sipas mishit Krishti, i cili është përmbi çdo gjë Perëndi, i bekuar përjetë. Amen.

Gal. 4:4 Por, kur erdhi plotësimi i kohës, Perëndia dërgoi Birin e tij, të lindur prej gruaje, të vënë nën ligj.

Isa. 9:5 Sepse na ka lindur një fëmijë, një djalë na është dhënë. Mbi supet e tij do të mbështetet perandoria dhe do të quhet Këshilltar i admirueshëm, Perëndi i fuqishëm, Atë i përjetshëm, Princ i paqes.

Jer. 23:6 Në ditët e tij Juda do të shpëtohet dhe Izraeli do të qëndrojë në siguri. Ky do të jetë emri me të cilin do të thirret: "ZOTI drejtësia jonë".

Mal. 3:1 «Ja, unë po dërgoj lajmëtarin tim për të përgatitur rrugën para meje. Dhe menjëherë ZOTI, që ju

kërkoni, do të hyjë në tempullin e vet, engjëlli i besëlidhjes që ju kërkoni me ëndje, ja, do të vijë», thotë ZOTI i ushtrive.

- b **Lu. 1:42** Dhe thërriti me zë të lartë, duke thënë: «Ti je e bekuar ndër gratë dhe i bekuar është fryti i barkut tënd».

Lu. 2:6–7 Kështu, ndërsa ishin atje, asaj iu mbushën ditët për të lindur. ⁷Dhe ajo lindi djalin e saj të parëlindur, e mbështolli me pelena dhe e vendosi në një grazhd; sepse në han nuk kishte vend për ta.

Rom. 1:3 Lidhur me Birin e tij, të lindur nga fara e Davidit sipas mishit.

Rom. 9:5 Të tyrët janë edhe etërit, prej të cilëve rrjedh sipas mishit Krishti, i cili është përmbi çdo gjë Perëndi, i bekuar përjetë. Amen!

Fil. 2:5–8 Kini në veten tuaj po atë mendje që ishte edhe në Jezu Krishtin, ⁶i cili, edhe pse ishte në trajtë Perëndie, nuk e çmoi si një gjë ku të mbahej fort për të qenë barabar me Perëndinë, ⁷por e zbrazi veten e tij, duke marrë trajtë shërbëtori, e u bë i ngjashëm me njerëzit; ⁸dhe duke u gjetur nga pamja e jashtme posi njeri, e përluli veten duke u bërë i bindur deri në vdekje, edhe deri në vdekje të kryqit.

Heb. 2:14–16 Sepse, duke qenë se bijtë kanë të përbashkët mishin dhe gjakun, po ashtu edhe ai u bë pjesëtar në po ato gjëra, që të shkatërronte, me anë të vdekjes atë, që ka pushtetin e vdekjes, domethënë djallin, ¹⁵edhe të çlironte të gjithë ata, që nga frika e vdekjes i ishin nënshtruar robërisë për tërë jetën. ¹⁶Sepse ai, pra, nuk kujdeset për engjëjt, por kujdeset për farën e Abrahamit.

Heb. 4:15 Sepse ne nuk kemi një kryepriфт që nuk mund të vuajë bashkë me dobësitë tona, por që u tundua në të gjitha njësoj si ne, por pa mëkat.

- c **Isa. 53:9** Kishin caktuar ta varrosnin bashkë me të pabesët, po kur vdiq e vunë me të pasurin, sepse nuk kishte kryer asnjë dhunë dhe nuk kishte pasur asnjë mashtrim në gojën e tij.

Isa. 53:11 Ai do të shikojë frytin e mundimit të shpirtit të tij dhe do të jetë i kënaqur; me anë të dëlturisë së tij, i drejti, shërbëtori im, do të bëjë të drejtë shumë veta, sepse do të marrë përsipër paudhësitë e tyre.

Jer. 23:5 «Ja, ditët po vijnë», thotë ZOTI, «në të cilat do të ngre nga Davidi një filiz të drejtë, që do të mbretërojë si mbret, do të ketë mbarësi dhe do të ushtrojë gjykimin dhe drejtësinë në vend.

Lu. 1:35 Dhe engjëlli duke u përgjigjur, i tha: «Fryma e Shenjtë do të vijë mbi ty dhe pushteti i Më të Lartit do të të mbulojë me hijen e vet; prandaj i shenjtë që do të lindë prej teje do të quhet Biri i Perëndisë.

Gjo. 8:46 Cili nga ju më bind për mëkat? Nëse flas të vërtetën, përse nuk më besoni?

Heb. 7:26 Sepse neve një kryepriфт i tillë na duhej: i shenjtë, i pafaj, i papërlyer, i ndarë nga mëkatarët dhe i bërë më i lartë se qiejt.

1 Pj. 1:19 Por me anë të gjakut të çmuar të Krishtit, si të Qengjit të patëmetë dhe të panjollë.

1 Pj. 2:22 «Ai nuk bëri asnjë mëkat dhe nuk u gjet asnjë mashtrim në gojën e tij».

1 Pj. 3:18 Sepse edhe Krishti ka vuajtur një herë për mëkatet, i drejti për të padrejtët, për të na çuar te Perëndia. U vra sipas mishit, por u ngjall me anë të Frymës.

- d **1 Tim. 2:5** Sepse një është Perëndia, dhe një është ndërmjetësi midis Perëndisë dhe njerëzve: njeriu Krishti Jezu.

1 Tim. 3:16 Dhe pa kundërshtim misteri i perëndishmërisë është i madh: Perëndia u shfaq në mish, u drejtësua në Frymë, iu duk engjëjve, u predikua ndër paganë, u besua në botë, u ngrit në lavdi.

Mt. 1:23 «Ja, virgjëresha do të mbetet shtatzënë e do të lindë një djalë, dhe do t'i vënë emrin Emanuel, që e përktër do të thotë: «Perëndia me ne»».

Lu. 2:11 Sepse sot në qytetin e Davidit lindi për ju një Shpëtimtar, që është Krishti, Zoti.

Heb. 2:9 Por atë, që u bë për pak kohë më i vogël se engjëjt, Jezusin, e shikojmë të kurorëzuar me lavdi dhe nder, për shkak të vuajtjes së vdekjes, që me anë të hirit të Perëndisë për të gjithë njerëzit, të shijonte vdekjen.

- e **1 Kor. 1:30** Edhe prej tij ju jeni në Krishtin Jezu, i cili u bë për ne urtësi prej Perëndisë, drejtësi edhe shenjtërim dhe shpengim.

Pyetja 19

Nga e di ti këtë?

Përgjigjja:

Nga Ungjilli i shenjtë, të cilin Vetë Perëndia e zbuloi në Parajsë^a dhe më vonë e shpalli me anë të patriarkëve^b dhe profetëve^c; dhe e paraqiti me anë të flijimeve dhe ceremonive të tjera të

ligjit^d; dhe së fundi e ka përmbushur me anë të Birit të Tij të vetëmlindur^e.

a **Zan. 3:15** «Dhe unë do të shtie armiqësi midis teje dhe gruas, midis farës sate dhe farës së saj; fara e saj do të shtypë kokën tënde dhe ti do të plagosësh thembrën e farës së saj».

b **Zan. 12:3** «Dhe unë do të bekoj të gjithë ata që do të të bekojnë dhe do të mallkoj ata që do të të mallkojnë; te ti do të jenë të bekuara tërë familjet e tokës».

Zan. 22:18 «Dhe tërë kombet e tokës do të bekohen te pasardhja jote, sepse ti iu binde zërit tim».

Zan. 49:10 Skeptri nuk do t'i hiqet Judës, as bastuni i komandimit nga këmbët e tij, derisa të vijë Shilohu; dhe atij do t'i binden popujt.

c **Isa. 53.**

Isa. 42:1–4 «Ja shërbëtori im, që unë përkrah, i zgjedhuri im që më kënaq shpirtin. Kam vënë Frymën time mbi të; ai do t'ju sjell drejtësinë kombeve. ²Nuk do të bërtasë, nuk do ta ngrejë zërin, nuk do të bëjë të dëgjohej zëri i tij nëpër rrugë. ³Nuk do ta copëtojë kallamin e thyer dhe nuk do ta shuajë kandilin që bën tym; do ta paraqesë drejtësinë sipas së vërtetës. ⁴Ai nuk do të ligështohet dhe nuk do të shkurajohet, derisa të vendosë drejtësinë mbi tokë; dhe ishujt do të presin ligjin e tij».

Isa. 43:25 Unë, pikërisht unë, jam ai që për hir të vetvetes fshij shkeljet e tua dhe nuk do t'i mbaj mend mëkatet e tua.

Isa. 49:5–6 Dhe tani thotë ZOTI që më ka formuar që në bark të nënës, që të jem shërbëtori i tij, që t'i sjell atij përsëri Jakobin dhe që të mbledh rreth tij Izraelin (unë jam i nderuar në sytë e ZOTI dhe Perëndia im është forca ime). ⁶Ai thotë: «Është tepër pak që ti të jesh shërbëtori im për të lartuar përsëri fiset e Jakobit dhe për të kthyer ata që kanë shpëtuar nga Izraeli. Të kam vendosur si dritën e kombeve, që të jesh shpëtimi im deri në skajet e tokës».

Isa. 49:22–23 Kështu thotë Zoti, ZOTI: «Ja, unë do të çoj dorën time mbi kombet, do të ngre flamurin tim mbi popujt; atëherë do t'i sjellin bijtë e tu në krahë dhe vajzat e tua do t'i sjellin mbi supe. ²³Mbretërit do të jenë baballarët tuaj birësues dhe mbretëreshat e tyre do të jenë tajat tua; ata do të bien përmbys para teje me fytyrën përtokë dhe do të lëpijnë pluhurin e këmbëve të tua; kështu do të mësosh që unë jam ZOTI dhe ata që shpresojnë tek unë nuk do të turpërohen.

Jer. 23:5–6 «Ja, ditët po vijnë», thotë ZOTI, «në të cilat do të ngre nga Davidi një filiz të drejtë, që do të mbretërojë si mbret, do të ketë mbarësi dhe do të ushtrojë gjykimin dhe drejtësinë në vend. ⁶Në ditët e tij Juda do të shpëtohet dhe Izraeli do të qëndrojë në siguri. Ky do të jetë emri me të cilin do të thirret: “ZOTI drejtësia jonë.”

Jer. 31:32–33 “...jo si besëlidhja që kam vendosur me etërit e tyre ditën kur i zura për dore për t'i nxjerrë nga vendi i Egjiptit, sepse ata e shkelën besëlidhjen time, ndonëse unë isha i zoti i tyre», thotë ZOTI. ³³«Por kjo është besëlidhja që do të vendos me shtëpinë e Izraelit mbas atyre ditëve», thotë ZOTI: «Do ta shtie ligjin tim në mendjen e tyre dhe do ta shkruaj mbi zemrën e tyre, dhe unë do të jem ZOTI i tyre dhe ata do të jenë populli im».

Jer. 32:39–41 Do t'u jap një zemër të vetme, një rrugë të vetme, që të kenë frikë nga unë përjetë për të mirën e tyre dhe të bijve të tyre. ⁴⁰Do të bëj me ta një besëlidhje të përjetshme; nuk do të largohem më prej tyre dhe do t'u bëj të mira dhe do të shtie në zemrën e tyre frikën, me qëllim që të mos më braktisin. ⁴¹Do të ndiej gëzim duke u bërë të mirë dhe do t'i mbjell në mënyrë të qëndrueshme në këtë vend me gjithë zemrën time dhe me gjithë shpirtin tim».

Mik. 7:18–20 Cili Perëndi është si ti, që fal paudhësinë dhe e kapërcen shkeljen e mbetjes së trashëgimisë së tij? Ai nuk e mban përgjithnjë zemërimin e tij, sepse i pëlqen të jetë i mëshirshëm. ¹⁹Atij do t'i vijë përsëri keq për ne, do të shkelë paudhësitë tona. Ti do të hedhësh në fund të detit tërë mëkatet tona. ²⁰Ti do t'ia tregosh besnikërinë tënde Jakobit dhe dhembshurinë tënde Abrahamit, siç iu betove etërve tanë qysh në kohërat e lashta.

Vep. 10:43 «Për të dëshmojnë të gjithë profetët, se me anë të emrit të tij merr faljen e mëkateve kushdo, që beson në të».

Vep. 3:22–24 Sepse Moisiu, u tha etërve: “Zoti, Perëndia juaj do të ngjallë për ju një profet si unë nga mesi i vëllezërve tuaj; dëgjojeni në të gjitha gjërat që ai do t'ju thotë! ²³Por do të ndodhë që çdo shpirt, që nuk do ta dëgjojë atë profet, do të shfaroset prej mesit të popullit”. ²⁴Por edhe të gjithë profetët, sa kanë folur që nga Samueli e këtej, i kanë paralajmëruar këto ditë.

Rom. 1:2 Që ai kishte premtuar më parë, me anë të profetëve të tij, në Shkrimet e Shenjta.

Heb. 1:1 Perëndia, mbasi u foli së lashti shumë herë dhe në shumë mënyra etërve me anë të profetëve.

d **Heb. 10:1, 7** Sepse ligji, duke pasur hijen e të mirave, që kanë për të ardhur, dhe jo shëmbëllimin vetë të

gjërave, nuk mundet kurrë që t'i bëjë të përkryer ata që i afrohen Perëndisë me anë të të njëjtave flijime, që ofrohen vazhdimisht, vit për vit...⁷ Atëherë unë thashë: «Ja, unë po vij; në rrotullin e librit është shkruar për mua; "për të bërë, o Perëndi, vullnetin tënd"».

Kol. 2:6-7 Ashtu si e keni marrë Krishtin Jezus, Zotin, ashtu, pra, ecni në të, ⁷duke pasur rrënjë dhe duke u ndërtuar në të, dhe duke u forcuar në besim ashtu sikurse u mësuar, duke tepruar në të me falënderim.

Gjo. 5:46 Sepse në qoftë se ju do t'i kishit besuar Moisiut, do të më besonit edhe mua, sepse ai ka shkruar për mua.
Rom. 10:4 Sepse fundi i ligjit është Krishti, për drejtësi të kujtdo që beson.

Gal. 4:4 Por, kur erdhi plotësimi i kohës, Perëndia dërgoi Birin e tij, të lindur prej gruaje, të vënë nën ligj.

Gal. 3:24 Kështu ligji që mësuesi ynë për te Krishti, që ne të drejtësohemi prej besimit.

Kol. 2:16-17 Prandaj askush të mos ju gjykojë për ushqime ose pije, për festa o hënë të re, apo shabate; ¹⁷këto gjëra janë hija e atyre që kanë për të ardhur; por trupi është i Krishtit.

DITA E ZOTIT, 7

Pyetja 20

Atëherë, a janë të gjithë njerëzit, siç u mallkuan në Adamin, të shpëtuar nga Krishti?

Përgjigjja:

Jo^a; vetëm ata që shartohen në Të dhe pranojnë të gjitha bekimet e Tij, me anë të një besimi të vërtetë^b.

a Mt. 7:14 Sepse e ngushtë është dera dhe e shtrënguar është udha që çon në jetë! Dhe pak janë ata që e gjejnë!

Mt. 22:14 «Sepse shumë janë të thirrur, por pak të zgjedhur».

b Mr. 16:16 Ai që beson dhe pagëzohet do të shpëtohet; por ai që nuk beson, do të dënohet.

Gjo. 1:12 Por të gjithëve atyre që e pranuan, ai u dha pushtet të bëhen bij të Perëndisë, atyre që besojnë në emrin e tij.

Gjo. 3:16, 18, 36 Sepse Perëndia e deshi aq botën, sa dha Birin e tij të vetëmlindurin, që, kushdo që beson në të, të mos humbasë, por të ketë jetën e përjetshme. ¹⁸Ai që beson në të, nuk gjykohet, por ai që nuk beson, tashmë është gjykuar, sepse nuk ka besuar në emrin e Birit të vetëmlindur të Perëndisë. ³⁶«Ai që beson në Birin ka jetë të përjetshme, por ai që nuk i bindet Birit, nuk do të shohë jetë, por zemërimi i Perëndisë qëndron mbi të».

Isa. 53:11 Ai do të shikojë frytin e mundimit të shpirtit të tij dhe do të jetë i kënaqur; me anë të dëtorisë së tij, i drejti, shërbëtori im, do të bëjë të drejtë shumë veta, sepse do të marrë përsipër paudhësitë e tyre.

Psa. 2:12 Nënshtroni Birit, që të mos zemërohet dhe të mos vdisni rrugës, sepse zemërimi i tij mund të ndizet në një çast. Lum ata që gjejnë strehë tek ai.

Rom. 3:22 Madje, drejtësia e Perëndisë nëpërmjet besimit në Jezu Krishtin për të gjithë e mbi të gjithë ata që besojnë, sepse nuk ka dallim.

Rom. 11:20 Mirë, ato u këputën për mosbesimin, por ti qëndron për shkak të besimit; mos u mbaj me të lartë, por druaj.

Heb. 4:3 Sepse ne që besuam hymë në prehje, siç tha ai: «Kështu u betova në zemërimin tim: Nuk do të hyjnë në prehen time», ndonëse veprat e tij u bënë që nga themelimi i botës.

Heb. 5:9 Dhe, si u bë i përkryer, u bë shkaktari i shpëtimit të përjetshëm për të gjithë ata që i binden.

Heb. 10:39 Por ne nuk jemi nga ata që tërhiqen prapa për humbje, por nga ata që besojnë për shpëtimin e shpirtit.

Heb. 11:6 Edhe pa besim është e pamundur t'i pëlqesh Atij, sepse ai që i afrohet Perëndisë duhet të besojë se Perëndia është, dhe se është shpërblyesi i atyre që e kërkojnë atë.

Pyetja 21

Çështë besimi i vërtetë?

Përgjigja:

Besimi i vërtetë nuk është thjesht një njohuri e caktuar, me anë të së cilës konsideroj si të vërteta të gjitha ato që Perëndia na ka zbuluar në Fjalën e Tij^a, por edhe një siguri e palëkundur^b, të cilën Fryma e Shenjtë^c e vendos nëpërmjet Ungjillit në zemrën time^d, që jo vetëm të tjerëve, por edhe mua më jepen lirisht nga Perëndia falja e mëkatit, drejtësia e përrjetshme dhe shpëtimi^e, thjesht nga hiri, vetëm falë meritave të Krishtit^f.

a **Jak. 2:17** Kështu edhe besimi, në qoftë se s'ka vepra, është i vdekur në vetvete.

b **Heb. 11:1** Dhe besimi është siguria e gjërave që shpresohen, bindja e gjërave që nuk shihen.

Heb. 11:7 Me anë të besimit Noeu, i lajmëruar hyjnisht për ato që ende nuk shiheshin, druante Perëndinë dhe ndërtoi arkën për shpëtimin e shtëpisë së tij, me anë të të cilit e dënoi botën dhe u bë trashëgimtar i drejtësisë sipas besimit.

Rom. 4:18–21 Ai, duke shpresuar kundër çdo shprese, besoi për t'u bërë ati i shumë kombeve sipas asaj që i ishte thënë: «Kështu do të jetë pasardhja jote». ¹⁹Dhe, duke mos qenë i dobët në besim, nuk e mori parasysh trupin e tij, i bërë tashmë i vdekur (ishte pothuaj njëqind vjeç) as barkun e vdekur të Sarës. ²⁰Madje nuk dyshoi me mosbesim në premtimin e Perëndisë, por u forcua në besim duke i dhënë lavdi Perëndisë, ²¹plotësisht i bindur se atë që ai kishte premtuar ishte edhe i fuqishëm ta bënte

Rom. 10:10 Sepse me zemër, njeriu beson në drejtësi dhe me gojë bëhet rrëfim për shpëtim.

Heb. 4:16 Le t'i afrohemi, pra, me guxim fronit të hirit, që të marrim mëshirë e të gjejmë hir, për të pasur ndihmë në kohën e duhur.

c **Gal. 5:22** Por fryti i Frymës është: dashuria, gëzimi, paqja, zemërgjerësia, mirëdashja, mirësia, besimi, zemërbutësia, vetëpërmbytja.

Mt. 16:17 Dhe Jezusi, duke iu përgjigjur, i tha: «I lum je ti, o Simon, bir i Jonas, sepse këtë nuk ta zbuloi as mishi, as gjaku, por Ati im që është në qiej.

2 Kor. 4:13 Por, duke pasur të njëjtën frymë besimi, sikurse është shkruar: «Unë besova, prandaj fola», edhe ne besojmë, prandaj edhe flasim.

Gjo. 6:29 Jezusi u përgjigj dhe u tha atyre: «Kjo është vepra e Perëndisë: Që ju të besoni në atë që ka dërguar ai».

Ef. 2:8 Sepse, me anë të hirit jeni të shpëtuar, nëpërmjet besimit; dhe kjo jo prej jush, por është dhurata e Perëndisë.

Fil. 1:19 Sepse e di, se kjo do të më dalë për shpëtim, me anë të lutjes suaj dhe me ndihmën e Frymës së Jezu Krishtit.

Vep. 16:14 Dhe një grua, me emër Lidia, që ishte tregtare të purpurtash, nga qyteti i Tiatirës dhe që e adhuronte Perëndinë, po dëgjonte. Dhe Zoti ia hapi zemrën për të dëgjuar ato që thoshte Pali.

d **Rom. 1:16** Sepse, unë nuk kam turp për ungjillin e Krishtit, sepse ai është fuqia e Perëndisë për shpëtimin e cilitdo që beson, më parë judeun e pastaj grekun.

Rom. 10:17 Besimi, pra, vjen nga dëgjimi, dhe dëgjimi vjen nga fjala e Perëndisë.

1 Kor. 1:21 Sepse, duke qenë se nëpërmjet urtësisë së Perëndisë bota nuk e njohu Perëndinë me urtësinë e vet, Perëndisë i pëlqeu të shpëtojë ata që besojnë nëpërmjet marrëzisë së predikimit.

Vep. 10:44 Ndërsa Pjetri ende po i thoshte këto fjalë, Fryma e Shenjtë ra mbi të gjithë ata që po e dëgjonin fjalën.

e **Rom. 1:17** Sepse, drejtësia e Perëndisë është zbuluar në të prej besimit në besim siç është shkruar: «I drejti do të jetojë prej besimit».

Gal. 3:11 Por, që me anë të ligjit askush nuk drejtësohet përpara Perëndisë, është e qartë, sepse: «I drejti do të rrojë prej besimit».

Heb. 10:8 Mbasi tha: «Ti nuk deshe as flijim, as blatë, as holokauste, as flijime për mëkatën, që të blatohen sipas ligjit»,

Heb. 10:38 «Dhe i drejti do të jetojë prej besimit; por në qoftë se ndokush tërhiqet prapa, shpirti im nuk do të gjejë pëlqim në të».

Gal. 2:16 Duke ditur se njeriu nuk drejtësohet prej veprave të ligjit, por përmes besimit në Jezu Krishtin, besuam edhe ne në Jezu Krishtin, që të drejtësoheshim prej besimit në Krishtin dhe jo prej veprave të ligjit, sepse asnjë mish nuk do të drejtësohet prej veprave të ligjit.

f **Ef. 2:8** Sepse, me anë të hirit jeni të shpëtuar, nëpërmjet besimit; dhe kjo jo prej jush, por është dhurata e Perëndisë.

Rom. 3:24 Por janë drejtësuar falas me anë të hirit të tij, nëpërmjet shpengimit që është në Krishtin Jezus.
Rom. 5:19 Sepse, ashtu si nëpërmjet mosbindjes së një njeriu të vetëm, të shumtët u bënë mëkatarë, ashtu edhe nëpërmjet bindjes së një të vetmi, të shumtët do të bëhen të drejtë.
Lu. 1:77-78 “...për t’i dhënë popullit të tij njohurinë e shpëtimit, në faljen e mëkateve të tyre; ⁷⁸për shkak të thellësisë së mëshirës së Perëndisë tonë, për të cilën agimi nga lart na ka vizituar.

Pyetja 22

Atëherë, çfarë është e domosdoshme që të besojë një i krishterë?

Përgjigjja:

Të gjitha gjërat që na premtohen në Ungjill^a, të cilat Kredoja e Besimit tonë të krishterë (Besorja Apostolike) na i mëson shkurt, në mënyrë të përgjithshme dhe të padysuar.

- a **Gjo. 20:31** Por këto gjëra janë shkruar që ju të besoni se Jezusi është Krishti, Biri i Perëndisë dhe që, duke besuar, të keni jetë në emër të tij.
Mt. 28:19 Shkoni, pra, dhe bëni dishepuj të gjitha kombet duke i pagëzuar në emër të Atit e të Birit e të Frymës së Shenjtë.
Mr. 1:15 Dhe duke thënë: «U mbush koha dhe mbretëria e Perëndisë është afër. Pendohuni dhe besoni në ungjillin».

Pyetja 23

Cila është kjo kredo?

Përgjigjja:

- I. Unë besoj në Perëndinë Atë, të Gjithëpushtetshmin, Krijuesin e qiellit dhe të tokës
 - II. dhe në Jezu Krishtin, Birin e Tij të vetëmlindur, Zotin tonë,
 - III. i Cili u ngjiz nga Fryma e Shenjtë, u lind nga virgjëresha Mari;
 - IV. vuajti nën Ponc Pilatin, u kryqëzua, vdiq, u varros dhe zbriti në ferr.
 - V. Ditën e tretë Ai u ngrit prej së vdekurish,
 - VI. u ngjit në qiell dhe rri në të djathtën e Perëndisë, Atit të Gjithëpushtetshëm;
 - VII. prej nga do të vijë të gjykojë të gjallët dhe të vdekurit.
 - VIII. Unë besoj në Frymën e Shenjtë.
 - IX. Unë besoj një Kishë të shenjtë, të përgjithshme; bashkësinë e shenjtorëve,
 - X. faljen e mëkateve,
 - XI. ringjalljen e trupit
 - XII. dhe jetën e përzjetshme.
- Amen.

DITA E ZOTIT, 8

Pyetja 24

Si ndahet kjo kredo?

Përgjigjja:

Në tri pjesë; e para flet për Perëndinë Atin dhe krijimin tonë, e dyta për Perëndinë Bir dhe shpengimin tonë, e treta për Perëndinë Frymë e Shenjtë dhe shenjtërimin tonë.

Pyetja 25

Përderisa ka vetëm një Qenie hyjnore^a, pse flet për Atin, Birin dhe Frymën e Shenjtë?

Përgjigjja:

Sepse Perëndia e ka zbuluar Vetën në Fjalën e Tij kështu^b, që këta tre Persona të veçantë janë i vetmi Perëndi i vërtetë dhe i përjetshëm.

a **LiP. 6:4** Dëgjo, Izrael, ZOTI, Perëndia ynë, është ZOTI i vetëm.

Ef. 4:5–6 Një Zot, një besim, një pagëzim, “një Perëndi dhe Atë i të gjithëve, që është përmbi të gjithë, përmes të gjithëve dhe në ju të gjithë.

Isa. 44:6 Kështu thotë ZOTI, mbreti i Izraelit dhe Shpengimtari i tij, ZOTI i ushtrive: «Unë jam i pari dhe jam i fundit dhe përveç meje nuk ka Perëndi.

Isa. 45:5 Unë jam ZOTI dhe nuk ka asnjë tjetër; jashtë meje nuk ka Perëndi. Të kam rrethuar, ndonëse ti nuk më njihje.

1 Kor. 8:4–6 Pra, për sa i përket të ngrënit të flive që u bëhen idhujve, ne e dimë se idhulli nuk është asgjë në botë dhe se nuk ka Perëndi tjetër, veç një. ⁵Sepse, ndonëse ka të ashtuquajtura perëndi në qiell a në tokë (sikurse ka shumë perëndi dhe shumë zotër), ⁶por për ne ka vetëm një Perëndi, Ati nga i cili janë të gjitha gjërat dhe ne në të; dhe një Zot, Jezu Krishti, me anë të të cilit janë të gjitha gjërat, dhe ne jetojmë me anë të tij.

b **Isa. 61:1** Fryma e Zotit, ZOTI, është mbi mua, sepse ZOTI më ka vajosur për t’u dhënë një lajm të mirë të përlurur; më ka dërguar të lidh plagën e atyre që e kanë zemrën të thyer, t’u shpall çlirimin atyre në robëri, hapjen e burgut të burgosurve

Lu. 4:18 «Fryma e Zotit është mbi mua, sepse ai më vajosi për të ungjillëzuar të varfrit; ai më dërgoi për të shëruar ata që e kanë zemrën të thyer, për të shpallur çlirimin e të burgosurve dhe kthimin e të parit të verbërve, për të dërguar në liri të shtypurit.

Zan. 1:2–3 Toka ishte pa trajtë, e zbrazët dhe errësira mbulonte sipërfaqen e humnerës; dhe Fryma e Perëndisë lëvizte mbi sipërfaqen e ujërave. ³Pastaj Perëndia tha: «U bëftë drita!». Dhe drita u bë.

Psa. 33:6 Qiejt u bënë me anë të fjalës së ZOTIT dhe tërë ushtria e tyre me anë të frymës së gojës së tij.

Isa. 48:16 Afrohuni tek unë, dëgjoni këtë: “Qysh në fillim nuk fola në fshehtësi; kur këto fakte ndodhnin, unë isha atje. Dhe tani Zoti, ZOTI, dhe Fryma e tij më kanë dërguar”».

Mt. 3:16 Dhe Jezusi, sapo u pagëzua, doli nga uji; dhe, ja, qiejt u hapën dhe ai pa Frymën e Perëndisë të zbrësë si një pëllumb e të vijë mbi të;

Mt. 3:17 Dhe, ja, një zë prej qiellit që tha: «Ky është Biri im i dashur, në të cilin gjeta pëlqim».

Mt. 28:19 Shkoni, pra, dhe bëni dishepuj të gjitha kombet duke i pagëzuar në emër të Atit e të Birit e të Frymës së Shenjtë.

1 Gjo. 5:7 Sepse tre janë ata që dëshmojnë në qiell: Ati, Fjala dhe Fryma e Shenjtë; dhe këta të tre janë një.

Isa. 6:1–3 Në vitin e vdekjes së mbretit Uziah unë pashë Zotin të ulur mbi një fron të ngritur dhe të lartë, dhe cepat e mantelit të tij mbushnin tempullin. ²Mbi të ishin serafinët; secili prej tyre kishte gjashtë krahë: me dy mbulonte fytyrën, me dy të tjerë këmbët dhe me dy fluturonte. ³Njëri i bërtiste tjetrit dhe i thoshte: «I shenjtë, i shenjtë, i shenjtë është ZOTI i ushtrive. Tërë toka është plot me lavdinë e tij».

Gjo. 14:26 Por Ngushëlluesi, Fryma e Shenjtë, që Ati do ta dërgojë në emrin tim, ai do t’ju mësojë çdo gjë dhe do t’ju kujtojë të gjitha këto që ju thashë.

Gjo. 15:26 Por kur të vijë Ngushëlluesi, që unë do t’ju dërgoj prej Atit, Fryma e së Vërtetës, që del nga Ati, ai do të dëshmojë për mua.

2 Kor. 13:13 Hiri i Zotit Jezu Krisht, dashuria e Perëndisë dhe bashkësia e Frymës së Shenjtë qofshin me ju të gjithë. Amen!

Gal. 4:6 Dhe, duke qenë se jeni bij, Perëndia dërgoi Frymën e Birit të tij në zemrat tuaja që thërret: « Abba, Atë! ».

Ef. 2:18 Sepse, përmes tij, që të dy kemi hyrje tek Ati nëpër një Frymë të vetëm.

Tit. 3:4–6 Po kur u shfaq dashamirësia e Perëndisë, Shpëtimtarit tonë dhe dashuria e tij për njerëzit, ⁵na shpëtoi jo me anë të veprave të drejta, që ne bëmë, por sipas mëshirës së tij, me anë të larjes së rilindjes dhe të ripërtëritjes së Frymës së Shenjtë, ⁶të cilën e derdhi me mbushulli mbi ne, me anë të Jezu Krishtit, Shpëtimtarit tonë.

PERËNDIA ATË

DITA E ZOTIT, 9

Pyetja 26

Çfarë beson ti, kur thua: “Unë besoj në Perëndinë Atë, të Gjithëpushtetshmin, Krijuesin e qiellit dhe të tokës”?

Përgjigjja:

Që Ati i përjetshëm i Zotit tonë Jezu Krisht (i Cili e bëri nga hiçi qiellin dhe tokën, me gjithçka që është në to^a; i Cili gjithashtu i mban dhe i sundon ato me anë të planit dhe providencës së Tij të përjetshme)^b është, për hir të Krishtit, Birit të Tij, Perëndia dhe Ati im^c; tek i Cili varem plotësisht dhe s’kam dyshim që Ai do të më japë të gjitha gjërat e nevojshme për trupin dhe shpirtin^d; dhe, për më tepër, se Ai do të bëjë që, çfarëdolloj të këqijash që Ai lejon për mua në këtë luginë lotësh, të kthehen në dobinë time^e; sepse Ai është në gjendje ta bëjë këtë, duke qenë Perëndi i Gjithëpushtetshëm^f dhe i vullnetshëm, duke qenë një Atë besnik^g.

a Zan. 1 & 2

Eks. 20:11 Sepse në gjashtë ditë ZOTI krijoi qiejt dhe tokën, detin dhe gjithçka që është në ta, dhe ditën e shtatë ai pushoi; prandaj ZOTI e ka bekuar ditën e shabatit dhe e ka shenjtëruar atë.

Job. 33:4 Fryma e Perëndisë më ka krijuar dhe hukatja e të Plotfuqishmit më jep jetë.

Job. 38 & 39

Vep. 4:24 Por kur i dëgjuan këto, ata me një mendje e ngritën zërin te Perëndia dhe thanë: «O Zot, ti je Perëndia që ke bërë qiellin, dheun, detin dhe gjithçka që është në ta.»

Vep. 14:15 «O burra, ç’ bëni këtë? Edhe ne jemi njerëz me të njëjtat ndjenja si ju, dhe po ju shpallim lajmin e mirë, që ju nga këto gjëra të kota të ktheheni te Perëndia i gjallë që ka bërë qiellin dhe dheun dhe detin dhe gjithçka në ta.»

Psa. 33:6 Qiejt u bënë me anë të fjalës së ZOTIT dhe tërë ushtria e tyre me anë të frymës së gojës së tij.

Isa. 45:7 «Unë formoj dritën dhe krijoj terrin, sjell mirëqenien dhe krijoj fatkeqësinë. Unë, ZOTI, i bëj të gjitha këto gjëra».

- b **Heb. 1:3** Ai, duke qenë shkëlqimi i lavdisë së tij dhe vula e qenies së tij dhe, duke i mbajtur të gjitha me fjalën e fuqisë së tij, mbasi e bëri, përmes vetes së tij, pastrimin e mëkateve tona, u ul në të djathtë të Madhërisë, në vendet e larta.

Psa. 104:27–30 Të gjithë presin që ti t’u japësh ushqimin në kohën e duhur. ²⁸Ti ua jep atyre dhe ata e mbledhin; ti hap dorën dhe ngopen me të mira. ²⁹Ti fsheh fytyrën tënde dhe ata e humbasin fare; ti tërheq frymën e tyre, dhe ata vdesin duke u kthyer përsëri në pluhurin e tyre. ³⁰Ti dërgon frymën tënde dhe ata krijojnë, kështu ti ripërtërin faqen e dheut.

Psa. 115:3 Por Perëndia ynë është në qiejt dhe bën tërë atë që i pëlqen.

Mt. 10:29 A nuk shiten vallë dy harabela për një aspër? Dhe, megjithatë asnjë prej tyre nuk bie përtokë pa dashjen e Atit tuaj.

Ef. 1:11 Në të cilin edhe u zgjodhëm për trashëgimi, duke qenë të paracaktuar sipas vendimit të atij që

vepron gjithçka sipas këshillës së vullnetit të tij.

- c **Gjo. 1:12** Por të gjithëve atyre që e pranuan, ai u dha pushtet të bëhen bij të Perëndisë, atyre që besojnë në emrin e tij.

Rom. 8:15 Sepse ju nuk keni marrë një frymë skllavërie, që të keni përsëri frikë, po keni marrë frymën e birërisë, me anë të së cilës ne thërrasim: «Aba, o Atë!».

Gal. 4:3–7 Kështu edhe ne, kur ishim të mitur, ishim të robëruar nën elementet e botës, ⁴por, kur erdhi plotësimi i kohës, Perëndia dërgoi Birin e tij, të lindur prej gruaje, të vënë nën ligj, ⁵që të shpengonte ata që ishin nën ligj, që ne të fitojmë birërinë. ⁶Dhe, duke qenë se jeni bij, Perëndia dërgoi Frymën e Birit të tij në zemrat tuaja që thërret: «Abba, Atë!». ⁷Prandaj ti nuk je më skllav, por bir; dhe në qoftë se je bir, je edhe trashëgimtar i Perëndisë, përmes Krishtit.

Ef. 1:5 Duke na paracaktuar për birësim për veten e tij me anë të Jezu Krishtit, sipas pëlqimit të vullnetit të vet.

- d **Psa. 55:22** Hidh mbi ZOTIN barrën tënde dhe ai do të të mbajë; ai nuk do të lejojë kurrë që i drejti të lëkundet.

Mt. 6:25 Prandaj po ju them: mos u shqetësoni për jetën tuaj, për atë që do të hani dhe do të pini, as për trupin tuaj, për atë që do të vishni. A nuk është vallë jeta më shumë se ushqimi dhe trupi se veshja?

Lu. 12:22 Pastaj u tha dishepujve të vet: «Prandaj po ju them: mos u shqetësoni për jetën tuaj se çfarë do të hani, as për trupin tuaj se çfarë do të vishni.»

- e **Rom. 8:28** Dhe ne e dimë se të gjitha gjërat bashkëveprojnë për të mirë për ata që e duan Perëndinë, për ata që janë të thirrur sipas qëllimit të tij.

- f **Isa. 46:4** “Deri në pleqërinë tuaj unë do të mbetem po ai, unë do t’ju mbaj derisa të thinjeni. Unë ju kam bërë dhe unë do t’ju përkrah; po, do t’ju mbaj dhe do t’ju shpëtoj”.

Rom. 10:12 Sepse nuk ka dallim në mes judeut dhe grekut, sepse i njëjti Zot është i të gjithëve, i pasur për të gjithë ata që e thërrasin.

- g **Mt. 6:32–33** Sepse paganët i kërkojnë të gjitha këto; Ati juaj qiellor, pra, e di mirë se ju keni nevojë për këto të gjitha. ³³Por para së gjithash kërkon mbretërinë e Perëndisë dhe drejtësinë e tij dhe të gjitha këto do t’ju shtohen.

Mt. 7:9–11 Ose cili është ai njeri ndër ju që, po t’i lypë i biri bukë, do t’i japë një gur? ¹⁰Dhe po t’i lypë një peshk, t’i japë një gjarpër? ¹¹Nëse pra, ju, që jeni të ligj, dini t’u jepni dhurata të mira bijve tuaj, aq më tepër Ati juaj, që është në qiej, do t’u japë gjëra të mira atyre që ia lypin atij.

DITA E ZOTIT, 10

Pyetja 27

Çfarë do të thotë “providenca e Perëndisë”?

Përgjigja:

Fuqia e gjithëpushtetshme dhe e gjithëpranishme e Perëndisë^a, me anë të së cilës, si nga dora e Tij, Ai mban dhe qeveris qiellin, tokën dhe të gjitha krijesat^b; kështu që bimët dhe bari, shiu dhe thatësira^c, vitet e begata dhe shterpë, ushqimet dhe pijet, shëndeti dhe sëmundja^d, pasuria dhe varfëria^e, po, të gjitha gjërat vijnë, jo nga rastësia, por nga dora e Tij atërore^f.

- a **Vep. 17:25–28** “...dhe as shërbehet nga duart e njerëzve, sikur të kishte nevojë për ndonjë gjë, sepse ai u jep të gjithëve jetë, frymëmarrje dhe gjithçka; ²⁶dhe ai ka bërë nga një gjak i vetëm çdo komb njerëzish, që të banojnë në mbarë fagen e dheut, dhe paracaktoi kohërat me radhë dhe kufijtë e banimit të tyre, ²⁷që të kërkojnë Zotin, mbase mund ta prekin edhe ta gjejnë, ndonëse ai nuk është larg nga secili prej nesh. ²⁸Sepse në të ne jetojmë, lëvizim dhe jemi, sikurse kanë thënë edhe disa nga poetët tuaj: “Sepse jemi edhe ne pasardhës të tij”.

Jer. 23:23–24 «A jam unë vetëm një Perëndi nga afër», thotë ZOTI, «apo dhe një Perëndi nga larg? ²⁴A mund

të fshihet dikush në vende të fshehta që unë të mos e shoh?», thotë ZOTI. «A nuk e mbush unë qiellin dhe tokën?», thotë ZOTI.

Isa. 29:15–16 Mjerë ata që shkojnë në vende të thella për t'ia fshehur ZOTIT planet e tyre, që i bëjnë veprat e tyre në terr dhe thonë: «Kush na sheh? Kush na njeh?». ¹⁶I keni përmbysur plotësisht gjërat. A mund të konsiderohet poçari i barabartë me argjilën? A mundet vepra t'i thotë atij që e ka bërë: «Nuk më ka bërë ai»? ose gjëja e formuar t'i thotë atij që e ka formuar: «Nuk ka zgjuarsi»?

Eze. 8:12 Pastaj më tha: «Bir njeriu, a e ke parë atë që bëjnë pleqtë e shtëpisë së Izraelit në errësirë, secili në dhomën e figurave të tij? Në fakt thonë: “ZOTI nuk na shikon, ZOTI e ka braktisur vendin”».

- b **Heb. 1:3** Ai, duke qenë shkëlqimi i lavdisë së tij dhe vula e qenies së tij dhe, duke i mbajtur të gjitha me fjalën e fuqisë së tij, mbasi e bëri, përmes vetes së tij, pastrimin e mëkateve tona, u ul në të djathtë të Madhërisë, në vendet e larta.

- c **Jer. 5:24** Nuk thonë në zemrën e tyre: “Kemi frikë nga ZOTI, Perëndia ynë, që na jep shiun në kohën e duhur, të parin dhe të fundit shi, që mban për ne javët e caktuara për korrje”.

Vep. 14:17 «Por nuk e la veten e vet pa dëshmi, duke bërë mirë, duke na dhënë shira prej qiellit dhe stinë të frytshme dhe duke i mbushur zemrat tona me ushqim dhe gëzim».

- d **Gjo. 9:3** Jezusi u përgjigj: «As ky s'ka mëkatuar, as prindërit e tij, por kjo ndodhi që tek ai të dëftohen veprat e Perëndisë».

- e **Fja. 22:2** I pasuri dhe i varfri bashkohen në një gjë: të dy i ka bërë ZOTI.

- f **Mt. 10:29** A nuk shiten vallë dy harabela për një ashpër? Dhe, megjithatë asnjë prej tyre nuk bie përtokë pa dashjen e Atit tuaj.

Fja. 16:33 Shorti hidhet që në barkun e nënës, por çdo vendim varet nga ZOTI.

Pyetja 28

Ç'dobi kemi ne të dimë se Perëndia i ka krijuar dhe se me anë të providencës së Tij i mban ende të gjitha gjërat?

Përgjigja:

Që të jemi të duruar në varfëri^a; mirënjohës në begati^b; dhe që, në të gjitha që mund të na ndodhin në të ardhmen, të vendosim besimin tonë të fortë te Perëndia dhe Ati ynë besnik^c, kështu që asgjë s'do të na ndajë nga dashuria e Tij^d, sepse të gjitha krijesat janë në dorën e Tij në atë masë, sa që s'mund të bëjnë asnjë lëvizje pa vullnetin e Tij^e.

- a **Rom. 5:3–4** Dhe jo vetëm kaq, por mburremi edhe në shtrëngime, duke ditur që shtrëngimi prodhon durimin, ⁴durimi përvojën dhe përvoja shpresën.

Rom. 8:28 Dhe ne e dimë se të gjitha gjërat bashkëveprojnë për të mirë për ata që e duan Perëndinë, për ata që janë të thirrur sipas qëllimit të tij.

Jak. 1:3 Duke e ditur se prova e besimit tuaj sjell durim.

Psa. 39:9 Do të qëndroj në heshtje, nuk kam për të hapur gojën, sepse ti je ai që vepron.

Job. 1:21–22 “...dhe tha: «Lakuriq dola nga barku i nënës sime dhe lakuriq do të kthehem. ZOTI ka dhënë dhe ZOTI ka marrë. Qoftë i bekuar emri i ZOTIT». ²²Në të gjitha këto Jobi nuk mëkatoi dhe nuk e paditi Perëndinë për ndonjë padrejtësi.

- b **1 The. 5:18** Në gjithçka falënderoni, sepse i tillë është vullneti i Perëndisë në Krishtin Jezus për ju.

LiP. 8:10 Do të hash, pra, dhe do të ngopesh, dhe do të bekosh ZOTIN, Perëndinë tënd, për shkak të vendit të bukur që të ka dhënë.

- c **Psa. 55:22** Hidh mbi ZOTIN barrën tënde dhe ai do të të mbajë; ai nuk do të lejojë kurrë që i drejti të lëkundet.

1 Pj. 5:7 Duke hedhur gjithë merakun tuaj mbi të, sepse ai kujdeset për ju.

- d **Rom. 8:38–39** Sepse jam i bindur se as vdekja, as jeta, as engjëjt, as pushtetet, as fuqitë dhe as gjërat e tashme, as gjërat e ardhshme, ³⁹as lartësitë, as thellësitë, as ndonjë tjetër krijesë, nuk do të mund të na ndajë nga dashuria e Perëndisë që është në Jezu Krishtin, Zotin tonë.

Gjo. 10:28 Dhe unë u jap atyre jetë të përjetshme dhe nuk do të humbasin aspak, përjetë, dhe askush nuk do t'i rrëmbejë nga dora ime.

- e **Job. 1:12** ZOTI i tha Satanit: «Ja, të gjitha ato që ai zotëron janë në pushtetin tënd, por mos e shtri dorën mbi personin e tij». Kështu Satani u largua nga prania e ZOTIT.
- Job. 2:6** ZOTI i tha Satanit: «Ja, ai është në pushtetin tënd, por mos ia merr jetën».
- Fja. 21:1** Zemra e mbretit në duart e ZOTIT është si rrjedhat e ujit; e drejton ku do ai.
- Isa. 10:15** Mos vallë sëpata lëvdohet me atë që pret me të ose mburret sharra me atë që e përdor? Siç shufra të duhej të drejtonte atë që e ngre, apo shkopi të mund të ngrihej a thua se nuk është prej druri!
- Vep. 17:25** Dhe as shërbehet nga duart e njerëzve, sikur të kishte nevojë për ndonjë gjë, sepse ai u jep të gjithëve jetë, frymëmarrje dhe gjithçka
- Vep. 17:28** Sepse në të ne jetojmë, lëvizim dhe jemi, sikurse kanë thënë edhe disa nga poetët tuaj: “Sepse jemi edhe ne pasardhës të tij”.

PERËNDIA BIR

DITA E ZOTIT, 11

Pyetja 29

Pse Biri i Perëndisë quhet Jezus, d.m.th. Shpëtimtar?

Përgjigjja:

Sepse Ai na shpëton dhe na çliron nga të gjitha mëkatet tona^a; po ashtu, sepse nuk duhet të kërkojmë e as nuk mund të gjejmë shpëtim në ndonjë tjetër^b.

- a **Mt. 1:21** «Dhe ajo do të lindë një djalë dhe do t'i vësh emrin Jezus, sepse ai do të shpëtojë popullin e tij nga mëkatet e tyre».
- Heb. 7:25** Prandaj edhe mund të shpëtojë plotësisht ata, që me anë të tij i afrohen Perëndisë, sepse gjithmonë rron që të ndërmjetësojë për ta.
- b **Vep. 4:12** «Dhe në asnjë tjetër nuk ka shpëtim, sepse nuk ka asnjë emër tjetër nën qiell, që u është dhënë njerëzve, me anë të të cilit duhet të shpëtohem».
- Gjo. 15:4–5** Qëndroni në mua dhe unë në ju; sikurse shermendi nuk mund të japë fryt nga vetja, po që se nuk qëndron në hardhi, kështu as ju, nëse nuk qëndroni në mua. ⁵Unë jam hardhia, ju jeni shermendet; kush qëndron në mua dhe unë në të, ai jep shumë fryt, sepse pa mua nuk mund të bëni asgjë.
- 1 Tim. 2:5** Sepse një është Perëndia, dhe një është ndërmjetësi midis Perëndisë dhe njerëzve: njeriu Krishti Jezus.
- Isa. 43:11** Unë, unë jam ZOTI dhe përveç meje nuk ka Shpëtimtar tjetër.
- 1 Gjo. 5:11** Dhe dëshmia është kjo: Perëndia na dha jetën e përjetshme dhe kjo jetë është në Birin e tij.

Pyetja 30

A besojnë, pra, në Jezusin, të vetmin Shpëtimtar, ata që e kërkojnë shpëtimin dhe lumturinë prej shenjtorëve, prej vetes së tyre, apo gjetkë?

Përgjigjja:

Nuk besojnë; sepse, edhe nëse mburren në Të me fjalë, prapë në vepra e mohojnë Jezusin, të vetmin Shpëtimtar^a; sepse një nga këto dy gjëra duhet të jetë e vërtetë: ose që Jezusi nuk është një Shpëtimtar i plotë, ose që ata që e pranojnë këtë Shpëtimtar me një besim të vërtetë, duhet të gjejnë në Të të gjitha gjërat e domosdoshme për shpëtimin e tyre^b.

- a **1 Kor. 1:13** Vallë i ndarë qenka Krishti? Mos Pali u kryqëzua për ju? Apo ju u pagëzuat në emër të Palit?

1 Kor. 1:30–31 Edhe prej tij ju jeni në Krishtin Jezus, i cili u bë për ne urtësi prej Perëndisë, drejtësi edhe shenjtërim dhe shpengim; ³¹që, sikurse është shkruar: «Ai që mburret, le të mburret në Zotin».

Gal. 5:4 Ju që kërkonti të drejtësoheni nëpërmjet ligjit, u ndatë nga Krishti; ratë poshtë nga hiri.

- b **Heb. 12:2** Duke i drejtuar sytë të Jezusi, kreu dhe plotësonjësi i besimit, i cili, për gëzimin që ishte përpara tij, duroi kryqin duke e përcëmuar fyerjen dhe u ul në të djathtë të fronit të Perëndisë.

Isa. 9:6 Nuk do të ketë të sosur rritja e perandorisë së tij dhe pagja mbi fronin e Davidit dhe në mbretërinë e tij, për ta vendosur pa u tundur dhe për ta përforcuar me anë të mençurisë dhe të drejtësisë, tani dhe përjetë. Këtë ka për të bërë zelli i ZOTIT të ushtrive.

Kol. 1:13–20 Ai na nxori nga pushteti i errësirës dhe na zhvendosi në mbretërinë e Birit të tij të dashur, ¹⁴në të cilën ne kemi shpengimin me anë të gjakut të tij, faljen e mëkateve. ¹⁵Ai është shëmbëllimi i Perëndisë të padukshëm, i parëlinduri i çdo krijese, ¹⁶sepse në të u krijuan të gjitha, ato që janë në qiej dhe ato mbi dhé, ato që duken dhe ato që nuk duken: frone, zotërime, principata dhe pushtete; të gjitha janë krijuar me anë të tij dhe ndaj tij. ¹⁷Ai është përpara të gjithave dhe të gjitha qëndrojnë nëpërmjet tij. ¹⁸Ai vetë është kreu i trupit, pra i kishës; ai është fillimi, i parëlinduri prej së vdekurish, që ai të bëhet i pari në të gjitha, ¹⁹sepse Atit i pëlqeu që në të të banojë e gjithë plotësia, ²⁰dhe, përmes tij, t'i pajtojë të gjitha me veten e tij; pasi bëri paqe, përmes gjakut të tij në kryq; përmes tij, si ato mbi tokë, si ato në qiej.

Kol. 2:10 Dhe ju jeni të mbushur në të, i cili është kreu e çdo principate e pushteti.

1 Gjo. 1:7 Por, po të ecim në dritë, sikurse ai është në dritë, kemi bashkësi me njëri-tjetrin, dhe gjaku i Jezu Krishtit, Birit të tij, na pastron nga çdo mëkat.

DITA E ZOTIT, 12

Pyetja 31

Pse Ai quhet Krisht, d.m.th. i Vajosur?

Përgjigjja:

Sepse Ai është caktuar nga Perëndia Atë dhe është vajosur me Frymën e Shenjtë^a, për të qenë Profeti dhe Mësuesi ynë kryesor^b; i Cili na ka zbuluar plotësisht planin dhe vullnetin e fshehtë të Perëndisë për shpengimin tonë^c; dhe për të qenë i vetmi Kryeprift yni^d, i Cili na ka shpenguar me anë të flijimit të vetëm të trupit të Vet^e dhe bën një ndërmjetësim të vazhdueshëm me Atin për ne^f; si dhe për të qenë Mbreti ynë i përvetshëm, i Cili na qeveris me anë të Fjalës dhe Frymës së Tij dhe na mbron e na ruan në gëzimin e atij shpëtimi që na e bleu Ai^g.

- a **Psa. 45:7** Ti e do drejtësinë dhe e urren mbrapshtinë; prandaj Perëndia, Perëndia yt, të ka vajosur me vaj gëzimi përmbi shokët e tu.

Heb. 1:9 E ke dashur drejtësinë dhe e ke urrer paudhësinë; prandaj Perëndia, Perëndia yt, të vajosi me vaj ngazëllimi përmbi shokët e tu».

Isa. 61:1 Fryma e Zotit, ZOTI, është mbi mua, sepse ZOTI më ka vajosur për t'u dhënë një lajm të mirë të përlururve; më ka dërguar të lidh plagën e atyre që e kanë zemrën të thyer, t'u shpall çlirimin atyre në robëri, hapjen e burgut të burgosurve.

Lu. 4:18 «Fryma e Zotit është mbi mua, sepse ai më vajosi për të ungjillëzuar të varfrit; ai më dërgoi për të shëruar ata që e kanë zemrën të thyer, për të shpallur çlirimin e të burgosurve dhe kthimin e të parit të verbërve, për të dërguar në liri të shtypurit.»

- b **LiP. 18:15** ZOTI, Perëndia yt, do të ngrejë për ty një profet si unë në mes teje dhe vëllezërve të tu; atë keni për ta dëgjuar.

Vep. 3:22 Sepse Moisiu, u tha etërve: «Zoti, Perëndia juaj do të ngjallë për ju një profet si unë nga mesi i vëllezërve tuaj; dëgjojeni në të gjitha gjërat që ai do t'ju thotë!

Vep. 7:37 Ky është ai Moisi që u tha bijve të Izraelit: «Zoti, Perëndia juaj do të ngrejë për ju, prej vëllezërve të tu, një profet si unë. Atë dëgjoni!»

Isa. 55:4 Ja, unë ia dhashë si dëshmitar popujve, si princ dhe komandant të popujve.

- c **Gjo. 1:18** Askush s'ë pa Perëndinë kurrë; i vetëmlinduri Bir, që është në gjirin e Atit, ai e bëri të njohur.
- Gjo. 15:15** Unë nuk ju quaj më shërbëtorë, sepse shërbëtori nuk e di ç'bën i zoti; por unë ju kam quajtur miq, sepse ju bëra të njohni të gjitha sa dëgjova nga Ati im.
- d **Psa. 110:4** ZOTI është betuar dhe nuk do të pendohet: «Ti je prift përjetë sipas rendit të Melkisedekut».
- e **Heb. 10:12** Ai, përkundrazi, pasi dha përgjithnjë një flijim të vetëm për mëkatet, u ul në të djathtë të Perëndisë.
- Heb. 10:14** Sepse, me një blatë të vetme, ai i bëri të përsosur përgjithnjë ata që shenjtërohen.
- Heb. 9:12** Hyri një herë e përgjithmonë në shenjtërore, jo përmes gjakut të cjepeve dhe të viçave, por përmes gjakut të vet, dhe fitoi një shpengim të përjetshëm.
- Heb. 9:14** Aq më shumë gjaku i Krishtit, i cili me anë të Frymës së përjetshme ia ofroi veten e tij të patëmetë Perëndisë, do ta pastrojë ndërgjegjen tuaj nga veprat e vdekura për t'i shërbyer Perëndisë së gjallë!
- Heb. 9:28** Kështu edhe Krishti, pasi u dha një herë për të marrë mbi vete mëkatet e shumëve, do të duket për së dyti pa mëkat për ata që e presin me durim për shpëtim.*.
- f **Rom. 8:34** Kush është ai që do t'i dënojë? Krishti është ai që vdiq, po për më tepër ai edhe u ringjall; ai është në të djathtë të Perëndisë dhe ai ndërmjetëson për ne.
- Heb. 9:24** Sepse Krishti nuk hyri në një shenjtërore të bërë me dorë, që është vetëm shëmbëllesë e asaj të vërtetë, por në vetë qiellin për t'u shfaqur tani përpara Perëndisë për ne.
- 1 Gjo. 2:1** Djema të mi, ju shkruaj këto që të mos mëkaton; dhe në qoftë se ndokush ka mëkatuar, kemi një avokat tek Ati, Jezu Krishtin, të drejtin.
- Rom. 5:9** Shumë më tepër, pra, duke qenë tani të drejtësuar nëpërmjet gjakut të tij, do të shpëtohemi nga zemërimi me anë të tij. Sepse, ndërsa ishim armiq, u pajtuam me Perëndinë nëpërmjet vdekjes së Birit të tij, aq më shumë tani, që jemi pajtuar, do të shpëtohemi nëpërmjet jetës së tij.
- g **Psa. 2:6** Dhe do të thotë: «E vendosa mbretin tim mbi Sion, malin tim të shenjtë.»
- Zak. 9:9** Ngazëllo me të madhe, o bijë e Sionit, lësho britma gëzimi, o bijë e Jerusalemit! Ja, mbreti yt po vjen te ti; ai është i drejtë dhe sjell shpëtimin, i përlurur dhe i hipur mbi një gomar, mbi një kërric gomareje.
- Mt. 21:5** «I thoni bijës së Sionit: Ja po të vjen mbreti yt, zemërbutë, dhe hipur mbi një gomare, madje një pulisht, pjellë e një kafshe barre».
- Lu. 1:33** «Dhe do të mbretërojë mbi shtëpinë e Jakobit përjetë dhe mbretëria e tij nuk do të ketë kurrë të sosur».
- Mt. 28:18** Dhe Jezusi u afrua dhe u foli atyre duke thënë: «Mua më është dhënë çdo pushtet në qiell e në tokë.
- Gjo. 10:28** Dhe unë u jap atyre jetë të përjetshme dhe nuk do të humbasin aspak, përjetë, dhe askush nuk do t'i rrëmbejë nga dora ime..
- Zbu. 12:10–11** Dhe dëgjova një zë të madh në qiell, që thoshte: «Tani u bë shpëtimi dhe fuqia dhe mbretëria e Perëndisë tonë dhe pushteti i Krishtit të tij; sepse u hodh poshtë paditësi i vëllezërve tanë, ai që i padiste përpara Perëndisë tonë ditë e natë. ¹¹Dhe ata e mundën atë me anë të gjakut të Qengjit dhe me anë të fjalës së dëshmisë së tyre; dhe nuk e dëshën jetën e tyre deri në vdekje.

Pyetja 32

Por pse quhesh ti *i krishterë?*^a

Përgjigjja:

Sepse unë jam një gjymtyrë e Krishtit, me anë të besimit^b, e kështu jam pjesëmarrës i vajosjes së Tij^c; në mënyrë që ta rrëfej emrin e Tij^d dhe ta paraqes veten si një flijim të gjallë mirënjohjeje ndaj Tij^e; si dhe që me një ndërgjegje të lirë dhe të mirë të luftoj kundër mëkatit dhe Satanit në këtë jetë^f; dhe pastaj të mbretëroj me Të përjetësisht mbi të gjitha krijesat^g.

- a **Vep. 11:26** Si e gjeti, e çoi në Antioki. Dhe ndodhi që plot një vit ata mblidheshin në kishë dhe mësuan një numër të madh njerëzish; dhe, për të parën herë në Antioki, dishepujt u quajtën të krishterë.
- b **1 Kor. 6:15** A nuk e dini se trupat tuaj janë gjymtyrë të Krishtit? Të marr, pra, unë gjymtyrët e Krishtit dhe t'i bëj gjymtyrë të një kurve? Kurrë mos qoftë!
- c **1 Gjo. 2:27** Dhe, sa për ju, vajosja, që keni marrë nga ai, rri në ju dhe nuk keni nevojë që ndokush t'ju mësojë; por, siç ju mëson ajo vajosja mbi gjithçka edhe është e vërtetë e nuk është gënjeshtër, edhe siç ju mësoi, do të qëndroni në të.

Vep. 2:17 “Dhe në ditët e fundit do të ndodhë, thotë Perëndia, që unë do të përhap nga Fryma im mbi çdo mish; dhe bijtë tuaj e bijat tuaja do të profetizojnë, të rinjtë tuaj do të shohin vegime dhe të moshuarit tuaj do të shohin ëndrra.”

- d **Mt. 10:32** Prandaj kushdo që do të më rrëfejë përpara njerëzve, edhe unë do ta rrëfejë përpara Atit tim në qiej.
- Rom. 10:10** Sepse me zemër, njeriu beson në drejtësi dhe me gojë bëhet rrëfim për shpëtim.
- e **Rom. 12:1** Ju lutem, pra, o vëllezër, nëpërmjet dhembshurisë së Perëndisë, t'i paraqitni trupat tuaj si fli të gjallë, të shenjtë, të pëlqyeshëm për Perëndinë, që është shërbesa juaj e mençur.
- 1 Pj. 2:5, 9** ...dhe ju, si gurë të gjallë, ndërtoheni për të qenë një shtëpi frymërore, një priftëri e shenjtë, për të ofruar fljime frymërore, që i pëlqejnë Perëndisë me anë të Jezu Krishtit... “Por ju jeni fis i zgjedhur, priftëri mbretërore, komb i shenjtë, popull i fituar nga Perëndia, që të shpallni lavdinë e atij, që ju thirri nga terri në dritën e tij të mrekullueshme;
- Zbu. 1:6** Dhe na bëri mbretër dhe priftër për Perëndinë dhe Atin e tij, atij i qoftë lavdi dhe pushtet në jetë të jetëve. Amen.
- Zbu. 5:8, 10** Dhe, mbasi e mori librin, të katër qeniet e gjalla dhe të njëzet e katër pleqtë ranë përmbys përpara Qengjit, duke pasur secili një geste dhe kupa të arta plot me temjan, të cilat janë lutjet e shenjtoreve. «...¹⁰dhe na bëre mbretër dhe priftërinj për Perëndinë tonë, dhe do të mbretërojmë mbi dhe.»
- f **1 Pj. 2:11** Të dashur, po ju nxis, si të huaj dhe shtegtarë, të hiqni dorë nga lakmitë e mishit, që luftojnë kundër shpirtit.
- Rom. 6:12–13** Le të mos mbretërojmë, pra, mëkati në trupin tuaj të vdekshëm, që t'i bindeni atij në epshet e veta. ¹³As mos ia paraqitni gjymtyrët tuaja mëkatit si mjete padrejtësie, por i paraqisni veten tuaj Perëndisë, si të gjallë prej së vdekurish, dhe gjymtyrët tuaja si mjete drejtësie Perëndisë.
- Gal. 5:16–17** Por po them: Ecni në Frymë dhe nuk do të përmbushni dëshirat e mishit, ¹⁷sepse mishi ka dëshira kundër Frymës, dhe Fryma ka dëshira kundër mishit; dhe këto i kundërvihen njëra-tjetrës, që të mos bëni ato që doni.
- Ef. 6:11** Vishni gjithë armatimin e Perëndisë që të mund të qëndroni kundër dredhive të djallit.
- 1 Tim. 1:18–19** Po ta besoj këtë porosi, o Timote bir, sipas profecive që u bënë më parë për ty, që sipas tyre të luftosh luftën e mirë, ¹⁹duke pasur besim dhe ndërgjegje të mirë, sepse disa, duke e hedhur tej, u bënë lundërthyerje në besim.
- g **2 Tim. 2:12** Në qoftë se durojmë, do të mbretërojmë bashkë me të; po ta mohojmë, edhe ai do të na mohojë.
- Mt. 25:34** Atëherë Mbreti do t'u thotë atyre që do të jenë në të djathtë të tij: “Ejani, të bekuar të Atit tim; trashëgoni mbretërinë që u bë gati për ju që nga themelimi i botës.

DITA E ZOTIT, 13

Pyetja 33

Pse Krishti quhet *i vetëmlinduri Bir i Perëndisë*, përderisa edhe ne jemi fëmijët e Perëndisë?

Përgjigjja:

Sepse vetëm Krishti është Biri i përrjetshëm dhe i natyrshëm i Perëndisë^a; kurse ne jemi fëmijë të birësuar të Perëndisë, me anë të hirit dhe për hir të Tij^b.

- a **Gjo. 1:14** Dhe Fjala u bë mish dhe ndenji ndër ne dhe ne soditëm lavdinë e tij, si lavdia e të vetëmlindurit nga Ati, plot hir e të vërtetë.

Heb. 1:1–2 Perëndia, mbasi u foli së lashti shumë herë dhe në shumë mënyra etërve me anë të profetëve, ²në këto ditët e fundit, na foli me anë të Birit, të cilin e bëri trashëgimtar të të gjitha gjërave, me anë të të cilit e krijoi dhe gjithësinë.

Gjo. 3:16 Sepse Perëndia e deshi aq botën, sa dha Birin e tij të vetëmlindurin, që, kushdo që beson në të, të mos humbasë, por të ketë jetën e përrjetshme.

1 Gjo. 4:9 Në këtë është shfaqur dashuria e Perëndisë ndaj nesh, se Perëndia dërgoi Birin e tij të vetëmlindurin në botë që ne të rrojmë përmes tij.

Rom. 8:32 Sepse ai që nuk e kurseu Birin e vet, por e dha për ne të gjithë, qysh nuk do të na dhurojë të gjitha gjërat bashkë me të?

b **Rom. 8:16** Vetë Fryma i dëshmon frymës sonë që jemi bij të Perëndisë.

Gjo. 1:12 Por të gjithëve atyre që e pranuan, ai u dha pushtet të bëhen bij të Perëndisë, atyre që besojnë në emrin e tij.

Gal. 4:6 Dhe, duke qenë se jeni bij, Perëndia dërgoi Frymën e Birit të tij në zemrat tuaja që thërret: «Abba, Atë!».

Ef. 1:4-6 ...sikurse na zgjodhi në të përpara themelimit të botës, që të jemi të shenjtë dhe të patëmetë përpara tij në dashuri, ⁵duke na paracaktuar për birësim për veten e tij me anë të Jezu Krishtit, sipas pëlqimit të vullnetit të vet, ⁶për lëvdim të lavdisë së hirit të tij, të cilin na dhuroi në të dashurin, Birin e tij.

Pyetja 34

Pse e quan Atë Zotin tonë?

Përgjigjja:

Sepse Ai na shpengoi trupin dhe shpirtin, nga të gjitha mëkatet tona, jo me ar apo argjend, por me gjakun e Tij të çmuar, dhe na shpëtoi nga tërë fuqia e djallit; dhe kështu na bëri pronë të Tij^a.

a **1 Pj. 1:18-19** ...duke ditur se jo me anë gjërash që prishen, si argjendi ose ari, jeni shpenguar nga sjellja e kotë e dorëzuar nga etërit, ¹⁹por me anë të gjakut të çmuar të Krishtit, si të Qengjit të patëmetë dhe të panjollë.

1 Pj. 2:9 Por ju jeni fis i zgjedhur, priftëri mbretërore, komb i shenjtë, popull i fituar nga Perëndia, që të shpallni lavdinë e atij, që ju thirri nga terri në dritën e tij të mrekullueshme.

1 Kor. 6:20 Sepse u bletë me një çmim! Përlëvdoni Perëndinë, pra, me trupin tuaj dhe në frymën tuaj, që i përkasin Perëndisë.

1 Tim. 2:6 I cili e dha veten e tij si shpërblese për të gjithë, për dëshmim në kohën e vet.

Gjo. 20:28 Atëherë Thomai u përgjigj dhe i tha: «Zoti im dhe Perëndia im!»

DITA E ZOTIT, 14

Pyetja 35

Cili është kuptimi i këtyre fjalëve: “Ai u ngjiz nga Fryma e Shenjtë dhe lindi nga virgjëresha Mari”?

Përgjigjja:

Që Biri i përjetshëm i Perëndisë, i Cili është^a dhe vazhdon të jetë^b Perëndi i vërtetë dhe i përjetshëm, mori përsipër tamam natyrën e njeriut prej mishit dhe gjakut të virgjëreshës Mari^c, me anë të veprimit të Frymës së Shenjtë^d, që Ai të jetë gjithashtu edhe fara e vërtetë e Davidit^e, duke u ngjarë vëllezërve të Tij në të gjitha^f, përveç asaj që nuk mëkatoit^g.

a **1 Gjo. 5:20** Por dimë se Biri i Perëndisë erdhi dhe na dha të kuptuarit, që të njohim të Vërtetin; dhe jemi në të Vërtetin, në Birin e tij Jezu Krisht; ky është i vërteti Perëndi dhe jeta e përjetshme.

Gjo. 1:1 Në fillim ishte Fjala dhe Fjala ishte me Perëndinë, dhe Fjala ishte Perëndi.

Gjo. 17:3 «Dhe kjo është jeta e përjetshme, të të njohin ty, të vetmin Perëndi të vërtetë, dhe Jezu Krishtin që ti ke dërguar.»

Rom. 1:3 Lidhur me Birin e tij, të lindur nga fara e Davidit sipas mishit.

Kol. 1:15 Ai është shëmbëllimi i Perëndisë të padukshëm, i parëlinduri i çdo krijese.

b **Rom. 9:5** Të tyret janë edhe etërit, prej të cilëve rrjedh sipas mishit Krishti, i cili është përmbi çdo gjë Perëndi, i bekuar përjetë. Amen.

c **Gal. 4:4** Por, kur erdhi plotësimi i kohës, Perëndia dërgoi Birin e tij, të lindur prej gruaje, të vënë nën ligj.

Lu. 1:31 Dhe ja, ti do të mbetesh shtatzënë dhe do të lindësh një djalë dhe do t'ia vësh emrin Jezus.

- Lu. 1:42–43** ...dhe thërriti me zë të lartë, duke thënë: «Ti je e bekuar ndër gratë dhe i bekuar është fryti i barkut tënd. ⁴³Dhe nga po më ndodh kjo, që nëna e Zotit tim të vijë tek unë?»
- d **Mt. 1:20** Por, ndërsa ai mendonte këto gjëra, ja, një engjell i Zotit iu shfaq në ëndërr dhe i tha: «Jozef, bir i Davidit, mos ki frikë ta marrësh me vete Marinë, gruan tënde, sepse çështë ngjizur në të, është prej Frymës së Shenjtë.»
- Lu. 1:35** Dhe engjëlli duke u përgjigjur, i tha: «Fryma e Shenjtë do të vijë mbi ty dhe pushteti i Më të Lartit do të të mbulojë me hijen e vet; prandaj i shenjtë që do të lindë prej teje do të quhet Biri i Perëndisë.»
- e **Rom. 1:3** Lidhur me Birin e tij, të lindur nga fara e Davidit sipas mishit.
- Psa. 132:11** ZOTI iu betua Davidit në të vërtetë dhe nuk do të ndryshojë: «Unë do të vë mbi fronin tënd një fryt të të përbrendshmëve të tua.»
- 2 Sam. 7:12** Kur t'i kesh mbushur ditët e tua dhe të jesh duke pushuar bashkë me etërit e tu, unë do të ngre mbas teje pasardhjen tënde që do të dalë nga barku yt dhe do të vendos mbretërinë tënde.
- Lu. 1:32** Ai do të jetë i madh dhe do të quhet Biri i Më të Lartit; dhe Zoti Perëndi do t'i japë fronin e Davidit, atit të tij.
- Vep. 2:30** Ai, pra, duke qenë profet, e dinte se Perëndia i kishte premtuar me betim se nga fryti i belit të tij, sipas mishit, do të ngjallet Krishti për t'u ulur mbi fronin e tij.
- f **Fil. 2:6–7** ...i cili, edhe pse ishte në trajtë Perëndie, nuk e çmoi si një gjë ku të mbahej fort për të qenë barabar me Perëndinë, ⁷por e zbrazti veten e tij, duke marrë trajtë shërbëtori, e u bë i ngjashëm me njerëzit.
- Heb. 2:14** Sepse, duke qenë se bijtë kanë të përbashkët mishin dhe gjakun, po ashtu edhe ai u bë pjesëtar në po ato gjëra, që të shkatërronte, me anë të vdekjes atë, që ka pushtetin e vdekjes, domethënë djallin.
- g **Heb. 4:15** Sepse ne nuk kemi një kryepriфт që nuk mund të vuajë bashkë me dobësitë tona, por që u tundua në të gjitha njësoj si ne, por pa mëkat.

Pyetja 36

Çfarë fitove ti me anë të ngjizjes së mbinatyrshme dhe lindjes së shenjtë të Krishtit?

Përgjigjja:

Që Ai është Ndërmjetësi ynë^a dhe, me pafajshmërinë dhe shenjtërinë e Tij të përsosur, mbulon para Perëndisë mëkatet e mia, në të cilat u ngjiza dhe u linda^b.

- a **Heb. 7:26–27** Sepse neve një kryepriфт i tillë na duhej: i shenjtë, i pafaj, i papërlyer, i ndarë nga mëkatarët dhe i bërë më i lartë se qiejt, ²⁷që nuk ka nevojë çdo ditë, si ata kryepriфтërinjtë, të ofrojë fljime më parë për mëkatet e veta e pastaj për ato të popullit; sepse këtë e bëri një herë e përgjithmonë, kur ofroi vetveten.
- b **1 Pj. 1:18–19** ...duke ditur se jo me anë gjërash që prishen, si argjendi ose ari, jeni shpenguar nga sjellja e kotë e dorëzuar nga etërit, ¹⁹por me anë të gjakut të çmuar të Krishtit, si të Qengjit të patëmetë dhe të panjollë.
- 1 Pj. 3:18** Sepse edhe Krishti ka vuajtur një herë për mëkatet, i drejti për të padrejtët, për të na çuar te Perëndia. U vra sipas mishit, por u ngjall me anë të Frymës.
- 1 Kor. 1:30–31** Edhe prej tij ju jeni në Krishtin Jezus, i cili u bë për ne urtësi prej Perëndisë, drejtësi edhe shenjtërim dhe shpengim; ³¹që, sikurse është shkruar: «Ai që mburret, le të mburret në Zotin».
- Rom. 8:3** Sepse atë që ishte e pamundur për ligjin, sepse ishte pa forcë për shkak të mishit, Perëndia, duke dërguar birin e tij në shëmbëllim mishi mëkatar, edhe për mëkat, e dënoi mëkatin në mish.
- Isa. 53:11** Ai do të shikojë frytin e mundimit të shpirtit të tij dhe do të jetë i kënaqur; me anë të dënisë së tij, i drejti, shërbëtori im, do të bëjë të drejtë shumë veta, sepse do të marrë përsipër paudhësitë e tyre.
- Psa. 32:1** Lum ai të cilit i kanë falur shkeljen, ai të cilit i kanë mbuluar mëkatin!

DITA E ZOTIT, 15

Pyetja 37

Çfarë kupton me fjalët “Ai vuajti”?

Përgjigja:

Që Ai, gjatë gjithë kohës që jetoi në tokë, por sidomos në fund të jetës së Tij, mbajti në trup dhe në shpirt zemërimin e Perëndisë kundër mëkateve të të gjithë njerëzimit^a, me qëllim që Ai, me anë të vuajtjes së Tij, si i vetmi flijim që kënaq zemërimin^b, të shpengojë trupin dhe shpirtin tonë nga dënimi i përjetshëm^c, dhe të gëzojmë hirin e Perëndisë, drejtësinë dhe jetën e përjetshme^d.

a **Isa. 53:4** Megjithatë ai mbante sëmundjet tona dhe kishte marrë përsipër dhembjet tona; por ne e konsideronim të goditur, të rrahur nga Perëndia dhe të përlulur.

1 Pj. 2:24 Ai vetë i barti mëkatet tona në trupin e tij mbi drurin e kryqit që ne, të vdekur për mëkate, të rrojmë për drejtësi; dhe me vurratat e tij ju u shëruat.

1 Pj. 3:18 Sepse edhe Krishti ka vuajtur një herë për mëkatet, i drejti për të padrejtët, për të na çuar te Perëndia. U vra sipas mishit, por u ngjall me anë të Frymës.

1 Tim. 2:6 I cili e dha veten e tij si shpërblës për të gjithë, për dëshmim në kohën e vet.

b **Isa. 53:10** Por i pëlqeu ZOTIT ta rrihte dhe ta bënte të vuante. Duke ofruar jetën e tij si flijim për mëkatin, ai do të shikojë pasardhje, do të zgjasë ditët e tij dhe vullneti i ZOTIT do të ketë mbarësi në duart e tij.

Ef. 5:2 Edhe ecni në dashuri, sikurse edhe Krishti na deshi dhe e dha veten e tij për ne, si blatë dhe flijim Perëndisë, si një parfum erëmirë.

1 Kor. 5:7 Fshijeni, pra, majanë e vjetër, që të jeni një brumë i ri, siç jeni pa maja; sepse pashka jonë, që është Krishti, u flijua për ne.

1 Gjo. 2:2 Ai është shlyesi për mëkatet tona; dhe jo vetëm për tonat, por edhe për ato të të gjithë botës.

Rom. 3:25 Të cilin e paraqiti Perëndia si pajtimorë nëpërmjet besimit në gjakun e tij, për të treguar kështu drejtësinë e tij për faljen e mëkateve, që janë kryer më parë gjatë kohës së durimit të Perëndisë.

Heb. 9:28 Kështu edhe Krishti, pasi u dha një herë për të marrë mbi vete mëkatet e shumëve, do të duket për së dyti pa mëkat për ata që e presin me durim për shpëtim.

Heb. 10:14 Sepse, me një blatë të vetme, ai i bëri të përsosur përgjithnjë ata që shenjtërohen.

c **Gal. 3:13** Krishti na shpengoi nga mallkimi i ligjit, sepse u bë mallkim për ne (sepse është shkruar: «I mallkuar është kushdo që varet në dru»).

Kol. 1:13 Ai na nxori nga pushteti i errësirës dhe na zhvendosi në mbretërinë e Birit të tij të dashur.

Heb. 9:12 Hyri një herë e përgjithmonë në shenjtërore, jo përmes gjakut të cjepeve dhe të viçave, por përmes gjakut të vet, dhe fitoi një shpengim të përjetshëm.

1 Pj. 1:18–19 ...duke ditur se jo me anë gjërash që prishen, si argjendi ose ari, jeni shpenguar nga sjellja e kotë e dorëzuar nga etërit, ¹⁹por me anë të gjakut të çmuar të Krishtit, si të Qengjit të patëmetë dhe të panjollë.

d **Rom. 3:25** Të cilin e paraqiti Perëndia si pajtimorë nëpërmjet besimit në gjakun e tij, për të treguar kështu drejtësinë e tij për faljen e mëkateve, që janë kryer më parë gjatë kohës së durimit të Perëndisë.

2 Kor. 5:21 Sepse atë, që nuk njihte mëkat, e bëri mëkat për ne, që ne të bëhemi drejtësi e Perëndisë në të.

Gjo. 3:16 Sepse Perëndia e deshi aq botën, sa dha Birin e tij të vetëmlindurin, që, kushdo që beson në të, të mos humbasë, por të ketë jetën e përjetshme.

Gjo. 6:51 Unë jam buka e gjallë që zbriti nga qielli; kush ha nga kjo bukë, do të jetojë përjetë; dhe buka që unë do të jap është mishi im, që unë do ta jap për jetën e botës».

Heb. 9:15 Dhe prandaj ai është ndërmjetësi i besëlidhjes së re që, me anë të vdekjes që u bë për shpengimin e shkeljeve që u kryen gjatë besëlidhjes së parë, të thirrurit të marrin premtimin e trashëgimisë së përjetshme.

Heb. 10:19 Duke pasur, pra, o vëllezër, guxim për të hyrë në shenjtërore me anë të gjakut të Jezusit.

Pyetja 38

Pse vuajti Ai nga Ponc Pilati?

Përgjigja:

Sepse Ai, duke qenë i pafajshëm, por prapë i gjykuar nga një gjykatës i botës^a, mund të na çlirojë kështu nga gjykimi i ashpër i Perëndisë, ndaj të cilit ishim të pambrojtur^b.

- a **Gjo. 18:38** Pilati i tha: «Çështë e vërteta?». Dhe, si tha këtë, doli përsëri pranë judenjve dhe u tha atyre: «Unë nuk po gjej në të asnjë faj!»
Mt. 27:24 Por Pilati, duke parë se nuk po arrinte gjë, madje se po bëhej trazirë, mori ujë dhe i lau duart para turmës, duke thënë: «Unë jam i pafaj për gjakun e këtij të drejti; shikojeni ju».
Lu. 23:14–15 ...e u tha atyre: «Ju më prutë këtë njeri si çoroditës të popullit; dhe, ja, unë, pasi e hetova para jush, nuk kam gjetur tek ky njeri asnjë nga fajet për të cilat ju e paditni, ¹⁵dhe as Herodi, sepse ju dërgova tek ai, dhe, ja, ai s'ka bërë asgjë që meriton vdekjen...»
Gjo. 19:4 Pastaj Pilati doli përsëri jashtë dhe u tha atyre: «Ja, po jua nxjerr jashtë, që ta dini se nuk gjej në të asnjë faj».
- b **Psa. 69:5** O Perëndi, ti e di marrëzinë time dhe fajet e mia nuk të janë fshehur.
Isa. 53:4–5 Megjithatë ai mbante sëmundjet tona dhe kishte marrë përsipër dhembjet tona; por ne e konsideronim të goditur, të rrahur nga Perëndia dhe të përlulur. ⁵Por ai u tejshpua për shkak të shkeljeve tona, u shtyp për paudhësitë tona; ndëshkimi për të cilin kemi paqen është mbi të, dhe për shkak të vurratave të tij ne jemi shëruar.
2 Kor. 5:21 Sepse atë, që nuk njihte mëkat, e bëri mëkat për ne, që ne të bëhemi drejtësi e Perëndisë në të.
Gal. 3:13 Krishti na shpengoi nga mallkimi i ligjit, sepse u bë mallkim për ne (sepse është shkruar: «I mallkuar është kushdo që varet në dru»).

Pyetja 39

A ka diçka më shumë në faktin që Ai u kryqëzua, ndryshe nga sikur të kishte vdekur me ndonjë lloj tjetër vdekjeje?

Përgjigjja:

Po, ka; sepse kështu sigurohem se Ai mori përsipër mallkimin që qëndronte mbi mua^a; sepse vdekja e kryqit ishte e mallkuar nga Perëndia^b.

- a **Gal. 3:13** Krishti na shpengoi nga mallkimi i ligjit, sepse u bë mallkim për ne (sepse është shkruar: «I mallkuar është kushdo që varet në dru»).
- b **LiP. 21:23** «...Kufoma e tij nuk do të rrijë tërë natën mbi pemë, por do ta varrosësh po atë ditë; sepse ai që rri varur është i mallkuar nga Perëndia dhe ti nuk do ta ndotësh tokën që ZOTI, Perëndia yt, të jep si trashëgimi».

DITA E ZOTIT, 16

Pyetja 40

Pse iu desh Krishtit ta përulte Vetën, madje deri në vdekje?

Përgjigjja:

Sepse, për sa i përket drejtësisë dhe vërtetësisë së Perëndisë^a, shlyerja për mëkatet tona nuk mund të bëhej ndryshe, përveçse me anë të vdekjes së Birit të Perëndisë^b.

- a **Zan. 2:17** «Por mos ha nga pema e njohjes të së mirës dhe të së keqes, sepse ditën që do të hash prej saj, ke për të vdekur me siguri».
- b **Rom. 8:3–4** Sepse atë që ishte e pamundur për ligjin, sepse ishte pa forcë për shkak të mishit, Perëndia, duke dërguar birin e tij në shëmbëllim mishi mëkatar, edhe për mëkat, e dënoi mëkatin në mish, ⁴që të përmbushet kërkesa e drejtë e ligjit në ne, që nuk ecim sipas mishit, por sipas Frymës.

Pyetja 41

Pse Ai u varros gjithashtu?

Përgjigjja

Që të tregohet se Ai vdiq vërtet^a.

- a **Vep. 13:29** Dhe mbasi u kryen të gjitha ato, që ishin shkruar për të, e zbritën nga druri dhe e vunë në varr.
Mt. 27:59–60 Dhe Jozefi, mbasi e mori trupin, e mbështolli me një çarçaf liri të pastër, ⁶⁰dhe e vendosi në varrin e vet të ri, që e kishte hapur në shkëmb; dhe rrokullisi një gur të madh në hyrje të varrit dhe u largua.
Lu. 23:53 Dhe, si e zbriti nga kryqi, e mbështolli në një çarçaf liri dhe e vuri në një varr të gërmuar në shkëmb, ku ende nuk ishte vënë asnjëri, kurrë.
Gjo. 19:38 Pas këtyre gjërave, Jozefi nga Arimateja, që ishte dishepull i Jezusit, por fshehtas nga frika e judenjve, i kërkoi Pilatit të merrte trupin e Jezusit; dhe Pilati i dha leje. Atëherë ai erdhi dhe e mori trupin e Jezusit.

Pyetja 42

Përderisa Krishti vdiq për ne, pse duhet të vdesim dhe ne?

Përgjigjja:

Vdekja jonë nuk është për të paguar për mëkatet tona^a, por vetëm për t'i dhënë fund mëkatit dhe për të kaluar në jetën e përjetshme^b.

- a **Mr. 8:37** Ose çfarë mund të japë njeriu në shkëmbim të shpirtit të vet?
Psa. 49:8 Sepse shpengimi i shpirtit të tij është shumë i shtrenjtë, dhe çmimi i tij nuk do të mjaftonte kurrë.
Fil. 1:23 Sepse unë jam i shtrenguar nga të dyja: kam dëshirë të ndahem dhe të jem bashkë me Krishtin, shumë herë më mirë.
Gjo. 5:24 Në të vërtetë, në të vërtetë po ju them: Ai që e dëgjon fjalën time dhe beson në atë që më ka dërguar, ka jetë të përjetshme, dhe ai nuk vjen në gjyq, por ka kaluar nga vdekja në jetë.
Rom. 7:24 Oh, i mjeri njeri që jam! Kush do të më çlirojë nga ky trup i vdekjes?

Pyetja 43

Çfarë të mire të mëtejshme marrim nga flijimi dhe vdekja e Krishtit në kryq?

Përgjigjja:

Atë që, për shkak të saj, njeriu ynë i vjetër kryqëzohet, vdes dhe varroset me Të^a; që prirjet e çoroditura të mishit të mos mbretërojnë më në ne^b; që ne të mund t'ia ofrojmë Atij veten tonë si flijim falënderimi^c.

- a **Rom. 6:6** Duke ditur këtë: se njeriu ynë i vjetër u kryqëzua me të, që trupi i mëkatit të shfuqizohet, që ne të mos i shërbejmë më mëkatit.
b **Rom. 6:6** *Shih a.*
Rom. 6:12 Le të mos mbretërojnë, pra, mëkati në trupin tuaj të vdekshëm, që t'i bindeni atij në epshet e veta.
c **Rom. 12:1** Ju lutem, pra, o vëllezër, nëpërmjet dhembshurisë së Perëndisë, t'i paraqitni trupat tuaj si fli të gjallë, të shenjtë, të pëlqyeshëm për Perëndinë, që është shërbesa juaj e mençur.

Pyetja 44

Pse i shtohet kjo: “Ai zbriti në ferr”?

Përgjigjja:

Që në tundimet e mia më të mëdha, unë të sigurohem dhe ta ngushëlloj veten plotësisht në këtë, që Zoti im Jezu Krisht, me anë të ankthit, të dhimbjeve, të tmerreve dhe të agonisë së Tij prej ferri, në të cilat Ai ishte zhytur gjatë gjithë vuajtjeve të Tij^a, por sidomos në kryq, më ka shpëtuar nga ankthi dhe mundimet e ferrit^b.

a **Psa. 18:5–6** Ankthet e Sheolit më kishin rrethuar dhe leqet e vdekjes më rrinin përpara. ⁶Në ankthin tim kërkova ZOTIN dhe i klitha Perëndisë tim; ai e dëgjoi zërin tim nga tempulli i tij dhe zëri im arriti para tij, në veshët e tij.

Psa. 116:3 Vargonjtë e vdekjes më kishin rrethuar dhe ankthet e Sheolit më kishin pushtuar; fatkeqësia dhe dhembja më kishin vënë përfund.

Mt. 26:38 Atëherë ai u tha atyre: «Shpirti im është thellësisht i trishtuar, deri në vdekje; qëndroni këtu dhe rrini zgjuar bashkë me mua».

Mt. 27:46 Por rreth orës së nëntë, Jezusi bërtiti me zë të lartë duke thënë: «Eli, Eli, lama sabakthani?», domethënë: «Perëndia im, Perëndia im, përse më ke braktisur?».

Heb. 5:7 I cili, në ditët e mishit të tij, me klithma të forta dhe me lot, i ofroi lutje dhe përgjërime atij që mund ta shpëtonte nga vdekja, dhe u dëgjua për shkak të frikës së tij nga Perëndia.

b **Isa. 53:5** Por ai u tejshpua për shkak të shkeljeve tona, u shtyp për paudhësitë tona; ndëshkimi për të cilin kemi paqen është mbi të, dhe për shkak të vurratave të tij ne jemi shëruar.

DITA E ZOTIT, 17

Pyetja 45

Ç’përfitim kemi nga ringjallja e Krishtit?

Përgjigjja:

Së pari; me ringjalljen e Tij, Ai ka mposhtur vdekjen, me qëllim që të na bëjë pjesëmarrës të asaj drejtësie që e kishte blerë për ne me anë të vdekjes së Tij^a; së dyti, me anë të fuqisë së Tij, edhe ne ringjallemi në një jetë të re^b; dhe, e fundit, ringjallja e Krishtit është një kapar i sigurt i ringjalljes sonë të bekuar^c.

a **Rom. 4:25** I cili u dorëzua për shkak të shkeljeve tona dhe u ringjall për drejtësimin tonë.

1 Pj. 1:3 Qoftë bekuar Perëndia, Ati i Zotit tonë Jezu Krisht, i cili sipas mëshirës së tij të shumtë na rilindi për një shpresë të gjallë me anë të ngjalljes së Jezu Krishtit prej së vdekurish.

1 Kor. 15:16 Sepse në qoftë se të vdekurit nuk ringjallen, as Krishti nuk është ringjallur;

b **Rom. 6:4** U varrosëm, pra, me të me anë të pagëzimit në vdekje, që, ashtu si Krishti u ringjall prej së vdekurish me anë të lavdisë së Atit, kështu edhe ne të ecim në risinë e jetës.

Kol. 3:1 Në qoftë se, pra, u ringjallët me Krishtin, kërkoni ato gjëra që janë lart, ku Krishti është ulur në të djathtë të Perëndisë.

Kol. 3:3 Sepse keni vdekur dhe jeta juaj është fshehur bashkë me Krishtin në Perëndinë.

Ef. 2:4–6 Por Perëndia, që është i pasur në mëshirë, për shkak të dashurisë së tij të madhe me të cilën na deshi, ⁵ndonëse ne ishim të vdekur nëpërmjet shkeljeve, na dha jetë bashkë me Krishtin (ju jeni të shpëtuar me anë të hirit), ⁶edhe na ringjalli bashkë me të dhe na vuri të ulemi bashkë me të në vendet qiellore në Krishtin Jezus.

- c **1 Kor. 15:20–21** Por tashti Krishti u ringjall prej së vdekurish, dhe u bë fryti i parë i atyre që kanë fjetur. ²¹Sepse, ashtu si erdhi vdekja me anë të një njeriu, kështu erdhi dhe ringjallja e të vdekurve me anë të një njeriu.

DITA E ZOTIT, 18

Pyetja 46

Si i kuptoni këto fjalë: “Ai u ngjit në qiell”?

Përgjigjja:

Që Krishti, në sy të dishepujve të Tij, u mor nga toka drejt e në qiell^a; dhe që Ai qëndron atje për interesin tonë^b, derisa të vijë përsëri për të gjykuar të gjallët dhe të vdekurit^c.

- a **Vep. 1:9** Mbasi i tha këto, ndërsa ata po e shikonin, u ngrit lart; dhe një re e mori prej syve të tyre.
Mr. 16:19 Zoti, pra, mbasi u foli atyre, u mor në qiell dhe u ul në të djathtë të Perëndisë.
Lu. 24:51 Dhe ndodhi që, ndërsa ai po i bekonte, u nda prej tyre dhe u ngrit lart në qiell.
- b **Heb. 9:24** Sepse Krishti nuk hyri në një shenjtërore të bërë me dorë, që është vetëm shëmbëllesë e asaj të vërtetë, por në vetë qiellin për t’u shfaqur tani përpara Perëndisë për ne.
Heb. 4:14 Duke pasur, pra, një kryepriut të madh që ka përshkuar qiejt, Jezusin, Birin e Perëndisë, le të mbajmë fort rrëfimin tonë.
Rom. 8:34 Kush është ai që do t’i dënojë? Krishti është ai që vdiq, po për më tepër ai edhe u ringjall; ai është në të djathtë të Perëndisë dhe ai ndërmjetëson për ne.
Kol. 3:1 Në qoftë se, pra, u ringjallët me Krishtin, kërkonin ato gjëra që janë lart, ku Krishti është ulur në të djathtë të Perëndisë.
- c **Vep. 1:11** Dhe thanë: «Burra galileas, çfarë qëndroni e shikoni drejt qiellit? Ky Jezus, që u mor nga mesi juaj në qiell, do të kthehet në të njëjtën mënyrë, me të cilën e keni parë atë të shkojë në qiell».
Mt. 24:30 Dhe atëherë do të duket në qiell shenja e Birit të njeriut; dhe atëherë të gjitha fiset e dheut do të mbajnë zi dhe do ta shohin Birin e njeriut duke ardhur mbi retë e qiellit me fuqi dhe lavdi të madhe.

Pyetja 47

Atëherë, a nuk është Krishti me ne deri në mbarim të botës, siç ka premtuar^a?

Përgjigjja:

Krishti është vërtet njeri dhe vërtet Perëndi. Për sa i përket natyrës së Tij njerëzore, Ai nuk është më mbi tokë^b; por, për sa i përket Hyjnisë, madhësisë, hirit dhe Frymës së Tij, asnjëherë s’është larg nga ne^c.

- a **Mt. 28:20** «Duke i mësuar të mbajnë të gjitha sa ju kam urdhëruar. Dhe ja, unë jam me ju gjithë ditët, deri në mbarim të botës. Amen».
- b **Heb. 8:4** Sepse, nëse do të ishte mbi dhe, nuk do të ishte as priut, sepse ka priftërinj, të cilët ofrojnë dhurata sipas ligjit.
Mt. 26:11 Sepse të varfrit do t’i keni përherë me ju, por mua nuk do të më keni përherë.
Gjo. 16:28 «Unë dola nga Ati dhe erdha në botë; përsëri po e lë botën dhe shkoj tek Ati».
Gjo. 17:11 Dhe nuk jam më në botë, por ata janë në botë, dhe unë po vij te ti. O Atë i shenjtë, ruaji ata në emrin tënd, ata që më ke dhënë, që të jenë një sikurse ne!
Vep. 3:21 Të cilin qielli duhet ta pranojë deri në kohën e ripërtëritjes së të gjitha gjërave, të cilat Perëndia i ka folur nëpërmjet gojës së gjithë profetëve të tij të shenjtë, që nga fillimi i botës.
- c **Gjo. 14:18** Nuk do t’ju lë bonjakë, do të kthehem te ju.

Mt. 28:20 «Duke i mësuar të mbajnë të gjitha sa ju kam urdhëruar. Dhe ja, unë jam me ju gjithë ditët, deri në mbarim të botës. Amen».

Pyetja 48

Por, në qoftë se natyra e Tij njerëzore nuk është e pranishme kudo ku është Hyjnia e Tij, a nuk janë, pra, të ndara nga njëra-tjetra këto dy natyra të Krishtit?

Përgjigjja:

Aspak, sepse, përderisa Hyjnia është e pakufishme dhe e gjithëpranishme^a, vijon detyrimisht të jetë përtej kufijve të natyrës njerëzore që e mori përsipër Ai^b, e megjithatë është në këtë natyrë njerëzore dhe mbetet e bashkuar personalisht me të.

- a **Jer. 23:24** A mund të fshihet dikush në vende të fshehta që unë të mos e shoh?, thotë ZOTI. «A nuk e mbush unë qiellin dhe tokën?», thotë ZOTI.
Vep. 7:49 «Qielli është fronti im dhe toka stoli i këmbëve të mia; çfarë shtëpie do të më ndërtonit ju, thotë Zoti, ose cili do të ishte vendi i prehjes sime?»
- b **Kol. 2:9** Sepse në të banon trupërisht gjithë plotësia e Hyjnisë.
Gjo. 3:13 Dhe askush nuk u ngjit në qiell, përveç atij që zbriti nga qielli, pra, Birit të njeriut që është në qiell.
Gjo. 11:15 «Edhe unë gëzohem për ju që nuk isha atje, që të besoni; por le të shkojmë tek ai».
Mt. 28:6 «Ai nuk është këtu, sepse u ringjall, sikurse kishte thënë; ejani, shikoni vendin ku ishte shtrirë Zoti».

Pyetja 49

Ç'dobi ka për ne ngritja e Krishtit në qiell?

Përgjigjja:

Së pari, Ai është Avokati ynë në praninë e Atit të Tij në qiell^a; së dyti, kemi një mishin tonë në qiell si kapar të sigurt, që Ai, si Kreu ynë, një ditë do të na marrë dhe ne pranë vetes së Tij, si gjymtyrë të Tij^b; së treti, Ai dërgon Frymën e Tij si kapar^c, me anë të fuqisë së të Cilit kërkojmë ato që janë lart, ku Krishti është ulur, në të djathtë të Perëndisë, jo ato që janë mbi tokë^d.

- a **1 Gjo. 2:1** Djema të mi, ju shkruaj këto që të mos mëkatoni; dhe në qoftë se ndokush ka mëkatuar, kemi një avokat tek Ati, Jezu Krishtin, të drejtin.
Rom. 8:34 Kush është ai që do t'i dënojë? Krishti është ai që vdiq, po për më tepër ai edhe u ringjall; ai është në të djathtë të Perëndisë dhe ai ndërmjetëson për ne.
- b **Gjo. 14:2** Në shtëpinë e Atit tim ka shumë banesa; përndryshe do t'ju thosha: Po shkoj t'ju përgatis një vend.
Gjo. 17:24 O Atë, unë dua që atje ku jam unë, të jenë me mua edhe ata që më ke dhënë, që ta shohin lavdinë time që ti më dhe, sepse ti më deshe para themelimit të botës.
Gjo. 20:17 Jezusi i tha: «Mos më prek, sepse ende nuk jam ngjitur tek Ati im; por shko te vëllezërit e mi dhe u thuaj atyre: Unë po ngjitem tek Ati im dhe Ati juaj, te Perëndia im dhe Perëndia juaj».
Ef. 2:6 Edhe na ringjalli bashkë me të dhe na vuri të ulemi bashkë me të në vendet qiellore në Krishtin Jezus.
- c **Gjo. 14:16** «Dhe unë do t'i lutem Atit dhe ai do t'ju japë një Ngushëllues tjetër, që do të qëndrojë përgjithmonë me ju.»
Gjo. 16:7 «Megjithatë unë ju them të vërtetën: Është mirë për ju që unë të shkoj, sepse, po nuk shkova, nuk do të vijë te ju Ngushëlluesi; por, po shkova, unë do t'ju dërgoj.»
Vep. 2:33 Ai, pra, duke qenë i ngritur në të djathtë të Perëndisë dhe duke marrë nga Ati premtimin e Frymës së Shenjtë, derdhi atë që ju tani shihni dhe dëgjoni.
2 Kor. 1:22 I cili edhe na vulosi dhe na dha kaparin e Frymës në zemrat tona.
2 Kor. 5:5 Por ai që na ka formuar pikërisht për këtë është Perëndia, i cili na dha edhe kaparin e Frymës.

Kol. 3:1 Në qoftë se, pra, u ringjallët me Krishtin, kërkoni ato gjëra që janë lart, ku Krishti është ulur në të djathtë të Perëndisë.

DITA E ZOTIT, 19

Pyetja 50

Pse shtohet: “...duke e vënë të ulej në të djathtë e Perëndisë”?

Përgjigjja:

Sepse Krishti është ngritur në qiell pikërisht për këtë qëllim, që atje të shfaqet si Kreu i kishës së Tij^a, me anë të të Cilit Ati drejton gjithçka^b.

- a **Ef. 1:20–23** ...të cilën e vuri në veprim në Krishtin, duke e ringjallur prej së vdekurish dhe duke e vënë të ulej në të djathtë e tij në vendet qiellore, ²¹përmbi çdo principatë, pushtet, fuqi, zotërim dhe çdo emër që përmendet jo vetëm në këtë botë, por edhe në atë të ardhme, ²²dhe vuri gjithçka nën këmbët e tij, edhe përmbi çdo gjë ia dha për krye kishës, ²³e cila është trupi i tij, plotësia e atij që mbush gjithçka, në të gjitha.
- Kol. 1:18** Ai vetë është kreu i trupit, pra i kishës; ai është fillimi, i parëlinduri prej së vdekurish, që ai të bëhet i pari në të gjitha.
- b **Mt. 28:18** Dhe Jezusi u afrua dhe u foli atyre duke thënë: «Mua më është dhënë çdo pushtet në qiell e në tokë.»
- Gjo. 5:22** Sepse Ati nuk gjykon asnjë, por gjithë gjyqin ia dha Birit.

Pyetja 51

Ç'dobi na sjell kjo lavdi e Krishtit, Kreut tonë?

Përgjigjja:

Së pari, me anë të Frymës së Tij të Shenjtë, Ai derdh hire hyjnore mbi ne, gjymtyrët e Tij^a; dhe pastaj, me anë të fuqisë së Tij, Ai na mbron dhe na ruan nga të gjithë armiqtë^b.

- a **Vep. 2:33** Ai, pra, duke qenë i ngritur në të djathtë të Perëndisë dhe duke marrë nga Ati premtimin e Frymës së Shenjtë, derdhi atë që ju tani shihni dhe dëgjoni.
- Ef. 4:7–8** Po gjithsecilit nga ne iu dha hiri sipas masës së dhuntisë së Krishtit. ⁸Prandaj Shkrimi thotë: «Kur ai u ngjit në lartësi, e robëroi robërinë dhe u dha dhurata njerëzve».
- b **Psa. 2:9** “Ti do t’i copëtosh me një shufër hekuri, do t’i bësh copë-copë si një enë argjile”.
- Psa. 110:1–2** ZOTI i thotë Zotërisë tim: «Ulu në të djathtë time, derisa t’i bëj armiq të tu stol të këmbëve të tua». ²ZOTI do ta shtrijë nga Sioni skeptrin e fuqisë sate. Ai sundon në mes të armiqve të tu.
- Gjo. 10:28** Dhe unë u jap atyre jetë të përjetshme dhe nuk do të humbasin aspak, përjetë, dhe askush nuk do t’i rrëmbejë nga dora ime.
- Ef. 4:8** Prandaj Shkrimi thotë: «Kur ai u ngjit në lartësi, e robëroi robërinë dhe u dha dhurata njerëzve».

Pyetja 52

Çfarë ngushëllimi gjen ti në faktin që “Krishti do të vijë përsëri për të gjykuar të gjallët dhe të vdekurit”?

Përgjigjja:

Në të gjitha pikëllimet dhe përndjekjet e mia, pres me kokën lart që të vijë si gjykatës nga qielli po i njëjti Person, i Cili më parë dha veten e Tij për hirin tim, përpara gjyqit të Perëndisë, dhe më ka hequr tërë mallkimin^a; i Cili do t'i hedhë të gjithë armiqtë e Tij dhe të mi në dënimin e përjetshëm^b, por mua me të gjithë të zgjedhurit e Tij do të marrë pranë vetes së Tij, në gëzime dhe lavdi qiellore^c.

- a **Fil. 3:20** Sepse qytetaria jonë është në qiejt, prej nga edhe presim me durim Shpëtimtarin, Zotin Jezu Krisht. **Lu. 21:28** «Dhe, kur të fillojnë të ndodhin këto, shikoni lart dhe ngrini kokat tuaja, sepse shpengimi juaj po afrohet». **Rom. 8:23** Dhe jo vetëm kaq, por edhe ne vetë që kemi frytin e parë të Frymës, psherëtimjmë në veten tonë, duke pritur me durim birërimin, shpengimin e trupit tonë. **Tit. 2:13** Duke pritur shpresën e lume dhe të shfaqurit e lavdisë së të madhit Perëndi dhe të Shpëtimtarit tonë, Jezu Krisht.
- 1 The. 4:16** Sepse Zoti vetë, me urdhër, me zë kryeengjëlli dhe me borinë e Perëndisë, do të zbrësë nga qielli dhe të vdekurit në Krishtin do të ringjallen të parët;
- b **Mt. 25:41** Atëherë do t'u thotë edhe atyre që do të jenë në të majtë: "Largohuni nga unë, të mallkuar, në zjarr të përjetshëm, të përgatitur për djallin dhe engjëjt e tij."
- 2 The. 1:6** Sepse është e drejtë, përpara Perëndisë, t'u kthehet shtrëngimi atyre që po ju shtrëngojnë.
- c **Mt. 25:34** Atëherë Mbreti do t'u thotë atyre që do të jenë në të djathtë të tij: "Ejani, të bekuar të Atit tim; trashëgoni mbretërinë që u bë gati për ju që nga themelimi i botës."
- 2 The. 1:7** Kurse juve, që shtrëngoheni, të preheni bashkë me ne, kur Zoti Jezu Krisht të zbulohet nga qielli me engjëjt e fuqisë së tij.

PERËNDIA FRYMË E SHENJTË

DITA E ZOTIT, 20

Pyetja 53

Çfarë beson për Frymën e Shenjtë?

Përgjigjja:

Së pari, që Ai është Perëndi i vërtetë dhe i bashkëpërjetshëm me Atin dhe Birin^a; së dyti, që Ai më jepet edhe mua^b, me qëllim që të më bëjë gjymtyrë të Krishtit dhe të të gjitha të mirave të Tij, me anë të besimit^c, që të më ngushëllojë^d dhe të qëndrojë me mua përgjithmonë^e.

- a **1 Gjo. 5:7** Sepse tre janë ata që dëshmojnë në qiell: Ati, Fjala dhe Fryma e Shenjtë; dhe këta të tre janë një. **Zan. 1:2** Toka ishte pa trajtë, e zbrazët dhe errësira mbulonte sipërfaqen e humnerës; dhe Fryma e Perëndisë lëvizte mbi sipërfaqen e ujërave. **Isa. 48:16** Afrohuni tek unë, dëgjoni këtë: "Qysh në fillim nuk fola në fshehtësi; kur këto fakte ndodhnin, unë isha atje. Dhe tani Zoti, ZOTI, dhe Fryma e tij më kanë dërguar".
- 1 Kor. 3:16** A nuk e dini se jeni tempulli i Perëndisë dhe se Fryma e Perëndisë banon në ju?
- 1 Kor. 6:19** A nuk e dini se trupi juaj është tempulli i Frymës së Shenjtë që është në ju, të cilin e keni nga Perëndia, dhe se nuk i përkritni vetvetes?
- Vep. 5:3–4** Por Pjetri i tha: «Anania, pse Satani ta mbushi zemrën që të gënjesh Frymën e Shenjtë dhe të mbash një pjesë të fitimit të vendit? ⁴Po të mbetej e pashitur, a nuk do të ngelte e jotja? Edhe pasi u shit a nuk ishte në pushtetin tënd? Pse e shtive në zemër këtë gjë? Ti nuk gënjeve njerëzit, por Perëndinë!»
- b **Gal. 4:6** Dhe, duke qenë se jeni bij, Perëndia dërgoi Frymën e Birit të tij në zemrat tuaja që thërret: «Abba, Atë!»
- Mt. 28:19–20** «Shkoni, pra, dhe bëni dishepuj të gjitha kombet duke i pagëzuar në emër të Atit e të Birit e

të Frymës së Shenjtë, ²⁰duke i mësuar të mbajnë të gjitha sa ju kam urdhëruar. Dhe ja, unë jam me ju gjithë ditët, deri në mbarim të botës. Amen».

2 Kor. 1:22 I cili edhe na vulosi dhe na dha kaparin e Frymës në zemrat tona.

Ef. 1:13 Në të edhe ju, pasi e dëgjuat fjalën e së vërtetës, ungjillin e shpëtimit tuaj dhe, pasi besuat, u vulosët me Frymën e Shenjtë të premtimit.

- c **Gal. 3:14** Që bekimi i Abrahamit t'u vijë kombeve nëpërmjet Jezu Krishtit, që ne të marrim premtimin e Frymës përmes besimit.

1 Pj. 1:2 Të zgjedhurve sipas paranjohjes së Perëndisë, Atit, me anë të shenjtërimit të Frymës, për bindje dhe për spërkatje me gjakun e Jezu Krishtit: hir dhe paqe ju shtoftë.

1 Kor. 6:17 Por ai që i ngjitet Zotit është një frymë me të.

- d **Gjo. 15:26** Por kur të vijë Ngushëlluesi, që unë do t'ju dërgoj prej Atit, Fryma e së Vërtetës, që del nga Ati, ai do të dëshmojë për mua.

Vep. 9:31 Kështu, në mbarë Judenë, në Galile dhe në Samari kishat kishin paqe dhe ndërtoheshin. Dhe duke ecur në druajtjen e Zotit dhe në ngushëllimin e Frymës së Shenjtë, shumoheshin.

- e **Gjo. 14:16** Dhe unë do t'i lutem Atit dhe ai do t'ju japë një Ngushëllues tjetër, që do të qëndrojë përgjithmonë me ju. **1 Pj. 4:14** Në qoftë se ju fyejnë për emrin e Krishtit, lum ju, sepse Fryma e lavdisë dhe Fryma e Perëndisë prehet mbi ju; nga ana e tyre blasfemohet, kurse nga ana juaj përlëvdohet.

DITA E ZOTIT, 21

Pyetja 54

Çfarë beson ti për “Kishën e shenjtë, të përgjithshme” të Krishtit?

Përgjigjja:

Që Biri i Perëndisë^a qysh nga fillimi e deri në mbarimin e botës^b, mbledh, mbron dhe ruan për veten e Tij^c, nëpërmjet Frymës dhe Fjalës së Tij^d, prej tërë racës njerëzore^e, një Kishë të zgjedhur për jetën e përjetshme^f, që pranon besimin e vërtetë^g; dhe që unë jam^h dhe do të mbetem gjithmonë një gjymtyrë e gjallë e sajⁱ.

- a **Ef. 5:26** Që ta shenjtërojë, pasi e pastroi me larjen e ujit me anë të fjalës.

Gjo. 10:11 Unë jam bariu i mirë; bariu i mirë jep jetën e vet për delet.

Vep. 20:28 Kini kujdes, pra, për veten tuaj dhe për gjithë tufën, në të cilën Fryma e Shenjtë ju ka vënë juve mbikëqyrës që të kullotni kishën e Perëndisë, të cilën ai e ka fituar me gjakun e vet.

Ef. 4:11–13 Dhe ai dha disa si apostuj, të tjerë si profetë, të tjerë si ungjilltarë, të tjerë si barinj e mësues, ¹²për ndreqjen e shenjtoreve, për veprën e shërbimit dhe për ndërtimin e trupit të Krishtit, ¹³derisa të arrijmë të gjithë tek uniteti i besimit dhe i njohjes së Birit të Perëndisë, te një burrë i përsosur, në masën e moshës së plotësisë së Krishtit.

- b **Psa. 71:17–18** O Perëndi, ti më ke mësuar që në fëmijëri; dhe deri më sot unë kam shpallur mrekullitë e tua.

¹⁸Edhe tani që jam plakur dhe jam thinjur, o Perëndi, mos më braktis, derisa t'i kem treguar këtij brezi fuqinë tënde dhe mrekullitë e tua gjithë atyre që do të vijnë.

Isa. 59:21 «Sa për mua, kjo është besëlidhja ime me ata», thotë ZOTI: «Fryma im është mbi ty dhe fjalët e mia që vura në gojën tënde nuk do të largohen kurrë nga goja jote, as nga goja e pasardhjes sate, as nga goja e pasardhjes së pasardhjes sate», thotë ZOTI, «tani e përgjithmonë».

1 Kor. 11:26 Sepse sa herë të hani nga kjo bukë dhe të pini nga kjo kupë, ju shpallni vdekjen e Zotit, derisa ai të vijë.

- c **Mt. 16:18** Dhe unë po të them gjithashtu se ti je Pjetri, dhe mbi këtë shkëmb do të ndërtoj kishën time dhe dyert e ferrit nuk do ta mundin atë.

Gjo. 10:28–30 «...dhe unë u jap atyre jetë të përjetshme dhe nuk do të humbasin aspak, përjetë, dhe askush nuk do t'i rrëmbejë nga dora ime. ²⁹Ati im, që m'i ka dhënë, është më i madh se të gjithë; dhe askush nuk mund t'i rrëmbejë nga dora e Atit tim. ³⁰Unë dhe Ati jemi një».

Psa. 129:1-5 Shumë më kanë shtypur që në rininë time, le ta thotë Izraeli: «²Shumë më kanë shtypur qysh prej rinitë sime, por nuk kanë mundur të më mposhtin. ³Lëruetit kanë lëruar mbi kurrizin tim dhe kanë bërë aty brazda të gjata». ⁴ZOTI është i drejtë; ai i preu litarët e të pabesëve. ⁵U turpërofshin të gjithë dhe kthefshin krahet ata që urrejnë Sionin!

- d **Isa. 59:21** «Sa për mua, kjo është besëlidhja ime me ata», thotë ZOTI: «Fryma im është mbi ty dhe fjalët e mia që vura në gojën tënde nuk do të largohen kurrë nga goja jote, as nga goja e pasardhjes sate, as nga goja e pasardhjes së pasardhjes sate», thotë ZOTI, «tani e përgjithmonë».

Rom. 1:16 Sepse, unë nuk kam turp për ungjillin e Krishtit, sepse ai është fuqia e Perëndisë për shpëtimin e cilitdo që beson, më parë judeun e pastaj grekun.

Rom. 10:14-17 Si do ta thërrasin, pra, atë, të cilin nuk i besuan? Dhe si do të besojnë tek ai për të cilin nuk kanë dëgjuar? Dhe si do të dëgjojnë, pa predikues? ¹⁵Dhe si do të predikojnë pa qenë dërguar? Siç është shkruar: «Sa të bukura janë këmbët e atyre që shpallin ungjillin e paqes, që shpallin ungjillin e së mirës!» ¹⁶Por jo të gjithë iu bindën ungjillit, sepse Isaia thotë: «Zot, kush i besoi predikimit tonë?» ¹⁷Besimi, pra, vjen nga dëgjimi, dhe dëgjimi vjen nga fjala e Perëndisë.

Ef. 5:25 Që ta shenjtërojë, pasi e pastroi me larjen e ujit me anë të fjalës.

- e **Zan. 26:4** Dhe do ta shumoj pasardhjen tënde si yjet e qiellit; do t'i jap pasardhjes sate tërë këto vende dhe të gjitha kombet e tokës do të bekohen te pasardhja jote.

Zbu. 5:9 Dhe këndonin një këngë të re duke thënë: «I denjë je të marrësh librin dhe të hapësh vulat e tij, sepse ti u there, dhe nëpërmjet gjakut tënd na bleve për Perëndinë prej çdo fisi, gjuhe, populli dhe kombi.

- f **Rom. 8:29** Sepse, ata që ai i ka njohur që më parë, edhe i ka paracaktuar që të jenë njësoj me shëmbëllimin e Birit të tij, kështu që ai të jetë i parëlinduri në mes të shumë vëllezërve.

Ef. 1:10-13 ...që, në administrimin për plotësimin e kohërave, të përmbledhë të gjitha gjërat në Krishtin, edhe ato që janë në qiej edhe ato që janë mbi dhe; në atë, ¹¹në të cilin edhe u zgjodhëm për trashëgimi, duke qenë të paracaktuar sipas vendimit të atij që vepron gjithçka sipas këshillës së vullnetit të tij, ¹²që ne të jemi për lëvdim të lavdisë së tij, ne që shpresuam qysh më parë në Krishtin. ¹³Në të edhe ju, pasi e dëgjuat fjalën e së vërtetës, ungjillin e shpëtimit tuaj dhe, pasi besuat, u vulosët me Frymën e Shenjtë të premtimit.

- g **Vep. 2:42** Por ata ishin ngulmues në mësimin e apostujve dhe në bashkësi dhe në thyerjen e bukës dhe në lutje.

Ef. 4:3-5 ...duke u përpjekur të ruani unitetin e Frymës në lidhjen e paqes. ⁴Është një trup dhe një Frymë, sikurse ju u thirrët në një shpresë të thirrjes suaj. ⁵Një Zot, një besim, një pagëzim.

- h **1 Gjo. 3:14, 19-21** Ne e dimë se kemi kaluar nga vdekja në jetë, sepse i duam vëllezërit; kush nuk e do vëllanë, mbetet në vdekje. ¹⁹Dhe në këtë dimë se jemi në të vërtetën dhe do t'i bindim zemrat tona para atij; ²⁰sepse, po të na dënojë zemra jonë, Perëndia është më i madh se zemra jonë dhe një çdo gjë. ²¹Të dashur, nëse zemra jonë nuk na dënon, kemi siguri para Perëndisë...

2 Kor. 13:5 Hetoni veten tuaj a jeni në besim; provoni veten tuaj! Apo nuk e njihni veten tuaj se Jezu Krishti është në ju? Veç në qofshi të paprovar.

Rom. 8:10 Dhe, nëse Krishti është në ju, trupi është i vdekur për shkak të mëkatit, por Fryma është jetë për shkak të drejtësisë.

- i **Psa. 23:6** Me siguri pasuri dhe mirësi do të më shoqërojnë në gjithë ditët e jetës sime; dhe unë do të banoj në Shtëpinë e ZOTIT ditë të gjata.

1 Kor. 1:8-9 ...i cili edhe do t'ju vërtetojë deri në fund, që të jeni të paqortueshëm në ditën e Zotit tonë Jezu Krisht. ⁹Besnik është Perëndia, nga i cili u thirrët në bashkësinë e Birit të tij Jezu Krishtit, Zotit tonë.

Gjo. 10:28 Dhe unë u jap atyre jetë të përjetshme dhe nuk do të humbasin aspak, përjetë, dhe askush nuk do t'i rrëmbejë nga dora ime.

1 Gjo. 2:19 Prej nesh dolën, por nuk ishin prej nesh, sepse, po të ishin prej nesh, do të kishin qëndruar me ne; por kjo ndodhi që të dalë se nuk janë të gjithë prej nesh.

1 Pj. 1:5 Që nga fuqia e Perëndisë me anë të besimit jeni të ruajtur, për shpëtimin që është gati për t'u zbuluar në kohën e fundit.

Pyetja 55

Çfarë kupton ti me shprehjen “bashkësi e shenjtoreve”?

Përgjigjja:

Së pari, që të gjithë ata që besojnë, duke qenë gjymtyrë të Krishtit, janë pjesëmarrës të Tij në bashkësi, dhe në të gjitha pasuritë dhe dhuratat e Tij^a; së dyti, që secili duhet ta dijë detyrën e tij, t'i përdorë me gatishmëri dhe me gëzim dhuntitë e tij për të mirën dhe shpëtimin e anëtarëve të tjerë^b.

- a **1 Gjo. 1:3** Atë që kemi parë dhe kemi dëgjuar, po jua shpallim, që edhe ju të keni bashkësi me ne; dhe bashkësia jonë është me Atin dhe me Birin e tij, Jezu Krishtin.

Rom. 8:32 Sepse ai që nuk e kurseu Birin e vet, por e dha për ne të gjithë, qysh nuk do të na dhurojë të gjitha gjërat bashkë me të?

1 Kor. 12:12–13 Sepse ashtu si trupi është një, dhe ka shumë gjymtyrë, edhe të gjitha gjymtyrët e të njëjtit trup, megjithëse janë shumë, janë një trup i vetëm, kështu është edhe Krishti. ¹³Sepse të gjithë ne jemi pagëzuar në një Frymë të vetëm në një trup, qofshin hebrej apo grekë, skllëvër a të lirë, dhe të gjithë jemi ujitur në një Frymë.

1 Kor. 6:17 Por ai që i ngjitet Zotit është një frymë me të.

- b **1 Kor. 12:21** Dhe syri nuk mund t'i thotë dorës: «Unë nuk kam nevojë për ty»; dhe po ashtu koka nuk mund t'u thotë këmbëve: «Unë nuk kam nevojë për ju».

1 Kor. 13:1–5 Po të flisja gjuhët e njerëzve dhe të engjëjve, dhe të mos kisha dashuri, do të bëhesha si një bronz që kumbon ose si cimballi që tingëllon. ²Edhe po të kisha dhuntinë e profecisë, edhe të dija të gjitha misteret dhe mbarë shkencën dhe po të kisha gjithë besimin sa të luaja nga vendi malet, por të mos kisha dashuri, nuk do të isha asgjë. ³Edhe po të ndaja gjithë ç'kam timen që të ushqoja të varfrit dhe po ta jepja trupin tim që të digjej, e të mos kisha dashuri, nuk do të më vlente asgjë! ⁴Dashuria është zemërgjerë, plot mirësi; dashuria nuk ka zili, nuk krekoset, nuk fryhet, ⁵nuk sillet në mënyrë të pahijshme, nuk kërkon të sajat, nuk pezmatohet, nuk llogarit të keqen...

Fil. 2:3–8 Mos bëni asgjë për rivalitet, as për lavdi të kotë, por me përlulësi, secili ta çmojë tjetrin më shumë se vetveten. ⁴Të mos shikojë secili interesin e vet, por edhe atë të tjerëve. ⁵Kini në veten tuaj po atë mendje që ishte edhe në Jezu Krishtin, ⁶i cili, edhe pse ishte në trajtë Perëndie, nuk e çmoi si një gjë ku të mbahej fort për të qenë barabar me Perëndinë, ⁷por e zbrazti veten e tij, duke marrë trajtë shërbëtori, e u bë i ngjashëm me njerëzit; ⁸dhe duke u gjetur nga pamja e jashtme posi njeri, e përluli veten duke u bërë i bindur deri në vdekje, edhe deri në vdekje të kryqit.

Pyetja 56

Çfarë beson ti për “faljen e mëkateve”?

Përgjigjja:

Që Perëndia, për hir të shlyerjes së Krishtit, nuk do t'i kujtojë më mëkatet e mia, as natyrën time të çoroditur, kundër së cilës kam për të luftuar gjatë gjithë jetës sime^a; por, me anë të hirit, do të më veshë drejtësinë e Krishtit^b, që unë të mos dënohem asnjëherë përpara gjyqit të Perëndisë^c.

- a **1 Gjo. 2:2** Ai është shlyesi për mëkatet tona; dhe jo vetëm për tonat, por edhe për ato të të gjithë botës.

1 Gjo. 1:7 Por, po të ecim në dritë, sikurse ai është në dritë, kemi bashkësi me njëri-tjetrin, dhe gjaku i Jezu Krishtit, Birit të tij, na pastron nga çdo mëkat.

2 Kor. 5:19 Sepse Perëndia ishte në Krishtin duke pajtuar botën me veten e tij, pa ua llogaritur atyre fajet e tyre dhe vuri ndër ne, si shërbesë, falën e paqtimit.

- b **Rom. 7:23–25** Por shoh një ligj tjetër në gjymtyrët e mia, që lufton kundër ligjit të mendjes sime dhe që më bën rob të ligjit të mëkatit që është në gjymtyrët e mia. ²⁴Oh, i mjeri njeri që jam! Kush do të më çlirojë nga ky trup i vdekjes? ²⁵I falem nderit Perëndisë, me anë të Jezu Krishtit, Zotit tonë. Unë vetë, pra, me mendjen i shërbej ligjit të Perëndisë, por, me mishin ligjit të mëkatit.

Jer. 31:34 Ata nuk do të mësojnë secili të afërmin e vet dhe secili vëllanë e vet, duke thënë: “Njihni ZOTIN!”, sepse të gjithë do të më njohin, nga më i vogli e deri te më i madhi», thotë ZOTI. «Sepse unë do ta fal paudhësinë e tyre dhe nuk do ta kujtoj më mëkatin e tyre».

Mik. 7:19 Atij do t'i vijë përsëri keq për ne, do të shkelë paudhësitë tona. Ti do të hedhësh në fund të detit tërë mëkatet tona.

Psa. 103:3, 10, 12 Ai fal të gjitha paudhësitë e tua dhe shëron të gjitha sëmundjet e tua. ¹⁰Ai nuk na trajton siç e meritojnë mëkatet tona dhe nuk na dënon në bazë të fajeve tona. ¹²Sa larg është lindja nga perëndimi, aq shumë ai ka larguar nga ne fajet tona.

- c **Gjo. 3:18** Ai që beson në të, nuk gjykohet, por ai që nuk beson, tashmë është gjykuar, sepse nuk ka besuar në emrin e Birit të vetëmlindur të Perëndisë.

Gjo. 5:24 Në të vërtetë, në të vërtetë po ju them: Ai që e dëgjon fjalën time dhe beson në atë që më ka dërguar, ka jetë të përjetshme, dhe ai nuk vjen në gjyq, por ka kaluar nga vdekja në jetë.

DITA E ZOTIT, 22

Pyetja 57

Çfarë ngushëllimi të jep “ringjallja e trupit”?

Përgjigjja:

Që pas kësaj jete, jo vetëm shpirti im do të shkojë menjëherë te Krishti, Kreu i tij^a; por edhe trupi im, duke u ringjallur nga fuqia e Krishtit, do të ribashkohet me shpirtin tim dhe do të bëhet i ngjashëm me trupin e lavdishëm të Krishtit^b.

- a **Lu. 16:22** Por ndodhi që i varfri vdiq dhe engjëjt e çuan në gji të Abrahamit; vdiq edhe pasaniku dhe u varros. **Lu. 23:43** Dhe Jezusi i tha: «Në të vërtetë po të them: sot do të jesh me mua në parajsë».

Fil. 1:21–23 Sepse për mua të jetuarit është Krishti dhe të vdekurit fitim. ²²Por në qoftë se të jetuarit në mish bën që puna ime të sjellë fryt, atëherë nuk di ç'të zgjedh; ²³sepse unë jam i shtrënguar nga të dyja: kam dëshirë të ndahem dhe të jem bashkë me Krishtin, shumë herë më mirë.

- b **Job. 19:25–26** Por unë e di që Shpengimtari im jeton dhe që në fund do të ngrihet mbi tokë. ²⁶Mbas shkatërrimit të lëkurës sime, në mishin tim do të shoh Perëndinë.

1 Gjo. 3:2 Të dashur, tani jemi bij të Perëndisë, dhe ende nuk është shfaqur ç'do të jemi; por dimë se, kur të shfaqet ai, do të jemi të ngjashëm me të, sepse do ta shohim atë sesi është.

Fil. 1:21 Sepse për mua të jetuarit është Krishti dhe të vdekurit fitim.

Pyetja 58

Ç'ngushëllim gjen ti tek ajo frazë e kredos që thotë “jetën e përjetshme”?

Përgjigjja:

Meqenëse qysh tani e ndiej në zemrën time fillimin e gëzimit të përjetshëm^a, pas kësaj jete do të trashëgoj shpëtimin e plotë, gjëra të cilat syri nuk i ka parë dhe veshi nuk i ka dëgjuar, dhe nuk kanë hyrë në zemrën e njeriut^b dhe kjo për të lavdëruar Perëndinë në të përgjithmonë^c.

- a **Psa. 4:6–8** Shumë thonë: «Kush do të na tregojë të mirën?». O ZOT, bëj që të shkëlqejë drita e fytyrës sate mbi ne. ⁷Ti më ke shtënë në zemër më tepër gëzim nga sa ndiejnë ata kur kanë grurë dhe musht me shumicë. ⁸Në paqe do të bie dhe në paqe do të fle, sepse ti vetëm, o ZOT, më mban në siguri.

Psa. 16:9–11 Prandaj zemra ime gëzohet dhe dinjiteti im ngazëllohet; edhe mishi im do të pushojë i sigurt, ¹⁰sepse ti nuk do ta lësh shpirtin tim në Sheol dhe nuk do të lejosh që i Shenjti yt të shohë kalbjen. ¹¹Ti do të më tregosh shtegun e jetës; ka plot gëzim në praninë tënde; në të dhathtën tënde ka kënaqësi në përjetësi.

Psa. 36:9 Sepse pranë teje është burimi i jetës dhe me anë të dritës sate ne shohim dritën.

Gjo. 3:36 «Ai që beson në Birin ka jetë të përjetshme, por ai që nuk i bindet Birit, nuk do të shohë jetë, por

zemërimi i Perëndisë qëndron mbi të».

Gjo. 5:24 Në të vërtetë, në të vërtetë po ju them: Ai që e dëgjon fjalën time dhe beson në atë që më ka dërguar, ka jetë të përjetshme, dhe ai nuk vjen në gjyq, por ka kaluar nga vdekja në jetë.

Gjo. 6:40 «Ky, pra, është vullneti i atij që më ka dërguar: që kushdo që sheh Birin dhe beson në të, të ketë jetë të përjetshme; dhe unë do ta ngjall atë në ditën e fundit».

Gjo. 6:54 Kush ha mishin tim dhe pi gjakun tim, ka jetë të përjetshme, dhe unë do ta ringjall atë në ditën e fundit.

Gjo. 11:25 Jezusi i tha: «Unë jam ringjallja dhe jeta; ai që beson në mua, edhe në vdekje, do të jetojë.»

Gjo. 17:3 Dhe kjo është jeta e përjetshme, të të njohin ty, të vetmin Perëndi të vërtetë, dhe Jezu Krishtin që ti ke dërguar.

2 Kor. 5:2–3 Sepse edhe në këtë çadër ne psherëtimë duke dëshiruar fort të veshim përsipër banesën tonë qiellore, ³edhe nëse e kemi të veshur, nuk do të gjendemi lakuriq.

Gal. 2:20 U kryqëzova bashkë me Krishtin; por rroj; jo më unë, po Krishti rron në mua; por ajo që tani jetoj në mish, e jetoj në besimin e Birit të Perëndisë, që më deshi dhe dha veten për mua.

- b **Isa. 64:4** Nga kohët e lashta askush nuk kishte dëgjuar kurrë, asnjë vesh nuk kishte dëgjuar dhe asnjë sy nuk kishte parë ndonjë Perëndi tjetër veç teje, që vepron për atë që ka shpresë tek ai.

1 Kor. 2:9 Por, sikurse është shkruar: «Ato gjëra që syri nuk i ka parë dhe veshi nuk i ka dëgjuar dhe që nuk kanë hyrë në zemër të njeriut, janë ato që Perëndia ka përgatitur për ata që e duan atë».

Zbu. 2:7 «Kush ka veshë, le të dëgjojë atë që u thotë Fryma kishave: kujt fiton do t'i jap të hajë nga pema e jetës, që është në mes të parajsës së Perëndisë».

Zbu. 2:17 «Kush ka veshë, le të dëgjojë atë që Fryma u thotë kishave: kujt fiton do t'i jap të hajë nga mana e fshehur; dhe do t'i jap një guriçkë të bardhë, dhe mbi guriçkë është shkruar një emër i ri, të cilin s'ë di askush, përveç atij që e merr».

- c **Ef. 1:5** Duke na paracaktuar për birësim për veten e tij me anë të Jezu Krishtit, sipas pëlqimit të vullnetit të vet.

Zbu. 4:8–11 Edhe të katër qeniet e gjalla kishin, secila, nga gjashtë krahë përquark, edhe përbrenda ishin plot me sy; dhe nuk pushojnë kurrë, as ditë, as natë, duke thënë: «I shenjtë, i shenjtë, i shenjtë është Zoti Perëndi, i Gjithëpushtetshmi, që ishte, që është dhe që vjen!». ⁹Sa herë që qeniet e gjalla i japin lavdi, nder e falënderim atij që është ulur mbi fron, atij që rron në jetë të jetëve, ¹⁰të njëzet e katër pleqtë bien përmbys përpara atij që është ulur mbi fron dhe adhurojnë atë që jeton në jetë të jetëve dhe i hedhin kurorat e tyre përpara fronit, duke thënë: «¹¹I denjë je, o Zot, të marrësh lavdinë, nderimin dhe fuqinë, sepse ti i krijove të gjitha gjërat, dhe për hir të vullnetit tënd janë dhe u krijuan».

DITA E ZOTIT, 23

Pyetja 59

Po ç'dobi ke tashmë që beson të gjitha këto?

Përgjigjja:

Që në Krishtin unë jam i drejtë para Perëndisë dhe trashëgimtar i jetës së përjetshme^a.

- a **Hab. 2:4** Ja, shpirti i është krenuar, nuk është i drejtë, por i drejti do të rrojë për shkak të besimit të tij.

Rom. 1:17 Sepse, drejtësia e Perëndisë është zbuluar në të prej besimit në besim siç është shkruar: «I drejti do të jetojë prej besimit.»

Rom. 4:3 Sepse, çfarë thotë Shkrimi? «Por Abrahami i besoi Perëndisë dhe kjo u llogarit për drejtësi.».

Gjo. 3:36 «Ai që beson në Birin ka jetë të përjetshme, por ai që nuk i bindet Birit, nuk do të shohë jetë, por zemërimi i Perëndisë qëndron mbi të.»

Gjo. 5:24 Në të vërtetë, në të vërtetë po ju them: Ai që e dëgjon fjalën time dhe beson në atë që më ka dërguar, ka jetë të përjetshme, dhe ai nuk vjen në gjyq, por ka kaluar nga vdekja në jetë.

Pyetja 60

Si është e mundur të jesh i drejtë para Perëndisë?

Përgjigjja:

Vetëm me anë të një besimi të vërtetë në Jezu Krishtin^a; kështu që, edhe nëse ndërgjegjja më akuzon se kam shkelur së tepërmi të gjitha urdhërimet e Perëndisë dhe nuk kam mbajtur asnjë prej tyre^b, dhe mbetem akoma i prirur drejt së keqes^c; prapëseprapë, Perëndia, pa asnjë meritë timen^d, por vetëm nga hiri^e, më dhuron dhe më llogarit shlyerjen, drejtësinë dhe shenjtërinë e plotë të Krishtit^f; sikur të mos kisha pasur apo kryer kurrë ndonjë mëkat; po sikur të isha treguar plotësisht i bindur, gjë që Krishti e ka kryer për mua^g; nëse e pranoj me një zemër besimtare një të mirë të tillë^h.

- a **Rom. 3:21, 28** Por tani, e ndarë nga ligji, është manifestuar drejtësia e Perëndisë, për të cilën dëshmojnë ligji dhe profetët... ²⁸Ne, pra, konkludojmë se njeriu është i drejtësuar nëpërmjet besimit, ndarë nga veprat e ligjit.
- Rom. 5:1–2** Të drejtësuar, pra, prej besimit, kemi paqe me Perëndinë, nëpërmjet Jezu Krishtit, Zotit tonë, ²me anë të të cilit edhe patëm, nëpërmjet besimit, hyrjen në këtë hir në të cilin qëndrojmë dhe mburremi në shpresën e lavdisë së Perëndisë.
- Gal. 2:16** Duke ditur se njeriu nuk drejtësohet prej veprave të ligjit, por përmes besimit në Jezu Krishtin, besuam edhe ne në Jezu Krishtin, që të drejtësoheshim prej besimit në Krishtin dhe jo prej veprave të ligjit, sepse asnjë mish nuk do të drejtësohet prej veprave të ligjit.
- Ef. 2:8–9** Sepse, me anë të hirit jeni të shpëtuar, nëpërmjet besimit; dhe kjo jo prej jush, por është dhurata e Perëndisë, ⁹jo prej veprave, që askush të mos mburret.
- Fil. 3:9** Dhe, që të gjendem në të, duke pasur jo drejtësinë time nga ligji, por atë përmes besimit në Krishtin: drejtësia prej Perëndisë, me anë të besimit.
- b **Rom. 3:9** E çfarë pra? A kemi ne ndonjë epërsi? Aspak! Sepse e kemi treguar qëparë se si judenjtë ashtu edhe grekët janë të gjithë nën mëkat.
- Jak. 2:10** Sepse kushdo që e zbaton gjithë ligjin, por e shkel në një pikë të vetme, është fajtor në të gjitha.
- c **Rom. 7:15, 23** Sepse unë nuk kuptoj atë që bëj, sepse nuk bëj atë që dua, por bëj atë që urrej. ...²³por shoh një ligj tjetër në gjymtyrët e mia, që lufton kundër ligjit të mendjes sime dhe që që më bën rob të ligjit të mëkatit që është në gjymtyrët e mia.
- Gal. 5:17** Sepse mishi ka dëshira kundër Frymës, dhe Fryma ka dëshira kundër mishit; dhe këto i kundërvihen njëra-tjetrës, që të mos bëni ato që doni.
- d **Lip. 9:6** Dije, pra, që nuk është për shkak të drejtësisë sate që ZOTI, Perëndia yt, të jep në zotërim këtë vend të mirë, sepse ti je një popull kokëfortë.
- Eze. 36:22** Prandaj i thuaj shtëpisë së Izraelit: Kështu thotë Zoti, ZOTI: Unë veproj kështu jo për shkakun tuaj, o shtëpi e Izraelit, por për hir të emrit tim të shenjtë që ju keni përdhosur midis kombeve ku keni shkuar.
- Rom. 3:24** Por janë drejtësuar falas me anë të hirit të tij, nëpërmjet shpengimit që është në Krishtin Jezus.
- Rom. 11:6** Edhe nëse është prej hirit, nuk është më prej veprash, përndryshe hiri nuk do të ishte më hir, por, po të jetë nëpërmjet veprave, nuk është më prej hirit, përndryshe vepra nuk do të ishte më vepër.
- Tit. 3:5** Na shpëtoi jo me anë të veprave të drejta, që ne bëmë, por sipas mëshirës së tij, me anë të larjes së rilindjes dhe të ripërtëritjes së Frymës së Shenjtë.
- e **Rom. 3:24** *Shih d.*
- Ef. 2:8** Sepse, me anë të hirit jeni të shpëtuar, nëpërmjet besimit; dhe kjo jo prej jush, por është dhurata e Perëndisë.
- f **Rom. 4:4** Por atij që bën vepra, paga nuk i llogaritet sipas hirit por si detyrim.
- 1 Kor. 1:30** Edhe prej tij ju jeni në Krishtin Jezus, i cili u bë për ne urtësi prej Perëndisë, drejtësi edhe shenjtërim dhe shpengim.
- 2 Kor. 5:19–21** Sepse Perëndia ishte në Krishtin duke pajtuar botën me veten e tij, pa ua llogaritur atyre fajet e tyre dhe vuri ndër ne, si shërbesë, fjalën e paqtitimit. ²⁰Jemi, pra, ambasadorë të Krishtit, sikur Perëndia t'ju lutej nëpërmjet nesh; ju lutemi në vend të Krishtit: Pajtohuni me Perëndinë! ²¹Sepse atë, që nuk njihje mëkat, e bëri mëkat për ne, që ne të bëhemi drejtësia e Perëndisë në të.

- 1 Gjo. 2:1** Djema të mi, ju shkruaj këto që të mos mëkatoni; dhe në qoftë se ndokush ka mëkatuar, kemi një avokat tek Ati, Jezu Krishtin, të drejtin.
- 2 Kor. 5:21** *Shih f.*
- h Gjo. 3:18** Ai që beson në të, nuk gjykohet, por ai që nuk beson, tashmë është gjykuar, sepse nuk ka besuar në emrin e Birit të vetëmlindur të Perëndisë.
- Rom. 3:22** Madje, drejtësia e Perëndisë nëpërmjet besimit në Jezu Krishtin për të gjithë e mbi të gjithë ata që besojnë, sepse nuk ka dallim.

Pyetja 61

Pse thua se je i drejtë vetëm me anë të besimit?

Përgjigjja:

Jo se Perëndia më pranon për shkak të denjësisë së besimit tim; por sepse shlyerja, drejtësia dhe shenjtëria e Krishtit është drejtësia ime para Perëndisë^a; dhe se nuk mund t'i marr dhe t'i përdor këto për veten time në ndonjë mënyrë tjetër, veçse vetëm me anë të besimit^b.

- a 1 Kor. 1:30** Edhe prej tij ju jeni në Krishtin Jezus, i cili u bë për ne urtësi prej Perëndisë, drejtësi edhe shenjtërim dhe shpengim;
- 1 Kor. 2:2** Sepse e vendosa që të mos di tjetër gjë ndër ju, veç Jezu Krishtit edhe atë të kryqëzuar.
- b Rom. 3:22** Madje, drejtësia e Perëndisë nëpërmjet besimit në Jezu Krishtin për të gjithë e mbi të gjithë ata që besojnë, sepse nuk ka dallim;
- 1 Gjo. 5:10** Ai, që beson në Birin e Perëndisë ka këtë dëshmi në vetvete; ai, që nuk i beson Perëndisë, e ka bërë atë gënjeshtar, sepse nuk i ka besuar dëshmisë, që Perëndia ka dhënë për Birin e tij.

DITA E ZOTIT, 24

Pyetja 62

Po pse veprat tona të mira s'mund të jenë drejtësia jonë e plotë apo pjesë e saj para Perëndisë?

Përgjigjja:

Sepse drejtësia që mund të pranohet përpara gjyqit të Perëndisë, duhet të jetë absolutisht e përsosur dhe t'i përshtatet ligjit hyjnor nga të gjitha anët^a; si dhe, sepse veprat tona më të mira në këtë jetë janë të gjitha të papërsosura dhe të njollosura nga mëkati^b.

- a LiP. 27:26** "Mallkuar qoftë ai që nuk u përmbahet fjalëve të këtij ligji për t'i zbatuar!". Tërë populli do të thotë: "Amen"
- Gal. 3:10** Dhe të gjithë ata që janë prej veprave të ligjit janë nën mallkim, sepse është shkruar: «I mallkuar është kushdo, që nuk qëndron në të gjitha ato, që shkruhen në librin e ligjit për t'i bërë».
- Jak. 2:10** Sepse kushdo që e zbaton gjithë ligjin, por e shkel në një pikë të vetme, është fajtor në të gjitha.
- b Psa. 143:2** Dhe mos hyr në gjyq me shërbëtorin tënd, sepse asnjë i gjallë nuk do të jetë i drejtë para teje.
- Isa. 64:6** Jemi të gjithë si një gjë e papastër dhe të gjitha veprat tona të drejtësisë janë si një rrobë e ndotur; po fishkemi të gjithë si një gjethe dhe paudhësitë tona na çojnë larg si era.
- Dan. 9:5, 18** Ne kemi mëkatuar dhe kemi vepruar në mënyrë të çoroditur, kemi qenë të këqij dhe u rebeluam, duke u larguar nga urdhërimet e tua dhe nga dekretet e tua. ¹⁸O Perëndia im, vër vesh dhe dëgjo; hap sytë e tu dhe shiko shkrimet tona dhe qytetin ku thirret emri yt, sepse ne nuk paraqesim para teje lutjet tona për veprat tona të drejta, por për dhembshuritë e tua të mëdha.

Pyetja 63

Çfarë! Nuk vlejné veprat tona të mira, për të cilat Perëndia do të na e shpërblejë në këtë jetë dhe në atë të ardhme^a?

Përgjigjja:

Ky shpërblim nuk vjen nga merita, por nga hiri^b.

- a **Mt. 5:12** Gëzohuni dhe ngazëllehuni, sepse shpërblimi juaj është i madh në qiej, sepse kështu i kanë përndjekur profetët që qenë para jush».

Mt. 10:42 Dhe kushdo që i jep për të pirë qoftë edhe vetëm një gotë uji të ftohtë ndonjërit prej këtyre të vegjëlve, në emër të një dishepulli, në të vërtetë ju them se nuk do ta humbë aspak shpërblimin e tij».

Lu. 6:35 Por ju t'i doni armiq të tuaj, bëni të mirë dhe jepni hua pa pasur shpresë për asgjë, dhe shpërblimi juaj do të jetë i madh dhe ju do të jeni bijtë e Më të Lartit, sepse ai është dashamirës me mosmirënjohësit dhe të ligjtë.

Rom. 2:6 Që do ta shpagojë secilin sipas veprave të tij.

1 Kor. 3:8 Por ai që mbjell dhe ai që ujit janë një, dhe secili do të marrë shpërblimin e vet sipas mundit të tij.

- b **Mt. 20:1** «Mbretëria e qiejve i ngjan, pra, një zoti shtëpie, që doli herët në mëngjes për të pajtuar me mëditje punëtorë për vreshtin e vet.»

Lu. 17:10 «Kështu edhe ju, kur të keni bërë të gjitha ato që ju urdhërohen, thoni: "Jemi shërbëtorë të padobishëm. Ne kemi bërë atë që kishim detyrë të bënim».

1 Kor. 9:16–18 Sepse, në qoftë se unë shpall ungjillin, s'ka pse të mburrem, sepse kjo është një nevojë që më është ngarkuar; por mjerë unë, po nuk shpalla ungjillin! ¹⁷Sepse nëse e bëj këtë me dëshirë, kam një pagë; por nëse e bëj pa dëshirë, mbetet përsëri një detyrë që më është besuar. ¹⁸Cila, pra, është paga ime? Që, duke shpallur ungjillin ta paraqes falas ungjillin e Krishtit, pa e përdorur për keq të drejtën time në ungjillin.

2 Tim. 1:16–18 Zoti i dhëntë mëshirë shtëpisë së Onesiforit, sepse shpeshherë më dha zemër dhe nuk pati turp nga zinxhirët e mi; ¹⁷madje, kur erdhi në Romë, më kërkoi me shumë zell dhe më gjeti. ¹⁸Zoti i dhëntë të gjejë mëshirë nga ana e Zotit në atë ditë. Edhe sa më shërbeu në Efes, ti e di më mirë se të gjithë.

Rom. 6:23 Sepse paga e mëkatit është vdekja, por dhurata e Perëndisë është jeta e përjetshme nëpërmjet Krishtit Jezus, Zotit tonë.

Pyetja 64

Por a nuk i bën kjo doktrinë njerëzit të pakujdesshëm dhe të këqij?

Përgjigjja:

Në asnjë mënyrë^a; sepse është e pamundur që ata, të cilët janë shartuar në Krishtin me anë të një besimi të vërtetë, të mos nxjerrin frytet e mirënjohjes^b.

- a **Psa. 130:4** Por te ti ka falje, me qëllim që të kenë frikë prej teje.

Lu. 1:73–75 Betimin që i bëri Abrahamit, atit tonë, ⁷⁴për të na lejuar që, pasi të qlirohemi nga duart e armiqve tanë, t'i shërbejmë pa frikë, ⁷⁵në shenjtëri e në drejtësi përpara tij, të gjitha ditët e jetës sonë.

Rom. 6:1 Ç'të themi, pra? A të mbetemi në mëkat, që të shtohet hiri?

Rom. 11:18–20 ...mos u mburr kundër degëve: por nëse mburresh kundër tyre, nuk je ti që mban rrënjën, po rrënja të mban ty. ¹⁹Do të thuash, pra: «Degët u këputën që të shartohej unë». ²⁰Mirë, ato u këputën për mosbesimin, por ti qëndron për shkak të besimit; mos u mbaj me të lartë, por druaj.

Ef. 1:3–4 I bekuar qoftë Perëndia dhe Ati i Zotit tonë Jezu Krisht, që na bekoj me çdo bekim frymëror në vendet qiellore, në Krishtin, ⁴sikurse na zgjodhi në të përpara themelimit të botës, që të jemi të shenjtë dhe të patëmetë përpara tij në dashuri...

Fil. 2:12–13 Prandaj, të dashurit e mi, ashtu sikurse keni qenë gjithnjë të bindur jo vetëm kur isha i pranishëm, por edhe më shumë tani, që jam larg, veproni për shpëtimin tuaj me frikë e me dridhje, ¹³sepse

Perëndia është ai që vepron në ju edhe vullnetin edhe veprimtarinë, sipas pëlqimit të tij.

Tit. 2:11 Sepse hiri shpëtues i Perëndisë iu shfaq gjithë njerëzve.

1 Gjo. 1:9 Po t'i rrëfejmë mëkatet tona, ai është besnik dhe i drejtë që të na falë mëkatet dhe të na pastrojë nga çdo paudhësi.

1 Gjo. 2:1 Djema të mi, ju shkruaj këto që të mos mëkatoni; dhe në qoftë se ndokush ka mëkatuar, kemi një avokat tek Ati, Jezu Krishtin, të drejtin.

b **Mt. 7:18** Një pemë e mirë nuk mund të japë fruta të këqija, as një pemë e kalbur të japë fruta të mira.

Gjo. 15:5 Unë jam hardhia, ju jeni shermendet; kush qëndron në mua dhe unë në të, ai jep shumë fryt, sepse pa mua nuk mund të bëni asgjë.

SAKRAMENTET

DITA E ZOTIT, 25

Pyetja 65

Përderisa, pra, jemi bërë pjesëtarë të Krishtit dhe të të gjitha të mirave të Tij vetëm me anë të besimit, nga buron ky besim?

Përgjigjja:

Nga Fryma e Shenjtë^a, që vendos besimin në zemrat tona me anë të predikimit të Ungjillit^b dhe e vërteton me anë të përdorimit të sakramenteve^c.

a **Gjo. 14:26** Por Ngushëlluesi, Fryma e Shenjtë, që Ati do ta dërgojë në emrin tim, ai do t'ju mësojë çdo gjë dhe do t'ju kujtojë të gjitha këto që ju thashë.

Ef. 2:8 Sepse, me anë të hirit jeni të shpëtuar, nëpërmjet besimit; dhe kjo jo prej jush, por është dhurata e Perëndisë.

Ef. 6:23 Paqe vëllezërve dhe dashuri me besim nga Perëndia Atë dhe nga Zoti Jezu Krisht.

Gjo. 3:5 Jezusi u përgjigj: «Në të vërtetë, në të vërtetë po të them se, kush nuk lind nga uji dhe nga Fryma, ai nuk mund të hyjë në mbretërinë e Perëndisë.

1 Kor. 12:3 Prandaj ju bëj të ditur se asnjë që flet në Frymën e Perëndisë nuk i thotë Jezusit, i mallkuar; edhe asnjë nuk mund t'i thotë Jezusit, Zot, veçse në Frymën e Shenjtë.

1 Kor. 12:8 Dikujt, pra, i jepet, fjalë urtësie me anë të Frymës; një tjetri, sipas po atij Fryme fjalë njohurie;

Fil. 1:29 Sepse juve ju është dhënë hiri për Krishtin, jo vetëm që të besoni në të, por edhe të vuani për të.

b **Mt. 16:15–17** Ai u tha atyre: «Po ju, kush thoni se jam unë?». ¹⁶Dhe Simon Pjetri duke u përgjigjur tha: «Ti je Krishti, Biri i Perëndisë të gjallë». ¹⁷Dhe Jezusi, duke iu përgjigjur, i tha: «I lum je ti, o Simon, bir i Jonas, sepse këtë nuk ta zbuloi as mishi, as gjaku, por Ati im që është në qiej.

Vep. 10:44 Ndërsa Pjetri ende po i thoshte këto fjalë, Fryma e Shenjtë ra mbi të gjithë ata që po e dëgjonin fjalën.

Vep. 16:14 Dhe një grua, me emër Lidia, që ishte tregtare të purpurtash, nga qyteti i Tiatirës dhe që e adhuronte Perëndinë, po dëgjonte. Dhe Zoti ia hapi zemrën për të dëgjuar ato që thoshte Pali.

Rom. 10:14 Si do ta thërrasin, pra, atë, të cilin nuk i besuan? Dhe si do të besojnë tek ai për të cilin nuk kanë dëgjuar? Dhe si do të dëgjojnë, pa predikues?

Rom. 10:17 Besimi, pra, vjen nga dëgjimi, dhe dëgjimi vjen nga fjalë e Perëndisë.

1 Pj. 1:23 Të rilindur jo nga një farë që priset, por që nuk priset, me anë të fjalës së gjallë të Perëndisë, që mbetet përjetë.

c **Zan. 17:11** Dhe do të rrethpriteni në mishin e lafshës suaj; dhe kjo do të jetë një shenjë e besëlidhjes midis meje dhe jush.

Rom. 4:11 Edhe mori shenjën e rrethprerjes, si vullë të drejtësisë për besimin që kishte pasur kur ishte ende i parrethprerë, me qëllim që të ishte ati i gjithë atyre që besojnë edhe se janë të parrethprerë, me qëllim që edhe atyre t'u llogaritet drejtësia.

Eks. 13:16 «Kjo do të jetë si një shenjë mbi dorën tënde dhe një ballore midis syve të tu, sepse Zoti me dorë të fuqishme na bëri të dalim nga Egjipti».

LiP. 30:6 ZOTI, Perëndia yt, do ta rrethpresë zemrën tënde dhe zemrën e pasardhjes sate, që ti ta duash Zotin, Perëndinë tënd, me gjithë zemër e me gjithë shpirt, dhe kështu ti të jetosh.

Lev. 6:9 «Jepu këtë urdhër Aaronit dhe bijve të tij, dhe u thuaj atyre: Ky është ligji i holokaustit. Holokausti do të mbetet mbi mangallin sipër altarit tërë natën, deri në mëngjes; dhe zjarri i altarit do të mbahet i ndezur.»

Lev. 6:25 «Folu Aaronit dhe bijve të tij dhe u thuaj atyre: Ky është ligji i flijimit për mëkatin. Në vendin ku theret holokausti, të theret flijimi për mëkatin përpara ZOTIT.»

Heb. 9:8 Nëpërmjet kësaj, Fryma e Shenjtë tregonte se udha në shenjtërore ende nuk ishte shfaqur, mbasi ende po qëndronte tenda e parë.

Heb. 9:24 Sepse Krishti nuk hyri në një shenjtërore të bërë me dorë, që është vetëm shëmbëllesë e asaj të vërtetë, por në vetë qiellin për t'u shfaqur tani përpara Perëndisë për ne

Eze. 20:12 Gjithashtu u dhashë atyre shabatet e mia, me qëllim që të ishin një shenjë midis meje dhe atyre, dhe që të njihnin që unë jam ZOTI që i shenjtëroj.

1 Sam. 17:36 «Po, shërbëtori yt ka vrarë luanin dhe ariun; dhe ky filiste i parrethprerë do të pësojë të njëjtin fat, sepse ka fyer ushtrinë e Perëndisë të gjallë».

Isa. 6:6 Atëherë një nga serafinët fluturoi drejt meje duke mbajtur në dorë një urë zjarri, që e kishte marrë me mashë nga altari.

Isa. 54:9 Për mua ky do të jetë në fakt si ujërat e Noeut; ashtu siç u betova që ujërat e Noeut nuk do ta mbulonin më tokën, kështu betohem që nuk do të zemërohem më me ty dhe nuk do të të kërcënojmë.

Mt. 3:11 Unë po ju pagëzoj me ujë, për pendim; por ai që vjen pas meje është më i fortë se unë, të cilit nuk jam i denjë as t'i mbaj sandalet; ai do t'ju pagëzojë me Frymën e Shenjtë dhe me zjarr.

Mt. 28:19 Shkoni, pra, dhe bëni dishepuj të gjitha kombet duke i pagëzuar në emër të Atit e të Birit e të Frymës së Shenjtë.

Vep. 2:38 Atëherë Pjetri u tha atyre: «Pendohuni dhe secili nga ju le të pagëzohet në emër të Jezu Krishtit për faljen e mëkateve; dhe ju do të merrni dhuratën e Frymës së Shenjtë.

Vep. 22:16 Dhe tani ç'pret? Çohu dhe pagëzohu dhe lahu nga mëkatet e tua, duke thirrur emrin e Zotit».

1 Kor. 11:26 Sepse sa herë të hani nga kjo bukë dhe të pini nga kjo kupë, ju shpallni vdekjen e Zotit, derisa ai të vijë.

Tit. 3:5 Na shpëtoi jo me anë të veprave të drejta, që ne bëmë, por sipas mëshirës së tij, me anë të larjes së rilindjes dhe të ripërtëritjes së Frymës së Shenjtë.

1 Pj. 3:21 Si kundërformë e kësaj, pagëzimi; na shpëton tani edhe ne, jo heqja e ndyrësisë së mishit, por kërkesa për një ndërgjegje të mirë ndaj Perëndisë, nëpërmjet ringjalljes së Jezu Krishtit.

Pyetja 66

Çfarë janë sakramentet?

Përgjigjia:

Sakramentet janë shenja të dukshme dhe vula të shenjta, të caktuara nga Perëndia për këtë qëllim, që, me anë të përdorimit të tyre, Ai të mund të shpallë më plotësisht dhe të vulosë në ne premtimin e Ungjillit, që do të thotë se Ai na e jep falas faljen e mëkateve dhe jetën e përjetshme, për hir të atij flijimi të vetëm të Krishtit të kryer në kryq^a.

a Shih përgjigjen 65 c.

Pyetja 67

Atëherë, a janë Fjala dhe sakramentet të urdhëruara dhe të caktuara për këtë qëllim, që të mund ta drejtojnë besimin tonë drejt flijimit të Jezu Krishtit në kryq, si e vetmja bazë e shpëtimit tonë?

Përgjigja:

Po, vërtet; sepse Fryma e Shenjtë na mëson në Ungjillin dhe na siguron me anë të sakramenteve, që i gjithë shpëtimi ynë varet nga ai flijim i vetëm i Krishtit, të cilin Ai e bëri për ne në kryq^a.

a **Gjo. 6:51** «Unë jam buka e gjallë që zbriti nga qielli; kush ha nga kjo bukë, do të jetojë përjetë; dhe buka që unë do të jap është mishi im, që unë do ta jap për jetën e botës».

Rom. 6:3 A nuk e dini se ne të gjithë që u pagëzuam në Jezu Krishtin, u pagëzuam në vdekjen e tij?

1 Kor. 2:2 Sepse e vendosa që të mos di tjetër gjë ndër ju, veç Jezu Krishtit edhe atë të kryqëzuar.

1 Kor. 11:25 Gjithashtu, pas darkës, mori edhe kupën, duke thënë: «Kjo kupë është besëlidhja e re në gjakun tim; bëni këtë sa herë që të pini, në përkujtimin tim».

Gal. 3:27 Sepse sa veta u pagëzuar në Krishtin, Krishtin keni veshur.

Kol. 2:12 Të varrosur bashkë me të nëpërmjet pagëzimit, ju edhe u ringjallët bashkë me të, përmes besimit në veprueshmërinë e Perëndisë, që e ka ringjallur prej së vdekurish.

Pyetja 68

Sa sakramente ka themeluar Krishti në Besëlidhjen e Re?

Përgjigja:

Dy: Pagëzimin e Shenjtë^a dhe Darkën e Shenjtë^b.

a **Mt. 28:19** Shkoni, pra, dhe bëni dishepuj të gjitha kombet duke i pagëzuar në emër të Atit e të Birit e të Frymës së Shenjtë.

Mr. 16:16 Ai që beson dhe pagëzohet do të shpëtohet; por ai që nuk beson, do të dënohet.

b **1 Kor. 11:23–26** Sepse unë mora nga Zoti atë që ju transmetova edhe juve; se Zoti Jezus, në atë natë që po tradhtohej, mori bukë ²⁴dhe, si falënderoi, e theu dhe tha: «Merrni, hani; ky është trupi im që thyhet për ju; bëni këtë në përkujtimin tim». ²⁵Gjithashtu, pas darkës, mori edhe kupën, duke thënë: «Kjo kupë është besëlidhja e re në gjakun tim; bëni këtë sa herë që të pini, në përkujtimin tim». ²⁶Sepse sa herë të hani nga kjo bukë dhe të pini nga kjo kupë, ju shpallni vdekjen e Zotit, derisa ai të vijë.

a dhe b **1 Kor. 10:1–4** Por nuk dua, o vëllezër, që ju të mos e dini se gjithë etërit tanë ishin nën renë, dhe të gjithë shkuan nëpër det, ²dhe të gjithë u pagëzuan mbi Moisiun në re dhe në det, ³dhe të gjithë hëngrën të njëjtin ushqim frymëror, ⁴dhe të gjithë pinë të njëjtën pije frymërore, sepse pinin prej shkëmbi frymëror që i ndiqte; edhe ky shkëmb ishte Krishti.

Vep. 2:41 Dhe ata që e pranuan fjalën e tij me gëzim, u pagëzuan; atë ditë u shtuan rreth tri mijë shpirtra.

PAGËZIMI I SHENJTË

DITA E ZOTIT, 26

Pyetja 69

Si të kujton dhe të siguron Pagëzimi i Shenjtë që flijimi i vetëm i Krishtit në kryq ka vërtet vlerë për ty?

Përgjigja:

Në këtë mënyrë: se Krishti e caktoi këtë larje të jashtme me ujë^a, duke i shtuar edhe këtë premtim^b, që unë lahem me siguri nga gjaku dhe Fryma e Tij prej tërë ndotjes së shpirtit tim, d.m.th. prej të gjitha mëkateve të mia, po aq sa lahem nga ana e jashtme me ujë, me anë të të cilit lahet zakonisht ndotja e trupit^c.

- a **Mt. 28:19** Shkoni, pra, dhe bëni dishepuj të gjitha kombet duke i pagëzuar në emër të Atit e të Birit e të Frymës së Shenjtë.
Vep. 2:38 Atëherë Pjetri u tha atyre: «Pendohuni dhe secili nga ju le të pagëzohet në emër të Jezu Krishtit për faljen e mëkateve; dhe ju do të merrni dhuratën e Frymës së Shenjtë».
- b **Mt. 3:11** Unë po ju pagëzoj me ujë, për pendim; por ai që vjen pas meje është më i fortë se unë, të cilit nuk jam i denjë as t'i mbaj sandalet; ai do t'ju pagëzojë me Frymën e Shenjtë dhe me zjarr.
Mr. 16:16 Ai që beson dhe pagëzohet do të shpëtohet; por ai që nuk beson, do të dënohet.
Rom. 6:3 A nuk e dini se ne të gjithë që u pagëzuam në Jezu Krishtin, u pagëzuam në vdekjen e tij?
- c **Mr. 1:4** Gjoni erdhi në shkretëtirë duke pagëzuar dhe duke predikuar një pagëzim pendese për faljen e mëkateve.
Lu. 3:3 Atëherë ai e përshkoi gjithë krahinën përreth Jordanit, duke predikuar pagëzim pendimi për faljen e mëkateve.
1 Pj. 3:21 Si kundërformë e kësaj, pagëzimi; na shpëton tani edhe ne, jo heqja e ndyrësisë së mishit, por kërkesa për një ndërgjegje të mirë ndaj Perëndisë, nëpërmjet ringjalljes së Jezu Krishtit.

Pyetja 70

Ç'do të thotë të lahes me gjakun dhe Frymën e Krishtit?

Përgjigja

Do të thotë ta marrësh nga Perëndia falas faljen e mëkateve, për hir të gjakut të Krishtit, të cilin Ai e derdhi për ne nëpërmjet flijimit të Tij në kryq^a; si dhe të ripërtërihesh nga Fryma e Shenjtë dhe të shenjtërohesh për të qenë gjymtyrë e Krishtit, që kështu të vdesim gjithnjë e më shumë ndaj mëkatit dhe të bëjmë një jetë të shenjtë dhe të paqortueshme^b.

- a **Gjo. 1:33** Dhe unë nuk e njihja; por ai, që më dërgoi të pagëzoj në ujë, më tha: «Ai, mbi të cilin do të shikosh të zbrësë Fryma dhe të qëndrojë mbi të, ky është që pagëzon me Frymën e Shenjtë».
Gjo. 3:5 Jezusi u përgjigj: «Në të vërtetë, në të vërtetë po të them se, kush nuk lind nga uji dhe nga Fryma, ai nuk mund të hyjë në mbretërinë e Perëndisë».
- Rom. 6:4** U varrosëm, pra, me të me anë të pagëzimit në vdekje, që, ashtu si Krishti u ringjall prej së vdekurish me anë të lavdisë së Atit, kështu edhe ne të ecim në risinë e jetës.
1 Kor. 6:11 Dhe të tillë qetë disa prej jush; por u latë, por u shenjtëruat, por u drejtësuat në emër të Zotit Jezus dhe nëpërmjet Frymës së Perëndisë tonë.
- 1 Kor. 12:13** Sepse të gjithë ne jemi pagëzuar në një Frymë të vetëm në një trup, qofshin hebrenj apo grekë, skllevër a të lirë, dhe të gjithë jemi ujitur në një Frymë.
Kol. 2:10-13 Dhe ju jeni të mbushur në të, i cili është kreu e çdo principate e pushteti, ¹¹në të cilin ju edhe u rrethprehtë me rrethprerjen që nuk u bë me dorë, nëpërmjet zhveshjes së trupit mëkatar të mishit, me anë të rrethprerjes së Krishtit: ¹²të varrosur bashkë me të nëpërmjet pagëzimit, ju edhe u ringjallët bashkë me të, përmes besimit në veprueshmërinë e Perëndisë, që e ka ringjallur prej së vdekurish. ¹³Dhe bashkë me të Perëndia ju dha jetë juve, që ishit të vdekur në mëkate dhe në parrethprerjen e mishit, duke jua falur të gjitha mëkatet.
- Fil. 3:3** Sepse Rrethprerja jemi ne, që i shërbejmë Perëndisë në Frymë dhe që mburremi në Krishtin Jezus pa besuar në mish.
- Tit. 3:5** Na shpëtoi jo me anë të veprave të drejta, që ne bëmë, por sipas mëshirës së tij, me anë të larjes së rilindjes dhe të ripërtëritjes së Frymës së Shenjtë.
- b **Eze. 36:25** Do të lëshoj pastaj ujë të pastër mbi ju dhe do të jeni të pastër; do t'ju pastroj nga të gjitha ndyrësitë tuaja dhe nga të gjithë idhujt tuaj.
Zak. 13:1 «Atë ditë do të hapet një burim për shtëpinë e Davidit dhe për banorët e Jerusalemit, për mëkatin dhe për papastërtinë.»
- Heb. 12:24** Dhe Jezusit, ndërmjetësit të besëlidhjes së re, dhe gjakut të spërkatjes, që flet më mirë se ai i Abelit.
- 1 Pj. 1:2** Të zgjedhurve sipas paranjohjes së Perëndisë, Atit, me anë të shenjtërimit të Frymës, për bindje dhe për spërkatje me gjakun e Jezu Krishtit: hir dhe paqe ju shtoftë.
- 1 Gjo. 1:7** Por, po të ecim në dritë, sikurse ai është në dritë, kemi bashkësi me njëri-tjetrin, dhe gjaku i Jezu

Krishtit, Birit të tij, na pastron nga çdo mëkat.

Zbu. 1:5 Dhe nga Jezu Krishti, dëshmitari besnik, i parëlinduri prej së vdekurish dhe kreu i mbretërve të dheut. Atij që na deshi dhe na lau nga mëkatet tona në gjakun e tij.

Zbu. 7:14 Dhe unë i thashë: «Imzot, ti e di». Atëherë ai më tha: «Këta janë ata, që kanë ardhur nga shtrëngimi i madh dhe i kanë larë rrobat e tyre dhe i kanë zbardhur në gjakun e Qengjit».

Pyetja 71

Ku na ka premtuar Krishti që Ai me siguri do të na lajë me gjakun dhe Frymën e Tij, ashtu siç lahem me ujin e Pagëzimit?

Përgjigjja:

Në themelimin e Pagëzimit, thuhet kështu: *Shkoni, pra, dhe bëni dishepuj nga të gjitha kombet duke i pagëzuar në emër të Atit e të Birit e të Frymës së Shenjtë^a; Ai që beson dhe pagëzohet, do të shpëtohet^b. Ky premtim është përsëritur edhe atje ku Shkrimi e quan Pagëzimin larja e rilindjes^c dhe larja e mëkateve^d.*

- a **Mt. 28:19** Shkoni, pra, dhe bëni dishepuj të gjitha kombet duke i pagëzuar në emër të Atit e të Birit e të Frymës së Shenjtë.
- b **Mr. 16:15–16** Dhe u tha atyre: «Shkoni në mbarë botën dhe i predikoni ungjillin çdo krijese; ¹⁶ai që beson dhe pagëzohet do të shpëtohet; por ai që nuk beson, do të dënohet.»
- c **Tit. 3:5** Na shpëtoi jo me anë të veprave të drejta, që ne bëmë, por sipas mëshirës së tij, me anë të larjes së rilindjes dhe të ripërtëritjes së Frymës së Shenjtë.
- d **Vep. 22:16** “Dhe tani ç’pret? Çohu dhe pagëzohu dhe lahu nga mëkatet e tua, duke thirrur emrin e Zotit.”

DITA E ZOTIT, 27

Pyetja 72

Atëherë, a është Pagëzimi i jashtëm me ujë larja e vetë mëkatit?

Përgjigjja:

Aspak^a, sepse vetëm gjaku i Jezu Krishtit dhe Fryma e Shenjtë na pastrojnë nga çdo mëkat^b.

- a **Mt. 3:11** Unë po ju pagëzoj me ujë, për pendim; por ai që vjen pas meje është më i fortë se unë, të cilit nuk jam i denjë as t’i mbaj sandalet; ai do t’ju pagëzojë me Frymën e Shenjtë dhe me zjarr.
Ef. 5:25–26 Ju, burra, duajini gratë tuaja, sikurse edhe Krishti deshi kishën dhe dha veten e tij për të, ²⁶që ta shenjtërojë, pasi e pastroi me larjen e ujit me anë të fjalës.
1 Pj. 3:21 Si kundërformë e kësaj, pagëzimi; na shpëton tani edhe ne, jo heqja e ndyrësisë së mishit, por kërkesa për një ndërgjegje të mirë ndaj Perëndisë, nëpërmjet ringjalljes së Jezu Krishtit.
- b **1 Kor. 6:11** Dhe të tillë qetë disa prej jush; por u latë, por u shenjtëruat, por u drejtësuat në emër të Zotit Jezus dhe nëpërmjet Frymës së Perëndisë tonë.
1 Gjo. 1:5 Dhe ky është mesazhi, që kemi dëgjuar nga ai dhe po jua lajmërojmë juve: Perëndia është dritë dhe në Të nuk ka kurrfarë errësire.
Heb. 9:14 Aq më shumë gjaku i Krishtit, i cili me anë të Frymës së përjetshëm ia ofroi veten e tij të patëmetë Perëndisë, do ta pastrojë ndërgjegjen tuaj nga veprat e vdekura për t’i shërbyer Perëndisë së gjallë!

Pyetja 73

Atëherë, pse Fryma e Shenjtë e quan Pagëzimin “larja e rilindjes” dhe “larja e mëkateve”?

Përgjigjja:

Perëndia flet kështu jo pa arsye të madhe, domethënë, jo vetëm të na mësojë se, ashtu siç largohet ndotja e trupit me anë të ujit, ashtu dhe mëkatet tona hiqen nga gjaku dhe Fryma e Jezu Krishtit^a, por sidomos që, me anë të këtij kapari dhe shenje hyjnore, Ai të mund të na sigurojë se jemi të pastruar frymërisht nga mëkatet tona, në mënyrë po aq të vërtetë, njësoj sikur të lahemi së jashtmi me ujë^b.

- a **Psa. 51:7** Më pastro me hisop dhe do të jem i dëlirë; më laj dhe do të jem më i bardhë se bora.
1 Kor. 6:11 Dhe të tillë qetë disa prej jush; por u latë, por u shenjtëruat, por u drejtësuar në emër të Zotit Jezus dhe nëpërmjet Frymës së Perëndisë tonë.
Heb. 9:13 Sepse, në qoftë se gjaku i demave dhe i cjepeve dhe hiri i një mëshqerre i spërkatur mbi të ndoturit, i shenjtëron, duke i pastruar në mish.
Zbu. 1:5 Dhe nga Jezu Krishti, dëshmitari besnik, i parëlinduri prej së vdekurish dhe kreu i mbretërve të dheut. Atij që na deshi dhe na lau nga mëkatet tona në gjakun e tij.
Zbu. 7:14 Dhe unë i thashë: «Imzot, ti e di». Atëherë ai më tha: «Këta janë ata, që kanë ardhur nga shtrëngimi i madh dhe i kanë larë rrobat e tyre dhe i kanë zbardhur në gjakun e Qengjit.
- b **Mr. 1:4** Gjoni erdhi në shkretëtirë duke pagëzuar dhe duke predikuar një pagëzim pendese për faljen e mëkateve.
Mr. 16:16 Ai që beson dhe pagëzohet do të shpëtohet; por ai që nuk beson, do të dënohet.
Vep. 22:16 Dhe tani ç'pret? Çohu dhe pagëzohu dhe lahu nga mëkatet e tua, duke thirrur emrin e Zotit”.
Gal. 3:26–27 Sepse të gjithë ju jeni bij të Perëndisë me anë të besimit në Krishtin Jezus. ²⁷Sepse sa veta u pagëzuar në Krishtin, Krishtin keni veshur.

Pyetja 74

A duhet të pagëzohen edhe foshnjat?

Përgjigjja:

Po, përderisa ata, si dhe të rriturit, përfshihen në besëlidhjen dhe kishën e Perëndisë^a; dhe përderisa shpengimi nga mëkati nëpërmjet gjakut të Krishtit^b dhe Frymës së Shenjtë, Autorit të besimit, u premtohet atyre jo më pak sesa të rriturve^c; prandaj dhe këta duhen pranuar në kishën e krishterë nëpërmjet Pagëzimit, si shenjë e besëlidhjes; dhe të dallohen nga fëmijët e jobesimtarëve^d, siç bëhej në Besëlidhjen e Vjetër, me anë të rrethprerjes^e, në vend të së cilës është themeluar Pagëzimi në Besëlidhjen e Re^d.

- a **Zan. 17:7** Dhe do të caktoj besëlidhjen time midis meje dhe teje, si dhe me pasardhjen tënde, nga një brez në një brez tjetër; kjo do të jetë një besëlidhje e përjetshme, me të cilën unë do të marr përsipër të jem Perëndia yt dhe i pasardhjes sate pas teje.
Vep. 2:38–39 Atëherë Pjetri u tha atyre: «Pendohuni dhe secili nga ju le të pagëzohet në emër të Jezu Krishtit për faljen e mëkateve; dhe ju do të merrni dhuratën e Frymës së Shenjtë. ³⁹Sepse premtimi është për ju dhe për bijtë tuaj dhe për gjithë ata që janë larg, për ata që Zoti, Perëndia ynë, do t'i thërrasë».
- Rom. 11:6** Edhe nëse është prej hirit, nuk është më prej veprash, përndryshe hiri nuk do të ishte më hir, por, po të jetë nëpërmjet veprave, nuk është më prej hirit, përndryshe vepra nuk do të ishte më vepër.
Ef. 5:25 Ju, burra, duajini gratë tuaja, sikurse edhe Krishti deshi kishën dhe dha veten e tij për të.
- b **Mt. 19:14** Por Jezusi tha: «I lini fëmijët e vegjël dhe mos i ndaloni të vijnë tek unë, sepse për të tillë është

mbretëria e qiejve».

- c **Lu. 1:14 15** Dhe ai do të jetë për ty gëzim dhe hare dhe shumë vetë do të gëzohen për lindjen e tij. Sepse ai do të jetë i madh përpara Zotit; nuk do të pijë as verë, as pije të forta dhe që në barkun e sëmës do të mbushet me Frymën e Shenjtë.
Vep. 2:39 *Shih a.*
- d **Vep. 10:46–47** ...sepse i dëgjonin duke folur gjuhë të tjera dhe duke madhëruar Perëndinë. Atëherë Pjetri u përgjigj: «⁴⁷A mund ta ndalojë dikush ujin, që të mos pagëzohen këta që morën Frymën e Shenjtë si edhe ne?». **1 Kor. 12:13** Sepse të gjithë ne jemi pagëzuar në një Frymë të vetëm në një trup, qofshin hebrej apo grekë, skllevër a të lirë, dhe të gjithë jemi ujitur në një Frymë.
1 Kor. 7:14 Sepse burri jobesimtar është shenjtëruar nëpërmjet gruas, dhe gruaja jobesimtare është shenjtëruar nëpërmjet burrit, sepse përndryshe fëmijët do të ishin të papastër; por kështu janë të shenjtë.
- e **Zan. 17:14** «Dhe mashkullit i parrethprerë, që nuk është rrethprerë në mishin e lafshës së tij, do të hidhet jashtë popullit të tij, sepse ka shkelur besëlidhjen time».
- f **Kol. 2:11–13** ...në të cilin ju edhe u rrethpretë me rrethprerjen që nuk u bë me dorë, nëpërmjet zhveshjes së trupit mëkatar të mishit, me anë të rrethprerjes së Krishtit: ¹²të varrosur bashkë me të nëpërmjet pagëzimit, ju edhe u ringjallët bashkë me të, përmes besimit në veprueshmërinë e Perëndisë, që e ka ringjallur prej së vdekurish. ¹³Dhe bashkë me të Perëndia ju dha jetë juve, që ishit të vdekur në mëkate dhe në parrethprerjen e mishit, duke jua falur të gjitha mëkatet.

DARKA E SHENJTË E ZOTIT TONË JEZU KRISHT DITA E ZOTIT, 28

Pyetja 75

Si të kujton dhe të siguron Darka e Zotit që je pjesëmarrës i atij flijimi të vetëm të Krishtit që u krye në kryq dhe i të gjitha të mirave të Tij?

Përgjigja:

Në këtë mënyrë: se Krishti më ka urdhëruar mua dhe të gjithë besimtarët që të hamë nga kjo bukë e thyer dhe të pimë nga kjo kupë në kujtim të Tij; duke shtuar këto premtime^e: së pari, që trupi i Tij u dha dhe u thye në kryq për mua dhe gjaku i Tij u derdh për mua me kaq siguri, sa shoh me sytë e mi bukën e Zotit të thyer për mua dhe kupën e Tij që më jepet; dhe më tej, se Ai e ushqen dhe e rrit shpirtin tim për në jetën e përjetshme me trupin e Tij të kryqëzuar dhe gjakun e Tij të derdhur me po aq siguri, sa marr nga duart e pastorit dhe shijoj me gojën time bukën dhe kupën e Zotit, si shenja të sigurtat të trupit dhe gjakut të Krishtit.

a **Mt. 26:26–28** Dhe ndërsa ata po hanin, Jezusi mori bukën, dhe e bekoj, dhe e theu, dhe ua dha dishepujve dhe tha: «Merrni, hani; ky është trupi im». ²⁷Dhe mori kupën, dhe falënderoi, dhe ua dha atyre duke thënë: «Pini prej tij të gjithë, ²⁸sepse ky është gjaku im, gjaku i besëlidhjes së re, i cili është derdhur për shumë veta për faljen e mëkateve...»

Mr. 14:22–24 Dhe, ndërsa ata po hanin, Jezusi mori bukë, e bekoj, e theu dhe ua dha atyre duke thënë: «Merrni, hani; ky është trupi im». ²³Pastaj mori kupën, falënderoi, ua dha atyre dhe të gjithë pinë prej saj. ²⁴Atëherë u tha: «Ky është gjaku im, gjaku i besëlidhjes së re, që derdhet për shumë veta.

Lu. 22:19 Dhe mori bukë, falënderoi, e theu dhe ua dha atyre duke thënë: «Ky është trupi im, që jepet për ju; bëni këtë në përkujtimin tim».

1 Kor. 10:16 Kupa e bekimit, që ne bekojmë, a nuk është vallë bashkësia e gjakut të Krishtit? Buka që ne thejtmë, a nuk është vallë bashkësia e trupit të Krishtit?

1 Kor. 11:23–25 Sepse unë mora nga Zoti atë që ju transmetova edhe juve; se Zoti Jezus, në atë natë që po tradhetohej, mori bukë ²⁴dhe, si falënderoi, e theu dhe tha: «Merrni, hani; ky është trupi im që thyhet për ju; bëni këtë në përkujtimin tim». ²⁵Gjithashtu, pas darkës, mori edhe kupën, duke thënë: «Kjo kupë është besëlidhja e re në gjakun tim; bëni këtë sa herë që të pini, në përkujtimin tim».

1 Kor. 12:13 Sepse të gjithë ne jemi pagëzuar në një Frymë të vetëm në një trup, qofshin hebrenj apo grekë, skllavë a të lirë, dhe të gjithë jemi ujitur në një Frymë.

Pyetja 76

Çfarë do të thotë, atëherë, të hash trupin e kryqëzuar dhe të pish gjakun e derdhur të Krishtit?

Përgjigjja:

Kjo do të thotë jo vetëm të përqafosh me një zemër besimtare të gjitha vuajtjet dhe vdekjen e Krishtit, e kështu të marrësh faljen e mëkateve dhe jetën e përjetshme^a; por edhe, përveç kësaj, të bëhesh gjithnjë e më tepër i bashkuar me trupin e Tij të shenjtë, nëpërmjet Frymës së Shenjtë^b, i Cili banon si në Krishtin, ashtu dhe në ne; në mënyrë që ne, edhe pse Krishti është në qiell^c dhe ne jemi në tokë, jemi prapëseprapë *mish nga mishi i Tij dhe kockë nga kocka e Tij*^d, dhe se jetojmë dhe drejtohem përgjithnjë nga një Frymë, ashtu siç drejtohen nga një shpirt gjymtyrët e të njëjtit trup^e.

a **Gjo. 6:35, 47, 51, 53, 54** Dhe Jezusi u tha atyre: «Unë jam buka e jetës; ai që vjen tek unë nuk do të ketë uri dhe ai që beson në mua, nuk do të ketë më kurrë etje». ⁴⁷Në të vërtetë, në të vërtetë, po ju them: Ai që beson në mua ka jetë të përjetshme. «⁵¹Unë jam buka e gjallë që zbriti nga qielli; kush ha nga kjo bukë, do të jetojë përjetë; dhe buka që unë do të jap është mishi im, që unë do ta jap për jetën e botës». ⁵³Atëherë Jezusi u tha atyre: «Në të vërtetë, në të vërtetë, ju them se, po të mos hani mishin e Birit të njeriut dhe të pini gjakun e tij, nuk keni jetë në veten tuaj. ⁵⁴Kush ha mishin tim dhe pi gjakun tim, ka jetë të përjetshme, dhe unë do ta ringjall atë në ditën e fundit.

b **Gjo. 6:55** Sepse mishi im është me të vërtetë ushqim dhe gjaku im është me të vërtetë pije.
Ef. 3:16 Që t'ju japë, sipas pasurisë së lavdisë së tij, të forcoheni me fuqi nëpërmjet Frymës të tij në njeriun e brendshëm.

1 Gjo. 3:24 Ai që mban urdhërimet e tij qëndron në Perëndinë, dhe ai në të; dhe në këtë ne dimë se ai qëndron në ne: nga Fryma që na dha.

Rom. 8:9 Nëse Fryma e Perëndisë banon në ju, ju nuk jeni më në mish, por në Frymë. Por në qoftë se ndokush nuk ka Frymën e Krishtit, nuk është i tij.

c **Vep. 1:9, 11** Mbasi i tha këto, ndërsa ata po e shikonin, u ngrit lart; dhe një re e mori prej syve të tyre. ¹¹Dhe thanë: «Burra galileas, çfarë qëndroni e shikoni drejt qiellit? Ky Jezus, që u mor nga mesi juaj në qiell, do të kthehet në të njëjtën mënyrë, me të cilën e keni parë atë të shkojë në qiell».

Vep. 3:21 Të cilin qielli duhet ta pranojë deri në kohën e ripërtëritjes së të gjitha gjërave, të cilat Perëndia i ka folur nëpërmjet gojës së gjithë profetëve të tij të shenjtë, që nga fillimi i botës.

1 Kor. 11:26 Sepse sa herë të hani nga kjo bukë dhe të pini nga kjo kupë, ju shpallni vdekjen e Zotit, derisa ai të vijë.

d **Ef. 5:29** Sepse askush nuk e urreu kurrë mishin e vet, por e ushqen dhe kujdeset me ngrohtësi për të, sikurse edhe Zoti bën me kishën.

1 Kor. 6:15 A nuk e dini se trupat tuaj janë gjymtyrë të Krishtit? Të marr, pra, unë gjymtyrët e Krishtit dhe t'i bëj gjymtyrë të një kurve? Kurrë mos qoftë!

1 Kor. 6:17 Por ai që i ngjitet Zotit është një frymë me të.

1 Kor. 6:19 A nuk e dini se trupi juaj është tempulli i Frymës së Shenjtë që është në ju, të cilin e keni nga Perëndia, dhe se nuk i përkitin vetvetes?

e **Gjo. 6:56** Kush ha mishin tim dhe pi gjakun tim, mbetet në mua dhe unë në të.

Gjo. 14:23 Jezusi u përgjigj dhe i tha: «Nëse ndokush më do, do ta mbajë fjalën time; edhe Ati im do ta dojë dhe ne do të vijmë tek ai dhe do të bëjmë banesën tek ai.

Gjo. 15:4 Qëndroni në mua dhe unë në ju; sikurse shermendi nuk mund të japë fryt nga vetja, po qe se nuk qëndron në hardhi, kështu as ju, nëse nuk qëndroni në mua.

Gal. 2:20 U kryqëzova bashkë me Krishtin; por rroj; jo më unë, po Krishti rron në mua; por ajo që tani jetoj në mish, e jetoj në besimin e Birit të Perëndisë, që më deshi dhe dha veten për mua.

Ef. 4:15–16 ...por, duke thënë të vërtetën me dashuri, të rritemi në çdo gjë drejt atij që është kreu, Krishti.

¹⁶Prej të cilit gjithë trupi i bashkuar dhe i lidhur mirë, me anë të bashkimit të ndihmesës sipas masës së veprueshmërisë së çdo pjesë të veçantë, shkakton rritjen e trupit, për ndërtimin e vetes së tij në dashuri.

Pyetja 77

Ku ka premtuar Krishti se Ai do t'i ushqejë dhe do t'i mbajë gjallë besimtarët me trupin dhe gjakun e Tij, me po aq siguri sa këta hanë nga kjo bukë e thyer dhe pinë nga kjo kupë?

Përgjigjja:

Në themelimin e Darkës, ku thuhet^a: *Zoti Jezus, në atë natë që po tradhtohej, mori bukë dhe, si falënderoi, e theu dhe tha: «Merrni, hani; ky është trupi im që thyhet për ju; bëjeni këtë në përkujtimin tim». Gjithashtu, pas darkës, mori edhe kupën, duke thënë: «Kjo kupë është besëlidhja e re në gjakun tim^b; bëjeni këtë sa herë që të pini, në përkujtimin tim»^c. Sepse sa herë të hani nga kjo bukë dhe të pini nga kjo kupë, ju shpallni vdekjen e Zotit, derisa ai të vijë.*

Ky premtim përsëritet nga apostulli Pal, ku thotë:^d *Kupa e bekimit, që ne bekojmë, a nuk është vallë bashkësia e gjakut të Krishtit? Buka që ne thejmë, a nuk është vallë bashkësia e trupit të Krishtit?*

a *Shih përgjigjen 75 a.*

b **Eks. 24:8** Pastaj Moisiu mori gjakun, spërkati popullin me të dhe tha: «Ja, gjaku i besëlidhjes që ZOTI ka lidhur me ju sipas tërë këtyre fjalëve».

Heb. 9:10–12, 23 ...vetëm me ushqime dhe pije dhe larje të ndryshme dhe rregulla mishërore, të imponuara deri në kohën e ndreqjes. ¹¹Por Krishti, që erdhi si kryepriфт i të mirave që kanë për të ardhur, përmes tabernakullit më të madh e më të përkryer, që sështë bërë me dorë, domethënë që nuk është e kësaj krijese, ¹²hyri një herë e përgjithmonë në shenjtërore, jo përmes gjakut të cjepve dhe të viçave, por përmes gjakut të vet, dhe fitoi një shpengim të përgjithshëm. ²³Ishte, pra, e nevojshme që format e gjërave qiellore të pastroheshin me këto gjëra; por vetë gjërat qiellore me flijime më të mira se këto.

c **Eks. 13:9** Dhe do të jetë për ty si një shenjë mbi dorën tënde dhe si një kujtim ndër sytë e tu, me qëllim që ligji i ZOTIT të jetë në gojën tënde; sepse ZOTI të bëri të dalësh nga Egjipti me dorë të fuqishme.

d **1 Kor. 10:16** Kupa e bekimit, që ne bekojmë, a nuk është vallë bashkësia e gjakut të Krishtit? Buka që ne thejmë, a nuk është vallë bashkësia e trupit të Krishtit?

DITA E ZOTIT, 29

Pyetja 78

Atëherë, a bëhen buka dhe vera tamam trupi dhe gjaku i Krishtit?

Përgjigjja:

Aspak; por ashtu siç nuk shndërrohet uji në Pagëzim në gjakun e Krishtit, dhe nuk është ai që lan mëkatën, duke qenë vetëm shenja dhe vërtetimi i asaj që është caktuar nga Perëndia; ashtu dhe buka në Darkën e Zotit nuk shndërrohet në trupin e Krishtit^a, edhe pse quhet trupi i Krishtit Jezus, në harmoni me natyrën e vetitë e sakramenteve^b.

- a **Zan. 17:10, 14** Kjo është besëlidhja ime që ju do të respektoni midis meje edhe jush, si dhe pasardhjes sate pas teje: çdo mashkull që ndodhet midis jush do të rrethpriet. «¹⁴Dhe mashkulli i parrethprerë, që nuk është rrethprerë në mishin e lafshës së tij, do të hidhet jashtë popullit të tij, sepse ka shkelur besëlidhjen time».
- Eks. 12:27** «Ju do t'u përgjigjeni: "Kjo është flia e Pashkës së ZOTIT, që kaloi tej shtëpive të bijve të Izraelit në Egjipt kur goditi egjiptasit dhe i fali shtëpitë tona"». Dhe populli u përkul dhe adhuroi.
- Eks. 12:43** Pastaj ZOTI u tha Moisiut dhe Aaronit: «Ky është rregulli i Pashkës: asnjë i huaj nuk do të hajë.
- Eks. 12:48** Dhe kur një i huaj do të banojë me ty dhe do të dojë të kremtojë Pashkën për nder të ZOTIT, tërë meshkujt e familjes së tij duhet të rrethprien më parë dhe pastaj ai le të afrohet për të kremtuar këtë ditë, ai do të konsiderohet si i lindur në vend; por asnjë i parrethprerë s'ka për të ngrënë.
- Eks. 13:9** Dhe do të jetë për ty si një shenjë mbi dorën tënde dhe si një kujtim ndër sytë e tu, me qëllim që ligji i ZOTIT të jetë në gojën tënde; sepse ZOTI të bëri të dalësh nga Egjipti me dorë të fuqishme.
- Vep. 7:8** Dhe i dha atij besëlidhjen e rrethprerjes. Dhe kështu Abrahamit i lindi Isaku dhe e rrethpreu të tetën ditë; dhe Isakut i lindi Jakobi dhe Jakobit dymbëdhjetë patriarkët.
- Eks. 24:8** Pastaj Moisiu mori gjakun, spërkati popullin me të dhe tha: «Ja, gjaku i besëlidhjes që ZOTI ka lidhur me ju sipas tërë këtyre fjalëve».
- Eks. 29:36** Dhe çdo ditë do të ofrosh një dem të vogël, si flijim për mëkatin, për të larë fajin që ke bërë dhe do ta vajosësh për ta shenjtëruar.
- Lev. 16:10** Por cjapi i caktuar si cjap fajshlyes do të paraqitet i gjallë para ZOTIT, me qëllim që mbi të të bëhet shlyerja dhe për ta çuar pastaj në shkretëtirë si cjap fajshlyes.
- Lev. 17:11** Sepse jeta e mishit është në gjak. Prandaj ju kam urdhëruar ta vini mbi altar për të bërë shlyerjen për jetën tuaj, sepse është gjaku që bën shlyerjen e fajit për jetën.
- Isa. 6:7** Me të ai preku gojën time dhe tha: «Ja, kjo preku buzët e tua, paudhësia jote hiqet dhe mëkati yt shlyhet».
- Vep. 22:16** Dhe tani ç'pret? Çohu dhe pagëzohu dhe lahu nga mëkatet e tua, duke thirrur emrin e Zotit».
- Tit. 3:4–5** Po kur u shfaq dashamirësia e Perëndisë, Shpëtimtarit tonë dhe dashuria e tij për njerëzit, ⁵na shpëtoi jo me anë të veprave të drejta, që ne bëmë, por sipas mëshirës së tij, me anë të larjes së rilindjes dhe të ripërtëritjes së Frymës së Shenjtë.
- 1 Pj. 3:21** Si kundërformë e kësaj, pagëzimi; na shpëton tani edhe ne, jo heqja e ndyrësisë së mishit, por kërkesa për një ndërgjegje të mirë ndaj Perëndisë, nëpërmjet ringjalljes së Jezu Krishtit.
- 1 Kor. 10:1–4** Por nuk dua, o vëllezër, që ju të mos e dini se gjithë etërit tanë ishin nën renë, dhe të gjithë shkuan nëpër det, ²dhe të gjithë u pagëzuan mbi Moisiun në re dhe në det, ³dhe të gjithë hëngrën të njëjtin ushqim frymëror, ⁴dhe të gjithë pinë të njëjtën pije frymërore, sepse pinin prej shkëmbi frymëror që i ndiqte; edhe ky shkëmb ishte Krishti.
- 1 Kor. 10:16** Kupa e bekimit, që ne bekojmë, a nuk është vallë bashkësia e gjakut të Krishtit? Buka që ne thyejmë, a nuk është vallë bashkësia e trupit të Krishtit?
- 1 Kor. 11:24–27** Dhe, si falënderoi, e theu dhe tha: «Merrni, hani; ky është trupi im që thyhet për ju; bëni këtë në përkujtimin tim». ²⁵Gjithashtu, pas darkës, mori edhe kupën, duke thënë: «Kjo kupë është besëlidhja e re në gjakun tim; bëni këtë sa herë që të pini, në përkujtimin tim». ²⁶Sepse sa herë të hani nga kjo bukë dhe të pini nga kjo kupë, ju shpallni vdekjen e Zotit, derisa ai të vijë. ²⁷Prandaj ai që ha nga kjo bukë ose pi nga kjo kupë e Zotit padenjësisht, do të jetë fajtor i trupit dhe i gjakut të Zotit.
- b **Mt. 26:26–28** Dhe ndërsa ata po hanin, Jezusi mori bukën, dhe e beko, dhe e theu, dhe ua dha dishepujve dhe tha: «Merrni, hani; ky është trupi im». ²⁷Dhe mori kupën, dhe falënderoi, dhe ua dha atyre duke thënë: «Pini prej tij të gjithë, ²⁸sepse ky është gjaku im, gjaku i besëlidhjes së re, i cili është derdhur për shumë veta për faljen e mëkateve.
- Lu. 22:19** Dhe mori bukë, falënderoi, e theu dhe ua dha atyre duke thënë: «Ky është trupi im, që jepet për ju; bëni këtë në përkujtimin tim».

Pyetja 79

Pse, atëherë, Krishti e quan bukën trupin e Tij dhe kupën gjakun e Tij, ose besëlidhja e re në gjakun e Tij; dhe Pali, bashkësi në trupin dhe gjakun e Krishtit?

Përgjigjja:

Krishti flet kështu jo pa arsye të madhe, pra, jo vetëm që të na mësojë që ashtu si buka dhe vera mbështesin këtë jetë të përkohshme, ashtu dhe trupi i Tij i kryqëzuar dhe gjaku i Tij i derdhur janë ushqimi dhe pija e vërtetë, nëpërmjet të cilave shpirtat tanë ushqehen për në jetën e përjetshme^b; por më veçanërisht të na sigurojë me anë të këtyre shenjave dhe kapareve të dukshme, që jemi pjesëmarrës të trupit dhe të gjakut të Tij të vërtetë (nëpërmjet veprimit të Frymës së Shenjtë)^c, po aq sigurisht sa marrim me gojën e trupit këto shenja të shenjta, në përkujtimin e Tij^d; dhe që të gjitha vuajtjet dhe bindja e Tij janë tonat me po aq siguri, sikur të kishim vuajtur ne vetë dhe të fitonim shlyerjen për mëkatet tona ndaj Perëndisë^e.

a Shih pyetjen 75 a dhe pyetjen 77.

b **Gjo. 6:51** «...Unë jam buka e gjallë që zbriti nga qielli; kush ha nga kjo bukë, do të jetojë përjetë; dhe buka që unë do të jap është mishi im, që unë do ta jap për jetën e botës».

Gjo. 6:55 «...Sepse mishi im është me të vërtetë ushqim dhe gjaku im është me të vërtetë pije...»

c **Gjo. 15:4** «...Qëndroni në mua dhe unë në ju; sikurse shermendi nuk mund të japë fryt nga vetja, po qe se nuk qëndron në hardhi, kështu as ju, nëse nuk qëndroni në mua...»

Ef. 5:30–32 ...sepse ne jemi gjymtyrë të trupit të tij, prej mishit të tij dhe prej kockave të tij. ³¹«Prandaj njeriu do të lërë atin e tij dhe nënën dhe do të ngjitet pas gruas së tij, dhe të dy do të bëhen një mish i vetëm». ³²Ky mister është i madh; por unë e them në lidhje me Krishtin dhe me kishën.

d **1 Kor. 10:16** Kupa e bekimit, që ne bekojmë, a nuk është vallë bashkësia e gjakut të Krishtit? Buka që ne thyejmë, a nuk është vallë bashkësia e trupit të Krishtit?

e **Rom. 5:9** Shumë më tepër, pra, duke qenë tani të drejtësuar nëpërmjet gjakut të tij, do të shpëtohem nga zemërimi me anë të tij.

Rom. 5:18 Sikundër, pra, me anë të shkeljes së njërit erdhi mbi gjithë njerëzit dënimi, ashtu edhe me anë të drejtësisë së njërit erdhi mbi gjithë njerëzit drejtësimi i jetës.

Rom. 8:1 Tani, pra, nuk ka asnjë dënim për ata që janë në Krishtin Jezus, që nuk ecin sipas mishit, por sipas Frymës.

2 Kor. 5:15 Dhe vdiq për të gjithë, me qëllim që ata të cilët jetojnë, të mos jetojnë më për veten e tyre, po për atë që vdiq e u ringjall për ta.

2 Kor. 5:21 Sepse atë, që nuk njihte mëkat, e bëri mëkat për ne, që ne të bëhemi drejtësia e Perëndisë në të.

Gal. 2:20 U kryqëzova bashkë me Krishtin; por rroj; jo më unë, po Krishti rron në mua; por ajo që tani jetoj në mish, e jetoj në besimin e Birit të Perëndisë, që më deshi dhe dha veten për mua.

Kol. 2:13 Dhe bashkë me të Perëndia ju dha jetë juve, që ishit të vdekur në mëkate dhe në parrethprerjen e mishit, duke jua falur të gjitha mëkatet.

DITA E ZOTIT, 30

Pyetja 80

Çfarë ndryshimi ka midis Darkës së Zotit dhe meshës papnore?

Përgjigjja:

Darka e Zotit na dëshmon që kemi një falje të plotë të të gjitha mëkateve, me anë të flijimit të vetëm të Jezu Krishtit, të cilin Ai vetë e kreu njëherë e mirë në kryq^a; dhe se ne, me anë të Frymës së Shenjtë, jemi shartuar në Krishtin^b, i Cili nuk është tani mbi tokë sipas natyrës së Tij njerëzore, por në qiell, në të djathtën e Perëndisë, të Atit të Tij^c, dhe do që të adhurohet nga ne^d; por mesha mëson se të gjallët dhe të vdekurit nuk kanë faljen e mëkateve nëpërmjet vuajtjeve të Krishtit, nëse Krishti nuk jepet çdo ditë për ta nga priftërinjtë; edhe më tej, që Krishti ndodhet

trupërisht nën trajtën e bukës dhe të verës, e prandaj duhet të adhurohet^e; kështu që mesha është veç një mohim i flijimit të vetëm dhe i vuajtjeve të Jezu Krishtit, dhe një idhujtari e mallkuar.

a **Heb. 7:26–27** Sepse neve një kryepriift i tillë na duhej: i shenjtë, i pafaj, i papërlyer, i ndarë nga mëkatarët dhe i bërë më i lartë se qiejt, ²⁷që nuk ka nevojë çdo ditë, si ata kryepriiftërinjtë, të ofrojnë fljime më parë për mëkatet e veta e pastaj për ato të popullit; sepse këtë e bëri një herë e përgjithmonë, kur ofroi vetveten.

Heb. 9:24–28 Sepse Krishti nuk hyri në një shenjtërore të bërë me dorë, që është vetëm shëmbëllesë e asaj të vërtetë, por në vetë qiellin për t'u shfaqur tani përpara Perëndisë për ne, ²⁵dhe jo për ta ofruar si fli veten e vet shumë herë, sikurse kryepriifti që hyn vit për vit në shenjtërore me gjakun e një tjetri, ²⁶sepse përndryshe ai duhet të vuanë shumë herë qëkurse u krijua bota; por tani, vetëm një herë, në fund të shekujve, Krishti u shfaq për të prishur mëkatën me anë të flijimit të vetvetes. ²⁷Dhe, duke qenë se është caktuar që njerëzit të vdesin një herë, dhe më pas vjen gjyqi, ²⁸kështu edhe Krishti, pasi u dha një herë për të marrë mbi vete mëkatet e shumëve, do të duket për së dyti pa mëkat për ata që e presin me durim për shpëtim.

Heb. 10:10–14 Prej këtij vullneti, ne jemi shenjtëruar me anë të blatës së trupit të Jezu Krishtit, një herë e përgjithmonë. ¹¹Dhe, ndërsa çdo priift rri përditë në këmbë, duke shërbyer dhe duke blatuar shpeshherë të njëjtat fljime, që nuk mund të heqin kurrë mëkatet, ¹²ai, përkundrazi, pasi dha përgjithnjë një fljim të vetëm për mëkatet, u ul në të djathtë të Perëndisë, ¹³duke pritur paskëtaj që armiqtë e tij t'i vihen si stol për këmbët e tij. ¹⁴Sepse, me një blatë të vetme, ai i bëri të përsosur përgjithnjë ata që shenjtërohen.

Gjo. 19:30 Por kur Jezusi mori uthullën, tha: «U krye!». Dhe duke ulur kryet, dha frymën.

Mt. 26:28 Sepse ky është gjaku im, gjaku i besëlidhjes së re, i cili është derdhur për shumë veta për faljen e mëkateve.

Lu. 22:19 Dhe mori bukë, falënderoi, e theu dhe ua dha atyre duke thënë: «Ky është trupi im, që jepet për ju; bëni këtë në përkujtimin tim».

b **1 Kor. 6:17** Por ai që i ngjitet Zotit është një frymë me të.

1 Kor. 10:16–17 ...kupa e bekimit, që ne bekojmë, a nuk është vallë bashkësia e gjakut të Krishtit? Buka që ne thyejmë, a nuk është vallë bashkësia e trupit të Krishtit? ¹⁷Sepse ne të shumtit, jemi një bukë, një trup, sepse të gjithë marrim pjesë në të vetmen bukë.

1 Kor. 12:13 Sepse të gjithë ne jemi pagëzuar në një Frymë të vetëm në një trup, qofshin hebrenj apo grekë, skllevër a të lirë, dhe të gjithë jemi ujitur në një Frymë.

c **Heb. 1:3** Ai, duke qenë shkëlqimi i lavdisë së tij dhe vula e qenies së tij dhe, duke i mbajtur të gjitha me fjalën e fuqisë së tij, mbasi e bëri, përmes vetes së tij, pastrimin e mëkateve tona, u ul në të djathtë të Madhërisë, në vendet e larta.

Heb. 8:1 Dhe kryesorja e atyre gjërave, që po themi, është kjo: ne kemi një kryepriift të tillë, i cili u ul në të djathtë të fronit të Madhërisë në qiejt.

d **Gjo. 4:21–24** Jezusi i tha: «O grua, më beso: vjen ora që as në këtë mal, as në Jerusalem nuk do ta adhuronin Atin. ²²Ju adhuronin atë që së njihni; ne adhurojmë atë që njohim; sepse shpëtimi vjen nga judenjtë. ²³Por vjen ora, madje ajo ka ardhur, që adhuresit e vërtetë do ta adhurojnë Atin në frymë dhe në të vërtetën, sepse Ati kërkon të tillë si adhures të tij. ²⁴Perëndia është Frymë, dhe ata që e adhurojnë, duhet ta adhurojnë në frymë dhe në të vërtetën».

Gjo. 20:17 Jezusi i tha: «Mos më prek, sepse ende nuk jam ngjitur tek Ati im; por shko te vëllezërit e mi dhe u thuaj atyre: Unë po ngjitem tek Ati im dhe Ati juaj, te Perëndia im dhe Perëndia juaj».

Lu. 24:51–53 Dhe ndodhi që, ndërsa ai po i bekonte, u nda prej tyre dhe u ngrit lart në qiell. ⁵²Dhe ata, e adhuruan dhe u kthyen në Jerusalem me gëzim të madh. ⁵³Dhe ishin vazhdimisht në tempull duke lavdëruar dhe duke bekuar Perëndinë. Amen!

Vep. 7:55 Por ai, plot Frymë të Shenjtë, i nguli sytë nga qielli, pa lavdinë e Perëndisë dhe Jezusin duke qëndruar në të djathtë të Perëndisë.

Vep. 7:59 Kështu e vranë me gurë Stefanin, që i thërriste Jezusit dhe thoshte: «Zot Jezus, pranoje frymën time!»

Kol. 3:1 Në qoftë se, pra, u ringjallët me Krishtin, kërkonin ato gjëra që janë lart, ku Krishti është ulur në të djathtë të Perëndisë.

1 The. 1:9–10 ...sepse vetë ata tregojnë për ne çfarë hyrjeje patëm te ju dhe si u kthyet nga idhujt te Perëndia, për t'i shërbyer Perëndisë së gjallë e të vërtetë, ¹⁰dhe për të pritur prej qiejve Birin e tij, të cilin ai e ngjalli prej së vdekurish, Jezusin, që na shpëton nga zemërimi që po vjen.

Pyetja 81

Për kë është themeluar Darka e Zotit?

Përgjigjja:

Për ata që u vjen vërtet keq për mëkatet e tyre, por edhe besojnë se këto u janë falur për hir të Krishtit; dhe se, dobësitë e tyre të mbetura, mbulohen nga vuajtja dhe vdekja e Tij, dhe gjithashtu dëshirojnë fort që besimi i tyre të forcohet gjithnjë e më tepër, dhe jeta të bëhet gjithnjë e më e shenjtë; por hipokritët dhe ata që nuk i kthehen Perëndisë me një zemër të sinqertë^b, hanë dhe pinë dënim për veten e tyre^c.

- a **2 Kro. 31:18** Dhe gjithë atyre që ishin regjistruar në gjenealogji, domethënë të vegjlit e tyre, bashkëshortet e tyre, bijtë e tyre dhe bijat e tyre si anëtarë të të gjithë asamblesë; sepse në funksionin që u ishte caktuar ata u shenjtëruan në shenjtëri.

Psa. 15:1 O ZOT, kush do të banojë në çadrën tënde? Kush do të banojë në malin tënd të shenjtë?

Psa. 24:3-5 Kush do t'i ngjitet malit të ZOTIT? Kush do të qëndrojë në vendin e tij të shenjtë? ⁴Njeriu i pafajshëm nga duart dhe i pastër nga zemra, që nuk e ngre shpirtin për t'u dukur dhe nuk betohet në mënyrë të rreme. ⁵Ai do të marrë bekimet e ZOTIT dhe drejtësinë nga Perëndia i shpëtimit të tij.

2 Kor. 6:14-17 Mos hyni në një zgjedhje bashkë me jobesimtarët, sepse ç'lidhje ka drejtësia me paudhësinë? Dhe çfarë bashkësie ka drita me errësirën? ¹⁵Dhe ç'harmoni ka Krishti me Belialin? Ose ç'pjesë ka besimtari me jobesimtarin? ¹⁶Dhe çfarë marrëveshjeje ka tempulli i Perëndisë me idhujt? Sepse ju jeni tempulli i Perëndisë së gjallë, sikurse tha Perëndia: «Unë do të banoj në mes tyre, dhe do të eci ndër ta; do të jem Perëndia i tyre dhe ata do të jenë populli im». ¹⁷Prandaj «dilni nga mesi i tyre dhe ndahuni prej tyre, thotë Zoti, dhe mos prekni asgjë të papastër, dhe unë do t'ju pranoj.

2 Kor. 13:5 Hetoni veten tuaj a jeni në besim; provoni veten tuaj! Apo nuk e njihni veten tuaj se Jezu Krishti është në ju? Veç në qofshi të paprovar.

Fil. 3:8-14 Po me të vërtetë i konsideroj të gjitha se janë dëm për madhësitë e njohjes së Krishtit Jezus, Zotit tim, për shkak të të cilit i humba të gjitha këto dhe i konsideroj se janë pleh, që unë të fitoj Krishtin, ⁹dhe, që të gjendem në të, duke pasur jo drejtësinë time nga ligji, por atë përmes besimit në Krishtin: drejtësia prej Perëndisë, me anë të besimit, ¹⁰që ta njoh atë dhe fuqinë e ringjalljes së tij dhe bashkësinë në vuajtjet e tij, duke u barazuar me vdekjen e tij, ¹¹që në ndonjë mënyrë të mund t'ia arrij ringjalljes prej së vdekurish. ¹²Jo se unë tashmë e fitova çmimin ose jam bërë i përsosur, por po e ndjek prapa se mos e kap, sepse edhe unë u kapa nga Jezu Krishti. ¹³Vëllezër, unë, nuk e llogaris veten time se e kam kapur, por një gjë po bëj: duke harruar ato që kam lënë pas, dhe duke u zgjatur drejt atyre që kam përpara, ¹⁴po ndjek pas synimin, drejt çmimit të thirrjes së lartme të Perëndisë në Krishtin Jezus.

- b. **Jak. 1:17** Çdo dhuratë e mirë dhe çdo dhuratë e përsosur është nga lart dhe zbret nga Ati i dritave, pranë të cilit nuk ka ndërrim dhe as hije ndryshimi.

1 Gjo. 2:3-6 Dhe nga kjo e dimë se e kemi njohur atë, në qoftë se i mbajmë urdhërimet e tij. ⁴Ai që thotë: «Unë e kam njohur atë», dhe nuk mban urdhërimet e tij, është gënjeshtar dhe e vërteta nuk është në atë. ⁵Por kush e mban fjalën e tij, në të me të vërtetë dashuria e Perëndisë është përsosur. Nga kjo e njohim se jemi në të. ⁶Ai që thotë se rri në të, duhet të ecë edhe vetë ashtu si ka ecur ai.

Tit. 1:16 Pohojnë se njohin Perëndinë, po me vepra e mohojnë, sepse janë të neveritshëm, të pabindur dhe të pasprovuar për çfarëdo veprë të mirë.

- c **1 Kor. 10:19-22** Çfarë them, pra? Se idhulli është diçka? Apo se ajo që u është flijuar idhujve është diçka? ²⁰Jo, por them se gjërat, që flijojnë paganët, ua flijojnë demonëve dhe jo Perëndisë; tani unë nuk dua që ju të keni bashkësi me demonët. ²¹Ju nuk mund të pini kupën e Zotit dhe kupën e demonëve; ju nuk mund të jeni pjesëtar në tryezën e Zotit dhe në tryezën e demonëve. ²²A duam ne të provokojmë Zotin për në xhelozit? Vallë a jemi më të fortë se ai?

1 Kor. 11:28-30 Por njeriu le të shqyrtojë vetveten dhe kështu të hajë nga buka e të pijë nga kupa, ²⁹sepse ai që ha dhe pi padenjësisht, ha dhe pi një dënim për veten e tij, sepse nuk e dallon trupin e Zotit. ³⁰Për këtë arsye ka në mes jush shumë të dobët e të sëmurë, dhe mjaft kanë vdekur.

Pyetja 82

A duhen pranuar në këtë Darkë edhe ata që, sipas rrëfimit dhe jetës së tyre, e shpallin veten jobesimtarë dhe të jo të përshpirtshëm?

Përgjigjja:

Jo; sepse kështu do të përdhosej besëlidhja e Perëndisë dhe zemërimi i Tij do të ndizej kundër tërë bashkësisë^a; prandaj është detyrë e kishës së krishterë, sipas caktimit të Krishtit dhe të apostujve të Tij, të përjashtojë persona të tillë, me anë të çelësve të Mbretërisë së Qiejve, derisa të tregojnë ndreqje të jetës^b së tyre.

a **1 Kor. 11:20, 34** Kur mblidheni, pra, në një vend, kjo që bëni nuk është për të ngrënë Darkën e Zotit... ³⁴Dhe në qoftë se dikush ka uri, le të hajë në shtëpi, që të mos mblidheni për gjykim. Dhe gjërat e tjera, kur të vij, do t'i rregulloj.

Isa. 1:11–15 «Ç'më duhet shumica e flijimeve tuaja», thotë ZOTI. «Jam ngopur nga holokaustet e deshve dhe nga dhjami i kafshëve të majme; gjakun e demave, të qengjave dhe të cjepve nuk e pëlqej. ¹²Kur vini të paraqiteni përpara meje, kush ua ka kërkuar këtë, që të shkelni oborret e mia? ¹³Mos sillni më blatime të kota; temjani është neveri për mua; nuk mund t'i duroj hënat e reja dhe shabatet, thirrjen e asambleve dhe paudhësinë bashkë me kuvendet solemne. ¹⁴Unë i urrej hënat tuaja të reja dhe festat tuaja solemne; janë një barrë për mua, jam lodhur duke i duruar. ¹⁵Kur i shtrini duart tuaja, unë i fsheh sytë e mi nga ju; edhe kur i shumoni lutjet tuaja, unë nuk dëgjoj; duart tuaja janë tërë gjak.

Isa. 66:3 Kush flijon një ka, është si të vriste një njeri, kush flijon një qengj, është si t'i thyente qafën një qeni, kush paraqet një blitim ushqimi, është si të ofronte gjak derri, kush djeg temjan, është si të bekonte një idhull. Ashtu si këta kanë zgjedhur rrugët e tyre dhe shpirti i tyre kënaqet në neveritë e tyre.

Jer. 7:21–23 Kështu thotë ZOTI i ushtrive, Perëndia i Izraelit: «Shtojani holokaustet tuaja flive tuaja dhe hani mishin e tyre! ²²Sepse unë nuk u fola etërve tuaj dhe nuk u dhashë atyre asnjë urdhër kur bëra që të dalin nga vendi i Egjiptit për sa u përket holokausteve dhe flijimeve; ²³por u dhashë këtë urdhër: “Dëgjoni zërin tim dhe unë do të jem Perëndia juaj dhe ju do të jeni populli im; ecni në të gjitha rrugët që ju kam urdhëruar, që të jeni të lumtur”.

Psa. 50:14–23 Dhuroji Perëndisë flijime lavdërimi dhe plotëso zotimet e tua që i ke bërë Shumë të Lartit. ¹⁵Kërkomë ditën e fatkeqësisë, unë do të të çliroj dhe ti do të më përlëvdosh». ¹⁶Por të pabesit Perëndia i thotë: «Çfarë të drejte ke ti të përmendësh statutet e mia dhe të kesh mbi buzët e tua besëlidhjen time, ¹⁷ti që e urren korrigjimin dhe i hedh pas kurrizit fjalët e mia? ¹⁸Në rast se sheh një vjedhës, bashkohesh me të me gjithë qejf dhe bëhesh shok i atyre që shkelin kurorën. ¹⁹Ti gojën ia lë së keqes dhe gjuha jote kurdis mashtrime. ²⁰Ti ulesh, flet kundër vëllait tënd dhe shpif kundër birit të nënës sate. ²¹Ti i ke bërë këto gjëra dhe unë kam heshtur; ti ke menduar që unë jam krejt i ngjashëm me ty. Por unë do të të përgjigjem dhe do të vë çdo gjë para syve të tu. ²²Tani kuptoni këtë gjë ju që harroni Perëndinë, që unë të mos ju bëj copë-copë dhe askush të mos ju çlirojë dot. ²³Ai që ofron flijime lavdërimi më përlëvdon dhe atij që sillet drejt do t'i tregoj shpëtimin e Perëndisë».

b **Lev. 13:46** Do të jetë i papastër tërë kohën që do të ketë plagën; është i papastër; do të jetojë vetëm; do të banojë jashtë kampit.

Num. 12:14 Atëherë ZOTI iu përgjigj Moisiut: «Po ta kishte pështyrë i ati në fytyrë, nuk do të ishte ndofta e turpëruar shtatë ditë? Veçojeni, pra, jashtë kampit shtatë ditë; pastaj pranojeni përsëri».

1 Kor. 5:5 T'i dorëzohet ai Satanit për prishjen e mishit, që të shpëtohet fryma në ditën e Zotit Jezus.

1 Kor. 5:13 Por ata të jashtëm Perëndia i gjykon. Prandaj nxirreni të ligun nga vetja juaj.

Mt. 7:6 Mos u jepni qenve gjërat e shenjta dhe mos i hidhni margaritarët tuaj para derrave, që të mos i shkelin me këmbët e tyre dhe të kthehen dhe t'ju shqyejnë.

2 The. 3:6 Dhe ju porosisim, o vëllazër, në emër të Zotit tonë Jezu Krisht, të tërhiqeni nga çdo vëlla që ecën i parregullt dhe jo sipas traditës që keni marrë prej nesh.

DITA E ZOTIT, 31

Pyetja 83

Cilët janë çelësat e Mbretërisë së Qiejve?

Përgjigjja:

Predikimi i Ungjillit të Shenjtë^a, si dhe Disiplina e krishterë apo përjashtimi prej kishës së krishterë^b; me anë të këtyre të dyve, Mbretëria e Qiejve u hapet besimtarëve dhe u mbyllet jobesimtarëve^c.

- a **Mt. 16:18–19** Dhe unë po të them gjithashtu se ti je Pjetri, dhe mbi këtë shkëmb do të ndërtoj kishën time dhe dyert e ferrit nuk do ta mundin atë. ¹⁹Dhe unë do të të jap çelësat e mbretërisë së qiejve; ç'të kesh lidhur mbi tokë, do të jetë lidhur në qiej, dhe ç'të kesh zgjidhur mbi tokë, do të jetë zgjidhur në qiej».

Mt. 18:8 Tani në qoftë se dora jote ose këmba jote të shtyn në mëkat, preje dhe hidhe prej teje; është më mirë për ty të hysh në jetë dorëçung ose i çalë, sesa të kesh dy duar dhe dy këmbë dhe të hidhesh në zjarr të përjetshëm.

Gjo. 20:21–23 Pastaj Jezusi u tha atyre përsëri: «Paqja me ju! Sikurse më ka dërguar mua Ati, ashtu unë po ju dërgoj ju». ²²Dhe, si tha këtë, hukati mbi ta dhe u tha: «Merrni Frymën e Shenjtë! ²³Kujt do t'ia falni mëkatet, do t'i jenë falur, kujt do t'ia mbani, do t'i jenë mbajtur».

- b **Mt. 18:15–18** «Por në qoftë se vëllai yt ka mëkatuar kundër teje, shko dhe qortoje vetëm për vetëm; në qoftë se të dëgjon, e fitove vëllanë tënd; ¹⁶por në qoftë se nuk të dëgjon, merr me vete edhe një ose dy vetë, që çdo fjalë të vërtetohet nga goja e dy ose tre dëshmitarëve. ¹⁷Nëse pastaj refuzon t'i dëgjojë, thuaja kishës; dhe në qoftë se refuzon të dëgjojë edhe kishën, le të jetë për ty si pagan ose tagrambledhës. ¹⁸Në të vërtetë ju them se ç'të keni lidhur mbi tokë do të jetë lidhur edhe në qiell; dhe ç'të keni zgjidhur mbi tokë do të jenë zgjidhur edhe në qiell.

- c **Mt. 16:19** Dhe unë do të të jap çelësat e mbretërisë së qiejve; ç'të kesh lidhur mbi tokë, do të jetë lidhur në qiej, dhe ç'të kesh zgjidhur mbi tokë, do të jetë zgjidhur në qiej».

Mt. 18:18 Në të vërtetë ju them se ç'të keni lidhur mbi tokë do të jetë lidhur edhe në qiell; dhe ç'të keni zgjidhur mbi tokë do të jenë zgjidhur edhe në qiell.

Gjo. 20:23 «Kujt do t'ia falni mëkatet, do t'i jenë falur, kujt do t'ia mbani, do t'i jenë mbajtur».

Pyetja 84:

Si hapet dhe mbyllet Mbretëria e Qiejve nga predikimi i Ungjillit të Shenjtë?

Përgjigjja:

Mbretëria e Qiejve hapet dhe mbyllet nga predikimi i Ungjillit të Shenjtë në këtë mënyrë: kur, sipas urdhërimit të Krishtit, u shpallet dhe u dëshmohet publikisht besimtarëve, të gjithëve dhe secilit, që, kur të marrin premtimin e Ungjillit me një besim të vërtetë, të gjitha mëkatet e tyre u falen vërtet nga Perëndia, për hir të meritave të Krishtit; dhe, në të kundërt, kur u shpallet dhe u dëshmohet të gjithë jobesimtarëve dhe atyre që nuk pendohen sinqerisht, se janë të pambrojtur nga zemërimi i Perëndisë dhe dënimi i përjetshëm, për sa kohë që mbeten të pakthyer^a; sipas dëshmisë së Ungjillit, Perëndia do t'i gjykojë, si në këtë jetë, ashtu edhe në jetën e së ardhmes^b.

- a **Isa. 3:10** I thoni të drejtës se do t'i dalë mirë, sepse do të hajë frytin e veprave të tij.

Hab. 2:4 Ja, shpirti i është krenuar, nuk është i drejtë, por i drejti do të rrojë për shkak të besimit të tij.

Gjo. 3:36 «Ai që beson në Birin ka jetë të përjetshme, por ai që nuk i bindet Birit, nuk do të shohë jetë, por

zemërimi i Perëndisë qëndron mbi të».

Mr. 16:16 Ai që beson dhe pagëzohet do të shpëtohet; por ai që nuk beson, do të dënohet.

2 The. 1:8–10 ...në flakë zjarri, për t'u hakmarrë kundër atyre që nuk njohin Perëndi, dhe të atyre që nuk i binden ungjillit të Zotit tonë Jezu Krisht. ⁹Ata do të ndëshkohen me shkatërrim të përgjeshëm, larg nga fytyra e Zotit dhe nga lavdia e forcës së tij, ¹⁰kur ai të vijë, atë ditë, të marrë lavdinë ndër shenjtoret e vet, dhe të admirohet ndër të gjithë ata që besojnë, sepse dëshmia jonë u besua te ju.

b Shih pyetjen 83 c.

Pyetja 85

Si mbyllet dhe hapet Mbretëria e Qiejve nga Disiplina e krishterë?

Përgjigjja:

Në këtë mënyrë: kur, në përputhje me urdhrin e Krishtit, ata që nën emrin e krishterë përkrahin doktrina apo praktika të papërrputshme me këtë dhe, pasi janë paralajmëruar shpeshherë në mënyrë vëllazërore, nuk duan të heqin dorë nga gabimet dhe jetesa e tyre e ligë, por i ankohen kishës, apo atyre që caktohen nga kisha për këtë punë dhe, në rast se përbuzin qortimin e tyre, u privohet përdorimi i sakramenteve; me anë të të cilit përjashtohen nga kisha e krishterë dhe nga vetë Perëndia, nga Mbretëria e Krishtit^a; dhe, kur premtojnë dhe tregojnë një ndreqje të vërtetë, pranohen përsëri si anëtarë të Krishtit dhe të kishës së Tij^b.

a **Mt. 18:15–18** Shih pyetjen 83 b.

2 Kro. 19:8–10 Edhe në Jerusalemin Jozafati vendosi disa levitë priftërinj dhe të parë të shtëpive atërore të Izraelit për gjykimin e Zotit dhe për grindjet e ndryshme; këta banonin në Jerusalemin. ⁹I urdhëroi ata duke thënë: «Ju do të veproni duke pasur frikë nga ZOTI, me besnikëri dhe me zemër të pastër. ¹⁰Në çdo grindje që do të parashtrohet para jush nga ana e vëllezërve tuaj, që banojnë në qytetet e tyre, qoftë për gjak të derdhur ose për shkelje të ligjit apo të një urdhërimi, kundër statuteve ose dekreteve, paralajmërojeni që të mos bëhen fajtorë përpara Zotit dhe zemërimi të mos bjerë mbi ju dhe mbi vëllezërit tuaj. Veproni kështu dhe nuk do të bëheni fajtorë.

Vep. 15:6 Atëherë apostujt dhe pleqtë u mbledhën për ta shqyrtuar këtë çështje.

Rom. 12:8 Dhe ai që këshillon, le t'i kushtohet këshillimit; ai që ndan, le ta bëjë me thjeshtësi; ai që kryeson le të kryesojë me zell; ai që bën vepra mëshire, le t'i bëjë me gëzim.

1 Kor. 12:28 Dhe Perëndia vuri disa në kishë, së pari apostuj, së dyti profetë, së treti mësues; pastaj vepra të fuqishme; pastaj dhuntitë e shërimeve, të ndihmës, të qeverisjes, të larmive të gjuhëve.

1 Tim. 5:17 Pleqtë që qeverisin mirë, le të nderohen dyfish, sidomos ata që mundohen në fjalë e mësim.

2 The. 3:14–15 Dhe në qoftë se dikush nuk i bindet fjalës sonë në këtë letër, shënojeni atë dhe mos u shoqëroni me të, që ai të turpërohet. ¹⁵Dhe mos e mbani atë si armik, por qortojeni si vëlla.

2 Gjo. 10 Në qoftë se dikush vjen te ju dhe nuk sjell këtë doktrinë, mos e pranoni në shtëpi dhe mos e përshëndetni.

1 Kor. 5:3–5 Sepse unë, megjithëse nuk jam aty me trup, me frymë aty jam, dhe, sikur të isha i pranishëm, kam gjykuar tanimë atë që bëri ashtu: ⁴në emër të Zotit tonë Jezu Krisht, si të mblidheni ju dhe fryma im, me fuqinë e Zotit tonë Jezu Krisht, ⁵t'i dorëzohet ai Satanit për prishjen e mishit, që të shpëtohet fryma në ditën e Zotit Jezus.

1 Kor. 5:11 Por tani ju shkrova të mos përziheni nëse dikush kërkon të quhet vëlla, duke qenë kurvar, ose lakmues ose idhujtar, o shpifës, o pijanec ose rrëmbyes; me një të tillë madje as të mos hani bashkë.

1 Kor. 5:13 Por ata të jashtëm Perëndia i gjykon. Prandaj nxirreni të ligun nga vetja juaj.

b **2 Kor. 2:6–11** Mjaft është për atë ndëshkimi që iu bë nga shumica, ⁷por tani, përkundrazi, ju duhet më tepër ta falni atë dhe ta ngushëlloni, që ai njeri të mos përpohet nga trishtimi i tepërt. ⁸Prandaj ju lutem t'i tregoni dashuri, ⁹sepse prandaj edhe ju shkrova, që të njoh provën tuaj, nëse jeni të bindur në të gjitha. ¹⁰Por atij që do t'i falni diçka, ia fal edhe unë, sepse edhe unë, nëse kam falur gjë, atij ia kam falur për shkakun tuaj përpara fytyrës së Krishtit, ¹¹që të mos na shfrytëzojë Satani, sepse mendimet e tij nuk na janë të panjohura. **2 The. 3:15** Dhe mos e mbani atë si armik, por qortojeni si vëlla.

PJESA E TRETË – MIRËNJOHJA

DITA E ZOTIT, 32

Pyetja 86

Pra, përderisa shpëtohem nga mjerimi ynë thjesht nga hiri, nëpërmjet Krishtit, pa asnjë meritë tonë, pse duhet të bëjmë ende vepra të mira?

Përgjigjja:

Sepse Krishti, pasi na shpengon dhe na shpëton me gjakun e Tij dhe na ripërtërin me Frymën e Tij të Shenjtë, sipas shëmbëllimit të vetes së Tij; kështu, pra, mund të dëshmojmë me tërë sjelljen tonë, për mirënjohjen tonë ndaj Perëndisë, për bekimet e Tij^a dhe që Ai të lavdërohet nga ne^b; po ashtu, që secili të sigurohet në vetvete për besimin e vet, për arsye të fryteve të tij; dhe që, me anë të jetës sonë të përshtirshme, të tjerët të fitohen për Krishtin^d.

a **Psa. 116:12–14, 17** Ç'do t'i jap ZOTIT në këmbim të gjithë të mirave që më ka bërë? ¹³Unë do të ngre kupën e shpëtimit dhe do të thërres emrin e ZOTIT. ¹⁴Do të plotësoj zotimet e mia ndaj ZOTIT në prani të gjithë popullit të tij. ¹⁷Unë do të të ofroj një flijim lavdërimi dhe do të thërres emrin e ZOTIT.

Rom. 6:13 As mos ia paraqitni gjymtyrët tuaja mëkatit si mjete padrejtësie, por i paraqisni veten tuaj Perëndisë, si të gjallë prej së vdekurish, dhe gjymtyrët tuaja si mjete drejtësie Perëndisë.

Rom. 12:1 Ju lutem, pra, o vëllezër, nëpërmjet dhembshurisë së Perëndisë, t'i paraqitni trupat tuaj si fli të gjallë, të shenjtë, të pëlqyeshëm për Perëndinë, që është shërbesa juaj e mençur.

1 Pj. 2:5, 9 ...edhe ju, si gurë të gjallë, ndërtoheni për të qenë një shtëpi frymërore, një priftëri e shenjtë, për të ofruar flijime frymërore, që i pëlqejnë Perëndisë me anë të Jezu Krishtit. ⁹Por ju jeni fis i zgjedhur, priftëri mbretëror, komb i shenjtë, popull i fituar nga Perëndia, që të shpallni lavdinë e atij, që ju thirrri nga terri në dritën e tij të mrekullueshme...

1 Kor. 6:19 A nuk e dini se trupi juaj është tempulli i Frymës së Shenjtë që është në ju, të cilin e keni nga Perëndia, dhe se nuk i përkthni vetvetes?

b **Mt. 5:16** «Ashtu le të shndritë drita juaj para njerëzve, që të shohin veprat tuaja të mira dhe ta lëvdojnë Atin tuaj që është në qiej».

1 Pj. 2:11–13 Të dashur, po ju nxis, si të huaj dhe shtegtarë, të hiqni dorë nga lakmitë e mishit, që luftojnë kundër shpirtit. ¹²Silluni mirë ndër paganë, që në atë që ju përfllasin si keqbërës, të përlëvdojnë Perëndinë ditën e vizitës së tij, për shkak të veprave tuaja të mira. ¹³Nënshtrojni, pra, për hir të Zotit, çdo urdhri njerëzor, qoftë mbretit, si më të lartit.

c **2 Pj. 1:10** Prandaj, vëllezër, jini të zellshëm aq më shumë ta përforconi thirrjen dhe zgjedhjen tuaj, sepse, duke bërë këto gjëra, nuk do të pengoheni kurrë.

Mt. 7:17–18 Kështu çdo pemë e mirë jep fruta të mira; por pema e kalbur jep fruta të këqija. ¹⁸Një pemë e mirë nuk mund të japë fruta të këqija, as një pemë e kalbur të japë fruta të mira.

Gal. 5:5–6 Sepse në Frymë, prej besimit presim me durim shpresën e drejtësisë, ⁶sepse në Krishtin Jezus as rrethprerja, as parrethprerja s'kanë ndonjë forcë, por besimi që vepron me anë të dashurisë.

Gal. 5:22–25 Por fryti i Frymës është: dashuria, gëzimi, paqja, zemërgjerësia, mirëdashja, mirësia, besimi, zemërbutësia, vetëpërmbytja. ²³Kundër tyre nuk ka ligj. ²⁴Por ata që janë të Krishtit e kanë kryqëzuar mishin bashkë me pasionet dhe epshet. ²⁵Në qoftë se rrojmë në Frymë, në Frymë edhe le të ecim.

d **1 Pj. 3:1–2** Gjithashtu dhe ju, gra, nënshtrojni burrave tuaj, që, edhe nëse disa nuk i binden fjalës, të fitohen pa fjalë, nga sjellja e grave të tyre, ²kur të shohin sjelljen tuaj të dëlirë dhe me frikë.

Mt. 5:16 «Ashtu le të shndritë drita juaj para njerëzve, që të shohin veprat tuaja të mira dhe ta lëvdojnë Atin tuaj që është në qiej».

1 Pj. 2:12 *Shih b.*

Rom. 14:19 Le të ndjekim, pra, ato që ndihmojnë për paqen dhe për ndërtimin e njëri-tjetrit.

Ef. 4:28–29 Ai që vidthe, le të mos vjedhë më, por më tepër të mundohet duke bërë të mirën me duart e veta,

që të ketë t'i japë diçka atij që ka nevojë. ²⁹Asnjë fjalë e keqe le të mos dalë nga goja juaj, por ajo që është e mirë për ndërtim, sipas nevojës, që t'u japë hir atyre që dëgjojnë.

1 The. 5:11 Prandaj ngushëlloni njëri-tjetrin dhe ndërtoni njëri-tjetrin ashtu sikur edhe bëni.

Heb. 10:24 Dhe le të kujdesemi për njëri-tjetrin, për t'u nxitur për dashuri dhe vepra të mira.

Pyetja 87

A nuk mund të shpëtohen ata që nuk i kthehen Perëndisë, por vazhdojnë jetën e tyre të ligë dhe mosmirënjohëse?

Përgjigja

Në asnjë mënyrë; sepse Shkrimi i Shenjtë thotë se asnjë i shturur, idhujtar, kurorëshkelës, hajdut, lakmitar, pijanec, shpifës, cub, apo ndonjë i tillë, nuk ka për të trashëguar Mbretërinë e Perëndisë^a.

a **1 Kor. 6:9–10** A nuk e dini se të padrejtët nuk do të trashëgojnë mbretërinë e Perëndisë? Mos u gënjeni: as kurvarët, as idhujtarët, as shkelësit e kurorës, as të zhburrëuarit, as homoseksualët, ¹⁰as vjedhësit, as lakmuesit, as pijanecët, as shpifësit, as rrëmbyesit nuk do të trashëgojnë mbretërinë e Perëndisë.

Ef. 5:5–7 Sepse këtë e dini, që asnjë kurvar, ose i papastër ose lakmitar, i cili është idhujtar, nuk ka ndonjë trashëgim në mbretërinë e Krishtit dhe të Perëndisë. ⁶Askush të mos ju mashtrojë me fjalë të kota, sepse, për shkak të këtyre gjërave, vjen zemërimi i Perëndisë mbi bijtë e mosbindjes. ⁷Mos jini, pra, shokë me ta.

1 Gjo. 3:14 Ne e dimë se kemi kaluar nga vdekja në jetë, sepse i duam vëllezërit; kush nuk e do vëllanë, mbetet në vdekje.

DITA E ZOTIT, 33

Pyetja 88

Nga sa pjesë përbëhet kthimi i vërtetë i njeriut?

Përgjigja:

Nga dy pjesë: nga *vdekja e vazhdueshme e njeriut të vjetër dhe ripërtëritja e vazhdueshme e njeriut të ri*.^a

a **Rom. 6:1, 4–6** Ç'të themi, pra? A të mbetemi në mëkat, që të shtohet hiri? ⁴U varrosëm, pra, me të me anë të pagëzimit në vdekje, që, ashtu si Krishti u ringjall prej së vdekurish me anë të lavdisë së Atit, kështu edhe ne të ecim në risinë e jetës. ⁵Sepse, nëse jemi bërë një me Krishtin në një vdekje të njëjtë me të tijën, do të jemi një edhe në ringjalljen e tij, ⁶duke ditur këtë: se njeriu ynë i vjetër u kryqëzua me të, që trupi i mëkatit të shfuqizohet, që ne të mos i shërbejmë më mëkatit.

Ef. 4:22–24 ...që për sa i përket sjelljes së mëparshme, të zhvishni njeriun e vjetër që priset sipas epsheve mashtroese, ²³dhe të përtëriheni në frymën e mendjes suaj ²⁴dhe të vishni njeriun e ri, të krijuar sipas Perëndisë në drejtësinë dhe shenjtërinë e së vërtetës.

Kol. 3:5–10 Vrisni, pra, gjymtyrët tuaja që janë mbi tokë: kurvërinë, papastërtinë, pasionet, dëshirat e këqija dhe lakminë, që është idhujtari; ⁶për shkak të këtyre zemërimi i Perëndisë vjen përmbi bijtë e mosbindjes, ⁷midis të cilëve dikur ecët edhe ju, kur rronit në to. ⁸Por tani hiqni edhe ju të gjitha këto gjëra: zemërimin, inatin, mbrapshtinë, sharjen, të folurit e pandershëm prej gojës suaj. ⁹Mos gënjeni njëri-tjetrin, sepse ju e zhveshët njeriun e vjetër me veprat e tij, ¹⁰edhe veshët njeriun e ri, që përtërihet në njohurinë, sipas shembullit të atij që e krijoi.

1 Kor. 5:7 Fshijeni, pra, majanë e vjetër, që të jeni një brumë i ri, siç jeni pa maja; sepse pashka jonë, që është

Krishti, u flijua për ne.

2 Kor. 7:10 Sepse trishtimi sipas Perëndisë, sjell pendim për shpëtim, për të cilin njeriut nuk i vjen keq, por trishtimi i botës sjell vdekje.

Pyetja 89

Ç'është vdekja e vazhdueshme e njeriut të vjetër?

Përgjigjja:

Është një pikëllim i sinqertë i zemrës, që kemi zemëruar Perëndinë me anë të mëkateve tona, një urrejtje gjithnjë e më e madhe ndaj tyre dhe një arratisje prej tyre.^a

a 2 Kor. 7:9–11 Tani po gëzohem, jo sepse u trishtuat, por sepse u trishtuat për pendim, sepse u trishtuat sipas Perëndisë, që të mos ju bëhet juve ndonjë dëm nga ne. ¹⁰Sepse trishtimi sipas Perëndisë, sjell pendim për shpëtim, për të cilin njeriut nuk i vjen keq, por trishtimi i botës sjell vdekje. ¹¹Sepse ja sa kujdes shkaktoi te ju trishtimi sipas Perëndisë, madje sa fjalë për të kërkuar ndjesë, sa zemëratë, sa druajtje, sa dëshirë të madhe, sa zell, sa shpagim! Me çdo mënyrë ju e treguat se jeni të pastër në këtë çështje.

Rom. 8:13 Sepse, po të jetoni sipas mishit, do të vdisni; por, nëse me anë të Frymës i vrisni veprat e trupit, do të jetoni.

Joe. 2:13 Grisni zemrën tuaj dhe jo rrobat tuaja dhe kthehuni te ZOTI, Perëndia juaj, sepse ai është i mëshirshëm dhe plot dhemshuri, i ngadalshëm në zemërim dhe me shumë dashamirësi, dhe pendohet për të keqen që ka dërguar.

Ose. 5:15 «Do të kthehem në vendin tim derisa të njohin që janë fajtorë dhe do të kërkojnë me siguri fytyrën time; në mjerimin e tyre do të më kërkojnë me zell».

Ose. 6:1 Ejani, të kthehemi te ZOTI, sepse ai na ka shqyer, por do të na shërojë; na ka goditur, por do të na fashojë.

Pyetja 90

Ç'është ripërtëritja e vazhdueshme e njeriut të ri?

Përgjigjja:

Ky është një gëzim i sinqertë i zemrës në Perëndinë, nëpërmjet Krishtit^a, dhe një jetë me dashuri dhe gëzim, sipas vullnetit të Perëndisë, në gjithfarë veprash të mira^b.

a Rom. 5:1 Të drejtësuar, pra, prej besimit, kemi paqe me Perëndinë, nëpërmjet Jezu Krishtit, Zotit tonë.

Rom. 14:17 Sepse mbretëria e Perëndisë nuk është të ngrënët dhe të pirët, por drejtësi dhe paqe dhe gëzim në Frymën e Shenjtë.

Isa. 25:9 Atë ditë do të thuhet: «Ja, ky është Perëndia ynë: tek ai kemi shpresuar dhe ai do të na shpëtojë. Ky është ZOTI tek i cili kemi shpresuar; të ngazëllojmë dhe të gëzohemi në shpëtimin e tij!».

Isa. 57:15 Sepse kështu thotë i Larti dhe i Madhërishtmi që banon përjetësinë dhe emri i të cilit është i «Shenjtë»: «Unë banoj në vendin e lartë dhe të shenjtë dhe bashkë me atë që është i penduar dhe i përlur nga fryma, për të ngjallur frymën e të përlururve, për të ngjallur frymën e të penduarve.

Psa. 1:1 Lum njeriu që nuk ecën sipas këshillës së të pabesëve, që nuk ndalet në rrugën e mëkatarëve dhe nuk ulët bashkë me tallësit.

Psa. 16:9 Prandaj zemra ime gëzohet dhe dinjiteti im ngazëllohet; edhe mishi im do të pushojë i sigurt.

Psa. 32:11 Gëzohuni te ZOTI dhe ngazëlloni, o njerëz të drejtë; lëshoni britma gëzimi, ju të gjithë, o njerëz me zemër të drejtë.

Fil. 4:4, 7 Gëzohuni gjithnjë në Zotin; po jua them përsëri: Gëzohuni! ⁷Dhe paqja e Perëndisë, që ia tejkalon çdo zgjuarsie, do të ruajë zemrat tuaja dhe mendjet tuaja në Krishtin Jezus.

- b **Rom. 6:10–11** Sepse në atë që vdiq, vdiq për mëkatin një herë e përgjithmonë; por në atë që jeton, jeton për Perëndinë. ¹¹Kështu edhe ju, llogariteni veten të vdekur për mëkatin, por të gjallë për Perëndinë, në Krishtin Jezus, Zotin tonë.
- Gal. 2:19–20** ...sepse përmes ligjit, unë vdiqa për ligjin, që të rroj për Perëndinë. ²⁰U kryqëzova bashkë me Krishtin; por rroj; jo më unë, po Krishti rron në mua; por ajo që tani jetoj në mish, e jetoj në besimin e Birit të Perëndisë, që më deshi dhe dha veten për mua.
- 1 Pj. 4:2** Për të jetuar kohën që mbetet në mish jo më në dëshirimet e njerëzve, por sipas vullnetit të Perëndisë.

Pyetja 91

Po cilat janë veprat e mira?

Përgjigjja:

Vetëm ato që burojnë nga një besim i vërtetë^a, që kryhen sipas ligjit të Perëndisë^b dhe për lavdinë e Tij^c; dhe jo si ato që mbështeten mbi fantazitë tona, apo mbi traditat e njerëzve^d.

- a **Rom. 14:23** Por ai që dyshon, kur ha, është i dënuar, sepse nuk ha me besim; dhe gjithçka që nuk bëhet me besim, është mëkat.
- Heb. 11:7** Me anë të besimit Noeu, i lajmëruar hyjnisht për ato që ende nuk shiheshin, druante Perëndinë dhe ndërtoi arkën për shpëtimin e shtëpisë së tij, me anë të të cilit e dënoi botën dhe u bë trashëgimtar i drejtësisë sipas besimit.
- b **LiP. 4:1** «Tani, pra, o Izrael, dëgjo statutet dhe dekretet që po ju mësoj, që t'i zbatoni, të jetoni dhe të shtini në dorë vendin që ZOTI, Perëndia i etërve tuaj, ju jep.»
- LiP. 11:32** «Kini kujdes, pra, të zbatoni të gjitha statutet dhe dekretet që unë shtroj sot para jush».
- LiP. 12:32** «Do të kujdeseni të zbatoni tërë gjërat që ju urdhëroj; nuk do t'u shtoni asgjë dhe asgjë nuk do t'u hiqni».
- Lev. 18:4** Do të zbatoni dekretet e mia dhe do të respektoni statutet e mia, duke iu përmbajtur atyre. Unë jam ZOTI, Perëndia juaj.
- 1 Sam. 15:22** Në mëngjes herët Samueli u ngrit për t'i dalë përpara Saulit; por erdhën t'i thonë Samuelit: «Sauli ka shkuar në Karmel dhe i ka ngritur vetes një monument; pastaj është kthyer duke kaluar tutje dhe ka zbritur në Gilgal».
- Eze. 20:18–19** Pastaj u thashë bijve të tyre në shkretëtirë: «Mos ecni sipas statuteve të etërve tuaj, mos respektoni dekretet e tyre dhe mos u ndotni me idhujt e tyre. ¹⁹Unë jam ZOTI, Perëndia juaj; ecni sipas statuteve të mia, respektoni dekretet e mia dhe i vini në praktikë.»
- Ef. 2:10** Sepse jemi vepra e tij, e krijuar në Krishtin Jezus për vepra të mira që Perëndia përgatiti që më parë, që ne të ecim në to.
- c **1 Kor. 10:31** Pra, nëse hani, nëse pini, nëse bëni ndonjë gjë tjetër, të gjitha t'i bëni për lavdinë e Perëndisë.
- d **Eze. 20:18–19** *Shih b.*
- Isa. 29:13** Prandaj Zoti thotë: «Meqenëse ky popull më afrohet vetëm me gojën e tij dhe më nderon me buzët e tij, ndërsa zemra e tij më rri larg dhe frika e tij ndaj meje është vetëm një urdhërim i mësuar nga njerëzit.»
- Mt. 15:7–9** Hipokritë, mirë profetizoi Isaia për ju kur tha: «Ky popull më afrohet me gojën e tij dhe më nderon me buzë; por zemra e tyre është larg meje. ⁹Dhe më kot më nderojnë, duke dhënë mësim për doktrina që janë urdhërime njerëzish.»

LIGJI I PERËNDISË

DITA E ZOTIT, 34

Pyetja 92

Çfarë është Ligji i Perëndisë?

Përgjigjja:

Atëherë Perëndia shqiptoi tërë këto fjalë (Eksodi 20:1–17, Ligji i Përtërirë 5:6–21), duke thënë: Unë jam ZOTI, Perëndia yt, që të nxori nga vendi i Egjiptit, nga shtëpia e skllavërisë.

- I. Mos ki perëndi të tjerë para meje.
- II. Mos bëj skulpturë ose shëmbëlltyrë të asnjë gjëje që ndodhet aty në qiejt ose këtu poshtë në tokë ose në ujërat nën tokë. Mos u përkul para tyre dhe as mos u shërbe, sepse unë, ZOTI, Perëndia yt, jam një Perëndi xheloz, që dënon paudhësinë e etërve mbi fëmijët e tyre deri në brezin e tretë dhe të katërt të atyre që më urrejnë, dhe unë përdor dashamirësi për mijëra, për ata që më duan dhe që zbatojnë urdhërimet e mia.
- III. Mos e përdor emrin e ZOTIT, të Perëndisë tënd, kot, sepse ZOTI nuk do të lërë të pandëshkuar atë që përdor kot emrin e tij.
- IV. Mbage mend^a ditën e shabatit për ta shenjtëruar^b. Puno gjashtë ditë dhe në ato bëj të gjithë punën tënde; por dita e shtatë është shabat, e shenjtë për ZOTIN, Perëndinë tënd; mos bëj në atë ditë asnjë punë, as ti, as biri yt, as bija jote, as shërbëtori yt, as shërbëtorja jote, as kafshët e tua^c, as i huaji që ndodhet brenda portave të tua^d; sepse në gjashtë ditë ZOTI krijoi qiejt dhe tokën, detin dhe gjithçka që është në ta, dhe ditën e shtatë ai pushoi; prandaj ZOTI e ka bekuar ditën e shabatit dhe e ka shenjtëruar atë.
- V. Ndero atin tënd dhe nënën tënde^e, me qëllim që ditët e tua të jenë të gjata^f mbi tokën që ZOTI, Perëndia yt, po të jep.
- VI. Mos vrit.
- VII. Mos shkel besnikërinë bashkëshortore.
- VIII. Mos vidh.
- IX. Mos bëj dëshmi të rreme kundër të afërmit tënd.
- X. Mos dëshiro shtëpinë e të afërmit tënd^g; mos dëshiro gruan e të afërmit tënd, as shërbëtorin e tij, as shërbëtoren e tij, as lopën e tij, as gomarin e tij, as ndonjë gjë tjetër që është e të afërmit tënd.

a **LiP. 5:12** “Respekto ditën e shabatit për ta shenjtëruar.”

b **LiP. 5:12** “Ashtu siç të ka porositur ZOTI, Perëndia yt.”

c **LiP. 5:14** “As kau, as gomari, asnjë nga kafshët e tua.”

d **LiP. 5:14–15** “Me qëllim që shërbëtori dhe shërbëtorja jote të çlodhen si ti. ¹⁵Dhe mos harro që ke qenë skllav në vendin e Egjiptit dhe që ZOTI, Perëndia yt, të nxori që andej me një dorë të fuqishme dhe vepruese; prandaj ZOTI, Perëndia yt, të urdhëron të respektosh ditën e shabatit.”

e **LiP. 5:16** “Ashtu si të ka urdhëruar ZOTI, Perëndia yt.”

f **LiP. 5:16** “Që të jetosh gjatë dhe të gëzosh begati në tokën që ZOTI, Perëndia yt, po të jep.”

g **LiP. 5:21** “Mos dëshiro gruan e të afërmit tënd, mos dëshiro shtëpinë e të afërmit tënd, as arën, as shërbëtorin, as shërbëtoren, as kaun, as gomarin dhe asnjë send që janë pronë e tij.”

Pyetja 93

Si ndahen këto dhjetë urdhërimet?

Përgjigjja:

Në dy pjesë^a; e para nga e cila mësojmë se si duhet të sillemi ndaj Perëndisë; e dyta, çfarë detyrash kemi ndaj të afërmit tonë^b.

a **Eks. 31:18** Kur ZOTI mbaroi së foluri me Moisiun në malin Sinai, i dha dy pllaka të dëshmisë, pllaka guri, të

shkruara me gishtin e Perëndisë.

Eks. 34:1, 4, 28 ZOTI i tha Moisiut: «Preji dy pllaka guri ashtu si të parat; dhe unë do të shkruaj mbi pllaka fjalët që ishin mbi pllakat e para që theve. ⁴Kështu Moisiu preu dy pllaka guri, si të parat; u ngrit herët në mëngjes dhe u ngjit në malin Sinai, ashtu siç e kishte urdhëruar ZOTI, dhe mori në dorë dy pllakat prej guri.

²⁸Kështu Moisiu mbeti aty me ZOTIN dyzet ditë dhe dyzet net; nuk hëngri bukë, as piu ujë. Dhe ZOTI shkroi mbi pllaka fjalët e besëlidhjes, dhjetë urdhërimet.

LiP. 4:13 Kështu ai ju shpalli besëlidhjen e tij, që ju porositi ta respektoni, domethënë të dhjetë urdhërimet; dhe i shkroi mbi dy pllaka prej guri.

LiP. 10:3 Kështu bëra një arkë prej dru akacieje dhe preva dy pllaka prej guri, të njëjlojta me të parat; pastaj u ngjita në mal me dy pllakat në dorë.

- b **Mt. 22:37–40** Dhe Jezusi i tha: «'Duaje Zotin, Perëndinë tënd me gjithë zemrën tënde, dhe me gjithë shpirtin tënd dhe me gjithë mendjen tënde'. ³⁸Ky është urdhërimi i parë dhe i madhi. ³⁹Dhe i dyti, i ngjashëm me këtë, është: "Duaje të afërmin tënd porsì vetveten". ⁴⁰Nga këto dy urdhërimet varet i tërë ligji dhe profetët».

Pyetja 94

Çfarë kërkon Perëndia në urdhërimin e parë?

Përgjigjia:

Që unë, po aq sinqerisht sa e dëshiroj shpëtimin e shpirtit tim, po aq dhe t'i shmangem dhe t'i largohem çdo idhujtarie^a, magji, yshtjeje, besëtytnie^b, thirrjeje drejtuar shenjtoreve apo çfarëdolloj krijese tjetër^c dhe të mësoj ta njoh drejt Perëndinë e vetëm dhe të vërtetë^d; t'i besoj vetëm Atij^e, t'i nënshtrohem Atij me përlusësi^f dhe durim^g, të pres të gjitha të mirat vetëm nga Ai^h, ta duaⁱ, t'ia kem frikën^j dhe ta lavdëroj Atë me gjithë zemrën time^k; kështu që heq dorë nga të gjitha krijesat dhe i braktis ato, më mirë sesa të kryej qoftë edhe gjënë më të vogël kundër vullnetit të Tij^l.

- a **1 Kor. 6:9** A nuk e dini se të padrejtët nuk do të trashëgojnë mbretërinë e Perëndisë? Mos u gënjeni: as kurvarët, as idhujtarët, as shkelësit e kurorës, as të zhburrëruarit, as homoseksualët.

1 Kor. 10:7 Dhe që të mos bëheni idhujtarë si disa nga ata, sikurse është shkruar: «Populli u ul që të hajë dhe të pijë, dhe u ngrit për të luajtur».

- b **Lev. 19:31** Mos iu drejtoni mediumeve dhe magjistarëve; mos u këshilloni me ta për të mos u ndotur me anë të tyre. Unë jam ZOTI, Perëndia juaj.

LiP. 18:10–12 Të mos gjendet midis teje ndonjë që e kalon birin ose bijën e vet nëpër zjarr, as ndonjë që praktikon shortarinë, bën parashikime, interpreton shenjat dhe merret me magji, ¹¹as ai që përdor yshtje, as mediume që këshillohen me frymët, as magjistarë, as ai që ndjell të vdekurit, ¹²sepse të gjithë ata që merren me këtë punë janë neveri për ZOTIN; dhe për shkak të kësaj neverie, ZOTI është duke i përzënë para teje.

- c **Mt. 4:10** Atëherë Jezusi i tha: «Shporru, Satan, sepse është shkruar: "Adhuro Zotin, Perëndinë tënd, dhe shërbeji vetëm atij"».

Zbu. 19:10 Edhe rashë përmbys përpara këmbëve të tij për ta adhuruar, dhe ai më tha: «Shiko se mos e bën, jam bashkëshërbëtori yt si dhe i vëllezërve të tu që kanë dëshminë e Jezusit. Perëndinë adhuro! Sepse dëshmia e Jezusit është frymë e profecisë».

Zbu. 22:8–9 Dhe unë, Gjoni, jam ai që pashë dhe dëgjova këto gjëra; dhe kur dëgjova dhe pashë, rashë përmbys për ta adhuruar përpara këmbëve të engjëllit që m'i tregonte këto gjëra. ⁹Dhe më tha: «Shiko se mos e bën! Sepse unë jam bashkëshërbëtori yt dhe i vëllezërve të tu, profetë, dhe të atyre që i mbajnë fjalët e këtij libri. Adhuro Perëndinë!».

- d **Gjo. 17:3** Dhe kjo është jeta e përjetshme, të të njohin ty, të vetmin Perëndi të vërtetë, dhe Jezu Krishtin që ti ke dërguar.

- e **Jer. 17:5–7** Kështu thotë ZOTI: «Mallkuar qoftë njeriu që ka besim te njeriu dhe e bën mishin krahun e tij dhe zemra e të cilit largohet nga ZOTI! ⁶Ai do të jetë si një brukë në shkretëtirë; kur vjen e mira, nuk ka për ta parë. Do të banojë në vende të thata në shkretëtirë, në një tokë të kripur pa banorë. ⁷Lum ai njeri që beson

te ZOTI dhe besimi i të cilit është ZOTI!

- f **1 Pj. 5:5** Gjithashtu ju, të rinjtë, nënshtrojeni pleqve. Po, nënshtrojeni të gjithë njëri-tjetrit dhe vishuni me përlulje, sepse Perëndia i kundërshton mendjemëdhenjtë, por u jep hir të përlulurve.
- g **Heb. 10:36** Sepse ju keni nevojë për durim që, mbasi të bëni vullnetin e Perëndisë, të merrni gjërat e premtuara. **Rom. 5:3-5** Dhe jo vetëm kaq, por mburrimi edhe në shtrengime, duke ditur që shtrengimi prodhon durimin, "durimi përvojën dhe përvoja shpresën." Por shpresa nuk turpëron, sepse dashuria e Perëndisë është derdhur në zemrat tona me anë të Frymës së Shenjtë që na është dhënë. **1 Kor. 10:10** As të mos murmurisni, sikundër edhe disa nga ata murmuritën, dhe u vranë nga shkatërruesi. **Fil. 2:14** Bëni gjithçka pa murmuritje dhe pa mëdyshje.
- h **Psa. 104:27-30** Të gjithë presin që ti t'u japësh ushqimin në kohën e duhur. ²⁸Ti ua jep atyre dhe ata e mbledhin; ti hap dorën dhe ngopen me të mira. ²⁹Ti fsheh fytyrën tënde dhe ata e humbasin fare; ti tërheq frymën e tyre, dhe ata vdesin duke u kthyer përsëri në pluhurin e tyre. ³⁰Ti dërgon frymën tënde dhe ata krijohen, kështu ti ripërtërin faqen e dheut. **Isa. 45:7** «Unë formoj dritën dhe krijoj terrin, sjell mirëqenien dhe krijoj fatkeqësinë. Unë, ZOTI, i bëj të gjitha këto gjëra». **Jak. 1:17** Çdo dhurëti e mirë dhe çdo dhuratë e përsosur është nga lart dhe zbret nga Ati i dritave, pranë të cilit nuk ka ndërrim dhe as hije ndryshimi.
- i **LiP. 6:5** Ti do ta duash, pra, ZOTIN, Perëndinë tënd, me gjithë zemër, me gjithë shpirt dhe me tërë forcën tënde. **Mt. 22:37** Dhe Jezusi i tha: "Duaje Zotin, Perëndinë tënd me gjithë zemrën tënde, dhe me gjithë shpirtin tënd dhe me gjithë mendjen tënde".
- j **LiP. 6:2** Me qëllim që ti të kesh frikë nga ZOTI, Perëndia yt, të respektosh gjatë gjithë ditëve të jetës sate, ti, yt bir dhe djali i birit tënd, të tëra statutet dhe të gjitha urdhërimet e tij që unë po të jap dhe me qëllim që ditët e jetës sate të zgjaten. **LiP. 10:20** Do të kesh frikë nga ZOTI, Perëndia yt, do t'i shërbesh atij, do të jesh lidhur ngushtë me të dhe do të betohesh në emrin e tij. **Psa. 111:10** Frika e ZOTIT është fillimi i urtësisë; fitojnë gjykim të mirë ata që zbatojnë urdhërimet e tij; lëvdimi i tij vazhdon në përjetësi. **Fja. 1:7** Frika e ZOTIT është fillimi i njohjes, por njerëzit e pamend e përçmojnë urtësinë dhe mësimin. **Fja. 9:10** Frika e ZOTIT është fillimi i urtësisë dhe njohja e të Shenjtit është mençuri.
- k **Mt. 4:10** Atëherë Jezusi i tha: «Shporru, Satan, sepse është shkruar: "Adhuro Zotin, Perëndinë tënd, dhe shërbeji vetëm atij"». **Mt. 10:28** Dhe mos kini frikë nga ata që vrasin trupin, por nuk mund të vrasin shpirtin; por kini frikë më tepër nga ai që mund t'jua humbë edhe shpirtin, edhe trupin në ferr.
- l **LiP. 33:9** Ai thotë për të atin dhe për të ëmën: "Unë nuk i kam parë"; ai nuk i njohu vëllezërit e tij dhe nuk njohu bijtë; sepse levitët kanë respektuar fjalën tënde dhe kanë ruajtur besëlidhjen tënde. **Mt. 5:29** Në qoftë se syri yt i djathtë të çon në mëkat, hiqe dhe hidhe larg teje, sepse është më mirë për ty që të humbësh një nga gjymtyrët e tua, sesa të hidhet në ferr gjithë trupi yt; **Mt. 10:37-39** Ai që e do të atin ose nënën më shumë se mua, nuk është i denjë për mua; dhe ai që e do birin ose bijën më shumë se mua, nuk është i denjë për mua. ³⁸Dhe ai që nuk e merr kryqin e vet dhe nuk vjen pas meje, nuk është i denjë për mua. ³⁹Kush do të gjejë jetën e vet, do ta humbasë; por kush do të humbasë jetën e vet për shkakun tim, do ta gjejë përsëri. **Vep. 5:29** Por Pjetri dhe apostujt, duke u përgjigjur, thanë: «Duhet t'i bindemi Perëndisë më shumë sesa njerëzve.

Pyetja 95

Çfarë është idhujtaria?

Përgjigja:

Idhujtari është që, në vend të, apo përveç, të vetmit Perëndie të vërtetë, i Cili e ka zbuluar Vetën në Fjalën e Tij, të shpikësh apo të bësh një tjetër objekt, në të cilin njeriu të vendosë besimin e tij^a.

- a **Ef. 5:5** Sepse këtë e dini, që asnjë kurvar, ose i papastër ose lakmitar, i cili është idhujtar, nuk ka ndonjë trashëgim në mbretërinë e Krishtit dhe të Perëndisë.
- 1 Kro. 16:26** Sepse tërë perënditë e kombeve janë idhuj, kurse Zoti ka krijuar qiejt.
- Fil. 3:18–19** Sepse, shumë nga ata, për të cilët ju kam folur shpesh edhe tani po jua them duke qarë, ecin si armiq të kryqit të Krishtit, ¹⁹dhe fundi i tyre është humbje, perëndia i tyre është barku dhe lavdia e tyre është në turp të tyre; ata e çojnë mendjen vetëm në gjërat tokësore.
- Gal. 4:8** Por atëherë, duke mos njohur Perëndinë, u shërbyet atyre, që prej natyre nuk janë perëndi...
- Ef. 2:12** Ishit në atë kohë pa Krishtin, të përjashtuar nga qytetaria e Izraelit dhe të huaj për besëlidhjet e premtimit, pa pasur shpresë dhe duke qenë pa Perëndi në botë.
- 1 Gjo. 2:23** Kushdo, që mohon Birin, s'ka as Atin; kushdo, që rrëfen Birin, ka edhe Atin.
- 2 Gjo. 1:7** Sepse shumë mashtrues dolën në botë, të cilët nuk rrëfejnë se Jezu Krishti ka ardhur në mish; ky është mashtruesi dhe antikrishti.
- Gjo. 5:23** Që të gjithë ta nderojnë Birin ashtu siç nderojnë Atin; kush nuk e nderon Birin, nuk nderon Atin, që e ka dërguar.

DITA E ZOTIT, 35

Pyetja 96

Çfarë kërkon Perëndia në urdhërimin e dytë?

Përgjigjja:

Që ne të mos e paraqitim në asnjë mënyrë Perëndinë me imazhe^a, as ta adhurojmë Atë në ndonjë mënyrë tjetër, veç asaj që Ai ka urdhëruar në Fjalën e Tij^b.

- a **Isa. 40:18–19, 25** Kujt dëshironi t'i përngjajë Perëndia dhe çfarë figure do t'i vinit përballë? ¹⁹Një artist shkrin një shëmbëlltyrë të gdhendur dhe argjendari e vesh me ar dhe shkrin zinxhirë të vegjël prej argjendi. «²⁵Me kë kërkon, pra, të më ngjasoni, që të jem baras me të?», thotë i Shenjti.
- LiP. 4:15–16** Meqenëse, pra, nuk patë asnjë figurë ditën që ZOTI ju foli në Horeb nga mesi i zjarrit, tregoni kujdes të veçantë për shpirtat tuaja, ¹⁶me qëllim që të mos shtureni dhe të mos gdhendni ndonjë shëmbëlltyrë, në trajtën e ndonjë figure: paraqitjen e një burri apo të një gruaje.
- Rom. 1:23** Dhe e ndërruan lavdinë e Perëndisë së paprishshëm në një shëmbëllim të ngjashëm me atë të një njeriu të prishshëm, të shpendëve, të katërkëmbëshave dhe të rrëshqanorëve.
- Vep. 17:29** Duke qenë, pra, se ne jemi pasardhës të Perëndisë, nuk duhet të mendojmë që natyra e perëndishme është e ngjashme me ar ose me argjend, ose me gur, të latuar me mjeshtëri e shpikje njeriu.
- b **1 Sam. 15:23** Sepse rebelimi është si mëkati i shortarisë dhe kryeneçësia është si kulti i idhujve dhe i perëndive shtëpiake. Duke qenë se ke hedhur poshtë fjalën e ZOTIT, edhe ai të ka hedhur poshtë si mbret».
- LiP. 12:30** Ruhë të mos biesh në kurthin e ngritur duke ndjekur shembullin e tyre, pasi ata janë shkatërruar para teje, dhe të informohesh mbi perënditë e tyre, duke thënë: «Si u shërbenin këto kombe perëndive të tyre? Edhe unë do të veproj kështu».
- Mt. 15:9** Dhe më kot më nderojnë, duke dhënë mësim për doktrina që janë urdhërime njerëzish.

Pyetja 97

Atëherë, s'duhën bërë imazhe fare?

Përgjigjja:

Perëndia as mund e as duhet të paraqitet në ndonjë mënyrë të tillë^a. Por, sa për krijesat, edhe pse mund të paraqiten [në imazhe], përsëri Perëndia na e ndalon ta bëjmë apo të kemi ndonjë

shëmbëllim të tyre me qëllim që t'i adhurojmë ato ose që t'i shërbejmë Perëndisë me anë të tyre^b.

a **Isa. 40:25** «Me kë kërkoni, pra, të më ngjasoni, që të jem baras me të?», thotë i Shenjta.

b **Eks. 23:24** Mos u përkul para perëndive të tyre dhe mos u shërbe. Mos bëj atë që bëjnë ata; por do t'i shkatërrosh plotësisht dhe do të thyesh shtyllat e tyre.

Eks. 34:13–17 ...por rrëzo altarët e tyre, copëto shtyllat e tyre të shenjta dhe rrëzo shëmbëlltyrat e tyre¹⁴(sepse nuk do t'i përulesh një perëndie tjetër, sepse ZOTI, emri i të cilit është “Xheloz”, është një Perëndi xheloz).¹⁵Mos bëj asnjë aleancë me banorët e vendit sepse, kur ata kurvërohen tek idhujt e tyre dhe u ofrojnë fli idhujve të tyre, ndokush prej tyre të fton dhe ti ha nga flitë e tyre¹⁶dhe merr nga bijat e tyre për bijtë e tu dhe vajzat e tyre të kurvërohen te idhujt e tyre dhe t'i shtynjë bijtë e tu të kurvërohen te idhujt e tyre.¹⁷Mos bëj idhull me metal të derdhur.

LiP. 7:5 Por me ta do të silleni kështu: do të shkatërroni altarët e tyre, do të copëtoni kolonat e tyre të shenjta, do të rrëzoni Ashërimet e tyre dhe do t'u vini flakën shëmbëlltyrave të tyre të gdhendura.

LiP. 12:3 Do të rrëzoni altarët e tyre, do të copëtoni kolonat e tyre të shenjta, do t'u vini flakën Asherimëve të tyre, do të rrëzoni shëmbëlltyrat e gdhendura të perëndive të tyre, do të zhdukni emrin e tyre nga këto vende.

LiP. 16:22 «Dhe nuk do të ngresh asnjë shtyllë të shenjtë, që ZOTI, Perëndia yt, urren».

Num. 33:52 Do të dëboni të gjithë banorët e vendit, do të shkatërroni të gjitha figurat e tyre dhe të tëra statujat e tyre prej metali të derdhur, do të rrëzoni të gjitha vendet e larta të tyre.

2 Mbr. 18:3–4 Ai bëri atë që ishte e drejtë në sytë e ZOTIT, sipas tërë atyre që kishte bërë Davidi, ati i tij. «I hoqi vendet e larta, bëri copë-copë shtyllat e shenjta, rrëzoi Asherahun dhe bëri copë-copë gjarprin prej bronzi që e pat bërë Moisiu, sepse deri në atë kohë bijtë e Izraelit i kishin ofruar temjan dhe e quajti Nehushtan.

Pyetja 98

Po, a nuk mund të tolerohen imazhet nëpër disa kisha, si në libra për njerëzit e thjeshtë?

Përgjigjja:

Jo, sepse nuk duhet të hiqemi si më të urtë sesa Perëndia, i Cili do që populli i Tij të marrë mësim jo nga ikona apo imazhe memece^a, por nga predikimi i gjallë i Fjalës së Tij^b.

a **Jer. 10:8–10** Janë të gjithë budallenj dhe pa arsye; idhulli i tyre prej druri është një doktrinë pa asnjë vlerë.⁹Argjend i petëzuar i sjellë nga Tarshishi dhe ar nga Ufazi, punë zejtari dhe dore argjendari; rrobja e tyre është e purpurt dhe e kuqe flakë, punime të dala nga duart e njerëzve të zotë.¹⁰Por ZOTI është Perëndia i vërtetë, ai është Perëndia i gjallë dhe mbreti i përjetshëm. Para zemërimit të tij toka dridhet dhe kombet nuk mund të qëndrojnë përpara indinjatës së tij.

Hab. 2:18–20 Çfarë dobie sjell figura e gdhendur, kur gdhendësi e ka gdhendur, apo një figurë e derdhur që të mëson gënjeshtren, që punuesi i saj të ketë besim te puna e tij, duke bërë idhuj të heshtur? ¹⁹Mjerë ai që i thotë drurit: «Zgjuhu!», apo gurit të heshtur: «Çohu!». A mund t'ju mësojë ai diçka? Ja, është i mbuluar me ar dhe me argjend, por në të nuk ka asnjë frymë jete.²⁰Por ZOTI është në tempullin e tij të shenjtë; tërë dheu le të heshtë përpara tij.

Zak. 10:2 Sepse idhujt familjarë rrëfejnë gjëra të kota, shortarët ndjekin veprime të rreme dhe tregojnë ëndrra të rreme, japin ngushëllime të kota; për këtë arsye ata po enden si dhentë, janë të pikëlluar, sepse janë pa bari.

b **2 Pj. 1:19** Ne e kemi edhe më të përforcuar fjalën profetike, së cilës bëni mirë t'i kushtoni kujdes, si një kandel që ndriçon në një vend të errët, derisa të zbardhë dita dhe ylli i mëngjesit të lindë në zemrat tuaja.

2 Tim. 3:16–17 I gjithë Shkrimi është i frymëzuar nga Perëndia dhe i dobishëm për mësim, bindje, ndreqje dhe për edukim në drejtësi,¹⁷që njeriu i Perëndisë të jetë i përkryer, tërësisht i pajisur për çdo vepër të mirë.

Gal. 3:1 O galatas të pamend! Kush ju ka yshtur që të mos i bindeni së vërtetë, ju, që para syve tuaj Jezu Krishti u përshkrua i kryqëzuar midis jush?

Rom. 10:7 Ose: «Kush do të zbresë në humnerë?». Kjo do të thotë që të sjellë lart Krishtin prej së vdekurish.

Rom. 10:14–17 Si do ta thërrasin, pra, atë, të cilin nuk i besuan? Dhe si do të besojnë tek ai për të cilin nuk kanë dëgjuar? Dhe si do të dëgjojnë, pa predikues? ¹⁵Dhe si do të predikojnë pa qenë dërguar? Siç është

shkruar: «Sa të bukura janë këmbët e atyre që shpallin ungjillin e paqes, që shpallin ungjillin e së mirës!». ¹⁶Por jo të gjithë iu bindën ungjillit, sepse Isaia thotë: «Zot, kush i besoi predikimit tonë?». ¹⁷Besimi, pra, vjen nga dëgjimi, dhe dëgjimi vjen nga fjala e Perëndisë.

DITA E ZOTIT, 36

Pyetja 99

Çfarë kërkohet në urdhërimin e tretë?

Përgjigjja:

Që ne jo vetëm me mallkim^a apo pabesi^b, por edhe me betime të nxituara^c, të mos e përdhosim apo keqpërdorim Emrin e Perëndisë, as të marrim pjesë me heshtje apo pranim në ato mëkate të urrejtshme të tjerët^d; dhe, shkurt, që të mos e përdorim Emrin e shenjtë të Perëndisë, veçse me frikë dhe respekt të thellë^e; që Ai të rrëfihet^f dhe adhurohet drejt^g nga ne, si dhe të lavdërohet në të gjitha fjalët dhe veprat tona^h.

a **Lev. 24:10, 15–16** Ndërkaq biri i një gruaje izraelite dhe i një egjiptasi doli në mes të bijve të Izraelit; dhe ndërmjet djalit të gruas izraelite dhe një izraeliti plasi një grindje. ¹⁵Pastaj folu bijve të Izraelit dhe u thuaj atyre: “Kushdo që mallkon Perëndinë e tij, do të mbajë fajin e mëkatit të tij. ¹⁶Dhe kushdo që e shan emrin e ZOTIT, do të dënohet me vdekje; tërë asambleja do ta vrasë me gurë. I huaj apo i lindur në vend, ai që blasfemon emrin e ZOTIT, do të dënohet me vdekje.

b **Lev. 19:12** Mos bëni betim të rremë në emrin tim, mos përdhosni emrin e Perëndisë tuaj. Unë jam ZOTI.

c **Mt. 5:34–37** Por unë po ju them: “Mos u betoni fare, as për qiellin, sepse është froni i Perëndisë, ³⁵as për dheun, sepse është stol i këmbëve të tij, as për Jerusalemin, sepse është qyteti i Mbretit të madh. ³⁶Mos u beto as për kokën tënde, sepse nuk mund të zbardhësh ose të nxish qoftë edhe një fije floku. ³⁷Por fjala juaj të jetë: Po, po; jo, jo; gjithçka më tepër vjen nga i ligu.

Jak. 5:12 Por, para së gjithash, vëllëzër të mi, mos u betoni as për qiellin, as për dheun, as mos bëni ndonjë be tjetër; por le të jetë «po»-ja juaj «po» dhe «jo»-ja, «jo», që të mos bini nën dënim.

d **Lev. 5:1** «Në qoftë se dikush kryen një mëkat pasi të jetë betuar botërisht se do të dëshmojë, kur ai është dëshmitar, sepse e ka parë faktin ose i është bërë i njohur, po të jetë se nuk e kallëzon, do të mbajë fajin.»

Fja. 29:24 Kush bëhet ortak me një vjedhës, urren jetën e vet. Ai dëgjon betimin, por nuk padit asgjë.

e **Jer. 4:2** «Dhe betohesh: “ZOTI rron”, me vërtetësi, me ndershmëri dhe me drejtësi, atëherë kombet do të jenë të bekuara në Të dhe në Të do të madhësohen».

Isa. 45:23 Jam betuar në veten time, nga goja ime ka dalë një fjalë drejtësie dhe nuk do ta tërheq; çdo gju do të përkulet para meje dhe çdo gjuhë do të betohet për mua.

f **Mt. 10:32–33** Prandaj kushdo që do të më rrëfejë përpara njerëzve, edhe unë do ta rrëfej përpara Atit tim në qiej. ³³Por kushdo që do të më mohojë përpara njerëzve, edhe unë do ta mohoj përpara Atit tim, që është në qiej».

Rom. 10:9–10 ...sepse, po të rrëfesh me gojën tënde Zotin Jezus, dhe po të besosh në zemrën tënde se Perëndia e ngjalli prej së vdekurish, do të shpëtohesh. ¹⁰Sepse me zemër, njeriu beson në drejtësi dhe me gojë bëhet rrëfim për shpëtim.

g **Psa. 50:14–15** «Dhuroji Perëndisë flijime lavdërimi dhe plotëso zotimet e tua që i ke bërë Shumë të Lartit. ¹⁵Kërkomë ditën e fatkeqësisë, unë do të të çliroj dhe ti do të më përlevdosh».

1 Tim. 2:8 Dua, pra, që burrat të luten në çdo vend, duke ngritur duar të shenjta, pa zemërim dhe pa dyshime.

h **Rom. 2:24** Sepse, siç është shkruar: «Për shkakun tuaj, emri i Perëndisë blasfemohet ndër kombe».

1 Kor. 10:31 Pra, nëse hani, nëse pini, nëse bëni ndonjë gjë tjetër, të gjitha t'i bëni për lavdinë e Perëndisë.

Kol. 3:17 Dhe çdo gjë që të bëni, me fjalë a me vepër, t'i bëni në emër të Zotit Jezus, duke e falënderuar nëpërmjet tij Perëndinë Atë.

1 Tim. 6:1 Të gjithë shërbëtorët që janë nën zgjedhë le t'i çmojnë zotërinjtë e tyre të denjë për çdo nderim, që të mos blasfemohet emri i Perëndisë dhe doktrina.

Pyetja 100

A është, atëherë, përdhosja e Emrit të Perëndisë me betime dhe mallkime të kota një mëkat kaq i rëndë, saqë zemërimi i Tij ndizet kundër atyre që nuk mundohen aq sa munden të ndalojnë dhe të pengojnë mallkime dhe betime të tilla te të tjerët?

Përgjigjja:

Patjetër që është^a, sepse nuk ka mëkat më të madh apo që e zemëron më shumë Perëndinë, sesa përdhosja e Emrit të Tij; e prandaj, Ai ka urdhëruar që ky mëkat të dënohet me vdekje^b.

- a **Lev. 5:1** «Në qoftë se dikush kryen një mëkat pasi të jetë betuar botërisht se do të dëshmojë, kur ai është dëshmitar, sepse e ka parë faktin ose i është bërë i njohur, po të jetë se nuk e kallëzon, do të mbajë fajin.»
Ef. 5:11 Dhe mos kini bashkësi me veprat e pafrytshme të errësirës, por më tepër t'i qortoni.
- b **Lev. 24:15–16** Pastaj folu bijve të Izraelit dhe u thuaj atyre: “Kushdo që mallkon Perëndinë e tij, do të mbajë fajin e mëkatit të tij. ¹⁶Dhe kushdo që e shan emrin e ZOTIT, do të dënohet me vdekje; tërë asambleja do ta vrasë me gurë. I huaj apo i lindur në vend, ai që blasfemon emrin e ZOTIT, do të dënohet me vdekje.”

DITA E ZOTIT, 37

Pyetja 101

Atëherë, a na lejohet të betohemi në mënyrë të përsëritshme për Emrin e Perëndisë?

Përgjigjja:

Po, ose kur këtë ua kërkojnë qeveritarët subjekteve të tyre, ose kur nevoja na kërkon të vërtetojmë kështu besnikërinë dhe vërtetësinë për lavdinë e Perëndisë dhe sigurimin e të afërmit tonë; sepse një betim i tillë është i themeluar në Fjalën e Perëndisë^a dhe për këtë arsye u përdor drejt nga shenjtorët, si në Dhiatën e Vjetër, ashtu dhe në Dhiatën e Re^b.

- a **Eks. 22:10–11** Në qoftë se ndokush i jep për ruajtje fqinjit të tij një gomar, një ka, një dele apo çfarëdo tjetër kafshe dhe kjo ngordh ose plagoset, ose dhe merret pa e parë njeri, ¹¹të dyja palët do të betohen para ZOTIT për të mësuar nëse marrësi në dorëzim nuk ka vënë dorë mbi pasurinë e fqinjit të tij. I zoti i gjësë do të pranojë betimin dhe tjetri nuk do të jetë i detyruar të lajë dëmet.

LiP. 6:13 Do të kesh frikë nga ZOTI, Perëndia yt, do t'i shërbesh dhe do të betohesh për emrin e tij.

LiP. 10:20 Do të kesh frikë nga ZOTI, Perëndia yt, do t'i shërbesh atij, do të jesh lidhur ngushtë me të dhe do të betohesh në emrin e tij.

1 Mbr. 8:31–32 Në qoftë se dikush mëkaton kundër të afërmit të tij dhe, duke qenë i detyruar të betohet, vjen të betohet para altarit tënd në këtë tempull, ³²të dëgjoje nga qielli, ndërhy dhe gjyko shërbëtorët e tu; dëno fajtorin, duke bërë që të bjerë mbi kokën e tij sjellja e tij dhe shpalle të drejtë të pafajshmin, duke i dhënë atë që i takon sipas së drejtës së tij.

Isa. 19:18 Atë ditë do të ketë në vendin e Egjiptit pesë qytete që do të flasin gjuhën e Kanaanit dhe do të betohen për ZOTIN e ushtrive; njëri nga këto do të quhet “qyteti i shkatërrimit”.

Isa. 48:1 Dëgjoni këtë, o shtëpi e Jakobit, ju që ju thërrasin me emrin e Izraelit dhe që keni dalë nga burimet e Judës, ju që betoheni për emrin e ZOTIT dhe që përmendni Perëndinë e Izraelit, por jo me të vërtetë dhe me drejtësi.

Heb. 6:16 Sepse njerëzit betohen mbi atë që është më i madh, dhe betimi për ta është përforcimi që i jep fund çdo kundërtënieje.

- b **Zan. 21:24** Abrahami u përgjigj: «Betohem».

Zan. 31:53 Perëndia i Abrahamit dhe Perëndia i Nahorit, Perëndia i atit të tyre, u bëftë gjykatës midis nesh!».

Dhe Jakobi u betua për Tmerrin e Isakut, atit të tij.

Joz. 2:12 Prandaj, ju lutem, betohuni në emër të ZOTIT që, ashtu si kam treguar dhembshuri ndaj jush, edhe ju do të tregoni po atë dhembshuri ndaj shtëpisë së atit tim; më jepni, pra, një shenjë të sigurt.

Joz. 9:15 Kështu Jozueu lidhi paqe me ta dhe nënshkroi një besëlidhje në bazë të së cilës ata liheshin të gjallë; dhe krerët e asamblesë u detyruan të betohen për këto gjëra.

Joz. 9:19 Atëherë krerët i thanë tërë asamblesë: «Ne u jemi betuar atyre në emër të ZOTIT, Perëndisë së Izraelit; prandaj nuk mund t'i ngasim.

1 Sam. 24:22 Davidi iu betua Saulit. Pastaj Sauli shkoi në shtëpinë e vet, ndërsa Davidi dhe njerëzit e tij u ngjitën në fortesë.

2 Sam. 3:35 Pastaj tërë populli erdhi për ta ftuar Davidin që të hante, sa ishte ende ditë; por Davidi u betua duke thënë: «Kështu ma bëftë Perëndia, madje më keq, po futa në gojë bukë apo ndonjë gjë tjetër para se të perëndojë dielli».

1 Mbr. 1:28–30 Mbreti David, duke u përgjigjur, tha: «Thirrmeni Bath-Shebën». Ajo hyri te mbreti dhe qëndroi më këmbë para tij. ²⁹Mbreti u betua dhe tha: «Ashtu siç është e vërtetë që rron ZOTI, i cili ka çliruar jetën time nga çdo fatkeqësi, ³⁰unë do të bëj sot pikërisht atë që të jam betuar për ZOTIN, Perëndinë e Izraelit, duke thënë: “Biri yt Salomon ka për të mbretëruar pas meje dhe do të ulet mbi fronin tim në vendin tim”».

Rom. 9:1 Unë them të vërtetën në Krishtin, nuk gënjej dhe ndërgjegjja ime me anë të Frymës së Shenjtë jep dëshmi bashkë me mua.

2 Kor. 1:23 Por unë e thërras Perëndinë për dëshmitar mbi shpirtin tim që, për t’ju kursyer, nuk kam ardhur më në Korint.

Heb. 6:12–13 ...që të mos bëheni të ngathët, por imitues të atyre, që nëpërmjet besimit dhe zemërgjerësisë trashëgojnë premtimet. ¹³Sepse, kur Perëndia i premtoi Abrahamit, duke qenë se s’kishte ndonjë më të madh mbi të cilin të betohej, u betua mbi veten e tij.

Zbu. 10:5–6 Atëherë engjëlli që unë pashë që qëndronte mbi det e mbi dhe, ngriti dorën drejt qiellit, ⁶dhe bëri be për atë që rron në jetë të jetëve, që krijoi qiellin dhe gjërat që janë në të, tokën dhe gjërat që janë në të, detin dhe gjërat që janë në të, se kohë nuk do të ketë më.

Pyetja 102

A mund të betohemi për shenjtoret apo për krijesa të tjera?

Përgjigjja:

Jo, sepse një betim i ligjshëm mund të kërkohej në Perëndinë^a, si i vetmi që njeh zemrën^b, se Ai do të dëshmojë për të vërtetën dhe do të më dënojë, nëse betohem në mënyrë të rreme^c; një nder ky që nuk është për shkak të asnjë krijese^d.

a **Joz. 23:7** Pa u përzier me kombet që mbeten midis jush; nuk do të përmendni as emrin e perëndive të tyre dhe nuk do të betoheni për ta; nuk do t’u shërbeni dhe nuk do të bini përmbys para tyre.

Jer. 5:7 «Si do të mund të të falja për këtë? Bijtë e tu më kanë braktisur dhe betohen për ata që nuk janë perëndi. Unë i kam ngopur, por ata kanë shkelur kurorën dhe mbushin shtëpitë e kurvërimit.»

Jer. 12:16 Dhe ka për të ndodhur që, në rast se mësojnë me kujdes rrugët e popullit tim dhe nëse betohen me emrin tim, duke thënë: “ZOTI rron”, ashtu siç e kanë mësuar popullin tim të betohet për Baalin, do të vendosen mirë e bukur në mes të popullit tim.

Sof. 1:5 Ata të cilët bien përmbys mbi tarraca përpara ushtrisë së qiellit, ata që bien përmbys duke iu betuar ZOTIT, por duke iu betuar edhe Malkamit.

b **Jer. 17:10** Unë, ZOTI, hetoj zemrën, vë në provë veshkat, për t’i dhënë secilit sipas rrugëve të veta, sipas frytit të veprimeve të tij.

1 Mbr. 8:39 Ti dëgjoje nga qielli, nga vendbanimi yt, dhe fal, ndërhy dhe jepi secilit sipas sjelljes së tij, ti që njeh zemrën e secilit (në të vërtetë vetëm ti ua njeh zemrën gjithë bijve të njerëzve).

Psa. 139 Gjithëprania dhe gjithëdija e Perëndisë...

Heb. 4:13 Dhe nuk ka asnjë krijesë që është e padukshme para tij, por gjithçka është lakuriq dhe e zbuluar

para syve të Atij, të cilit ne duhet t'i japim llogari.

- c **2 Kor. 1:23** Por unë e thërras Perëndinë për dëshmitar mbi shpirtin tim që, për t'ju kursyer, nuk kam ardhur më në Korint.

- d **Joz. 7:19** Atëherë Jozueu i tha Akanit: «Biri im, të lutem, mbushe me lavdi ZOTIN, Perëndinë e Izraelit, rrëfeji atij dhe më thuaj atë që ke bërë; mos ma fshih».

Mt. 5:34–37 Por unë po ju them: “Mos u betoni fare, as për qiellin, sepse është froni i Perëndisë, ³⁵as për dheun, sepse është stol i këmbëve të tij, as për Jerusalemin, sepse është qyteti i Mbretit të madh. ³⁶Mos u beto as për kokën tënde, sepse nuk mund të zbardhësh ose të nxish qoftë edhe një fije floku. ³⁷Por fjala juaj të jetë: Po, po; jo, jo; gjithçka më tepër vjen nga i ligu.

Jak. 5:12 Por, para së gjithash, vëllezër të mi, mos u betoni as për qiellin, as për dheun, as mos bëni ndonjë be tjetër; por le të jetë «po»-ja juaj «po» dhe «jo»-ja, «jo», që të mos bini nën dënim.

DITA E ZOTIT, 38

Pyetja 103

Çfarë kërkon Perëndia në urdhërimin e katërt?

Përgjigjja:

Së pari, që të ruhet shërbimi i Ungjillit dhe shkollat e krishtera^a; dhe që unë, sidomos në ditën e shabatit, d.m.th. në ditën e pushimit^b, të frekuentoj me zell kishën e Perëndisë^c, të dëgjoj Fjalën e Tij^d, të përdor sakramentet^e, të thërras Zotin publikisht^f dhe të kontribuoj në ndihmën ndaj të varfërve^g, siç i takon të krishterit. Së dyti, që tërë ditët e jetës sime të pushoj nga veprat e mia të këqija dhe t'i dorëzohem Zotit, që Ai të veprojë tek unë nëpërmjet Frymës së Tij të Shenjtë; dhe kështu të filloj në këtë jetë shabatit e përjetshëm^h.

- a **Tit. 1:5** Për këtë arsye të lashë në Kretë, që ti të rregullosh punët që kanë mbetur pa u bërë dhe që, në çdo qytet, të caktosh pleq, siç të porosita.

1 Tim. 3:14–15 Po t'i shkruaj këto gjëra duke shpresuar që të vij së shpejti te ti, por, ¹⁵po u vonova, të dish se si duhet jetë sjellja në shtëpinë e Perëndisë, që është kisha e Perëndisë së gjallë, shtylla dhe mbështetja e së vërtetës.

1 Kor. 9:11–14 Në qoftë se mbollëm ndër ju gjërat frymërore, a është gjë e madhe nëse korrim të mirat tuaja materiale? ¹²Në qoftë se të tjerë kanë pjesë në këtë të drejtë mbi ju, a nuk do ta kishim ne shumë më tepër? Po ne nuk e përdorëm këtë të drejtë; por durojmë çdo gjë, për të mos i vënë ndonjë pengesë ungjillit të Krishtit.

¹³Nuk e dini ju se ata që kryejnë shërbesën e shenjtë hanë nga gjërat e tempullit, dhe ata që shërbejnë pranë altarit marrin pjesë nga të mirat e altarit? ¹⁴Kështu edhe Zoti urdhëroi që ata, që shpallin ungjillin, nga ungjilli të rrojnë.

2 Tim. 2:2 Dhe ato që dëgjojnë nga unë përpara shumë dëshmitarëve, besojua njerëzve besnikë, që do të jenë të aftë të mësojnë edhe të tjerë.

2 Tim. 3:15 dhe se, që nga fëmijëria i njeh Shkrimet e Shenjta, të cilat mund të të bëjnë të urtë për shpëtimin me anë të besimit në Krishtin Jezus.

- b **Psa. 40:10** Nuk e kam fshehur drejtësinë tënde në zemrën time; kam shpallur besnikërinë tënde dhe shpëtimin tënd; nuk e kam fshehur dashamirësinë tënde, as të vërtetën tënde para kuvendit të madh.

Psa. 68:26 Bekoni Perëndinë në kuvende; bekon ZOTIN ju që jeni nga gurra e Izraelit.

Vep. 2:42 Por ata ishin ngulmues në mësimin e apostujve dhe në bashkësi dhe në thyerjen e bukës dhe në lutje.

- c **1 Tim. 4:13** Kushtoj leximit, nxitjes dhe dhënies së mësimi derisa të vij unë.

1 Kor. 14:29 Le të flasin dy a tre profetë, dhe të tjerët të gjykojnë.

- d **1 Kor. 11:33** Prandaj, o vëllezërit e mi, kur mblidheni për të ngrënë, pritni njeri-tjetrin.

1 Kor. 14:19, 29, 31 Por në kishë dua më mirë të them pesë fjalë me mençurinë time për mësimin e të tjerëve

se dhjetë mijë fjalë në gjuhë tjetër.²⁹Le të flasin dy a tre profetë, dhe të tjerët të gjykojnë.³¹Sepse të gjithë, njëri pas tjetrit, mund të profetizojnë, që të mësojnë të gjithë dhe të inkurajohen të gjithë.

- e **1 Tim. 2:1** Bëj thirrje, pra, para së gjithash, të bëhen përgjërime, lutje, ndërhyrje dhe falënderime për të gjithë njerëzit...

1 Kor. 14:16 Sepse, në qoftë se ti e lavdëron Perëndinë me frymën, ai që zë vendin e të paditurit, si të thotë “amen” për falënderimin tënd, kur nuk merr vesh ç’po thua?

- f **1 Kor. 16:2** Të parën ditë të çdo jave, secili nga ju le të vërë mënjane, dhe të mbledhë aq sa mundet, që, kur të vij, të mos bëhen atëherë mbledhje ndihmash.

- g **Isa. 66:23** Dhe do të ndodhë që nga një hënë e re në tjetrën dhe nga një shabat në tjetrin çdo mish do të vijë të bjerë në gjunjë para meje», thotë ZOTI.

Heb. 4:3, 9–10 Sepse ne që besuam hymë në prehje, siç tha ai: «Kështu u betova në zemërimin tim: Nuk do të hyjnë në prehjen time», ndonëse veprat e tij u bënë që nga themelimi i botës.⁹Mbetet, pra, një prehje shabati për popullin e Perëndisë.¹⁰Sepse kush ka hyrë në prehjen e tij, ka pushuar edhe ai vetë nga veprat e tij, ashtu si Perëndia nga të tijat.

DITA E ZOTIT, 39

Pyetja 104

Çfarë kërkon Perëndia në urdhërimin e pestë?

Përgjigjja:

Që të nderoj, t’i shpreh dashuri, dhe t’i jem besnik babait tim dhe nënës sime dhe çdo njeriu me autoritet mbi mua, dhe t’i nënshtrohem drejtimit dhe ndëshkimit të tyre të mirë, me bindjen e duhur^a; si dhe të kem durim me dobësitë dhe të metat e tyre^b, meqenëse i pëlqen Perëndisë që të na drejtojë me anë të dorës së tyre^c.

- a **Ef. 6:1–3, 5** Fëmijë, bindjuni prindërve tuaj në Zotin, sepse kjo është e drejtë. «²Ndero atin tënd dhe nënën tënde», ky është urdhërimi i parë me premtim, «³që ti të jesh mirë dhe të jetosh gjatë mbi dhe». ⁵Ju, shërbëtorë, bindjuni zotërinjve tuaj sipas mishit me frikë dhe dridhje, në thjeshtësinë e zemrës suaj, porsi Krishtit.

Kol. 3:18–24 Ju gratë, jini të nënshtuara burrave tuaj, ashtu si ka hije në Zotin. ¹⁹Ju burrat, duajini gratë tuaja dhe mos u bëni të hidhur ndaj tyre. ²⁰Ju bij, bindjuni prindërve në çdo gjë, sepse kjo është e pëlqyeshme për Zotin. ²¹Ju etër, mos provokoni për zemërim bijtë tuaj, që të mos i lëshojë zemra. ²²Ju shërbëtorë, bindjuni në çdo gjë zotërinjve tuaj sipas mishit, duke u shërbyer jo përpara syve, si ata që duan t’u pëlqejnë njerëzve, por me thjeshtësinë e zemrës, duke druajtur Perëndinë. ²³Dhe çdo gjë që të bëni, bëjeni prej shpirtit, si për Zotin dhe jo për njerëzit, ²⁴duke ditur se nga Zoti do të merrni shpërblimin e trashëgimisë, sepse ju i shërbeni Zotit Krisht.

Ef. 5:22 Ju, gra, nënshtrojuuni burrave tuaj porsi Zotit.

Lev. 19:3 Secili prej jush të respektojë nënën dhe atin e tij, po kështu të respektojë shabatet e mia. Unë jam ZOTI, Perëndia juaj.

Fja. 1:8 Dëgjo, o biri im, mësimin e atit tënd dhe mos e lër pas dore udhëzimin e nënës sate.

Fja. 4:1 Dëgjoni, o bij, mësimet e një ati dhe tregoni kujdes që të mësoni mençurinë.

Fja. 15:20 Biri i urtë gëzon të atin, por njeriu budalla përçmon të ëmën.

Fja. 20:20 Atij që mallkon të atin dhe të ëmën llamba do t’i shuhet në terrin më të madh.

Eks. 21:17 Kush mallkon të atin ose të ëmën, do të dënohet me vdekje.

Rom. 13:1 Çdo njeri le t’i nënshtrohet pushteteve të sipërme, sepse nuk ka pushtet veçse prej Perëndisë; dhe pushtetet që janë, janë caktuar nga Perëndia.

1 Tim. 2:1–3 Bëj thirrje, pra, para së gjithash, të bëhen përgjërime, lutje, ndërhyrje dhe falënderime për të gjithë njerëzit, ²për mbretërit e për të gjithë ata që janë në pozitë të lartë, që të mund të shkojmë një jetë të qetë dhe të paqetë në çdo perëndishmëri dhe nder. ³Sepse kjo është e mirë dhe e pëlqyer përpara Perëndisë, shpëtimtarit tonë.

- b **Fja. 23:22** Dëgjo atin tënd që të bëri dhe mos e përçmo nënën tënde kur të jetë plakë.

Zan. 9:24–26 Kur Noeu u zgjua nga dehja e tij, mësoi atë që i kishte bërë i biri më i vogël dhe tha: «²⁵I mallkuar qoftë Kanaani! Ai qoftë shërbyesi i shërbëtorëve të vëllezërve të vet!» ²⁶Pastaj tha: «I bekuar qoftë ZOTI, Perëndia i Semit, dhe Kanaani të jetë shërbëtori i tij.

1 Pj. 2:18 Ju, shërbëtorë, nënshtrojeni në çdo druajtje zotërinjve tuaj, jo vetëm të mirëve dhe të butëve, por edhe tekanjozëve.

- c **Ef. 6:4** Dhe ju, etër, mos provokoni për zemërim fëmijët tuaj, por i rrisni në disiplinë dhe në këshillë të Zotit. **Kol. 3:20** Ju bij, bindjuni prindërve në çdo gjë, sepse kjo është e pëlqyeshme për Zotin.

Rom. 13:2–7 Prandaj ai që i kundërvihet pushtetit, i kundërvihet urdhrat të Perëndisë; dhe ata që i kundërvihen do të marrin dënim mbi veten e tyre. ³Sepse eprorët s'ke pse t'i kesh frikë për vepra të mira, por për të këqijat; a do, pra, të mos i kesh frikë pushtetit? Bëj të mirën dhe do të kesh lavdërim nga ai, ⁴sepse është shërbenjës i Perëndisë për të mirën tënde; por, po të bësh të keqen, druaj, sepse nuk e mban kot shpatën; sepse ai është shërbenjës i Perëndisë, hakmarrës për të ushtruar zemërim kundër atij që bën të keqen. ⁵Prandaj është e nevojshme t'i nënshtroheni, jo vetëm për shkak të zemërimit, por edhe për shkak të ndërgjegjes. ⁶Sepse prandaj paguani edhe tatimet, sepse ata janë shërbëtorë të Perëndisë, që i kushtohen vazhdimisht këtij shërbimi. ⁷Jepuni pra të gjithëve detyrimet: tatimin atij që i takon tatimi, doganën atij që i takon dogana, frikën atij që i takon frika dhe nderimin atij që i takon nderimi.

Mt. 22:21 Ata i thanë: «E Cezarit». Atëherë ai u tha atyre: «Jepini, pra, Cezarit atë që i përket Cezarit dhe Perëndisë atë që i përket Perëndisë».

DITA E ZOTIT, 40

Pyetja 105

Çfarë kërkon Perëndia në urdhërimin e gjashtë?

Përgjigjja:

Që as në mendime, as në fjalë, as në gjeste, aq më pak në vepra, të mos çnderoj, urrej, dëmtoj apo vras të afërmin tim, vetë apo nëpërmjet një tjetri^a; por të lë mënjane çdo dëshirë hakmarrjeje^b; si dhe të mos e dëmtoj veten time apo ta vë veten në rrezik qëllimisht^c. Prandaj edhe qeveritari është i armatosur me armë që ta ndalojë vrasjen^d.

- a **Mt. 5:21–22** Ju keni dëgjuar se u qe thënë të moçmëve: “Mos vrit” dhe: “Por ai që vret do t'i nënshtrohet gjyqit”; ²²por unë po ju them: “Kushdo që zemërohet pa shkak kundër vëllait të vet, do të jetë fajtor për në gjyq; dhe kush i thotë vëllait të vet: “Rraka”, do të jetë fajtor për në sinedër; dhe kush do t'i thotë: “Budalla”, do të jetë fajtor për në zjarrin e ferrit.

Mt. 26:52 Atëherë Jezusi i tha: «Ktheje shpatën tënde në vendin e vet, sepse të gjithë ata që rrokin shpatën, prej shpate do të humbasin. Atëherë Jezusi i tha: «Ktheje shpatën tënde në vendin e vet, sepse të gjithë ata që rrokin shpatën, prej shpate do të humbasin.

Zan. 9:6 Cilido që derdh gjakun e një njeriu, gjaku i tij do të derdhet nga një njeri, sepse Perëndia e ka krijuar njeriun sipas shëmbëlltyrës së vet.

- b **Ef. 4:26** Zemërohuni dhe mos mëkatoni; dielli të mos perëndojë mbi zemërimin tuaj.

Rom. 12:19 Mos u hakmerrni për veten tuaj, o të dashur, por i jepni vend zemërimit të Perëndisë, sepse është shkruar: «Mua më përket hakmarrja, unë do të shpaguaj, thotë Zoti».

Mt. 5:25 Trego shpejt mirëdashje ndaj kundërshtarit tënd sa je në një rrugë me të, që kundërshtari yt të mos të të dorëzojë te gjykatësi dhe gjykatësi të të dorëzojë te rojtari dhe të futesh në burg.

Mt. 18:35 «Kështu do të veprojë me ju edhe Ati im qiellor, në qoftë se nuk ia falni nga zemra, gjithsecili vëllait të vet, shkeljet e tij».

- c **Rom. 13:14** Por vishni Zotin Jezu Krisht dhe mos u kujdesni për mishin, që t'i plotësoni epshet.

Kol. 2:23 Këto kanë një dukje urtësie në fetarizëm të zgjedhur vetë, në përlulësinë e rreme dhe në moskursimin e trupit, por nuk kanë ndonjë vlerë dhe janë vetëm për kënaqësinë e mishit.

Mt. 4:7 Jezusi i tha: «Është shkruar gjithashtu: “Mos e tundo Zotin, Perëndinë tënd”».

Vep. 27:21 Edhe, mbasi mbetëm shumë kohë pa ushqim, Pali qëndroi në mes të tyre dhe tha: «O burra, po të më kishit dëgjuar dhe të mos ishit nisur nga Kreta, do t'i ishim shmangur kësaj së keqeje dhe këtij dëmi.»

d **Zan. 9:6** *Shih a.*

Eks. 21:14 Në qoftë se ndokush vepron me paramendim kundër të afërmit të tij për ta vvarë me mashtrim, ti do ta shëputësh edhe nga altari im, për të siguruar vdekjen e tij.

Mt. 26:52 *Shih a.*

Rom. 13:4 Sepse është shërbenjësi i Perëndisë për të mirën tënde; por, po të bësh të keqen, druaj, sepse nuk e mban kot shpatën; sepse ai është shërbenjësi i Perëndisë, hakmarrës për të ushtruar zemërim kundër atij që bën të keqen.

Pyetja 106

Por, duket sikur ky urdhërim flet vetëm për vrasjen?

Përgjigjja:

Duke ndaluar vrasjen, Perëndia na mëson se Ai i urren të gjitha shkaqet e saj, siç janë zilia^a, urrejtja^b, inati dhe dëshira për hakmarrje^c; dhe që të gjitha këto i llogarit për vrasje^d.

a **Fja. 14:30** Një zemër e shëndoshë është jetë për trupin, por smira është kalbja e kockave.

Rom. 1:29 Duke qenë të mbushur me çdo padrejtësi, kurvërim, ligësi, lakmi, mbrapshti; plot smirë, vrasje, grindje, mashtrim, poshtërsi;

Gal. 5:21 Smira, vrasjet, të dehurit, grykësia dhe të tjera të ngjashme me to, për të cilat po ju paralajmëroj, sikurse ju thashë edhe më parë, se ata që i bëjnë këto gjëra nuk do të trashëgojnë mbretërinë e Perëndisë.

b **1 Gjo. 2:9–11** Ai, që thotë se është në dritë dhe urren vëllanë e tij, është në errësirë gjer tani. ¹⁰Ai, që e do vëllanë e tij rri në dritë edhe nuk ka asgjë në të që e bën të bjerë. ¹¹Por ai, që urren vëllanë e tij, është në errësirë, ecën në errësirë dhe nuk di ku shkon, sepse errësira ia ka verbuar sytë.

c **Zan. 4:5–7** ...por nuk e çmoi Kainin dhe ofertën e tij. Dhe kështu Kaini u pezmatua shumë dhe fytyra e tij mori një pamje të dëshpëruar. ⁶Atëherë ZOTI i tha Kainit: «Përse je pezmatuar dhe përse fytyra jote është dëshpëruar? ⁷Në rast se bën mirë a nuk do të pranohesh? Por në qoftë se nuk bën mirë, mëkati po të ruan te porta dhe dëshirat e tij drejtohen ndaj teje; por ti duhet ta sundosh».

Mt. 5:22 Por unë po ju them: “Kushdo që zemërohet pa shkak kundër vëllait të vet, do të jetë fajtor për në gjyq; dhe kush i thotë vëllait të vet: “Raka”, do të jetë fajtor për në sinedër; dhe kush do t'i thotë: “Budalla”, do të jetë fajtor për në zjarrin e ferrit.

Gal. 5:19–21 Por veprat e mishit janë të shfaqura dhe janë: kurorëshkelja, kurvëria, papastërtia, shthurja, ²⁰idhujtaria, magjia, armiqësia, grindja, xhelozia, zemërimi, rivaliteti, përçarjet, tarafet, ²¹smira, vrasjet, të dehurit, grykësia dhe të tjera të ngjashme me to, për të cilat po ju paralajmëroj, sikurse ju thashë edhe më parë, se ata që i bëjnë këto gjëra nuk do të trashëgojnë mbretërinë e Perëndisë.

Jak. 1:20 Sepse zemërimi i njeriut nuk kryen drejtësinë e Perëndisë.

Mt. 5:38–39, 44 Ju keni dëgjuar se qe thënë: “Sy për sy dhe dhëmb për dhëmb”. ³⁹Por unë po ju them: Mos i rezisto të ligut; madje, në qoftë se dikush të qëllon mbi faqen e djathtë, ktheja dhe tjetrën... ⁴⁴Por unë po ju them: “Duajini armiq të tuaj, bekojini ata që ju mallkojnë, u bëni të mirë atyre që ju urrejnë dhe lutuni për ata që ju keqtrajtojnë dhe ju përndjekin.

Rom. 12:17, 19 Mos ia ktheni kurrkujt të keqen me të keqe, kujdesuni të bëni të mira përpara të gjithë njerëzve... ¹⁹Mos u hakmerrni për veten tuaj, o të dashur, por i jepni vend zemërimit të Perëndisë, sepse është shkruar: «Mua më përket hakmarrja, unë do të shpagoaj, thotë Zoti».

1 Pj. 3:8–9 Dhe më në fund jini të gjithë të një mendjeje, të dhembshur, plot dashuri vëllazërore, të përdëlyeshëm dhe dashamirës, ⁹pa e kthyer të keqen me të keqe ose fyerjen me fyerje, po, përkundrazi, bekon, duke e ditur se për këtë u thirrët, që të trashëgoni bekimin.

d **1 Gjo. 3:15** Kushdo, që urren vëllanë e tij, është njerivrasës; dhe ju e dini se asnjë njerivrasës nuk ka jetë të përjetshme të qëndrueshme në vetë.

Pyetja 107

Po, a nuk mjafton që nuk vrasim asnjë njeri në mënyrën e lartpërmendur?

Përgjigjja:

Jo, sepse i njëjti Perëndia që ndalon zilinë, urrejtjen dhe inatin, është i njëjti që na urdhëron ta duam të afërmin tonë porsì veten^a, të tregojmë ndaj tij durim, paqe, butësi^b, mëshirë^c dhe çdo mirësi^d dhe t'i ndalojmë dëmet aq sa mundemi^e: dhe t'u bëjmë mirë madje edhe armiqve tanë^f.

- a **Mt. 22:39** Dhe i dyti, i ngjashëm me këtë, është: “Duaje të afërmin tënd porsì vetveten”.
- Mt. 7:12** Gjithçka, pra, që ju doni t’ju bëjnë njerëzit, kështu ua bëni edhe ju atyre, sepse ky është ligji dhe profetët.
- Rom. 12:10** Duajeni njëri-tjetrin me dashuri vëllazërore; në nderim t’ia kaloni njëri-tjetrit.
- b **Mt. 5:5** Lum ata që janë zemërbutë, sepse ata do ta trashëgojnë tokën.
- Lu. 6:36** Jini të mëshirshëm, pra, sikurse edhe Ati juaj është i mëshirshëm.
- Rom. 12:18** Po të jetë e mundur dhe aq sa varet prej jush, jetoni në paqe me të gjithë njerëzit.
- Gal. 6:1–2** Vëllazër, në qoftë se dikush bie në ndonjë faj, ju që jeni frymërorë, ndërtojeni të tillë në frymën e zemërbutësisë; duke u kujdesur për veten tënde, që të mos tundohesh edhe ti. ²Mbani barrët e njëri-tjetrit dhe kështu përbushni ligjin e Krishtit.
- Ef. 4:1–3** Unë, pra, i burgosuri për Zotin, ju bëj thirrje që të ecni denjësisht ndaj thirrjes që u thirrët, ²me gjithë përlulësinë e zemërbutësinë, me zemërgjerësi, ³duke e duruar njëri-tjetrin në dashuri, duke u përpjekur të ruani unitetin e Frymës në lidhjen e paqes.
- 1 Pj. 3:8** Dhe më në fund jini të gjithë të një mendjeje, të dhembshur, plot dashuri vëllazërore, të përdëlllyeshëm dhe dashamirës.
- Kol. 3:12** Vishni, pra, si të zgjedhur të Perëndisë, shenjtore dhe të dashur: përdëllim dhembshurie, mirësi, përlulësi, zemërbutësi, zemërgjerësi.
- c **Mt. 5:7** Lum ata që janë të mëshirshëm, sepse ata do të gjejnë mëshirë.
- Eks. 23:5** Në rast se sheh gomarin e atij që të urren, të shtrirë për tokë nën barrë, ruhu se e braktis, por ndihmo të zotin ta zgjidhë.
- d **Mt. 5:44–45** Por unë po ju them: “Duajini armiq të tuaj, bekojini ata që ju mallkojnë, u bëni të mirë atyre që ju urrejnë dhe lutuni për ata që ju keqtrajtojnë dhe ju përndjekin, ⁴⁵që të bëheni bij të Atit tuaj që është në qiej, sepse ai bën të lindë diellin e tij mbi të këqijtë dhe mbi të mirët dhe bën të bjerë shi mbi të drejtët dhe të padrejtët.
- Rom. 12:10** Duajeni njëri-tjetrin me dashuri vëllazërore; në nderim t’ia kaloni njëri-tjetrit.
- e **Eks. 23:5** *Shih c.*
- LiP. 22:4** Në qoftë se ti shikon gomarin e vëllait tënd apo kaun e tij të rrëzuar gjatë rrugës, ti nuk do të bësh sikur nuk i ke parë, por do të ndihmosh tët vëlla për t’i ngritur.
- f **Fja. 25:21–22** Nëse armiku yt ka uri, jepi bukë për të ngrënë dhe nëse ka etje, jepi ujë për të pirë, ²²sepse kështu do të grumbullosh thëngjij mbi kokën e tij dhe ZOTI do të të shpërblejë.
- Rom. 5:8** Por Perëndia e tregon dashurinë e tij ndaj nesh në atë që, kur ende ishim mëkatarë, Krishti vdiq për ne.
- Rom. 12:20** «Nëse armiku yt, pra, ka uri, jepi të hajë; në pastë etje, jepi të pijë; sepse, duke bërë këtë, do të grumbullosh mbi krye të tij thëngjij të ndezur».

DITA E ZOTIT, 41

Pyetja 108

Çfarë na mëson urdhërimi i shtatë?

Përgjigjja:

Që çdo papastërti është e mallkuar nga Perëndia^a, kështu që edhe ne duhet ta urrejmë atë me

gjithë zemër^b, dhe të jetojmë të dëlirë dhe me pastërti^c, qoftë në martesën e shenjtë, qoftë si beqar^d.

- a **Lev. 18:28** Që edhe ju, po të jetë se e ndotni, vendi të mos ju vjellë ashtu si ka vjellë kombin që ishte para jush.
- b **Jud. 1:22** Por shpëtojini të tjerët me frikë, duke ia rrëmbyer zjarrit, duke urryer edhe rrobën e ndotur nga mishi.
- c **1 The. 4:3–5** Sepse ky është vullneti i Perëndisë: shenjtërimi juaj; të hiqni dorë nga kurvëria; ⁴që secili prej jush të dijë ta mbajë enën e vet në shenjtëri dhe me nder, ⁵jo me pasione epshi, si edhe paganët që nuk e njohin Perëndinë.
- d **Heb. 13:4** Martesa të nderohet nga të gjithë dhe shtrati martesor të jetë i papërlyer, sepse Perëndia do të gjykojë kurvarët dhe kurorëshkelësit.
1 Kor. 7:7 Sepse do të doja që të gjithë njerëzit të ishin si unë; por secili ka dhuntinë e vet nga Perëndia, njëri kështu dhe tjetri ashtu.

Pyetja 109

A ndalon Perëndia në këtë urdhërim vetëm kurorëshkeljen dhe të tilla mëkate flagrante?

Përgjigjja:

Meqenëse edhe trupi, edhe shpirti ynë janë tempuj të Frymës së Shenjtë, Ai na urdhëron t'i ruajmë ato të pastra dhe të shenjta; prandaj Ai i ndalon të gjitha veprimet, gjestet, fjalët^a, mendimet dhe dëshirat jo të dëlira^b, si dhe çdo gjë që mund t'i joshë njerëzit drejt këtyre^c.

- a **Ef. 5:3–4** Por, kurvëria dhe çdo papastërti ose lakmi, as të mos përmendet ndër ju, ashtu si u ka hije shenjtorëve; ⁴as pandersshmëria, as të folurit pa mend e fjalë për të përqeshur, të cilat nuk kanë hije, por më tepër falënderim.
- 1 Kor. 6:18–19** Arratisjuni kurvërisë! Çdo mëkat që kryen njeriu është jashtë trupit, po ai që kurvëron mëkaton kundër trupit të vet. ¹⁹A nuk e dini se trupi juaj është tempulli i Frymës së Shenjtë që është në ju, të cilin e keni nga Perëndia, dhe se nuk i përkitni vetvetes?
- b **Mt. 5:27–28** Keni dëgjuar se të moçmëve u qe thënë: “Mos shkel kurorën”. ²⁸Por unë po ju them se kushdo që shikon një grua për ta dëshiruar, ka shkelur kurorën me të në zemrën e vet.
- c **Ef. 5:18** Dhe mos u dehini me verë, në të cilën ka shturje, por mbushuni me Frymën.
1 Kor. 15:33 Mos u gënjëni; shoqëritë e këqija prishin zakonet e mira.

DITA E ZOTIT, 42

Pyetja 110

Çfarë ndalon Perëndia në urdhërimin e tetë?

Përgjigjja:

Perëndia ndalon jo vetëm ato vjedhje^a dhe hajdutëri^b, të cilat janë të dënueshme nga qeveria; por, nën emrin e vjedhjes, Ai përfshin të gjitha hilet dhe marifetet e liga, me anë të të cilave synojmë të përvetësojmë mallrat që i takojnë të afërmit tonë^c, qoftë kjo me dhunë, qoftë kjo në dukje si e drejtë, siç bëhet me peshat dhe masat e padrejta, mallrat mashtroese^d, monedhat false, kamatën^e, ose me anë të çdo rruge tjetër që ndalohet nga Perëndia; si dhe çdo lakmë^f, çdo shpërdorim dhe harxhim kot të dhuratave të Tij^g.

- a **1 Kor. 6:10** As vjedhësit, as lakmuesit, as pijanecët, as shpifësit, as rrëmbyesit nuk do të trashëgojnë mbretërinë e Perëndisë.
- b **1 Kor. 5:10** Dhe aspak me kurvarët e kësaj bote, ose me lakmuesit ose me rrëmbyesit, ose me idhujtarët, sepse atëherë duhet të dilnit nga bota.
Isa. 33:1 Mjerë ti që shkreteton edhe sikur të mos kesh qenë i shkretuar, që vepron me pabesi edhe sikur të mos jetë vepruar me pabesi kundër teje! Kur të kesh mbaruar së shkatërruari, do të shkatërrohesh; kur të kesh mbaruar së vepruari pabesisht, do të veprohet me pabesi kundër teje.
- c **Lu. 3:14** Por edhe ushtarët e pyetën duke thënë: «Dhe ne, ç'duhet të bëjmë?». Dhe ai u tha atyre: «Mos i bëni shantazh asnjëri, mos i bëni akuza të rreme kurrkujt dhe jini të kënaqur me pagën tuaj!».
1 The. 4:6 Dhe që askush të mos kapërcejë edhe t'i bëjë keq me lakmi në këtë punë vëllait të vet, sepse Zoti është hakmarrës për të gjitha këto, sikurse ju thamë dhe dëshmuam edhe më parë.
- d **Fja. 11:1** Peshorja e pasaktë është neveri për ZOTIN, por peshimi i saktë i pëlqen.
Fja. 16:11 Kandari dhe peshoret e sakta janë të ZOTI, të gjitha gurët e peshës janë vepër e tij.
Eze. 45:9–10 Kështu thotë Zoti, ZOTI: «Mjaft më, o princa të Izraelit! Lini mënjatë dhunën dhe grabitjet, zbatoni ndershmërinë dhe drejtësinë, hiqni dorë nga të zhveshurit e popullit tim», thotë Zoti, ZOTI. «¹⁰Kini peshore të sakta, efa të saktë dhe bato të saktë.»
LiP. 25:13 Nuk do të kesh në thesin tënd dy pesha, një të madhe dhe një të vogël.
- e **Psa. 15:5** Ai që nuk i jep paratë e tij me kamatë dhe nuk pranon dhurata kundër të pafajshmit. Ai që bën këto gjëra, nuk do të hiqet kurrë.
Lu. 6:35 Por ju t'i doni armiqitë tuaj, bëni të mirë dhe jepni hua pa pasur shpresë për asgjë, dhe shpërblimi juaj do të jetë i madh dhe ju do të jeni bijtë e Më të Lartit, sepse ai është dashamirës me mosmirënjohësit dhe të ligjtë.
- f **1 Kor. 6:10** As vjedhësit, as lakmuesit, as pijanecët, as shpifësit, as rrëmbyesit nuk do të trashëgojnë mbretërinë e Perëndisë.
- g **Fja. 23:20–21** Mos rri me ata që pijnë verë, as me grykësit dhe mishngrënësit; ²¹sepse pijaneci dhe grykësi do të varfërohen dhe gjumashi do të vishet me rrecka.
Fja. 21:20 Në shtëpinë e të urtit ka një thesar të çmuar dhe vaj, por njeriu budalla i bën të gjitha rrush e kumbulla.

Pyetja 111

Por, çfarë kërkon Perëndia në këtë urdhërim?

Përgjigjja:

Që unë të ndihmoj në përparimin e të afërmit tim në çdo rast që mundem, apo lejohej, dhe të merrem me të siç dëshiroj të trajtohem dhe unë nga të tjerët^a; edhe më tej, që të punoj besnikërisht, me qëllim që të jem në gjendje t'i ndihmoj nevojtarët^b.

- a **Mt. 7:12** Gjithçka, pra, që ju doni t'ju bëjnë njerëzit, kështu ua bëni edhe ju atyre, sepse ky është ligji dhe profetët.
b **Ef. 4:28** Ai që vidhte, le të mos vjedhë më, por më tepër të mundohet duke bërë të mirën me duart e veta, që të ketë t'i japë diçka atij që ka nevojë.

DITA E ZOTIT, 43

Pyetja 112

Çfarë kërkohet në urdhërimin e nëntë?

Përgjigjja:

Që unë të mos bëj dëshmi të rreme kundër asnjë njeriu^a; as të mos i shtrembëroj fjalët e të tjerëve^b; që të mos bëhem thashethemexhi, as shpifës^c; që të mos gjykoj apo bashkohem në

dënimin e ndonjë njeriu, pa u menduar apo pa iu dhënë atij mundësia të dëgjohet^d; por t'i shmangem çdo gjë gjënjeshtrë dhe mashtrimi, si vepra të mirëfillta të djallit^e, nëse nuk dua të sjell mbi veten time zemërimin e fuqishëm të Perëndisë^f; po ashtu, që në gjykim dhe çdo ndërmarrjeje tjetër, ta dua të vërtetën, ta them atë drejt^g dhe ta rrëfej; si dhe të mbroj dhe ta nxis përpara me sa mundem nderin dhe karakterin e mirë të të afërmit tim^h.

- a **Fja. 19:5, 9** Dëshmitari i rremë nuk do të mbetet pa u ndëshkuar dhe ai që thotë gjënjeshtra nuk do të ketë shpëtim. ⁹Dëshmitari i rremë nuk do të mbetet pa u ndëshkuar dhe ai që thotë gjënjeshtra do të humbasë.
Fja. 21:28 Dëshmitari i rremë do të vdesë, por njeriu që dëgjon, do të mund të flasë gjithnjë.
- b **Psa. 15:3** Që nuk shpif me gjuhën e vet, që nuk i bën asnjë të keqe shokut të tij dhe nuk fyen të afërmin e tij.
Psa. 50:19–20 Ti gojën ia lë së keqes dhe gjuha jote kurdis mashtrime. ²⁰Ti ulyesh, flet kundër vëllait tënd dhe shpif kundër birit të nënës sate.
- c **Rom. 1:30** Thashethemexhinj, shpifës, armiq të Perëndisë, fyesh, mendjemëdhenj, mburraveçë, trillues ligësish, të pabindur ndaj prindërve.
- d **Mt. 7:1** «Mos gjykoni, që të mos gjykoheni.»
Lu. 6:37 Mos gjykoni dhe nuk do të gjykoheni; mos dënoni dhe nuk do të dënoheni; falni dhe do të jeni të falur.
- e **Gjo. 8:44** Ju jeni nga djalli, që është ati juaj, dhe doni të bëni dëshirat e atit tuaj; ai ishte vrasës që nga fillimi dhe nuk qëndroi në të vërtetën, sepse në të nuk ka të vërtetë. Kur thotë gjënjeshtrën, flet nga vetvetja, sepse është gjënjeshtrë dhe ati i saj.
- f **Fja. 12:22** Buzët gjënjeshtrare janë neveri për ZOTIN, por ata që veprojnë me çiltërsi i pëlqejnë atij.
Fja. 13:5 I drejti e urren gjënjeshtrën, por i pabesi është i neveritshëm dhe do të turpërohet.
- g **1 Kor. 13:6** Nuk gëzohet për padrejtësinë, por gëzohet me të vërtetën.
Ef. 4:25 Prandaj, duke e lënë mënjënë gjënjeshtrën, secili të flasë të vërtetën me të afërmin e tij, sepse jemi gjymtyrë të njëri-tjetrit.
- h **1 Pj. 4:8** Dhe të keni, para së gjithash, një dashuri të fortë për njëri-tjetrin, sepse «dashuria do të mbulojë një shumicë mëkatesh».

DITA E ZOTIT, 44

Pyetja 113

Çfarë na kërkon urdhërimi i dhjetë?

Përgjigjja:

Që as edhe prirja më e vogël e mendimit kundër ndonjërit prej urdhërimeve të Perëndisë, të mos ngrihet në zemrat tona; por që, në çdo kohë, ne ta urrejmë mëkatën me gjithë zemër dhe të gëzohemi në çdo drejtësi^a.

- a **Rom. 7:7** Çfarë të themi, pra? Se ligji është mëkat? Kurrë mos qoftë! Mëkatën nuk do ta kisha njohur, veçse me anë të ligjit; sepse nuk do ta kisha njohur epshin, po të mos thoshte ligji: «Mos ki epsh!»

Pyetja 114

Por, a mundet që ata të cilët kthehen tek Perëndia, t'i mbajnë përsosmërisht këto urdhërime?

Përgjigjja:

Jo; edhe njerëzit më të shenjtë, ndërsa janë në këtë jetë, kanë vetëm një fillësë të vogël të kësaj bindjeje^a; megjithatë, me një vendim të sinqertë, fillojnë të jetojnë jo vetëm sipas disa, por sipas

të gjitha urdhërimeve të Perëndisë^b.

- a **1 Gjo. 1:8** Po të themi se nuk kemi mëkat, gënjejmë vetveten dhe e vërteta nuk është në ne.
Rom. 7:14–15 Sepse ne e dimë se ligji është frymëror, por unë jam mishëror, i shitur nën mëkatin. ¹⁵Sepse unë nuk kuptoj atë që bëj, sepse nuk bëj atë që dua, por bëj atë që urrej.
Pre. 7:20 Nuk ka në fakt asnjë njeri të drejtë mbi tokë që bën të mirën dhe të mos mëkatojë.
1 Kor. 13:9 Sepse ne njohim pjesërisht dhe profetizojmë pjesërisht.
- b **Rom. 7:22** Sepse unë gjej kënaqësi në ligjin e Perëndisë sipas njeriut të brendshëm.
Psa. 1:1–2 Lum njeriu që nuk ecën sipas këshillës së të pabesëve, që nuk ndalet në rrugën e mëkatarëve dhe nuk ulet bashkë me tallësit, ²por gjen kënaqësinë e tij në ligjin e ZOTIT dhe mendon thellë ditë e natë mbi ligjin e tij.

Pyetja 115

Po pse, atëherë, Perëndia do që dhjetë urdhërimet të predikohen kaq rreptësisht, duke parë që asnjë njeri në këtë jetë s'mund t'i mbajë ato?

Përgjigjja:

Së pari, që gjatë tërë jetës sonë të mësojmë gjithnjë e më shumë ta njohim natyrën tonë mëkatore^a, dhe kështu të bëhemi më të zellshëm për të kërkuar faljen e mëkatit dhe drejtësinë në Krishtin^b; gjithashtu, që të përpiqemi vazhdimisht dhe t'i lutemi Perëndisë për hirin e Frymës së Shenjtë, që t'i përshtatemi gjithnjë e më shumë shëmbëllimit të Perëndisë, deri sa të arrijmë në përsosmërinë që na propozohet në një jetë të ardhshme^c.

- a **Rom. 3:20** Sepse asnjë mish nuk do të shfajësohet para tij përmes veprave të ligjit; sepse me anë të ligjit vjen njohja e mëkatit.
1 Gjo. 1:9 Po t'i rrëfejmë mëkatet tona, ai është besnik dhe i drejtë që të na falë mëkatet dhe të na pastrojë nga çdo paudhësi.
Psa. 32:5 Para teje pranova mëkatin tim, nuk e fsheha paudhësinë time. Thashë: «Do t'ia rrëfej shkeljet e mia ZOTIT», dhe ti e ke falur paudhësinë e mëkatit tim.
- b **Mt. 5:6** Lum ata që janë të uritur dhe të etur për drejtësi, sepse ata do të ngopen.
Rom. 7:24–25 Oh, i mjeri njeri që jam! Kush do të më çlirojë nga ky trup i vdekjes? ²⁵I falem nderit Perëndisë, me anë të Jezu Krishtit, Zotit tonë. Unë vetë, pra, me mendjen i shërbej ligjit të Perëndisë, por, me mishin ligjit të mëkatit.
- c **1 Kor. 9:24** A nuk e dini se ata që vrapojnë në stadium, vërtet vrapojnë të gjithë, por vetëm një e merr çmimin? Vraponi në mënyrë që ta merrni.
Fil. 3:12–14 Jo se unë tashmë e fitova çmimin ose jam bërë i përsosur, por po e ndjek prapa se mos e kap, sepse edhe unë u kapa nga Jezu Krishti. ¹³Vëllezër, unë, nuk e llogaris veten time se e kam kapur, por një gjë po bëj: duke harruar ato që kam lënë pas, dhe duke u zgjatur drejt atyre që kam përpara, ¹⁴po ndjek pas synimin, drejt çmimit të thirrjes së lartme të Perëndisë në Krishtin Jezus.

LUTJA

DITA E ZOTIT, 45

Pyetja 116

Pse është e nevojshme lutja për të krishterët?

Përgjigjja:

Sepse është ajo pjesë kryesore e mirënjohjes, të cilën na e kërkon Perëndia^a; si dhe sepse Perëndia do t'u japë hirin e Tij dhe Frymën e Shenjtë vetëm atyre që ia kërkojnë Atij vazhdimisht me dëshira të sinqerta dhe janë mirënjohës për to^b.

- a **Psa. 50:14** Dhuroji Perëndisë flijime lavdërimi dhe plotëso zotimet e tua që i ke bërë Shumë të Lartit.
- b **Mt. 7:7** Lypni dhe do t'ju jepet; kërkonti dhe do të gjeni; trokitni dhe do t'ju hapet.
- Lu. 11:9–13** Dhe unë po ju them: Lypni dhe do t'ju jepet; kërkonti dhe do të gjeni; trokitni dhe do t'ju hapet.
- ¹⁰Sepse kushdo që lyp, merr, kushdo që kërkon, gjen dhe do t'i hapet atij që troket. ¹¹Dhe cili nga ju është baba i tillë që, po t'i lypë bukë djali, t'i japë një gur? ¹²Ose po t'i lypë një peshk, në vend të peshkut t'i japë një gjarpër? Ose, po t'i lypë një vezë, i jep një akrep? ¹³Nëse ju, pra, që jeni të ligj, dini t'u jepni dhurata të mira bijve tuaj, aq më tepër Ati në qiell do t'u japë Frymën e Shenjtë atyre që ia lypin».
- 1 The. 5:17** Lutuni pa pushim.

Pyetja 117

Cilat janë kushtet e nevojshme që lutja të jetë e pranueshme për Perëndinë dhe që Ai ta dëgjojë?

Përgjigjja:

Së pari, që ne nga zemra^a t'i lutemi vetëm Perëndisë së vetëm dhe të vërtetë, i Cili e ka zbuluar Vetën në Fjalën e Tij^b, për të gjitha gjërat që Ai na ka urdhëruar t'i kërkojmë^c; së dyti, që ne të njohim drejt dhe krejt nevojën dhe mjerimin tonë^d, në mënyrë që të përulemi thellë në praninë e madhësisë së Tij hyjnore^e; së treti, që ne të bindemi plotësisht, që Ai me siguri do ta dëgjojë lutjen tonë^f, siç ka premtuar në Fjalën e Tij^g, për hir të Krishtit, Zotit tonë, pavarësisht se ne jemi të padenjë për të^h.

- a **Gjo. 4:24** «Perëndia është Frymë, dhe ata që e adhurojnë, duhet ta adhurojnë në frymë dhe në të vërtetën».
- Psa. 145:18** ZOTI është pranë gjithë atyre që e thërrasin, pranë gjithë atyre që e thërrasin në të vërtetë.
- b **Zbu. 19:10** Edhe rashë përmbys përpara këmbëve të tij për ta adhuruar, dhe ai më tha: «Shiko se mos e bën, jam bashkëshërbëtori yt si dhe i vëllezërve të tu që kanë dëshminë e Jezusit. Perëndinë adhuro! Sepse dëshmia e Jezusit është frymë e profecisë».
- Gjo. 4:22–24** Ju adhuronit atë që s'e njihni; ne adhurojmë atë që njohim; sepse shpëtimi vjen nga judenjtë.
- ²³Por vjen ora, madje ajo ka ardhur, që adhuresit e vërtetë do ta adhurojnë Atin në frymë dhe në të vërtetën, sepse Ati kërkon të tillë si adhures të tij. ²⁴Perëndia është Frymë, dhe ata që e adhurojnë, duhet ta adhurojnë në frymë dhe në të vërtetën».
- c **Rom. 8:26** Po ashtu, edhe Fryma na ndihmon në dobësitë tona, sepse ne nuk dimë çfarë të kërkojmë në lutjet tona, sikurse duhet; por vetë Fryma ndërhyr për ne me psherëtimë të patregueshme.
- 1 Gjo. 5:14** Kjo është siguria që kemi përpara tij: nëse kërkojmë diçka sipas vullnetit të tij, na dëgjon.
- Jak. 1:5** Por në qoftë se ndonjërit nga ju i mungon urtësia, le të kërkojë nga Perëndia, që u jep të gjithëve pa kursim, pa qortuar, edhe atij do t'i jepet.
- d **2 Kro. 20:12** «O Perëndia ynë, a nuk do t'i dënosh ata? Sepse ne jemi pa forcë përpara kësaj shumice të madhe që vjen kundër nesh; nuk dimë çfarë të bëjmë, por sytë tanë janë drejtuar te ti».
- e **Psa. 2:11** Shërbejini me frikë ZOTIT dhe gëzohuni me dridhma.
- Psa. 34:18** ZOTI qëndron afër atyre që e kanë zemrën të thyer dhe shpëton ata që e kanë frymën të dërrmuar.
- Isa. 66:2** Tërë këto gjëra i ka bërë dora ime dhe të gjitha kanë ardhur në ekzistencë», thotë ZOTI. «Mbi kë, pra, do ta kthej shikimin tim? Mbi atë që është i përlulur, ka frymë të penduar dhe dridhet nga fjala ime.»
- f **Rom. 10:14** Si do ta thërrasin, pra, atë, të cilit nuk i besuan? Dhe si do të besojnë tek ai për të cilin nuk kanë dëgjuar? Dhe si do të dëgjojnë, pa predikues?
- Jak. 1:6** Por le të kërkojë në besim, pa dyshuar, sepse ai që dyshon i ngjan valës së detit, të cilën e ngre dhe e përplas era.
- g **Gjo. 14:13** Dhe çfarëdo të kërkonti në emrin tim, do ta bëj, që Ati të përlëvdohet në Birin.

Gjo. 16:23 Dhe atë ditë ju nuk do të më pyesni më asgjë. Në të vërtetë, në të vërtetë po ju them se çdo gjë që t'i kërkonit Atit në emrin tim, ai do t'ju japë.

Dan. 9:18 O Perëndia im, vër vesh dhe dëgjo; hap sytë e tu dhe shiko shkretimet tona dhe qytetin ku thirret emri yt, sepse ne nuk paraqesim para teje lutjet tona për veprat tona të drejta, por për dhembshuritë e tua të mëdha.

h **Mt. 7:8** Sepse kushdo që lyp, merr; dhe ai që kërkon, gjen; dhe atij që troket, do t'i hapet.

Psa. 27:8 Zemra ime më thotë nga ana jote: «Kërkoni fytyrën time». Unë kërkoj fytyrën tënde, o ZOT.

Pyetja 118

Çfarë na ka urdhëruar Perëndia t'i kërkojmë Atij?

Përgjigjja:

Të gjitha gjërat e nevojshme për trupin dhe shpirtin^a, të cilat Krishti, Zoti ynë, i ka përmbledhur në lutjen që na ka mësuar vetë Ai.

a **Jak. 1:17** Çdo dhurëti e mirë dhe çdo dhuratë e përsosur është nga lart dhe zbret nga Ati i dritave, pranë të cilit nuk ka ndërrim dhe as hije ndryshimi.

Mt. 6:33 Por para së gjithash kërkon mbretërinë e Perëndisë dhe drejtësinë e tij dhe të gjitha këto do t'ju shtohen.

Pyetja 119

Cilat janë fjalët e asaj lutjeje?

Përgjigjja:

Ati ynë që je në qiej, u shenjtëroftë Emri yt. Ardhtë Mbretëria jote. U bëftë vullneti yt në tokë si në qiell. Bukën tonë të përditshme na e jep sot. Dhe na i fal fajet tona, siç ua falim edhe ne fajtorëve tanë. Dhe mos lejo të biem në tundim, por na shpëto nga i ligu, sepse jotja është Mbretëria dhe fuqia, dhe lavdia, përjetë. Amen.^a

a **Mt. 6:9–13 dhe Lu. 11:2–4.**

DITA E ZOTIT, 46

Pyetja 120

Pse Krishti na ka urdhëruar t'i drejtohem Perëndisë kështu: “Ati ynë”?

Përgjigjja:

Që të ngjallë te ne, menjëherë, që në fillim të lutjes sonë, një respekt si prej një fëmije për Perëndinë dhe besim tek Ai, gjëra të cilat janë themeli i lutjes sonë, që do të thotë se Perëndia është bërë Ati ynë në Krishtin dhe, nëse prindërit tanë nuk na refuzojnë gjëra tokësore, aq më pak do të na i privojë Ai ato që i kërkojmë Atij me besim të vërtetë.^a

a **Mt. 7:9–11** Ose cili është ai njeri ndër ju që, po t'i lypë i biri bukë, do t'i japë një gur? ¹⁰Dhe po t'i lypë një peshk, t'i japë një gjarpër? ¹¹Nëse pra, ju, që jeni të ligj, dini t'u jepni dhurata të mira bijve tuaj, aq më tepër

Ati juaj, që është në qiej, do t'u japë gjëra të mira atyre që ia lypin atij.

Lu. 11:11–13 Dhe cili nga ju është baba i tillë që, po t'i lypë bukë djali, t'i japë një gur? Ose po t'i lypë një peshk, në vend të peshkut t'i japë një gjarpër? ¹²Ose, po t'i lypë një vezë, i jep një akrep? ¹³Nëse ju, pra, që jeni të ligj, dini t'u jepni dhurata të mira bijve tuaj, aq më tepër Ati në qiell do t'u japë Frymën e Shenjtë atyre që ia lypin».

Pyetja 121

Pse shtohet këtui: "...që je në qiej"?

Përgjigjja:

Që të mos formojmë konceptime tokësore të madhështisë qiellore të Perëndisë^a dhe që të presim prej fuqisë së Tij të plotfuqishme të gjitha gjërat që i nevojiten trupit dhe shpirtit^b.

a **Jer. 23:23–24** A jam unë vetëm një Perëndi nga afër», thotë ZOTI, «apo dhe një Perëndi nga larg? ²⁴A mund të fshihet dikush në vende të fshehta që unë të mos e shoh?», thotë ZOTI. «A nuk e mbush unë qiellin dhe tokën?», thotë ZOTI.

Vep. 17:24–27 Perëndia, që bëri botën dhe të gjitha sa janë në të, duke qenë Zot i qiellit dhe i tokës, nuk banon në tempuj të bërë nga duart e njeriut, ²⁵dhe as shërbehet nga duart e njerëzve, sikur të kishte nevojë për ndonjë gjë, sepse ai u jep të gjithëve jetë, frymëmarrje dhe gjithçka; ²⁶dhe ai ka bërë nga një gjak i vetëm çdo komb njerëzish, që të banojnë në mbarë faqen e dheut, dhe paracaktoi kohërat me radhë dhe kufijtë e banimit të tyre, ²⁷që të kërkojnë Zotin, mbase mund ta prekin edhe ta gjejnë, ndonëse ai nuk është larg nga secili prej nesh.

b **Rom. 10:12** Sepse nuk ka dallim në mes judeut dhe grekut, sepse i njëjti Zot është i të gjithëve, i pasur për të gjithë ata që e thërrasin.

DITA E ZOTIT, 47

Pyetja 122

Cila është kërkesa e parë?

Përgjigjja:

“U shenjtëroftë emri yt”; d.m.th. na ndihmo që të të njohim Ty drejt^a dhe të të shenjtërojmë, të të lavdërojmë dhe të të lëvdojmë Ty në të gjitha veprat e Tua, në të cilat shfaqen qartë fuqia, urtësia, mirësia, drejtësia, mëshira dhe vërtetësia Jote^b; edhe më tej, që ne të rregullojnë dhe të drejtojnë gjithë jetën, mendimet, fjalët dhe veprimet tona në atë mënyrë, që Emri Yt të mos blasfemohet kurrë, por të nderohet dhe të lavdërohet për shkakun tonë^c.

a **Gjo. 17:3** Dhe kjo është jeta e përjetshme, të të njohin ty, të vetmin Perëndi të vërtetë, dhe Jezu Krishtin që ti ke dërguar.

Jer. 9:24 Por kush lavdërohet, të lavdërohet me këtë: të ketë gjykim dhe të më njohë mua që jam ZOTI, që ushtroj mirësinë, gjykimin dhe drejtësinë mbi tokë; sepse kënaqem me këto gjëra», thotë ZOTI.

Jer. 31:33–34 «Por kjo është besëlidhja që do të vendos me shtëpinë e Izraelit mbas atyre ditëve», thotë ZOTI: «Do ta shtie ligjin tim në mendjen e tyre dhe do ta shkruaj mbi zemrën e tyre, dhe unë do të jem ZOTI i tyre dhe ata do të jenë populli im. ³⁴Ata nuk do të mësojnë secili të afërmin e vet dhe secili vëllanë e vet, duke thënë: “Njihni ZOTIN!”, sepse të gjithë do të më njohin, nga më i vogli e deri te më i madhi», thotë ZOTI. «Sepse unë do ta fal paudhësinë e tyre dhe nuk do ta kujtoj më mëkatën e tyre».

Mt. 16:17 Dhe Jezusi, duke iu përgjigjur, i tha: «I lum je ti, o Simon, bir i Jonas, sepse këtë nuk ta zbuloi as mishi, as gjaku, por Ati im që është në qiej.

Jak. 1:5 Por në qoftë se ndonjërit nga ju i mungon urtësia, le të kërkojë nga Perëndia, që u jep të gjithëve pa

kursim, pa qortuar, edhe atij do t'i jepet.

Psa. 119:105 Fjala jote është një llambë në këmbën time dhe një dritë në shtegun tim.

- b **Psa. 119:37** Largoji sytë e mi nga gjërat e kota dhe gjallëromë në rrugët e tua.

Lu. 1:46–47 Dhe Maria tha: «Shpirti im e madhëron Zotin, ⁴⁷dhe fryma im ngazëllen në Perëndinë, Shpëtimtarin tim.»

Lu. 1:68–69 «Bekuar qoftë Zoti, Perëndia i Izraelit, sepse e ka vizituar dhe i bëri shpengim popullit të vet; ⁶⁹dhe na ngriti bri shpëtimi në shtëpinë e Davidit, shërbëtorit të vet.»

Rom. 11:33 O thellësi pasurie edhe e urtësisë dhe e diturisë së Perëndisë! Sa të pahulumtueshme janë gjykimet e tij dhe të pagjurmueshme janë udhët e tij!

- c **Psa. 71:8** Goja ime është plot me lëvdimet e tua dhe shpall lavdinë tënde tërë ditën.

Psa. 115:1 Jo neve, o ZOT, jo neve, por emrit tënd jepi lavdi, për mirësinë tënde dhe për besnikërinë tënde.

DITA E ZOTIT, 48

Pyetja 123

Cila është kërkesa e dytë?

Përgjigjja:

“Ardhtë Mbretëria jote”; d.m.th. drejtona me Fjalën dhe Frymën Tënde, që të të nënshtrohemi Ty gjithnjë e më shumë^a; ruaje dhe rrite kishën Tënde^b, shkatërroji veprat e djallit dhe çdo pushtet që ngrihet kundër Fjalës Sate të shenjtë^c; derisa të përsoset plotësisht Mbretëria Jote^d, ku Ti do të jesh gjithçka në të gjithë^e.

- a **Psa. 143:10** Më mëso të plotësoj vullnetin tënd, sepse ti je Perëndia im; Fryma yt i mirë le të më udhëheqë në tokë të sheshtë.

Psa. 119:5 Oh, rrugët e mia qofshin të qëndrueshme në respektimin e statuteve të tua.

Mt. 6:33 Por para së gjithash kërkon mbretërinë e Perëndisë dhe drejtësinë e tij dhe të gjitha këto do t'ju shtohen.

- b **Psa. 51:18** Bëji të mirën Sionit për dashamirësinë tënde, ndërto muret e Jerusalemit.

Psa. 122:6–7 Lutuni për paqen e Jerusalemit, le të begatohen ata që të duan. ⁷Pastë paqe brenda mureve të tua dhe begati në pallatet e tua.

- c **1 Gjo. 3:8** Kush bën mëkat është nga djalli, sepse djalli mëkaton nga fillimi; për këtë është shfaqur Biri i Perëndisë: për të shkatërruar veprat e djallit.

Rom. 16:20 Por Perëndia i paqes do ta dërrmojë së shpejti Satanin nën këmbët tuaja. Hiri i Zotit tonë Jezu Krisht qoftë me ju.

- d **Zbu. 22:20** Ai që dëshmon për këto gjëra, thotë: «Po, unë vij shpejt. Amen». Po, eja, Zoti Jezus.

Rom. 8:22–23 Sepse e dimë se deri tani mbarë krijesa psherëtin bashkë dhe ndodhet bashkë në dhimbjet e lindjes. ²³Dhe jo vetëm kaq, por edhe ne vetë që kemi frytin e parë të Frymës, psherëtimë në veten tonë, duke pritur me durim birërimin, shpengimin e trupit tonë.

- e **1 Kor. 15:58** Prandaj, o vëllezërit e mi të dashur, qëndroni të fortë e të patundur, duke tepruar përherë në veprën e Zotit, duke e ditur se mundi juaj nuk është i kotë në Zotin.

DITA E ZOTIT, 49

Pyetja 124

Cila është kërkesa e tretë?

Përgjigja:

“U bëftë vullneti yt në tokë, si në qiell”; d.m.th. bëj që ne dhe të gjithë njerëzit të heqim dorë nga vullneti ynë^a, dhe pa u ankuar t’i bindemi vullnetit Tënd, i cili është vetëm i mirë^b; që kështu, secili të kujdeset dhe t’i kryejë detyrat e ofiqit dhe të thirrjes së tij^c, me po aq gatishmëri dhe besnikëri, sa e bëjnë edhe engjëjt në qiell^d.

- a **Mt. 16:24** Atëherë Jezusi u tha dishepujve të vet: «Në qoftë se dikush do të vijë pas meje, të mohojë vetveten, dhe të marrë kryqin e vet, dhe të më ndjekë.»
Tit. 2:11–12 Sepse hiri shpëtues i Perëndisë iu shfaq gjithë njerëzve, ¹²dhe na mëson të mohojmë pabesinë dhe ëndjet e botës, që të rrojmë me maturi, me drejtësi dhe me perëndishmëri në këtë jetë.
- b **Lu. 22:42** Duke thënë: «O Atë, po të duash, largoje këtë kupë nga unë! Megjithatë mos u bëftë vullneti im, por yt».
Ef. 5:10 Duke provuar çfarë është e pëlqyeshme për Zotin.
Rom. 12:2 Dhe mos u konformoni me këtë botë, por transformohuni me anë të ripërtëritjes së mendjes suaj, që të provoni cili është i miri, i pëlqyeri dhe i përsosuri vullneti i Perëndisë.
- c **1 Kor. 7:24** Vëllezër, secili le të mbetet përpara Perëndisë në gjendjen në të cilën është thirrur.
- d **Psa. 103:20–21** Bekoni ZOTIN ju, engjëjt të tij të pushtetshëm dhe të fortë, që bëni atë që thotë ai, duke iu bindur zërit të fjalës së tij. ²¹Bekoni ZOTIN ju, tërë ushtritë e tij, ju, tërë ministrat e tij, që zbatoni vullnetin e tij.

DITA E ZOTIT, 50

Pyetja 125

Cila është kërkesa e katërt?

Përgjigja:

“...bukën tonë të përditshme na e jep sot”, d.m.th. të pëlqeftë të na sigurosh të gjitha gjërat e nevojshme për trupin^a, që kështu të pranojmë se Ti je i vetmi burim i gjithçkaje të mirë^b dhe që as kujdesi, as puna jonë, dhe as dhuratat e Tua nuk mund të na sjellin dobi pa bekimin Tënd^c, e si pasojë ta heqim besimin tonë nga të gjitha krijesat dhe ta vendosim vetëm te Ti^d.

- a **Psa. 145:15** Sytë e të gjithëve shikojnë drejt teje duke pritur dhe ti u jep atyre ushqimin në kohën e duhur.
Psa. 104:27 Të gjithë presin që ti t’u japësh ushqimin në kohën e duhur.
Mt. 6:26 Vini re zogjitë e qiellit: nuk mbjellin, nuk korrin dhe nuk mbledhin në hambare; dhe Ati juaj qiellor i ushqen. A nuk vleni ju shumë më tepër sesa ata?
- b **Jak. 1:17** Çdo dhurëti e mirë dhe çdo dhuratë e përsosur është nga lart dhe zbret nga Ati i dritave, pranë të cilit nuk ka ndërrim dhe as hije ndryshimi.
Vep. 14:17 «Por nuk e la veten e vet pa dëshmi, duke bërë mirë, duke na dhënë shira prej qiellit dhe stinë të frytshme dhe duke i mbushur zemrat tona me ushqim dhe gëzim».
Vep. 17:27 Që të kërkojnë Zotin, mbase mund ta prekin edhe ta gjejnë, ndonëse ai nuk është larg nga secili prej nesh.
- c **1 Kor. 15:58** Prandaj, o vëllezërit e mi të dashur, qëndroni të fortë e të patundur, duke tepruar përherë në veprën e Zotit, duke e ditur se mundi juaj nuk është i kotë në Zotin.
LiP. 8:3 Kështu, pra, ai të bëri të ulësh kokën, të provosh urinë, pastaj të ka ushqyer me mana që ti nuk e njihje dhe as etërit e tu së kishin njohur kurrë, me qëllim që ti të kuptosh se njeriu nuk rron vetëm me bukë, por rron me çdo fjalë që del nga goja e ZOTIT.
Psa. 37:16 Vlen më tepër e pakta e të drejtit sesa bollëku i shumë të pabesëve.
Psa. 127:1 Në qoftë se ZOTI nuk e ndërton shtëpinë, më kot lodhen ndërtuesit; në qoftë se ZOTI nuk e ruan qytetin, më kot e ruajnë rojat.
Psa. 127:2 Është e kotë që ju të çoheni herët dhe të shkoni vonë për të pushuar dhe për të ngrënë bukën e

nxjerrë me punë të rëndë, sepse ai u jep pushim atyre që do.

- d **Psa. 55:22** Hidh mbi ZOTIN barrën tënde dhe ai do të të mbajë; ai nuk do të lejojë kurrë që i drejti të lëkundet. **Psa. 62:10** Mos kini besim te zhvatja dhe mos ushqeni shpresa të kota te grabitja; mos shkoni pas kotësisë; në rast se pasuritë janë të bollshme, mos u kushtoni zemrën.

Psa. 146:3 Mos kini besim te princat dhe as te ndonjë bir njeriu, që nuk mund të shpëtojë.

Jer. 17:5–7 Kështu thotë ZOTI: «Mallkuar qoftë njeriu që ka besim te njeriu dhe e bën mishin krahun e tij dhe zemra e të cilit largohet nga ZOTI! ⁶Ai do të jetë si një brukë në shkretëtirë; kur vjen e mira, nuk ka për ta parë. Do të banojë në vende të thata në shkretëtirë, në një tokë të kripur pa banorë. ⁷Lum ai njeri që beson te ZOTI dhe besimi i të cilit është ZOTI!

DITA E ZOTIT, 51

Pyetja 126

Cila është kërkesa e pestë?

Përgjigjja:

“...dhe na i fal fajet tona, ashtu siç ua falim fajtorëve tanë”, d.m.th. të pëlqeftë, për hir të gjakut të Krishtit, të mos na i llogaritësh neve mëkatarëve të gjerë shkeljet tona, as atë ligësi që na ngjitet gjithmonë^a; ashtu siç edhe ne gjejmë në veten tonë këtë dëshmi të hirit Tënd, që është vendimi ynë i sigurt nga zemra, ta falim të afërmin tonë^b.

- a **Psa. 51:1** Ki mëshirë për mua, o Perëndi, sipas mirësisë sate; për dhembshurinë e madhe që ke, fshiji të ligat që kam bërë.

Psa. 143:2 Dhe mos hyr në gjyq me shërbëtorin tënd, sepse asnjë i gjallë nuk do të jetë i drejtë para teje.

1 Gjo. 2:1 Djema të mi, ju shkruaj këto që të mos mëkatoni; dhe në qoftë se ndokush ka mëkatuar, kemi një avokat tek Ati, Jezu Krishtin, të drejtin.

Rom. 8:1 Tani, pra, nuk ka asnjë dënim për ata që janë në Krishtin Jezus, që nuk ecin sipas mishit, por sipas Frymës.

- b **Mt. 6:14** Sepse në qoftë se ju ua falni njerëzve gabimet e tyre, Ati juaj qiellor do t’ju falë edhe juve.

DITA E ZOTIT, 52

Pyetja 127

Cila është kërkesa e gjashtë?

Përgjigjja:

“Dhe mos lejo të biem në tundim, por na çliro nga i ligu”; d.m.th. meqenëse ne jemi aq të dobët në vetvete, saqë s’mund të qëndrojmë asnjë moment^a; dhe përveç kësaj, meqenëse armiqtë tanë vdekjeprurës, djalli^b, bota^c dhe mishi ynë^d, nuk pushojnë së sulmuari, na ruaj dhe na forco nëpërmjet fuqisë së Frymës Tënde të Shenjtë, që të mos mundemi në këtë luftë frymërore^e, por t’u rezistojmë armiqve tanë vazhdimisht dhe me zell, deri sa në fund të korrim një fitore të plotë^f.

- a **Gjo. 15:5** Unë jam hardhia, ju jeni shermendet; kush qëndron në mua dhe unë në të, ai jep shumë fryt, sepse pa mua nuk mund të bëni asgjë.

Psa. 103:14 Sepse ai e njeh natyrën tonë dhe nuk harron që ne jemi pluhur.

- b **1 Pj. 5:8** Jini të kthjellët, vigjiloni; sepse kundërshtari juaj, djalli, sillet rreth e qark si një luan vrumbullues, duke kërkuar cilin mund të përpijë.

Ef. 6:12 Sepse beteja jonë nuk është kundër gjakut dhe mishit, por kundër principatave, kundër pushteteve, kundër sunduesve të përbotshëm të errësirës së kësaj jete, kundër frymërave të liga në vendet qiellore.

- c **Gjo. 15:19** Po të ishit nga bota, bota do të donte të vetët; por sepse nuk jeni nga bota, por unë ju zgjodha nga bota, prandaj bota ju urren.

- d **Rom. 7:23** Por shoh një ligj tjetër në gjymtyrët e mia, që lufton kundër ligjit të mendjes sime dhe që më bën rob të ligjit të mëkatit që është në gjymtyrët e mia.

Gal. 5:17 Sepse mishi ka dëshira kundër Frymës, dhe Fryma ka dëshira kundër mishit; dhe këto i kundërvihen njëra-tjetrës, që të mos bëni ato që doni.

- e **Mt. 26:41** «Rrini zgjuar dhe lutuni, që të mos bini në tundim; sepse fryma është gati, por mishi është i dobët».

Mr. 13:33 Tregoni kujdes, rrini zgjuar dhe lutuni, sepse nuk e dini kur do të jetë koha.

- f **1 The. 3:13** Për të forcuar zemrat tuaja, pa të meta në shenjtëri përpara Perëndisë tonë dhe Atë, në ardhjen e Zotit tonë Jezu Krisht bashkë me gjithë shenjtoret e tij.

1 The. 5:23 Por ai vetë, Perëndia i paqes, ju shenjtëroftë tërësisht; dhe gjithë fryma juaj, shpirt e trup, të ruhet pa të metë për ardhjen e Zotit tonë, Jezu Krisht.

Pyetja 128

Si e mbaron ti lutjen tënde?

Përgjigjja:

“...sepse jotja është Mbretëria dhe fuqia, dhe lavdia përjetë”; d.m.th. të gjitha këto t’i kërkojmë Ty, sepse Ti, duke qenë Mbreti ynë dhe i Plotfuqishmi, je i gatshëm dhe i aftë të na japësh çdo gjë të mirë^a; dhe për të gjitha këto lutemi, që kështu, jo ne, por Emri Yt i shenjtë të lëvdohet përgjithmonë^b.

- a **Rom. 10:12** Sepse nuk ka dallim në mes judeut dhe grekut, sepse i njëjti Zot është i të gjithëve, i pasur për të gjithë ata që e thërrasin.

2 Pj. 2:9 Zoti di t’i shpëtojë nga tundimi të perëndishmit dhe t’i ruajë të padrejtët që të ndëshkohen ditën e gjyqit.

- b **Gjo. 14:13** Dhe çfarëdo të kërkon në emrin tim, do ta bëj, që Ati të përlëvdohet në Birin.

Jer. 33:8–9 «Do t’i pastroj nga çdo paudhësi e tyre me të cilat kanë mëkatuar kundër meje dhe do t’ua fal të gjitha paudhësitë e tyre me të cilat kanë mëkatuar dhe me të cilat kanë ngritur krye kundër meje. ⁹Dhe ky qytet do të ketë për mua një titull gëzimi, lëvdimi dhe lavdie përpara gjithë kombeve të dheut, kur ato të mësojnë gjithë të mirën që unë u bëj atyre; dhe do të kenë frikë e do të dridhen për shkak të gjithë mirësisë dhe të gjithë paqes që unë do t’i sjell atij».

Psa. 115:1 Jo neve, o ZOT, jo neve, por emrit tënd jepi lavdi, për mirësinë tënde dhe për besnikërinë tënde.

Pyetja 129

Ç’tregon fjala “Amen”?

Përgjigjja:

“Amen” tregon se kjo do të ndodhë vërtet dhe me siguri; sepse fakti që Perëndia e dëgjon lutjen time është më i sigurt sesa dëshira që ndiej në zemër për këto gjëra^a.

- a **2 Kor. 1:20** Sepse të gjitha premtimet e Perëndisë janë në të “po” dhe në të “amen”, për lavdi të Perëndisë nëpërmjet nesh.

2 Tim. 2:12 Nëse jemi të pabesë, ai mbetet besnik; ai nuk mund të mohojë vetveten.